

---

This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<https://books.google.com>





## A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

## Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

## À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>







<36602294790010



<36602294790010

Bayer. Staatsbibliothek

P.O. gall.

1578 d - R

Nouvelles

B. l. franc. p. 463.



**RECUEIL**  
**D E**  
**CONTES.**

1750

LES CENT  
*NOUVELLES*  
NOUVELLES.


TOME PREMIER.



A LONDRES.

---

M. DCC. XLIV.







# LES CENT NOUVELLES NOUVELLES.

---

I. NOUVELLE.

## LA MEDAILLE A REVERS.



La Ville de Valenciennes eut n'aguères un notable Bourgeois en son tems Receueur de Haynault , lequel entre les autres fut renommé de large & discrète prudence , & entre ses louables vertus celle de libéralité ne fut pas la moindre ; car par icelle vint en la

*Tome I.*

A

## 2      *LA MEDAILLE*

grace des Princes , Seigneurs & autres gens de tous états , en cette heureuse félicité se mintenit & soubtint jusqu'en la fin de ses jours devant & aprez ce que mort l'eut detacheé de la chaisne qui en mariage l'acouplait. Le bon bourgeois cause de cette histoire ne estoit pas si mal logé en ladite ville , qu'un bien grand maistre ne se tint pour content & honoré d'avoir vng tel logis , & entre les desirées & louées édifices , sa maison decouvroit sur plusieurs ruës , & la auoit vne petite poterne vis à vis prez de la , en laquelle demouroit un moult bon Compagnon qui tres belle femme & gente auoit & encore en meilleur point ; & comme il est de coutume les yeux de elles archieres de cuer decocherent tant de fleches en la personne dudit bourgeois , que sans prochain remede , son cas n'estoit pas moindre que mortel ; pour laquelle chose seurement obuier trouua par plusieurs & subtiles façons que le Compagnon mari de ladite gouge fut son amy tres privé & familier , tant que peu de diners , soupers , de banquets , de bains , d'etuues & autres passetems en son hotel & ailleurs ne se fissent jamais sans sa compagnie , & à cette occasion se tenoit le compagnon bien fier & encore autant heureux , quand notre bourgeois plus subtil qu'un Renard eut gagnée la grace du compagnon , bien peu se soucia de parvenir à l'amour de sa femme , & en peu de jours tant & si bien laboura que la vaillante femme fut constante d'oïr & entendre son cas pour y bailler

remède convenable, ne restoit plus que tems & lieu, & fut à ce menée qu'elle lui promit tantost que son mari iroit quelque part dehors pour sejourner vne nuit, elle continent le auertiroit. Achief de pieces, ce desiré jour fut assigné, & dit le compaignon à sa femme qu'il s'en alloit à vn Château lointain de Valenciennes enuiron trois lieues, & la chargea bien de soi tenir en sa maison pource que ses affaires ne pouuoient souffrir que cette nuit il retourna; s'elle en fut bien joyeuse sans en faire semblance ne maniere en paroles ne autrement, il ne le faut ja demander; car il n'auoit pas encore cheminé vne lieue quand le bourgeois sceut cette auanture depieca desirée: il fit tantost tirer les bains, chauffer les etuues, faire pasteés, tartres, hypocras & le surplus des biens de Dieu si largement que l'appareil sembloit un droit de Roy. Quand vint sur le soir, la poterne fut desferée, & celle qui pour la nuit y deuoit le guet, saillit dedans, & Dieu sçait qu'elle fut doucement recüe, je m'en passe en brief, j'espere plus qu'ils firent plusieurs deuises d'aucunes choses qu'ils n'auoyent pas en cette heureuse journée à leur premiere vouldance aprez ce que en la chambre furent descendus, tantost se bouterent au bain devant lequel beau souper fut en haste couuert & servit. Et Dieu sçait qu'on y but d'autant largement & souvent, des vins & viandes, parler n'en seroit que redire, & pour faire le conte brief faute ny auoit que du trop; en ce tres gracieux état se passa

## 4 LA MEDAILLE

la plupart de cette douce & courte nuit, baisers donnés, baisers rendus, tant & si longuement que chacun ne desiroit que le lit. Tandisque cette grande chere se faisoit, voicy bon mary ja retourneé de son voyage non quérant cette sa bonne avanture, qui heurte bien fort a l'huis de sa chambre, & pour la compaignie qui y estoit a l'entrée de plain faut lui fut refusée jusqu'a ce qu'il nomma son parain; adonques se nomme haut & clair, & tres bien l'entendirent & reconnurent sa bonne femme & le bourgeois. La gouge fut tant fort effrayée a la voix de son mary que a peu que son loyal cueur ne fallioit & ne scauoit sa contenance tenir se le bon bourgeois & ses gens ne l'eussent reconfortée; mais ledit bourgeois tant assuré, & de son fait tres aviseé se fit bien en haste coucher, au plus prez d'elle se bouta, & luy chargea qu'elle se joignit prez de luy & cacha le visage qu'on ne peut rien appercevoir. Et cela fait au plus brief qu'on peut sans foy trop hastier il commanda ouvrir la porte. Et le bon compaignon saute dedans la chambre pensant en soy qu'aucun mystere y auoit, quand deuant l'huis l'auoit retenu si longs tems, & quand il vit la table tant chargée de vins & de grandes viandes, ensemble ce beau bain tres bien paré, & le bourgeois au tres beau lit encourtineé avec la seconde personne. Dieu scait s'il parla haut & blasonna les armes de son bon voisin, lors l'appella ribaut, lourdier, aprez putier, aprez yvrogne, & tant bien le baptisa que tous ceux qui étoient

en la chambre & lui avec s'en rioient bien fort ; mais sa femme a cette heure n'auoit ce loisir , tant estoient ses léures empechées de soy joindre prez de son mari nouuel , ha ! dit-il , maître houlrier , vous m'avez bien celeé cette bonne chiére , mais par ma foyse je n'ay éteé a la grande feste , sy faut-il bien que l'on me montre l'épousée , & a ce tout tenant la chandelle en sa main se tira prez du lit & ja se vouloit auancer de haucer la couuerture sous laquelle faisoit moult grande penitence & silence sa tres parfaite & bonne femme , quand le bourgeois & ses gens l'engarderent dont le compaignon ne s'en contentoit pas trop , & a force , maugré chacun , toujours auoit la main au lit , mais il ne fut pas maître pour lors ne creu de faire son vouloir & pour cause , sur quoy ung appointment tres gracieux & bien nouuau fut fait dequoy assez se contenta qui fut tel : le bourgeois se contenta qu'on lui montra a decouuert le derriere de sa femme , les rains & les cuisses qui blanches & grosses estoient , & le surplus bel & honnete sans en rien decourir ne voir le visage. Le bon compaignon toujours la chandelle en main fut longuement sans dire mot ; & quand il parla ce fut en louant beaucoup la tres grande beauté de cette femme , & afferma par vn bien grand serment que jamais ne auoit veu chose si bien ressemblant au cul de sa femme , & s'il ne fut bien seur qu'elle fut en son hostel a cette heure , il diroit que ce seroit elle ; mais elle fut tantost recouuerte & adoncques se tira ar-

riere assez pensif. Et Dieu scait si on luy disoit bien puis l'vng, puis l'autre que c'étoit de luy mal cognu, a sa femme pou d'honneur porté, & que c'étoit bien autre chose, que cy aprez assez il pourroit voir; pour refaire les yeux abusez de ce pource martyr, le bourgeois commanda qu'on le fit seoir a la table où il reprit nouvelle imagination par boire & manger largement du souper de ceux, qui entretems au lit se devoient a son grand prejudice, puis voulut departir & donner la bonne nuit au bourgeois & sa compaignie, & pria moult doucement qu'on le bouta hors de leans par la poterne pour plustost trouver sa maison, mais le bourgeois luy repondit qu'il ne fauroit a cette heure trouver la clef, pensoit aussi que la serure fut tant enrouillie qu'on ne la pourroit ouvrir, pource que nulle fois ou peu souvent s'ouvroit. Et fut au fort contraint de faillir par la porte de deuant & d'aller le grand tour a sa maison, tandis que les gens au bourgeois le conduisoient vers la porte tenant le bec en l'eauë par deuises, & la bonne femme fut incontinent mise sur pied, & en peu d'heures habillée & lacée sa cotte simple son corsset en son bras & venne a la poterne puis, ne fit qu'un saut en sa maison où elle attendoit son mary qui le long tour venoit, tres auisée de son fait, & des manieres qu'elle avoit a tenir. Veci notre homme voyant encore la lumiere & la clarté en sa maison, hurte assez rudement, & sa bonne femme qui menageoit par leans, en sa main tenant

ung ramon demande , ce qu'elle bien scait , qui est  
 cela ? & il repondit c'est votre mary. Mon mary ,  
 dit-elle , mon mary n'est-ce pas ? il n'est pas en la  
 ville ? Et il hurte derechief , & dit ouurez ouurez ,  
 je suis votre mari. Je connois bien mon mary , dit-  
 elle ; ce n'est pas sa coutume de soi enclore si tard ,  
 quand il seroit en la ville : allez ailleurs , vous n'e-  
 tes pas bien ariué , ce n'est point ceans qu'on doit  
 heurter a cette heure ; & il heurte pour la tierce fois ,  
 & l'apella par son nom une fois deux fois. Adonc  
 fit elle aucunement semblant de le connoître en de-  
 mandant dont il venoit a cette heure , & pour re-  
 ponce ne bailloit autre chose que , ouurez ouurez.  
 Ouurez , dit-elle , encore n'y estes vous pas mechant  
 houllier ? par la force sainte Marie je aimerois mieulx  
 vous voir noier que ceans vous bouter. Allez cou-  
 cher en mal repos dont vous venez ; & lors le bon  
 mary de soi couroucer & fiert tant qu'il peut de son  
 pié contre la porte & semble qu'il doïue tout aba-  
 tre , & menasse la bonne femme de la tant battre  
 que c'est raige , dont elle n'a guere grand paour ;  
 mais au fort pour appaiser la noise & a son aise  
 mieulx dire sa pensée , elle ouurit l'huis , & a l'en-  
 trée que il fit Dieu scait qu'il fut servi d'une chiere  
 bien rechignée , & d'un agu & enflambee visage , &  
 quand la langue d'elle eut pouuoir sur le cueur char-  
 gé tres fort d'yre & de couroux par semblant , les pa-  
 roles qu'elle decocha ne furent pas moins tranchan-  
 tes que rasoirs deguaignant bien afilez , & entre au-

tres choses fort luy reprochoit qu'il auoit par malice  
 conclud cette feinte allée pour l'éprouuer, & que  
 c'estoit fait d'un lache & recru courage indigne d'estre  
 alié a si prude femme comme elle. Le bon compaignon  
 jassoit ce qu'il fut moult couroucé & malmeu par auant,  
 toutefois pource qu'il veoit son tort a l'œil & le rebours  
 de sa pensée, refraint son yre, & le couroux qu'en son  
 cueur auoit conceu quand a sa porte tant heurtoit,  
 fut tout a coup en courtois parler converty. Car il  
 dit pour soi excuser & pour sa femme contanter  
 qu'il estoit retourné de son chemin pource qu'il auoit  
 oblié la lettre principale qui touchoit plus le fait de son  
 voiage; sans faire semblant de le croire elle recommence  
 sa legende dorée, luy mettant sus qu'il venoit de la  
 tauerne & de lieux deshonnètes & dissolus, & qu'il se  
 gouernoit mal en homme de bien, maudissant l'heure  
 que oncques elle eut son accointance & son amour & sa  
 tres maudite alliance. Le pource desollé connoissant son  
 cas, voyant sa bonne femme trop plus qu'il ne voulsist  
 troublée, hélas! & a sa cause ne scauoit que dire. Si se  
 prent a penser, & a chef de pensée ou meditation, se  
 tire prés d'elle ploiant ses genoux tout en bas sur la  
 terre, & dit les beaux mots qui s'ensuiuent: Ma tres  
 chiere compaigne & tres loyalle épouse, je vous prie &  
 requiert que otez votre cueur de tous ces couroux que  
 auez vers moi conceus, & me pardonnez au surplus ce  
 que vous puis auoir ineffait ne medit. Je connois mon cas, &



viens n'agueres d'une place où l'en faisoit bien bonne chiere, si vous ose bien dire que cognoître vous y cuiday, dont j'estois tres deplaisant. Et pource que a tort & sans cause je le confesse, vous ay suspeconnée d'estre autre que bonne, dont me repens amèrement. Je vous supplie & derechief que tous autres passez couroux & cestuy cy obliez, vostre grace me soit donnée, & me pardonnez ma follic. Le mautalent de nostre gouge, voyant son mary en bon ploy & a son droit, ne se monstra meshuy si aspre ne si venimeuse. Comme, dit elle, vilain putier, se vous venez de vostres deshonestes lieux & infames, est il dit pourtant que vous devez penser, ne en quelque façon croire que vostre bonne femme les daingnast regarder. Nenny par Dieu; hélas! ce scai je bien, ma mie: n'en parlons plus, pour Dieu, dit le bon homme. Et de plus belle vers elle se incline faisant sa requête ja pieca que trop dicté. Elle jacoit ce que encores marrie, & presque enraigée de cette suspicion, voyant la parfonde contrition du bon homme cessa de parler, & petit a petit son trouble cueur se remit a nature, & luy pardonna, combien que en grand regret après cent mille sermens & autant de promesses que celuy qui l'auoit tant grevée. Et par ce point a moins de crainte & de regret elle passa maintefois depuis la poterne, sans que l'embusche fut jamais decouuerte a celluy a qui plus touchoit. Et ce souffise quant a la premiere histoire.

## II. NOUVELLE.

LE CORDELIER  
MEDECIN.

**E**N la maistresse ville du Royaume d'Angleterre, nommée Londres, assez hantée & connue de plusieurs gens, n'a pas long tems demouroit vng riche & puissant homme qui marchand & bourgeois estoit, qui entre ses riches bagues & innombrables trefors s'ejouissoit & se tenoit plus enrichy d'une belle fille que Dieu lui auoit enuoyée, que du bien; grant surplus de sa chevance, car de bonté, beaulté, & genteté passoit toutes les filles d'elles plus aagées. Et ou tems que ce tres heureux bruit & vertueuse renommée d'elle s'ourdoyt en son quinziesme an ou environ estoit, Dieu scait se plusieurs gens de bien desiroient & pourchassoient sa grace par plusieurs & toutes façons en amour accoutumées, qui n'estoit pas vng plaisir petit au pere & a la mere. Et a cette occasion de plus en plus croissoit en eulx l'ardente & paternelle amour que a leur tres aymée fille portoient. Auint toutefois ou que Dieu le permit, ou que fortune le voulut & commanda, enuieuse & mal contante de la prosperité de cette belle

fille de ses parens , ou de tous deux ensemble , ou  
 espoir d'une secrette cause & raison naturelle dont je  
 laisse l'inquisition aux Philosophes & Medecins ,  
 qu'elle cheut en vne dangereuse & deplaisante ma-  
 ladie que communement on appelle broches. La dou-  
 ce maison fut tres largement troublée quant en la  
 garenne que plus chièrement tenoyent lesdits parens ,  
 avoit osé lachier les Leuriers & Limiers ce desplai-  
 sant mal , & qui plus est touchier sa proye en dan-  
 gereux & dommageable lieu. La pource fille de ce  
 grand mal toute affoillée ne scait sa contenance que  
 de plourer & soupirer. Sa tres dolente mere est si tres  
 fort troublée que d'elle il n'est rien plus desplai-  
 sant , & son tres ennuyé pere detort ses mains & des-  
 sire ses cheveux pour la raige de ce nouveau cou-  
 roux. Que vous dirai je toute la grant triomphe qu'en  
 cest hostel souloit tant comblement abonder est , par  
 ce cas flappie & ternie , & en amère & subite tri-  
 stesse a la mal heure conuertie. Or uienent les pa-  
 rens , amis , & voisins de ce dolent hostel visiter &  
 conforter la compaignie , mais pou ou rien prouffi-  
 toit , car de plus en plus elle est aggrée & oppres-  
 sée la bonne fille de ce mal. Adoncques vient vne  
 matrone qui moult & trop enquier de cette mala-  
 die , & fait virer & revirer puis cy , puis la , la tres  
 dolente & pource patiente a grant regret, Dieu le scait,  
 & puis lui baille medecine de cent mille façons der-  
 bes ; mais rien plus. Vient avant & plus empire &  
 est force que les Medecins de la ville & du pays en

niron soient mandez , & que la pource fille descouvre & monstre son tres piteux cas. Or sont venus maistre Pierre , maistre Jehan , maistre cy , maistre la , tant de Physiciens que vous voudrez , qui veulent bien voir la paciente ensemble , & les parties du corps a descouvert ou ce maudit mal des broches s'estoit helas longuement embusché. Cette pource fille fut plus surprise & esbahie que se a la mort fut adjugée , & ne se vouloit accorder qu'on la mist en façon que son mal fust apperceu , mesmes aymoit plus chiere mourir que vng tel secret fust a ung homme decouvert. Cette obstinée volonté ne dura pas gramment , quand pere & mere vindrent , qui plusieurs remonstrances lui firent , comme de dire qu'elle pouroit estre cause de sa mort qui n'est pas vng petit peché , & plusieurs autres y eut , trop longs a raconter. Finalement trop plus pour pere & mere que pour crainte de mort vaincuë , la pource fille se laissa ser-  
rer , & fut mise sur vne couche les dents dessoubz & son corps tant & si tres auant descouvert , que les Medecins virent apertement le grand meschief qui fort la tourmentoit. Ils ordonnèrent son regime faire aux Appoticaire clysteres , pouldres , oygnements & le surplus que bon sembla , & elle prit & fit tout ce qu'on voulut pour recouurer santé. Mais tout rien n'y vault ; car il n'est tour ne engin que lesdits Medecins saichent pour alleguer quelque peu de ce destresseux mal , ne en leurs liures n'ont veus ne acoustumé que riens , si tres fort la pource fille empi-

se, mais que l'ennuy qu'elle s'en donne ; car autant semble estre morte que viue. En cette aspre langueur & douleur forte se passerent beaucoup de jours. Et comme le pere & la niere, parens & voisins s'enqueroient par tout la legende de la fille, si rencontrerent vng tres ancien Cordelier qui borgne estoit, & en son temps auoit veu moult de choses, & de sa principale science se mesloit fort de medecine, dont sa presence fut plus agreable aux parens de la patiente, laquelle helas a tel regret que dessus regarda tout a son beau loisir, & se fit fort de la guarir. Pensez qu'il fut tres volentiers oüy, & tant que la dolente assemblée qui de liesse pieca banie estoit, fut a ce point quelque peu consolée, esperant le fait sortir tel que la parole touchoit. Adonc maistre Cordelier se partit de leans, & prit jour a demain de retourner fourny & pourueu de medecine si tres vertueuse qu'elle, en peu d'heure, effacera la grant douleur qui tant martire & debrise la pource patiente. La nuit fut beaucoup longue attendant le jour desire ; neantmoins passerent tant deuers a quelque peine que ce fut que nostre bon Cordelier fut acquitté de sa promesse pour soy rendre deuers la patiente a l'eure assignée. S'il fut joyeusement receu, pensez que oüy. Et quand vint l'eure qu'il voulut besongner, & la patiente medecine on la prit comme l'autre fois, & sur la couche tout au plus bel qu'on peut fut au bougons couchée, & son derriere descouuert assez auant, lequel fut incontinent des Matrones d'vng

tres beau blanc drap garni , tapissé & aorné , a l'endroit du secret mal fut fait vng beau pertuis par lequel maistre Cordelier pouuoit apertement le choisir , & il regarde ce mal puis d'vng costé , puis d'autre , maintenant luy touche du doigt tant doulcement , vne autre fois prend la pouldre dont medeciner la vouloit ; or regarde le tuyau dont il veut souffler ycelle pouldre par fus & dedans le mal , or retourne arriere & jette l'œil derechief , sur ce dit mal , & ne se scait saouler d'assez le regarder. A chief de piece il prend sa pouldre a la main gauche mise en vng beau petit vaisseau plat , & de l'autre son tuyau qu'il vouloit emplir de ladite pouldre , & comme il regardoit tres ententiement & de tres prés par ce pertuis & à l'environ le destresseux mal de la pource fille , elle ne se peut contenir voyant l'etrange façon de regarder a tout vng œil de nostre Cordelier , que force de rire ne la surprint qu'elle cuyda bien longuement retenir , mais si mal helas luy aduint , que ce ris a force retenu fut conuertiy en un sonnet dont le vent retourna si tres a point la pouldre , que la pluspart il fit voler contre le visage & seul bon œil de ce bon Cordelier , lequel sentant cette douleur, habandonna tantost & vaisseau & tuyau , & a peu qu'il ne cheut a la renuerse , tant fort fut effrayé , & quand il eut son sang il met tost en haste la main a son œil , soy plaignant durement , disant qu'il estoit homme defait , & en danger de perdre vng seul bon œil qu'il auoit. Il ne

mentit pas ; car en peu de jours la pouldre qui corrosiue estoit , luy gasta & mangea tretout l'œil , & par ce point l'autre qui ja estoit perdu aveugle fut , & ainsi demoura ledit Cordelier. Si se fit guider & mener vng certain jour aprez ce jusqu'a l'hostel ou il conquist ce beau butin & parla au maistre de leans , auquel il remonstra son piteux cas , priant & requerant ainsi que droit le porte que lui baille & assigne , ainsi qu'a son estat appartient , sa vie honorablement. Le Bourgeois respondit que de cette son aduenture beaucoup lui desplaisoit , combien que riens il n'en soit cause , ne en quelque facon que ce soit chargié ne s'en tient. Trop bien est il contant luy faire quelque gracieuse ayde d'argent , pource qu'il auoit entrepris de guarir sa fille , ce qu'il n'auoit pas fait , & que a luy ne voulut estre tenu en riens , luy veut bailler autant en somme que s'il luy eut sa fille en santé renduë , non pas comme-dit est qu'il soit tenu de ce faire. Maistre Cordelier non contant de cette offre demande qu'il lui assignast sa vie , remonstrant comment sa fille l'auoit auenglé en sa presence , & a cette occasion priué estoit de la digne & tres sainte conseruation du précieux Corps de Jesus , du saint seruice de l'Eglise , & de la glorieuse inquisition des Docteurs qui ont écrit sur la sainte Theologie , & pour ce point de prédication plus ne pouuoit seruir le peuple que estoit sa totale destruction ; car il est mendiant & non fondé , sinon sur aumosnes que plus conquerre ne pou-

uoit ; quelque-chose qu'il allegue ne remonstre , & ne peut finer d'autre responce que cette precedente. Si se tira par deuers la Justice du Parlement dudit Londres , deuant lequel lui fit bailler jour a nostre homme dessus dit. Et quant il vit heure de plaider sa cause par vng bon aduocat bien informé de ce qu'il deuoit dire , Dieu scait que plusieurs se rendirent au Consistoire pour ouïr ce nouueau procez qui beaucoup pleut aux Seigneurs dudit Parlement, tant pour la nouuelte du cas , que pour les allegacions & arguments des parties deuant eulx debatans , que non auoit accoutumé , mais plaisantes estoient. Ce procez tant plaisant & nouuel afin qu'il fust de plusieurs gens cogneu, fut tenu & maintenu assez & longuement , non pas qu'a son tour de roule ne fust bien renuoyé & mis en jeu ; mais le Juge le fit differer jusques a la façon de cestes. Et par ce point celle qui auparauant par sa beaulté , bonté & gentesé cogneuë estoit de plusieurs gens deuant notoire a tout le monde par ce maudit mal de broches dont en la fin fut guarie , ainsi que depuis me fut compté.





III. NOUVELLE.

LA PESCH E  
DE L'ANNEAU.

**E**N la Duché de Bourgogne eut n'agueres vng gentil Chevalier , dont l'histoire passe le nom , qui marié estoit a vne belle & gente Dame , & assez prez du Chasteau ou ledit Cheualier faisoit residence , demouroit vng musnier pareillement a vne belle gente & jeune femme marié. Aduint vne fois entre les autres que comme le Cheualier pour passer teins & prendre son esbatement , se pourmenast entour son hostel , & du long de la rivière sur laquelle estoit assise la maison , heritage & moulin, dessus dit musnier que a ce coup n'estoit pas a son hostel , mais a Dijon ou a Beaulne , ledit Cheualier aperceut la femme dudit musnier pourtant deux cruches , & retournant de la Riviere querir de l'eauë. Si se avanca vers elle & doucement la salua , & elle comme saige & bien apprinse lui fit l'honneur & reuerence qui lui appartenoit. Nostre bon Cheualier voiant cette musniere tres belle & en bon point , mais de sens assez escharssément houredée , se pensa de bonnes , & lui dit : Certes , ma mie , j'appercois bien que vous estes malade & en grand peril. A ces

*Tome I.*

B.

paroles la musniere s'approcha de luy , & luy dit :  
 Helas , Monseigneur , & que me faut-il. Vrayement  
 ma mie , j'apperceoy bien , si vous cheminez gueres  
 auant , que vostre deuant est en grand dangier de  
 cheoir , & vous ose bien dire que vous ne le porte-  
 rez gueres longuement qu'il ne vous cheé , tant my  
 connois je. La simple musniere oiant les paroles de  
 Monseigneur deuint tres esbahye , comment Mon-  
 seigneur pouuoit scauoir ne voir ce meschief adue-  
 nir. Et couroucée d'oïir la perte du meilleur mem-  
 bre de son corps , & dont elle se seruoit mieux & son  
 mary aussi ; si respondit : Helas , Monseigneur , & a  
 quoi connoissez vous que mon deuant est en dan-  
 gier de cheoir : il me semble qu'il tient tant bien.  
 Dea , ma mie , souffise vous a tant & soyez seure  
 que je vous dis la verité , & ne seriez pas la premie-  
 re a qui le cas est adueni. Helas , dit-elle , Monsei-  
 gneur , or suis je femme deffaite , deshonorée & per-  
 due , & que dira mon mary , nostre Dame , quand il  
 scaura ce meschief ? il ne tiendra plus compte de  
 moy. Ne vous desconfortez que bien a point , ma  
 mie , dit Monseigneur , encore n'est pas le cas adue-  
 nu ; aussi y a t'il bon remede. Quand la jeune mus-  
 niere ouït que on trouueroit bien remede en son  
 fait , le sang luy commenca a reuenir , & ainsi qu'elle  
 sceut , pria Monseigneur pour Dieu , que de sa gra-  
 ce luy voulsist enseigner qu'elle doit faire pour gar-  
 der ce pource deuant de cheoir. Monseigneur qui  
 tres courtois & gracieux estoit , mesmement tou-

Jours vers les Dames , luy dit : Ma mie , pource que vous estes belle & bonne , & que j'aime bien vostre mary , il me prent pitié & compassion de vostre fait , si vous enseignerai comment vous garderez vostre deuant de cheoir. Helas , Monseigneur , ie vous en mercye , & certes vous ferez une œuvre bien meritoire ; car tant me vauldroit non estre que de viure sans mon deuant , & que dois je donc faire , Monseigneur ? Ma mie , dit il , afin de garder vostre deuant de cheoir , le remede si est qu'au plustost que faire pourrez , le fort & souuent faire recoigner. Recoigner , Monseigneur , & qui le scauroit faire ? a qui me faudroit-il parler pour bien faire cette besogne ? Je vous dirai , ma mie , dit Monseigneur , pource que je vous ay aduertie de vostre meschief qui tres prochain & grief estoit , ensemble aussi & du remede necessaire pour obuier aux inconueniens qui sourdre en pourroient , j'e suis content afin de plus enmieux nourir amour entre nous deux vous recoigner votre deuant , & vous le rendrey en tel estat que par tout le pourrez tout seurement porter sans auoir crainte ne doubte que jamais il puisse cheoir , & de ce me fais bien fort. Si nôtre musiniere fut bien joyeuse il ne le faut pas demander qui mettoit tres grand peine du peu du sens qu'elle avoit de suffisamment remercier Monseigneur : si martherent tant Monseigneur & elle qu'ils vindrent au moulin ou ils ne furent gueres sans mettre la main a l'œuvre. Car Monseigneur par sa courtoisie d'vng hostile qu'il auoit,

recoignat en peu d'eures trois ou quatre fois le deuant de notre musnierre qui tres joyeuse & lye en fus. Et aprez que l'œuure fut polye, & de deuises vng millier, & jour assigné d'encores ouurer a ce deuant. Monseigneur part, & tout le beau pas s'en retourne vers son hostel, & au jour nommé se rendit Monseigneur vers sa musnierre, en la façon dessus & au mieux qu'il peut il s'emploia a recoigner ce deuant, & sy bien y ouura par continuation de tems que ce deuant fut tout assuré & tenoit ferme & bien. Pendant le tems Monseigneur recoingnoit le deuant de cette musnierre, le musnier retourna de sa marchandise & fit grand chiere, & aussy fist a sa femme, & comme ils eurent deuisez de leurs besoignes, la très saige musnierre va dire a son mary, par ma foy sire nous sommes bien obligez a Monseigneur de cette ville; voire ma mie dit le musnier, en quelle façon. C'est bien raison que le vous die afin que l'en remerciez. Car vous y estes tenu. Il est vray que tandis que auez esté dehors, Monseigneur passoit par ei droit a la court, ain sy que a tous deux cruches je alloye a la riuere, il me salua; si fis je lui, & comme je marchoye il apperceut que mon deuant ne tenoit comme rien, & qu'il étoit en trop grande aduantage de cheoir, & le me dit de sa grace dont je fus si tres ebahye, voire par Dieu outant couroucée que se tout le monde fut mort. Le bon Seigneur qui me voit en ce point lamenter en eut pitié, & de fait m'enseigna vn beau remede pour me garder de ce

mauldit danger , encore me fist il bien plus qu'il n'eut point fait a vn autre , car le remede dont il me advertit qui estoit de faire recoigner & recheuiller mon deuant afin de le garder de cheoir , lui mesmes le mit a execution , que lui fut tres grant peine & en sua plusieurs fois , pource que mon cas requeroit d'estre souuent visité , que vous diray ie plus il s'en est tant bien acquitté que j'aurais ne lui scauriez deservir. Par ma foy il m'a tel jour de cette sepmaine recoigné les trois les quatre fois , vng autre deux , vng autre trois , il ne ma ja laissée tant que aye esté toute garie , & si ma mis en tel estat que mon deuant tient a cette heure aussy bien & aussy fermement que celui de femme de nostre ville. Le musnier oyant cette aduantage ne fist pas semblant par dehors tel que son cueur au pardedans portoit ; or ça ma mie je suis bien joyeux que Monseigneur nous a fait ce plaisir , & ce Dieu plaist quand il sera possible je feray autant pour lui ; mais pource que votre cas n'estoit pas honneste , gardez vous bien d'en rien dire a personne , & aussy puis que vous estes garie , il n'est ja mestier que vous trauallez plus , Monseigneur , vous n'avez garde , dit la musniere , que j'en die jamais vng mot ; car aussy me le deffendit bien Monseigneur. Nostre musnier que estoit gentil compaignon a qui les crignons de sa teste ramenteuoient souuent & trop la courtoisie que Monseigneur luy auoit faite , si sagement se conduisit qu'onques Monseigneur ne s'apperceut qu'il se doubta de la tromperie qu'il

luy auoit faite , & cuidoit en soy mesme qu'il n'en sceust rien. Mais helas si faisoit & n'auoit ailleurs son cuer , son estude , ne toutes les pensées que a soy vanger de luy, s'il scauoit en facon telle ou semblable qu'il luy deceut sa femme. Et tant ainſy fit par son engin que point oyſeux n'estoit , qu'il aduiſa a vne maniere par laquelle bien luy sembloit que s'il en pouuoit venir a chief que Monſeigneur auroit beure pour oeuf. A chief de piece pour aulcunes affaires que ſuruindrent a Monſeigneur , il monta a cheual , & print de Madame congié bien pour vng mois , dont le muſnier ne fut pas joyeux. Un jour entre les autres Madame eut vouldé de ſoy baigner , & fit tirer le baing & chauffer les estuues en son hoſtel , a part ce que noſtre muſnier ſceut tres bien pource que aſſez familier eſtoit de leans , ſi s'aduiſa de prendre vng beau brochet qu'il auoit en ſa foſſe , & vint au Chasteau pour le preſenter a Madame. Aucunes des femmes de Madame vouloient prendre le brochet , & de par le muſnier faire preſent ; mais il dit que lui meſme il le preſenteroit ou vrayement il le remporteroit ; au fort pource qu'il eſtoit comme de leans & joyeux homme Madame le fit venir qui dedans ſon baing eſtoit. Le gracieulx muſnier fit ſon preſent , dont Madame le remercia & fit porter en la cuyſine le beau brochet , & mettre a point pour le ſouper. Et entretant que Madame au muſnier deuifoit , il apperceut ſur le bord de la cuue vng tres beau dyamant qu'elle auoit oſté de

son doigt doubtant de l'eauë le galter. Si le croqua si souplement qu'il ne fut de ame apperceu, & quand il vit son point il donna la bonne nuit a Madame & a sa compaignie, & s'en retourne a son moulin, pensant au surplus de son affaire. Madame qui faisoit grande chiere-avec ses femmes, voyant qu'il estoit ja bien tart & heure de souper, habandonna le bain & en son lit-se bouta, & comme elle ne vit point son dyamant, si appella ses femmes & leur demanda aprez ce dyamant, & a laquelle elle l'auoit baillé. Chacune dit : Ce ne fut pas a moy na moy, ne a moi aussi. On cherche hault & bas dedans la cuue, sur la cuue ; mais rien n'y vault, on ne le scait trouuer. La queste de ce dyamant dura beaucoup sans qu'on en sceust quelque nouuelle, dont Madame s'en donnoit bien mauuais tems, pource qu'il estoit mechamment perdu & en sa chambre ; & aussi Monseigneur son mary luy donna au jour de ses épousailles, si le tenoit beaucoup plus cher. On ne scait qui mécroire, ne a qui le demander, dont grand deüil sourd par leans. L'une des femmes s'aduifa & dit : ame n'est ceans entré que nous que y sommes & le musnier, ce me sembleroit bon qu'il fut mandé. On le manda & il vit Madame si tres courroucée & desplaisante estoit que plus ne pouuoit, demanda au musnier s'il auoit point veu son dyamant, & luy asséuré autant en bourdes que vng autre a dire la verité, s'en excusa tres haultement, & osa bien demander a Madame si elle le

tenoit a larron. Certes , dit-elle , uenny ; aussi-cè ne seroit pas larrecin si vous l'auiez par esbatement emporté. Madame , dit le musnier , je vous promets que de vostre dyamant ne sçay je nouvelle. Adonc fut la compaignie bien simple , & Madame especialement que en est si tres desplaisante qu'elle n'eus fait sa contenance que de jecter larmes a grand habondance , tant a regret de cette verge. La triste compaignie se met a conseil pour scauoir qu'il est de faire. L'une dit il faut qu'il soit en la chambre , l'autre respond qu'elle a cherchié par tout. Le musnier demande a Madame s'elle l'auoit a l'entrée du baing , & elle dit que ouy. S'ainfi est , certainement , Madame , veu la grande diligence qu'on a fait de le querir sans en scauoir nouvelle , la chose est bien estrange. Toutefois il me semble bien que s'il y auoit homme en cette ville que sceust donner conseil pour le recouurer que je seroye celui , & pource que je ne vouldroye pas que ma science fust diuulguée , il seroit bon que je parlasse a vous a part. A cela ne tiendra , dit Madame ; si fit partir la compaignie , & au partir que firent les femmes , disoient Dame Jheanne , Ysabeau , Catherine : Helas musnier que vous seriez bon homme si vous faisiez reuenir ce dyamant. Je m'en fais fort , dit le musnier ; mais j'ose bien dire que s'il est possible de jamais le trouuer , que j'en apprendrai la maniere. Quand il se vit a part avec Madame , il luy dit qu'il se doubtoit beaucoup & pensoit que en l'arriuée du baing elle auoit son

dyamant



dyamant, que il ne fust failly de son doigt & cheu en l'eauë & dedans son corps s'est boutté, attendu qu'il n'y auoit ame qui le voulsist retenir. Et la diligence faite pour le trouuer, se mist Madame sur son lit; ce qu'elle eust volentiers refusé ce n'eust esté pour mieux faire, & aprez qu'il l'eust assez decouuerte, fit comme maniere de regarder ca & la, & dit: Seurement, Madame, le dyamant est entré en vostre corps. Et dites vous, musnier, que vous l'avez aperceu? Ouy vraiment. Helas, dit elle, & comment l'en pourra se tirer? Tres bien, Madame, je ne doute pas que je n'en vienne bien a chief s'il vous plaist. Se maist Dieu il n'est chose que je ne face pour le rauoir, dit Madame; or vous auancez beau musnier. Madame encore sur le list couchée fut mise par le musnier toute en telle façon que Monseigneur mettoit sa femme quand il luy recoignoit son deuant, & d'vng tel houtil la tente pour querir & pescher le dyamant. Aprez les reposées de la premiere & seconde queste que le musnier fit du dyamant, Madame demanda s'il l'auoit point sentu, & il dit que ouy, dont elle fut bien joyeuse, & luy pria qu'il pescha encore tant qu'il l'eut trouué. Pour abreger, tant fit le bon musnier qu'il rendit a Madame son tres beau dyamant, dont la tres grande joye vint par leans, & n'eut jamais musnier tant d'honneur ne d'auancement que Madame & ses femmes luy donnerent. Le bon musnier en la tres bonne grace de Madame part de leans, & vint a sa mai-

## 26 LA PESC. DE L'ANNEAU.

son , sans foy vanter a sa femme de sa nouvelle ad-  
uenture , dont il estoit plus joyeux que s'il eust eu  
tout le monde gagné. La , Dieu mercy , petit de  
tems aprez Monseigneur reuint en sa maison ou il  
fut doucement receu & de Madame humblement  
bien venu , laquelle , aprez plusieurs deuises qui au  
liet se font , luy compta la merueilleuse aduenture  
de son dyamant , & comment il fut par le musnier  
de son corps repesché ; pour abreger , tout du long  
luy compta le procez en la facon & maniere que tint  
ledit musnier en la queste dudit dyamant , dont il  
n'eut gueres grande joye , mais pensa que le mus-  
nier luy auoit baillé belle. A la premiere fois qu'il  
rencontra le musnier il le salua haultement , & luy  
dit : Dieu gard , Dieu gard ce bon pescheur de dya-  
mans. A quoy le musnier respondit : Dieu gard le re-  
coigneur de C. Par nostre dame tu dis vray , dit  
le Seigneur : tay toy de moy , & si ferai de toy. Le  
musnier fut contant , & plus n'en parla ; non fit le  
Seigneur , que je sache.



IV. NOUVELLE.

LE COCU ARME.

**L**E Roy n'aguieres eſtant en ſa ville de Tours, vng gentil Compaignon Eſcoſſois, archier de ſon corps & de ſa grant garde, ſ'enamoura tres fort d'une belle & gente Damoifelle mariée & Merciere. Et quant il ſceut trouver tems & lieu le mains mal qu'il ſceut, compta ſon gracieux & piteux cas, dont il n'eſtoit pas trop content, ne joyeux neantmoins; car il auoit la choſe trop a cuer, ne laiffa pas a faire ſa pourſuite, mais de plus en plus tres aigrement pourchaſſa tant que la Damoifelle le voulut enchaſſier, & donner total congé, & luy dit qu'elle auertiroit ſon mary du pourchas deſhonneſte & damnable qu'il ſ'efforçoit d'acheuer; ce qu'elle fit tout au long. Le mary bon & ſaige, preux & vaillant comme aprez vous ſera compté, ſe courouca amerement encontre l'Eſcoſſois que deſhonnouer le vouloit, & ſa tres bonne femme auſſi, & pour bien ſe vanger de luy a ſon aife & ſans reprinſe, commanda a ſa femme que ſ'il retournoit plus a ſa queſte, qu'elle luy baillaſt & assignaſt jour, & ſ'il eſtoit ſi fol que d'y comparoir, le blaſme qu'il pourchaſſoit luy ſeroit cher vendu. La bonne femme pour obeir

Cij

au bon plaisir de son mary , dit que si feroit elle. Il ne demoura gueres que le pource amoureux Escossois fit tant de tours qu'il veit en place nostre Merciere que fut par luy humblement saluée , & derechief d'amours si doucement priée , que les requestes du parauant deuoient bien estre enterinées par la confusion de cette piteuse & derniere priere , & qu'elle les voulsit ouyr , & jamais ne seroit femme plus loyallement obeye ne seruie qu'elle seroit , se de grace vouloit accepter sa tres humble & raisonnable requeste. La belle Merciere soy recordant de la leçon que son mary luy bailla , voyant aussi l'heure propice , entre autres deuises & plusieurs excusations seruans a son propos , bailla journée a l'Escossois a lendemain au soir de comparoir personnellement en sa chambre pour-en ce lieu luy dire plus celeement le surplus de son intention , & le grand bien qu'il luy vouloit. Pensez qu'elle fut haultement remerciée , doucement escoutée , & de bon cueur obeye de ce luy qui aprez ces bonnes nouuelles laissa sa Dame le plus joyeux que jamais il n'auoit esté. Quand le mary vint a l'hostel , il sceut comment l'Escossois fut leant des parolles & des grands offres qu'il fist , & comment il se rendra demain au soir deuers elle en sa chambre. Or le laisse venir , dit le mary. Il ne fit jamais si folle entreprinse , que bien je luy cuyde monstrier auant qu'il parte voyre & faire son grand tort confesser , pour estre exemple aux autres fols oultre-cuydez & enraigez comme luy. Le soir du lende-

main approcha , tres desiré du poure amoureux Escossois pour veoir & jouir de sa Dame , tres desirée du bon Mercier pour accomplir sa tres criminelle vangeance qu'il veut executer en la personne d'iceluy Escossois qui veult estre son lieutenant , tres doubté aussi de la bonne femme qui pour obeir a son mary attend de veoir vng grand hutin. Au fort chacun s'appreste ; le Mercier se fait armer de vng grant , viel & lourd harnois , prend sa salade , ses gantelets & en sa main vne grant hache. Or il est bien en point , Dieu le scait , & semble bien que autre fois il ait veu hutin. Comme vng vray champion venu sur les rangs de bonne heure & attendant son ennemy , en lieu de pauillon , se va mettre derriere vng tapis en la ruelle de son liét , & si bien se cacha qu'il ne pouroit estre apperceu. L'amoureux malade sentant l'heure tres desirée , se met en chemin deuers l'hostel a la Merciere ; mais il ne oublia pas sa tres grande , bonne & forte espée a deux mains. Et comme il fut venu leans , la Dame monte en sa chambre sans faire effroy , & il la suit tout doucement ; & quand il se est trouué leans , il demanda a sa Dame s'en sa chambre y auoit ame qu'elle ; a quoy elle respondit assez legierement , & comme non trop asseurée , que non. Dictes verité , dist l'Escossois ; vostre mary n'y est il pas ? Nenny , dist elle. Or le laissez venir ; par saint Agnant , s'il vient je luy fendrai la teste jusque aux dents : voire par Dieu , s'ils estoient trois je ne les crains , je serai bien maistre,

Et apres ces criminelles paroles vous tire hors la grande & bonne espée , & si la fait brandir trois ou quatre fois , & auprez de luy sur le lit la couche , & ce fait incontinent baisser & accoller & le surplus que apres s'ensuit , tout a son bel aise & loysir acheua , sans ce que le pourceux de la ruelle s'osast oncques monstrier , mais si grant paour avoit qu'a pou qu'il ne mouroit. Nostre Escossois apres cette haulte aventure prend de sa Dame congié jusqu'à vne autre fois , & la remercie comme il doit & scait de sa grant courtoisie , & se met a chemin. Quand le vaillant homme d'armes sceut l'Escossois yssu hors de l'huys , ainsy effrayé qu'il estoit sans a peine scauoir parler , fault dehors de son pauillon , & commença a tencer sa femme de ce qu'elle auoit souffert le plaisir de l'archier , & elle respondit que c'estoit sa faulte & sa coulpe , & que enchargié luy auoit de luy bailler jour. Je ne vous commanday pas , dist-il , que luy laissiez faire sa volenté ne son plaisir. Comme , dist-elle , le pouuoie refuser voyant sa grant espée dont il m'eut tuée en cas de refus. Et a ce coup vecy son Escossois qui retourne & monte arriere les degrez la chambre , & fault dedans & dist tout hault : qu'est ce cy ? & le bon homme de soy sauuer , & deffoubs le liét se boute pour plus seurement , beaucoup plus esbahy que parauant. La Dame fut reprinsé & derechief enfermée a son beau loysir & a la facon que dessus , toujours l'espée au plus prez de luy. Apres cette rencharge & plusieurs lon,

gtes deuises d'entre l'Escossois & de la Dame ,  
 -l'heure vint de partir. Sy luy donnat la bonne nuyt, &  
 -pique & s'en va. Le pource martyr estant deffoubz le  
 -list a peu s'il se osoit tirer de la , doubtant le retour  
 -de son aduersaire , ou pour mieulx dire son compai-  
 -gnon. A chief de piece il print couraige , & a l'ayde  
 -de sa femme la , Dieu mercy , il fut remis sur piedz.  
 -S'il auoit bien tencé sa femme au parauant , enco-  
 -res recommença t'il plus dure legende. Car elle auoit  
 -consenti , aprez sa deffense , le deshonneur de luy &  
 -d'elle. Helas , dist-elle , & ou est la femme si assen-  
 -rée qui osast dedire vng homme ainsy eschauffié &  
 -enraigé comme cestuy estoit quand vous qui estes ar-  
 -mé , embastonné & si vaillant , a qui il a trop plus  
 -messait que a moy , ne l'avez pas osé assaillir ne moy  
 -deffendre. Ce n'est pas responce , dit il : dame sy  
 -vous n'eussiez voulu , jamais ne fust venu a ses at-  
 -teintes ; vous estes mauuaise & deloyalle. Mais  
 -vous , dist-elle , lasche, meschant & reprouché hom-  
 -me pour qui je suis deshonorée ; car pour vous  
 -obeir , je assignay le maudit jour a l'Escossois. Et en-  
 -cores n'avez vous eu tant de couraige d'entrepren-  
 -dre la deffence de celle en qui gyst tout vostre bien  
 -& vostre honneur. Et ne pensez vous pas que j'eusse  
 -trop mieulx aimé la mort , que d'auoir moy mesme  
 -consenti ne accordé ce meschief ? Et Dieu scait le  
 -deuil que j'en porte & porterai tant que je viurai ,  
 -quand celluy de qui je dois auoir & tout secours at-  
 -tendre , en sa presence m'a bien souffert deshonna-

## 32 *LE COCU ARME.*

rer. Il fait assez accroire & penser qu'elle ne souffrir pas la volenté de l'Escossois pour plaisir qu'elle y print ; mais elle fut a ce contrainte & forcée par non resister , laissant la resistance en la prouesse de son mary qui s'en estoit tres bien chargié. Dont chacun d'eulx laisse son dire & sa querelle aprez plusieurs arguments & repliques d'vng costé & d'autre. Mais en son cas euident fut le mary deceu , & demoura trompé de l'Escossois en la facon qu'auyez ouye.

---

### V. NOUVELLE.

#### LE

## *DUEL D'AIGUILLETTE.*

**M**OMSEIGNEUR Thalebót, que Dieu pardonne, Capitaine Anglois si heureux, comme chascun scait, fit en sa vie deux jugemens dignes d'estre recitez, & en audience & memoire perpetuelle amenez ; & afin que de chascun d'iceulx jugemens soit faite mention, je veuille raconter en briefs mots ma premiere nouvelle, & au rang des autres la cinquiesme, j'en fourniray & diray ainsi. Pendant le temps que la mauldite & pestilentielle guerre de France & d'Angleterre regnoit, & que-encores n'a pas prins fin comme souuent aduient, vng



## LE DUEL D'AIGUIL. 33

Francøys homme d'armes fut a vng aultre Angloys prisonnier, & puis qu'il fut mis a finance, soubz le faufconduit de Monseigneur Thalebott, deuers son Capitaine retournoit pour faire finance de sa rançon, & a son maistre l'enuoyer ou apporter, & comme il estoit en chemin fut par vng Angloys sur les champs encontré, lequel voyant le Francøys, tantost luy demanda dont il venoit & ou il alloit, l'autre respondit la verité. Et ou est vostre faufconduit, dit l'Angloys? Il n'est pas loing, dit le Francøys. Lors tire vne petite boete pendante a sa ceinture, ou son faufconduit estoit, & a l'Angloys le tendit, qui de bout a aultre le leut, & comme il est de costume mettre en toutes lettres de faufconduit, reserué tous vrayz habillemens de guerre, l'Angloys note sur ce mot, & voit encores les esguillettes a armer pendantes au parpoint du Francøys. Si va jugier en soy mesme qu'il auoit enfreint son faufconduit, & que esguillettes sont vrayz habillemens de guerre, si luy dit, je vous fais prisonnier; car vous auez rompu vostre faufconduit. Par ma foy non ay, dit le Francøys, faulue vostre grace; vous voyez en quel estat je suis. Nenny, nenny, dit l'Angloys; par saint Jouen, vostre faufconduit est rompu; rendez vous ou je vous tuerai. Le pource Francøys qui n'auoit que son paige, & qui estoit tout nud & de ses armes degarny, voyant l'autre, & de trois ou quatre archiers accompagnié, pour le mieulx faire, a luy se rendit. L'Angloys le mena en vne place assez prez de la, & ca

prison le boute. Le Francoys se voyant ainsi mené, a grand haite a son Capitaine le manda, lequel oyant le cas de son homme, fut trestout a merveilles esbahy. Si fit tantost escrire lettres a Monseigneur Thalebot, & par ung herault les enuoya bien & suffisamment informé de la matiere que l'homme d'armes prisonnier auoit au long au Capitaine rescript. C'est a scauoir comment vng tel de ses gens auoit prins vng tel des siens sous son saufconduit. Ledit herault bien informé & aprins de ce qu'il deuoit dire & faire, de son maistre partit & a Monseigneur Thalebot les lettres presenta. Il les leut, & par vng sien Secretaire en audience deuant plusieurs Cheualiers & Escuyers & aultres de sa route, derechief les fist lire. Si deuez scauoir que tantost il monstra sur son cheualet; car il auoit la teste chaulde & fumeuse, & n'estoit pas content quand on faisoit aultrement qu'a point & par especial en matiere de guerre, & d'en fraindre son saufconduit il enraigeoit tout vif. Pour abreger le conte, fit venir deuant luy l'Angloys & le Francoys, & dit au Francoys qu'il contaist son cas. Il dit comment il auoit esté prisonnier d'vng tel de ses gens, & s'estoit mis a finance. Et soubz vostre saufconduit, Monseigneur, je m'en alloye deuers ceulx de nostre party pour que-  
 +rir ma rançon, je rencontray ce Gentilhomme icy, lequel est aussi de vos gens, qui me demanda ou j'alloye, & se j'auoye saufconduit, je luy dis que ouy, lequel je luy monstroi; & quand il l'eut leu, il me

dit que je l'auoye rompu, & je luy respondis que non auoye, & qu'il ne le scauroit monstrier, brief, je ne peuz estre oüy, & me fut force, se je ne me vouloye faire tuer sur la place, de me rendre. Et ne scay cause nulle parquoy il me doye auoir retenu; si vous en demande justice. Monseigneur Thalebot oyant le Francoys, n'estoit pas bien a son aise; neantmoins quand il eut ce dit, il dit a l'Anglois: que respons tu a cecy? Monseigneur, dit il, il est bien vray, comme il a dit, que je le rencontray & voulus voir son faufconduit, lequel de bout en bout & tout du long je leus, & apperceus tantost qu'il l'auoit rompu & enfraint, & aultrement je ne l'eusse arresté. Comment la il rompu, dist Monseigneur Thalebot? dis tost. Monseigneur, pource que en son faufconduit sont reseruez tous habillements de guerre, & il y auoit & a encores vrayz habillements de guerre, c'est a scauoir a son parpoint ses esguillettes a armer, que sont vrayz habillements de guerre; car sans elles on ne se peut armer. Voire, dit Thalebot, & esguillettes sont ce doncques vrayz habillements de guerre, & ne scais tu aultre chose parquoy il puisse auoir enfraint a son faufconduit? Vrayement, Monseigneur, nenny, respondit l'Anglois. Voire vilain, de par vostre dyable, dit Monseigneur Thalebot, auez vous retenu vng gentil homme sur mon faufconduit pour ses esguillettes? par saint George, je vous feray monstrier se ce sont habillements de guerre. Alors tout eschauffé, & de courroux bien fort emeu

& courroucé, vint au Francoys, & de son parpoint deux esguillettes en tira, & a l'Anglois les bailla, & au Francoys vne bonne espée d'armes luy fut a la main liurée, & puis la sienne belle & bonne hors du fourreau va tirer & la tint en sa main, & a l'Anglois va dire : Deffendez vous de cet habillement de guerre que vous dites, se vous sçavez. Et puis dit au Francoys : Frappez sur ce vilain qui vous a retenu sans cause & sans raison ; on verra comment il se defendra de vostre habillement de guerre ; se vous lespargnez, je frapperai sur vous, par saint George. Alors le Francoys voulüst ou non, fut contraint a frapper sur l'Anglois de l'espée toute nuë qu'il tenoit, & le pource Anglois se couvroit le mieulx qu'il pouuoit, & couroit par la chambre & Thalebot aprez, qui toujours faisoit ferir par le Francoys sur l'autre, & luy disoit : Deffendez vous, vilain, de vostre habillement de guerre. A la verité l'Anglois fut tant battu, qu'il fut prez jusqu'a la mort, & cria mercy a Thalebot & au Francoys, lequel par ce moyen fut deliuré de sa rançon, & par Monseigneur Thalebot acquitté, & avec ce son cheual & son harnois & tout son bagaige que au jour de sa prinse auoit, luy fit rendre & bailler. Reste a compter l'autre qui est tel. Il sceut que l'vng de ses gens auoit derobbé en vne Eglise le Tabernacle où l'en met *Corpus Domini*, & a bons deniers comptans vendu. Je ne sçay pas la juste somme ; mais il estoit grant & beau, d'argent doré tres gentement esmaillé. Monseigneur

Thalebot , quoy qu'il fust tres cruel & en la guerre tres criminel , si auoit en grant reuerence toujours en l'Eglise , & ne vouloit que nut monstier ne Eglise le feu on boutast ne derobast quelque chose , & où il scauoit qu'on le fist , il en faisoit merueilleuse discipline de ceulx qui en ce faisant trespassoient son commandement. Or fit il deuant luy amener celui qui le Tabernacle auoit en l'Eglise robé. Et quand il le veit , Dieu scait quelle chere il luy fist. Il le vouloit a toute force tuer , se ne eussent esté ceulx que entour luy estoient , qui tant luy prierent que sa vie luy fut faulcée. Mais neantmoins si le voulut , il punit & luy dit : Traistre ribault , comment auez vous osé rober cette Eglise oultre mon commandement & ma deffense ? Ah , Monseigneur , pour Dieu , dit le poure larron , je vous crie mercy ; jamais ne m'aduiendra. Venez auant , vilain , dit-il , & l'autre aussi volentiers qu'on va au guet , deuers Monseigneur Thalebot d'aller d'auance , & ledit Monseigneur Thalebot dechargier sur ce pelerin de son poingt qui estoit gros & lourd , pareillement frappe sur sa teste , en luy disant : Ha , larron , vous auez robé l'Eglise ; & l'autre de crier : Monseigneur , je vous crie mercy ; jamais je ne le feray. Le ferez vous ? Nenny , Monseigneur. Or jures doncques que jamais tu n'entreras en Eglise nulle qu'elle soit : jures , vilain. Et bien , Monseigneur , dit l'autre. Lors luy fit jurer que jamais en Eglise pied ne mettroit , dont tous ceux qui la estoient & que l'ouy-

## 38 *LE DUEL D'AIGUIL.*

rent , eurent grant ris , quoy que ils eussent pitié du larron , pource que Monseigneur Thalebot luy défendoit l'Eglise a toujours , & luy faisoit jurer de non jamais y entrer ; & croyez qu'il cuidoit bien faire & a bonne intention luy faisoit. Ainly auez vous ouï racompter de Monseigneur Thalebot les deux jugements qui furent tels comme comptez les vous ay.

### V I. N O U V E L L E.

## *L'YVROGNE* *AU PARADIS.*

**A**DVINT en vne bonne ville de Hollande comme le Prieur des Augustins n'agueres se pourmenast en disant ses heures sur le serain , assez prez de la Chapelle Saint Antoine , située au bois de la dite ville , fut rencontré d'vng grand lourd Hollandois si tres yvre qu'a merueilles , lequel demouroit en vng village nommé Hesteuelighes a deux lieues prez d'illec. Le Prieur de loing le voyant venir , cogneut tantost son cas par les lourdes demarches & mal seures qu'il faisoit tirant son chemin. Et quand ils vindrent pour joindre l'vng a l'autre , l'yurogne salua premier le Prieur qui luy rendit son salut tantost , & puis passa oultre continuant son service sans en aultre propos l'arrester ne interroguer ; mais l'y-

## *L'YUROG. AU PARADIS.* 39

yurogne tant oultré que plus n'en pouuoit , se retourne & poursuit le Prieur , & luy request confession. Confession , dist le Prieur ! va t'en , va t'en , tu es bien confessé. Helas ! sire , respondit l'yurogne , pour Dieu confessez moy ; j'ay assez tres frefche memoire de tous nies pechez , & si ay parfaite contrition. Le Prieur desplaisant d'estre empesché a ce coup par cet yurogne , respond : va ton chemin ; il ne te faut confesser , car tu es en tres bon estat. Ha dea , dit l'yurogne , par la mort bieu , vous me confesserez , maistre Prieur ; car j'en ay a cette heure deuotion : & le saisit par la manche , & le voulut arrester. Le Prieur n'y vouloit entendre , mais auoit tant grant fain que merueilles d'estre echapé de l'autre ; mais rien n'y vault , car il est ferme en la deuocion d'estre confessé ; ce que le Prieur tousjours refuse , & sy s'en cuyde depescher , mais il ne peut. La deuocion de l'yurogne de plus en plus s'efforce , & quand il voit le Prieur reffusant de ouyr ses pechez , il met sa main a sa grande Coustille & de sa gayne la tire , & dit au Prieur qu'il le tuera , se bien il n'escoute sa confession. Le Prieur doubtant le Couteau & la main perilleuse qui le tenoit , si demanda a l'autre : Que veuil tu dire ? Je me veuil confesser , dit il. Or auant , dit le Prieur , je le veuil ; auance toy. Nostre yurogne plus saoul que vne Griue partant d'une vigne , commença , s'il vous plaist , sa deuote confession , laquelle je passe ; car le Prieur point ne la reuela , mais vous pouuez bien penser qu'elle fut bien nouue

uelle & estrange. Quand le Prieur veit son point, il couppa le chemin aux longues & lourdes paroles de nostre yurogne, & l'absolution luy donne & en congé luy donnant, luy dit : Va t'en, tu es bien confessé. Dites vous, sire, respondit il ? Ouy vrayement, dit le Prieur ; ta confession est tres bonne : va t'en, tu ne peux mal auoir. Et puis que je suis bien confessé, & que j'ay absolution receüe, se a cette heure mouroye, n'iroye je pas en Paradis, dit l'yurogne ? Tout droit sans faillir, respond le Prieur, n'en fais nulle doubte. Puis que ainsi est ce, dit l'yurogne, que maintenant je suis en bon estat & en chemin de Paradis, & qu'il y fait tant bel & tant bon, je vueil mourir tout maintenant, afin que incontinent je y aille. Si prend & baille son cousteau a ce Prieur, en luy priant & requerant qu'il luy tranchaft la teste afin qu'il allast en Paradis. Ha dea, dit le Prieur tout esbahy, il n'est ja mestier de ainsi faire ; tu yras bien en Paradis par aultre voye. Nennay, respond l'yurogne. Je vueil aller tout maintenant & icy mourir par vos mains ; aduancez vous & me tuez. Non feray pas, dit le Prieur ; vng Prestre ne doit personne tuer. Si ferez, sire, par la mort bieu, & se bientoist ne me depeſchez & me mettez en Paradis, moy mesme a mes deux mains vous occirai ; & a ces mots brandit son grand cousteau, & en fait monstre aux yeux du poure Prieur tout espouuente & assimply, Au fort aprez qu'il eut vng peu pensé afin d'estre de son yurogne depeſchié, lequel  
de



de plus en plus l'agresse & par force que luy oste la vie, il saisit & prend le cousteau, & va si dire : Or ca puis que tu veux finer par mes mains afin d'aller en Paradis, metz toy a genoux icy deuant moy. L'yurogne ne s'en fit gueres prescher ; mais tout a coup du hault de luy tomber se laissa, & a chef de piece a quelque meschief que ce fut, sur les genoulx se releua, & a mains jointes le coup de l'espée cuydant mourir, attendoit. Le Prieur du dos du cousteau fiert sur le col de l'yurogne vng grant & pesant coup. Et par terre le abbat bien durement ; mais vous n'avez garde qu'il se relieue, mesme cuyde vrayement estre mort & estre ja en Paradis. Et ce point le laissa le Prieur, que pour sa seureté n'oublia pas le cousteau. Et comme il fut vng peu auant il rencontra vng chariot chargé de gens au mains de la pluspart. Si bien aduint que ceulx qui auoient esté presens ou nostre yurogne s'estoit chargé y estoient, auxquels il raconta bien au long le mystere dessusdit, en leurs priant qu'ils se leuassent & qu'en son hostel le voulussent rendre & conduire, & puis leur bailla son cousteau. Ils promirent de l'emmener & charger avec eulx, & le Prieur s'en va. Ils n'eurent gueres cheminé qu'ils apperceurent ce bon yurogne couchié ainsi comme s'il fut mort, les dents contre terre ; & quand ils furent prez de luy, tous a vne voix par son nom l'appellerent ; mais ils ont beau huchier, il n'auoit garde de respondre : ils recommencerent a crier, mais c'est pour neant. Adoncques descendi-

rent aucuns de leur chariot , si le prindrent par la teste , par les piez & par les jambes , & tout en l'air le leuerent , & tant hucherent qu'il ouurit ses yeulx , & incontinent parla & dit : Laissez moy , laissez moy , je suis mort. Non estes , non , dirent les compaignions ; il vous fault venir avec nous. Non feray , dit l'yurogne : ou iray je ? je suis mort & desja en Paradis. Vous vous en viendrez , dirent les aultres ; il nous fault aller boire. Boire , dit il ? Voire , dit l'aultre. Jamais je ne boirai , dit il ; car je suis mort. Quelque chose que ses compaignons luy disent , il ne vouloit mettre hors de sa teste qu'il ne fust mort. Les deuises durerent beaucoup , & ne scauoient trouuer les compaignons façon ne maniere d'emmener ce fol yurogne ; car quelque chose qu'ils disent tousjours respond : je suis mort. En la fin vng entre les aultres se aduifa , & dit : Puis que vous estes mort , vous ne voulez pas demourer icy , & comme vne beste , aux champs estre enfoüy ; venez , venez avec nous ; si vous porterons enterrer sur nostre chariot ou cymetiere de nostre ville , ainsi qu'il appartient a vng Chrestien , aultrement n'irez pas en Paradis. Quand l'yurogne entendit qu'il le failloit enterrer ains qu'il montaist en Paradis , il fut content de obéir. Si fut tantost troussé & mis dans le chariot , ou gueres ne fut sans dormir. Le chariot estoit bien attelé , si furent tantost a Hesteuelighes , ou ce bon yurogne fut descendu tout deuant sa maison. Sa femme & ses enfans furent appelez , & leurs fut ce bon

corps saint rendu , qui si fort dormoit , que pour le porter du chariot en sa maison & en son lit le jeter , jamais ne s'eueilla , & la il fut enseveli entre deux linceulx sans s'eueiller bien deux jours aprez .

---

VII. NOUVELLE.

LE CHARRETON  
A L'ARRIEREGARDE.

UN Orfeure de Paris n'aguères pour depeschier plusieurs besongnes de sa marchandise a l'encontre d'une foire du landit & denuers , fit large & grande prouision de charbon de saoulx. Aduint vng jour entre les autres que le Charretton que cette denrée liuroit pour la grant haste de l'Orfeure , fit si grande diligence qu'il amena deux voitures plus qu'il n'auoit fait ez jours parauant ; mais il ne fut pas si tost en Paris a sa derniere charretée , que la porte a ses talons ne fut fermée. Toutefois il fut tres bien venu , & bien de l'Orfeure receu ; & aprez que son charbon fut descendu , & ses chevaux mis en l'estable , il voulut souper tout a loisir , & fit tres grant chere , qui ne se passa pas sans boire d'autant & d'autel. Quand la brigade fut bien repeuë , la cloche va sonner douze heures , dont ils se donnerent grant merueille , tant plaisamment s'estoit le temps

D ij

## 44 LE CHARRETON

passé a ce souper. Chacun rendit graces a Dieu, ~~fais~~ <sup>fa-</sup> sant tres petits yeulx, & ne demandoient que le lit, mais pource qu'il estoit tant tard, l'Orfeure retint au coucher son Charreton, doubtant la rencontre du guet qui l'eust bouté en Chastelet, se a cette heure l'eust trouué. Pour celle heure nostre Orfeure auoit tant de gens qui pour luy ouuroient, que force luy fut le Charreton avec luy & sa femme en son lit herbergier, & comme saige & non suspeconneux il fit sa femme entre luy & le Charreton couchier. Or vous faut il dire que ce ne fut pas sans grant mystere; car le bon Charreton refusoit de tous points ce logis, & a toute force vouloit dessus le banc ou dedans la grange couchier. Force luy fut d'obeir a l'Orfeure, & aprez qu'il fut depouillé, dedans le lit se boute, ou qu'il estoit ja l'Orfeure & sa femme en la façon que j'ai dicté. La femme sentant le Charreton a cause du froid & de la petitesse du lit, d'elle approuchier, tost se vira deuers son mari, & en lieu d'oreiller se mit sur la poitrine de sondit mari, & ou giron du Charreton son derriere reposoit. Sans dormir ne se tindrent gueres l'Orfeure & sa femme sans en faire le semblant; mais nostre Charreton jacoit qu'il fut lassé & trauaillé, n'en auoit garde. Car comme le poulain s'echauffe sentant la jument, & se dresse & demene, si faisoit le sien poulain leuant la teste contre mont si tres prochain de ladite femme, & ne fut pas en la puissance dudit Charreton qu'elle ne se joignit de prez, & en cet estat fut long es-

## A L'ARRIEREGARDE. 45

Pace quand la femme s'eueillait, voire ou au moins qu'elle en fist semblant. Aussi n'eust pas fait le mari, si ce n'eust esté la teste de sa femme qui sur sa poitrine estoit reposant, qui par l'assault & heurt de ce poulain luy donnoit si grand branle que assez tost il se reueilla. Il euidoit bien que sa femme songeait; mais pource que trop longuement duroit, & qu'il ouyt le Charreton soy remuer & tres fort souffler, tout doucement leua la main en hault: & si tres bien a point en bas la rabattit, qu'en dommaige & en sa garenne le poulain au Charreton trouua, dont il ne fut pas bien content, & ce pour l'amour de sa femme il l'en fit en haste saillir, & dit au Charreton: Que faites vous, mechant coquart? vous estes par ma foy bien enraigé qui a ma femme vous prenez; n'en faites plus. Je vous jure par la mort bieu que s'elle se fust a ce coup esueillée, quand vostre poulain ainsi la harioit, je ne scay moy penser que vous eussiez fait; car je suis tout certain, tant la connois, qu'elle vous eust tout le visaige esgratinné & a ses mains les yeulx de vostre teste esfrachez. Vous ne scauez pas comme elle est merueilleuse depuis qu'elle entre en sa malice, & si n'est chose au monde qui plustot luy boutast. Ostez vous, je vous en supplie, pour vostre bien. Le Charreton en peu de mots s'excusa qu'il n'y pensoit pas; & comme le jour fut prochain tantost, il se leua, & apres le bon jour donné a son hostesse, part & s'en va, & a charrier se met. Vous deuez penser que la bonne femme

s'elle eut pensé le fait du Charreton , que elle l'eut beaucoup plus greué que son mary ne disoit. Combien que depuis il me fut dit que assez de fois le Charreton la rencontra en la propre façon & maniere qu'il fut trouué de l'Orfeure , si non qu'elle ne dormoit pas , non point que je le veuille croire , ne en riens ce rapport faire bon.

---

## VIII. NOUVELLE.

*GARCE POUR GARCE.*

**E**N la ville de Bruxelles , ou maintes aduentures sont en nostre tems aduenues , demouroit n'a pas long tems un jeune compaignon Picard , qui seruit tres bien & loyaulment son maistre assez long espace , & entre aultres seruices a quoy il obligea sondit maistre vers luy , il fit tant par son tres gracieux parler , maintient & courtoisie , que si auant fut en la grace de sa fille qu'il coucha avec elle , & par ses œuures meritoires elle deuint grosse & enceinte. Nostre Compaignon voyant sa Dame en cet estat ne fut pas si fol que d'attendre l'heure que son maistre le pouuoit scauoir & apperceuoir. Si print de bonne heure vng gracieux congié pour peu de jours , combien qu'il n'eust nulle enuie d'y jamais retourner , feignant d'aller en Picardie visiter son pere & sa mere , & aulcuns de ses paréns ; & quand il

## GARCE POUR GARCE. 47

eut a son maistre & a sa maistresse dit adieu , le tres piteulx fut a la fille sa Dame , a laquelle il promit tantost retourner ; ce qu'il ne fit point , & pour cause. Luy estant en Picardie en l'hostel de son pere , la pource fille de son maistre deuenoit si tres grosse que son piteulx cas ne se pouuoit plus celer ; dont entre les aultres sa bonne mere que au mestier se cognoissoit , s'en donna garde la premiere : si la tira a part & luy demanda , comme on peut penser , dont elle venoit en cet estat , & que luy auoit mise. S'elle se fit beaucoup presser & admonester autant qu'elle en voulsist rien dire ne cognoistre , il ne le fault ja demander ; mais en la fin elle fut a ce menée qu'elle fut contrainte de cognoistre & confesser son piteulx fait , & dit que le Picard varlet de son pere , lequel n'agueres s'en estoit allé , l'auoit seduite & en ce tres piteulx point laissée. Sa mere toute enraigée , forcée & tant marrie qu'on ne pourroit plus , la voyant ainsi deshonorée , se prend a la tenser & tant d'injures luy va dire , que la patience qu'elle eut de tous costez sans mot sonner ne rien respondre , estoit suffisante d'esteindre le crime qu'elle auoit commis pour soi laisser engrosser du Picard. Mais hélas ! cette patience ne esmeut en rien sa mere a pitié , mais luy dit : Va t'en , va t'en arriere de moy , & fais tant que tu trouues le Picard qui t'a fait grosse , & luy dis qu'il te defface ce qu'il t'a fait ; & ne retournes jamais vers moy jusqu'a ce qu'il aura tout deffait ce que par son oultrage il t'a fait. La pource

## 48 GARCE POUR GARCE.

filie en l'estat que vous ouyes, marrie & desolée par sa fumeuse & cruelle mere, se met a la queste du Picard que l'engrossa, & croyez certainement que auant que elle en peut auoir aucunes nouuelles, ce ne fut pas sans endurer grant peine & du malaise largement. Et en la parfin, comme Dieu le voulut, aprez maints gestes qu'elle fit en Picardie, elle arriua par vng jour de Dimanche en vng gros villaiage au pays d'Artois, & si tres bien luy vint a ce propre jour que son amy le Picard, lequel l'auoit engrossée, faisoit ses nopces, de laquelle chose elle fut merueilleusement joyeuse, & ne fut pas si peu asseurée pour a sa mere obeir qu'elle ne se boutast par la presse des gens, ainsi grosse comme elle estoit, & fist tant qu'elle trouua son amy & le salua, lequel tantost la cogneut & en rougissant son salut luy rendit, & luy dit : Vous soyez la tres bien venue ; qu'il vous ameine a cette heure, ma mie ? Ma mere, dit elle, m'enuoye vers vous ; & Dieu scait que vous m'auez bien fait tenser : elle m'a chargié & commandé que je vous die que vous me deffaciez ce que vous m'auez fait, & se ainsi ne le faites, que jamais ne retourne vers elle. L'autre entend tantost la folie, & au plustost qu'il peut il se deffit d'elle, & luy dit par telle maniere : Ma mie, je seray volentiers ce que me requerez, & que vostre mere veut que je fasse ; car cest bien raison : mais a cette heure vous voyez que je n'y puis pas bonnement entendre ; si vous prie tant comme je puis, que ayez patience  
pour



pour meshuy, & demain je besongneray a vous. Elle fut contente, & alors il la fit guider & mettre en vne chambre, & commande qu'elle fust tres bien pensée; car aussi bien elle en auoit bon mestier, a cause des grands labeurs & trauaux qu'elle auoit eue en son voyage faisant cette queste. Or vous deuez scauoir & entendre que l'espousée ne tenoit pas ses yeulx en son sein, mais se donna tres bien garde & apperceut son mary parler a nostre fille grosse: dont la puce luy entre en l'oreille & n'estoit en rien contente, mais très troublée & marrie en estoit. Si garda son courroux sans mot dire jusqu'a ce que son mary se vint coucher, & quand il la cuida accoller & baïser, & au surplus faire son deuoir, & gagner le chaudéau, elle se vire puis d'vng costé, puis d'autre, tellement qu'il ne peut paruenir a ses atteintes, dont il est tres esbahy & courroucé, & luy va dire: Ma mie, pourquoy faites vous cecy? J'ai bien cause, dit-elle, & aussi quelque chere que vous facez, il ne vous chault gueres de moy: vous en auez bien d'autres dont il vous est plus que de moy. Et non ay, par ma foi, dit-il, ne en ce monde je n'aime autre femme que vous. Helas! dit-elle, & ne vous ay je pas bien veu aprez dîner tenir vos longues paroles a une femme a la salle; on y voyoit trop bien que c'estoit vous, & ne vous en scauriez excuser. Cela, dit-il, nostre Dame, vous n'auéz cause en rien de vous en jalouser. Et adonc luy va tout au long conter comment c'estoit la fille a son maistre de Bru-

## 50 GARCE POUR GARCE.

xelles , & coucha avec elle & l'engrossa , & qu'à cette cause il s'en vint par deca ; comment aussi apres son partement elle deuint si tres grosse qu'on s'en apperceut , & comment elle se confessa a sa mere qu'il l'auoit engrossée , & l'enuoyoit vers luy affin qu'il luy deffist ce qu'il luy auoit fait , autrement jamais vers elle ne s'en retournaist. Quand nostre homme eut tout au long compté sa ratelée , sa femme ne reprint que l'vng de ses points , & dit : Comment, dit-elle , dites vous qu'elle dit a sa mere que vous auiez couché avecques elle ? Oüy par ma foy , dit-il , & luy conta tout. Par mon serment , dit-elle , elle monstra bien qu'elle estoit beste. Le Charreton de nostre maison a couchié avecques moy plus de quarante nuits ; mais vous n'avez garde que j'en dise oncques vng seul mot a ma mere ; je m'en suis tres bien gardée. Voire , dit il , de par le Diable , le gibet y ait part : or allez a vostre Charreton se vous voulez , car je n'ay cure de vous. Si se leua tout a coup & s'en vint rendre a celle qu'il engrossa , & habandonna l'autre. Et quand le lendemain on sceut cette nouvelle , Dieu scait le grand ris d'aulcuns , & le grand desplaisir de plusieurs , especiallement du pere & de la mere de l'espousée.

IX. NOUVELLE.

LE MARY

MAQUEREAU DE SA FEMME.

**P**OUR continuer le propos des nouvelles histoires, comme les aduentures aduiennent en diuers lieux & diuerfement, on ne doibt pas taire comment vng gentil Cheualier de Bourgoingne faisant residence en vng sien Chasteau beau & fort fourny de gens & d'artillerie comme a son estat appartenoit, deuint amoureux d'une belle Damoiselle de son hostel, voire & la premiere aprez Madame sa femme, & par amours si fort la contraignoit que jamais ne scauoit sa maniere sans elle, & tousiours l'entretenoit & la requeroit, & brief nul bien sans elle il ne pouuoit auoir, tant estoit au vif feru de l'amour d'elle. La Damoiselle bonne & saige voulant garder son honneur que aussi chier elle tenoit que sa propre ame, voulant aussi garder la loyaulté que a sa maistresse elle deuoit, ne prestoit pas l'oreille a son seigneur toutesfois qu'il eust bien voulu; & se aucune force luy estoit de l'escouter, Dieu scait la tres dure responce dont il estoit serui, luy remonstrant sa tres folle entreprinse & la grande lacheté de son cuer; & au surplus bien luy disoit

E ij

que se cette queste il continuë plus , qu'a sa maistresse il seroit descouuert. Quelque maniere ou menace qu'elle fasse , il ne veut laisser son entreprinse , mais de plus en plus la pourchasse , & tant en fait que force est a la bonne fille d'en aduertir bien au long sa maistresse ; ce qu'elle fit. La Dame aduertie des nouuelles amours de Monseigneur sans en montrer semblant , en est tres mal contente ; mais non pourtant elle s'aduisa d'vng tour aincoys que rien luy en dire , qui fut tel. Elle enchargea a sa Dämoiselle que la premiere fois que Monseigneur viendrait pour la prier d'amours , que tres tous reffus mis arriere, elle luy baillast jour a lendemain de soy trouuer dedans sa chambre & en son lit ; & s'il accepte la journée , dit la Dame , je viendrai tenir vostre place , & du surplus laissez moy faire. Pour obeir comme elle doit a sa maistresse , elle est contente & promet d'ainsi ce faire. Si ne tarda gueres aprez que Monseigneur ne retournast a l'ouuraige , & s'il auoit au parauant bien fort menti , encores a cette heure il s'en efforce beaucoup plus de l'affirmer , disant que se a cette heure elle n'entend a sa priere , trop mieulx luy vaudroit la mort , & que sans prouchain remede viure en ce monde plus ne pouuoit. Qu'en vaudroit le long compte : la Dämoiselle de sa maistresse bien conseillée si bien a point que mieulx on ne pourroit , baille a demain au bon feigneur l'heure de besongner , dont il est tant content que son cueur luy tressault tout de joye ; & dit bien en soy

mesme qu'il ne fauldroit pas a sa journée. Le jour des armes assigné suruint au soir vng gentil Cheualier, voisin de Monseigneur & son tres grand amy, qui le vint voir, auquel il fit tres grande & bonne chiere comme bien le scauoit faire, si fit Madame aussi, & le surplus de la maison s'efforçoit fort de luy complaire, scaichant estre le bon plaisir de Monseigneur & de Madame. Aprez les tres grandes chieres & du souper & du banquet, & qu'il fut heure de retraire, la bonne nuit donnée a Madame & a ses femmes, les deux Cheualiers se mettent en deuises de plusieurs & diuerfes matieres, & entre autres propos le Cheualier estrange demande a Monseigneur s'en son villaige auoit rien de beau pour aller courir l'esguillette; car la deuocion luy en eut prinse, apre z ces bonnes chieres & le beau temps qu'il fait a cette heure. Monseigneur qui rien ne luy voudroit celer pour la tres grande amour que il luy porte, luy va dire comment il a jour assigné de couchier ennuyt avec sa chambriere; & pour luy faire plaisir, quand il aura esté avec elle vne espace de temps, il se leuera tout doucement & le viendra querir pour le surplus aller parfaire. Le compaignon estrange mercia son compaignon, & Dieu scait qu'il luy tarde bien que l'heure soit venuë. L'hoste prend congié de luy & se retrait dedans sa garde robe comme il auoit de coustume pour soy deshabiller. Or deuez vous scauoir que tandis que les Cheualiers se deuisoient, Madame s'en alla mettre dedans le lit

ou Monseigneur deuoit trouuer sa chambriere , & droit la attendre ce que Dieu lui voudroit enuoyer. Monseigneur mit assez longue espace a soy deshabiller tout a propos , pensant que desja Madame fut endormie comme souuent faisoit , pource que deuant se couchoit. Monseigneur donne congié a son varlet de chambre , & a tout sa longue robe s'en va ou lit ou Madame l'attendoit , cuidant y trouuer autrui , & tout coiemment de sa robe se desarme , & puis dedans le lit se bouta. Et pource que la chandelle estoit estaincte , & que Madame mot ne sonnoit , il cuide auoir sa chambriere. Il n'y eut gueres esté sans faire son deuoir , & si tres bien s'en acquitta , que les trois les quatre fois gueres ne luy cousterent , que Madame print bien en gré , laquelle tost apres pensant que fust tout , s'endormit. Monseigneur trop plus legier que par auant , voyant que Madame dormoit , & se recordant de sa promesse , tout doucement se lieue & puis vient a son compaignon qui n'attendoit que l'heure d'aller aux armes , & luy dit qu'il allast tenir son lieu ; mais qu'il ne sonnast mot , & que retournast quand il auroit bien besongné & tout son saoul. L'autre plus esueillé que vng rat & viste comme vng leurier , part & s'en va , & auprez de Madame il se loge sans qu'elle en scaiche rien. Et quand il fut tout rassuré se Monseigneur auoit bien besongné , voire & en haste encores fit il mieulx , dont Madame n'est pas vng peu esmerueillée , laquelle apres ce beau passerems qui au-

## *MAQUER. DE SAFEMME. 55*

tunement travail luy estoit , arriere s'endormit , & bon Cheualier de l'habandonner & a Monseigneur se retourne , lequel comme parauant se vint reloger emprez Madame , & de plus belle aux armes se rallie , tant lui plaist le nouuel exercice. Tant d'œuvres se passerent tant en dormant comme aultre chose faisant , que le jour s'apparut , & comme il se retournoit cuidant virer l'œil sur la chambriere , il voit & connoit que c'est Madame , laquelle a cette heure va dire : N'estes vous pas bien putier , recraint , lasche , qui croyant auoir ma chambriere , tant de fois & oultre mesure m'avez accolée pour accomplir vostre desordonnée voulenté ; vous estes la , Dieu mercy , bien deceu ; car aultre que moy pour cette heure n'aura ce qui doit estre mien. Se le Cheualier fut esbahy & courroucé , ce n'est pas merueilles. Et quand il parla , il dit : Ma mie , je ne vous puis celer ma folie , dont beaucoup il me poise que jamais l'entreprins ; si vous prie que vous en soyez contente & n'y pensez plus ; car jour de ma vie plus ne m'aduendra , cela vous prometz par ma foy. Et afin que n'ayez occasion d'y penser , je donnerai congié a la chambriere que me bailla le vouloir de faire cette faulte. Madame plus contente d'auoir eu l'adventure de cette nuit que sa chambriere , & oyant la bonne repentance de Monseigneur , assez legierement se contenta , mais ce ne fut pas sans grands langaiges & remonstrances. Au fort trestout va bien , & Monseigneur que a des nouuelles en sa quenaille ,

E iiii]

aprez qu'il s'est leué, s'en vient vers son compaignon, auquel il conte tout du long son aduventure, luy priant de deux choses; la premiere, ce fut qu'il celast tres bien ce mystere & sa tres desplaisante aduventure; l'autre si est que jamais il ne retourne en lieu ou sa femme sera. L'autre tres desplaisant de ce malle aduventure, conforte le Cheualier au mieulx qu'il peut, & promet d'accomplir sa tres raisonnable requeste, & puis monta a cheual & s'en va. La chambriere qui coulpe n'auoit au mesfait dessusdit, en porta la pugnicion pour en auoir congie. Si vesquirent depuis long tems Monseigneur & Madame ensemble, sans qu'elle sceut jamais auoir affaire au Cheualier estrange.

---

## X. NOUVELLE.

*LES PASTES  
D'ANGUILLE.*

**P**LUSIEURS haultes & diuerfes, dures & merueilleuses aduentures ont esté souuent menées & a fin conduites ou Royaume d'Angleterre, dont la recitacion a present ne seruiroit pas a la continuation de cette presente histoire. Neantmoins cette presente histoire, pour ce propos continuer & le nombre de ses histoires accroistre, fera mencion



## LES PASTES D'ANGUIL. 57

comment vng bien grand Seigneur du Royaume d'Angleterre entre les mieulx fortunés riche , puissant & conquerant , lequel entre les aultres de ses seruiteurs auoit parfaite confiance , confidence & amour a vng jeune , gracieulx Gentilhomme de son hostel pour plusieurs raisons , tant par la loyauté , diligence , subtilité & prudence , & pour le bien que en luy auoit trouué , ne luy celoit pas rien de ses amours , mesmes par succession de temps. Tant fit ledit gracieulx Gentilhomme par son habileté que fut tellement en sa grace , que tous ses parfaits secrets & aduentures de ses amours , mesmement les affaires , embassades & diligences menoit & conduisoit. Et ce pour le temps que sondit maistre estoit encore a marier. Aduint certaine espace aprez que par le conseil de plusieurs de ses parents , amys & bien veuillans , Monseigneur se maria a vne tres belle , noble , bonne & riche Dame , dont plusieurs furent tres joyeux , & entre les autres nostre Gentilhomme , qui mignon se peult bien nommer , ne fut pas moins joyeux , disant en soy que c'estoit le bien & honneur de son maistre , & qu'il se retireroit a cette occasion de plusieurs menuës folies d'amour qu'il faisoit , auxquelles ledit mignon trop se donnoit d'esperoir. Si dit vng jour a Monseigneur qu'il estoit tres joyeux de luy , pource qu'il auoit si tres belle & bonne Dame espousée ; car a cette cause plus ne seroit empesché de faire queste ca ne la , comme il auoit de coustume. A quoi Monseigneur respondit ce nonobstant

n'entendoit pas du tout amours habandonner ; & ja-  
coit ce qu'il fut marié , si n'estoit il pas pourtant du  
gracieulx seruice d'amours osté , mais de bien en  
mieulx si vouloit employer. Son mignon non con-  
tent de ce vouloir , luy respondit que sa queste en  
amours deueroit estre bien finée , quand amours  
l'ont parti de la nonpareille , de la plus belle , de la  
plus faige , de la plus loyalle & bonne par dessus  
toutes autres. Faites , dit-il , Monseigneur , tout ce  
qu'il vous plaira ; car de ma part a aultre femme  
jamais parole ne porteray au prejudice de ma mai-  
stresse. Je ne scay quel prejudice , dit le maistre ;  
mais il vous fault trop bien remettre en train d'al-  
ler a telle & a telle. Et ne pensez pas que encore  
d'elles ne m'en soit autant que quant vous en parlai  
premier. Ha dea , Monseigneur , dit le mignon , il  
fault dire que vous prenez plaisir d'abuser femmes ,  
laquelle chose n'est pas bien fait ; car vous scauez  
bien que toutes celles que m'avez ici nommées , ne  
sont pas a comparer en beaulté ne autrement a Ma-  
dame , a qui vous feriez mortel desplaisir s'elle sca-  
uoit vostre deshonneste vouloir ; & qui plus est, vous  
ne pouuez pas ignorer qu'en ce faisant vous ne dani-  
nez vostre amé. Cesse ton preschier , dit Monsei-  
gneur , & va faire ce que je commande. Pardonnez  
moy , Monseigneur , dit le mignon , j'aymeroye  
mieulx mourir que par moy sourdistr noise entre  
Madame & vous ; si vous prie que soyez content de  
moy , car certes je n'en feray plus. Monseigneur qui

voit son mignon en son opinion aheurté, pour ce coup plus ne le pressa ; mais certaine piece comme de trois ou quatre jours sans faire en riens semblant des paroles precedentes, entre aultres deuises a son mignon demanda quelle viande il mangeoit plus volentiers, & il luy respondit que nulle viande tant ne luy plaisoit que pastés d'Anguille. Saint Jehan ! c'est bonne viande, dit le maistre ; vous n'avez pas mal choisi. Cela se passe, & Monseigneur se trait arriere & mande vers luy venir ses maistres d'hostel, auxquels il enchargea si chier qu'ils le vouloient obeir, que son mignon ne fust seruy d'aultres choses que de pastés d'Anguille, pour riens qu'il dit ; & ils respondirent promettant d'accomplir son commandement : ce qu'ils firent tres bien. Car comme ledit mignon fut a table pour mangier en sa chambre le propre jour du commandement, ses gens luy apporterent largement de beaulx & gros pastés d'Anguille qu'on leur deliura en la cuisine, dont il fut bien joyeux. Si en mengea tout son saoul, a lendemain pareillement : cinq ou six jours ensuiuans tousjours ramenoient ces pastés en jeu, dont il estoit ja tout ennuyé. Si demanda ledit mignon a ses gens se l'on ne seruoit leans que des pastés. Ma foi, dirent ils, Monseigneur, on ne vous baille aultre chose ; trop bien voyons nous seruir en salle & ailleurs d'aultre viande, mais pour vous il n'est memoire que de pastés. Le mignon saige que jamais sans grant cause pour sa bouche ne faisoit plainte, passa

encores plusieurs jours vſant de ces ennuyeux paſtés dont il n'eſtoit pas bien content. Si ſ'aduifa vng jour entre les aultres d'aller diſner avec les maiſtres d'hoſtel qui le firent ſeruir comme parauant de paſtés d'Anguilles , & quand il vit ce , il ne ſe peut plus tenir de demander la cauſe pourquoy on le ſeruoit plus de paſtés d'Anguille que les aultres , & ſ'il eſtoit paſté. Par la mort bieu, dit-il , j'en ſuis ſi houredé que plus n'en puis : il me ſemble que je ne vois que paſtés , & pour vous dire il n'y a point de raiſon ; vous la m'avez faite trop longue. Il y a ja plus d'vng mois que vous me faites ce tour , dont je ſuis tant maigre que je n'ay force ne puiſſance ; ſi ne ſcauroye eſtre content d'eſtre ainſi gouuerné. Les maiſtres d'hoſtel luy dirent que vrayement ils ne faiſoient choſe que Monſeigneur n'eust commandé , & que ce n'eſtoit pas par eulx. Noſtre mignon plein de paſtés ne porta gueres ſa penſée ſans la decouurir a Monſeigneur , & luy demanda a quel propos il l'auoit faiſ ſeruir ſi longuement de paſtés d'Anguilles , & defendu , comme diſoient les maiſtres d'hoſtel , qu'on ne luy baillaſt aultre choſe ; & Monſeigneur pour reſponce luy dit : Ne m'as tu pas dit que la viande que en ce monde tu plus aymes , ce ſont paſtés d'Anguilles. Par ſaint Jehan , ouy , Monſeigneur, dit le mignon. Et pourquoy doncques te plains tu maintenant , dit Monſeigneur , ſi je te fais bailler ce que tu aymes ? Ce que j'ayme , dit le mignon ; il y a maigre. J'ayme voyrement tres bien paſtés d'Anguilles

pour vne fois ou pour deux ou pour trois, ou de fois a aultre, & n'est viande que deuant je prinse ; mais de dire que tousjours je voulsisse auoir sans mangier aultre chose, par nostre Dame non feray. Il n'est homme qui n'en fust rompu & rebouté ; mon esto-  
mac en est si trauaillé, que tantost qu'il les sent il a assez disné. Pour Dieu, Monseigneur, commandez qu'on me baille aultre viande pour recouurer mon appetit, autrement je suis homme perdu. Ha dea, dit Monseigneur, & te semble t'il que je ne sois enuuyé, qui veulx que je me passe de la chair de ma femme, tu peulx penser par ma foy que j'en suis aussi saoul que tu es de pastés, & que aussi voulentiers me renouuelleroi je, j'acolt ce que point tant ne l'aymassé, que tu ferois d'aultre viande, que pourtant n'aymes que pastés ; & pour tout abreger, tu ne mangeras jamais d'aultre viande jusqu'a ce que me serues ainsi que saoulois, & me feras auoir des vnes & des aultres pour moy renouueller, comme tu veulx changer de viandes. Le mignon quand il entend le mystere & la subtile comparai-  
son que son maistre luy baille, fut tout confus & se rendit, promettant a son maistre de faire tout ce qu'il voudra pour estre quitte de ces pastés, voire ambassades & diligences comme parauant. Et par ce point Monseigneur, voire & pour Madame espergnier, ainsi que pouuons penser, au pourchatz du mignon passa le temps avec les belles & bonnes filles, & nostre mignon fut deliuré de ses pastés, & a son premier mestier ratellé & restably.

## XI. NOUVELLE.

*L'ENCENS AU DIABLE.*

**V**NG lasche paillard recraint , jaloux , je ne dis pas ceux , viuant a l'aïse , ainsi que Dieu scait que les entachez de ce mal peuuent sentir , & les aultres peuuent apperceuoir & ouïr dire , ne scauoit a que recourir a soy rendre pour trouuer guarison de sa douleur miserable & bien peu plainte maladie. Il faisoit huy vng pelerinage , demain vng autre , & aussi le plus souuent par les gens ses deuotions & offrandes faisoit faire , tant estoit assoté de sa maison , voire au mains du regard de sa femme , laquelle miserablement son temps passoit avec son tres maudit mary , le plus suspeconneux hongnart que jamais femme accointast. Vng jour comme il pensoit qu'il auoit fait & fait faire plusieurs offrandes a diuers saints de Paradis , & entre aultres a Monseigneur saint Michel , il s'aduïsa qu'il en feroit vne a l'ymaïge qui est soubz les pieds dudit saint Michel , & de fait commanda a l'vng de ses gens qu'il luy allumast & fist offre d'vne grosse chandelle de cire , en le priant pour son intention. Tantost son commandement fut accomply , & luy fut fait son rapport. Or ça , dit il en soy mesme , je vray si Dieu ou Diable

me pouroit guarir. En son accoustumé desplaisir s'en  
va couchier auprez de sa bonne & prudente femme  
& jacoit ce qu'il eut en sa teste des fantasies & pen-  
sées largement, si le contraignit nature qu'elle eut  
ses droits de repos, & de fait bien fermement s'en-  
dormit: & ainsy qu'il estoit au plus parfont de son  
somme, celuy a que ce jour la chandelle auoit esté  
offerte, par vision a luy s'apparut, qu'il le remercie  
de l'offrande que n'aguères luy auoit enuoyée, affer-  
mant que pieca telle offrande ne luy fut donnée;  
dist au surplus qu'il n'auoit pas perdu sa peine, &  
qu'il obtiendrait ce dont il auoit requis. Et comme  
l'autre tousjours perseueroit a son somme, luy sem-  
bla que a vng doigt de sa main vng anneau luy fut  
bouté, en luy disant que tant que cest anneau en  
son doigt seroit, jamais coux il ne seroit, ne cause  
aussy venir luy en-pourroit qui de ce le tentast. Aprez  
l'euanouissement de cette vision, nostre jaloux se re-  
ueille, & cuyda a l'vng de ses doigts ledit anneau  
trouuer, ainsy que semblé luy auoit, mais au der-  
riere de sa femme bien auant bouté l'vng de sesdits  
doigts & trouua, de quoy luy & elle furent tres es-  
bahis; mais du surplus de la vie au jaloux, de ses af-  
faires & maintiens cette histoire se taist.



## XII. NOUVELLE.

## L E V E A U.

**E**S mettes du pays de Hollande vng fol n'agueres se aduifa de faire du pis qu'il pourroit. C'est ascauoir soy marier; & tantost qu'il fut affubl  du doux manteau de mariage, jacoit ce que alors il fut yuer, il fut si tres fort eschauff  qu'on ne le scauoit tenir de nuit; encores veu que les nuits qui pour celle saison duroient neuf ou dix heures, n'estoient point assez suffisantes ne d'assez longue dur e pour estaindre le tres ardent desir qu'il auoit de faire lign e; & de fait quelque part qu'il rencontra sa femme, il la labouroit: fust en la chambre, fust en l'estable, ou en quelque lieu que ce fust, tousjours auoit vng assaut, & ne dura cette maniere vng mois ou deux seulement; mais si tres longuement que pas ne leouldroye escripre pour l'inconuenient qui souldre en pouroit, se la folie de ce grant ouurier venoit a la connoissance de plusieurs femmes. Que vous en diray je plus? il en fit tant que la memoire jamais estainte n'en fera audit pays. Et a la verit  la femme qui n'agueres au Baillif d'Amiens se complaignit, n'auoit pas si bien matiere de soy complaindre que ceste cy. Mais quoy qu'il fust, nonobstant que de  
cette



cette plaifante peine fe fust tres bien aucune fois paffée pour obeir, comme elle deuoit, a son mary, ne fut resbourfée a l'efperon.

Aduint vng jour aprez difner que tres beau temps faifoit, & que le foleil fes rayes enuoyoit & despartoit deffus la terre paincte & bordée de belles fleurs, fi leur print vouldenté d'aller jouër aux bois eulx deux tant feulement, & se mirent en chemin. Or ne vous faut il pas celer ce qui fert a l'hiftoire. A l'heure droitement que nos bonnes gens auoient cette deuocion d'aller jouër au bois, aduint qu'vng Laboureur auoit perdu son veau qu'il auoit mis paifstre dedans vng pré en vng pastis audit bois, lequel vint chercher, mais ne le trouua pas, dont il ne fut point trop joyeux. Si se mit en la queffe tant par le bois, comme ez prez, terres & places voisines de l'enuiron pour trouuer fondit veau; mais il n'en fcait auoir nouuelles. Il s'aduifa que par aduenture il se feroit bouté en quelque buiffon pour paifstre, ou dedans aulcune foffe herbuë, dont il pourroit bien faillir quand il auroit le ventre plein; & a celle fin qu'il puiſſe mieulx veoir & a son aife, fans aller courir ça & la, se son veau estoit ainſi comme il pensoit, il choisit le plus haut arbre & mieulx houchié de bois qu'il peut trouuer, & monte fus, & quand il se treuve au plus haut de cet arbre qui toute la terre d'enuiron couuroit, il luy fut bien aduis que son veau estoit a moitié trouué. Tandis que ce bon Laboureur jettoit les yeulx de tous coſtés aprez.

*Tome I.*

E

son veau , vecy nostre homme & sa femme que se boutent au bois chantans , jouans & faisans feste , comme font les cueurs gais quand ils se treuvent és plaisans lieux , & n'est pas merueille si le vouloir luy creut & le desir l'enhorta d'accoller sa femme en ce lieu si plaisant & propice pour executer ce vouloir a sa plaissance & a son beau loisir. Tant regarda vng coupt a destre , l'autre a senestre , qu'il appercent le tres bel arbre dessus lequel estoit ce Laboureur dont il ne scauoit riens , & soubz cet arbre se disposa , & conclud ces gracieuses plaissances accomplir. Et quand il fut au lieu , il ne demoura gueres aprez la semonce de sondit desir ; mais tantost mit la main a la besongne , & vous commença a assaillir sa femme , & la jette par terre : car a l'heure il estoit bien en ses gogues , & sa femme aussi d'autre part. Si la voulut veoir par deuant & par derriere , & de fait prend sa robe & la luy osta , & en cotte simple la met , aprez il la haussa bien hault maulgré elle , ainsi comme esforcé , & ne fut pas content de ce ; mais encores pour le bien véoir a son aise & sa beauté regarder , la tourne & reuire , & a la fin sur son gros derriere sa rude main par trois ou quatre fois il fait descendre , puis d'autre part la retourne ; & comme il eut son derriere regardé , aussi fait il son deuant : ce que la bonne simple femme ne veut pour rien consentir , mesme avec la grant resistance qu'elle fait , Dieu scait que sa langue n'estoit pas oyseuse ; or l'appelle maulgracieux , maintenant fol & enraigé ; l'autre fois des-

honneste, & tant luy dit que c'est merueille ; mais rien n'y vault, il est trop plus fort qu'elle, & si a conclud de faire inuentaire de ce qu'elle porte, si est force qu'elle obeisse, mieulx aimant, comme saige, le bon plaisir de son mary que par reffus le des-  
plaisir. Toute desfence du costé d'elle mis arriere, ce vaillant homme va passer temps a son deuant regarder, & se sans honneur, on le peut dire, il ne fut pas content se ses mains ne decououroient a ses yeulx les secretz dont il se deuoit bien passer d'anquere, & comme il estoit en cette profonde estude, il disoit : Maintenant je voy cecy, je voy cela, encores cecy, encores cela, & que l'oyoit, il voit tout le monde & beaucoup plus ; & aprez vne grande & longue pose, estant en cette gracieuse contemplacion, dit derechief : Sainte Marie, que je voy de choses ! He-  
las ! dit lors le Laboureur, bonnes gens ne veez vous point mon veau : sire vil me semble que j'en voy la queuë. L'autre iacoit qu'il fut bien esbahy subitement fit la responce, & dit : Cette queuë n'est pas de ce veau, & a tant point, & s'en va & sa femme aprez. Et qui me demanderoit qui le Laboureur mou-  
uoit de faire cette question, le Secretaire de cette histoire respond que la barbe du deuant de cette femme estoit assez & beaucoup longue, comme il est coustume a celles de Hollan le. Si cuydoit bien que ce fut la queuë de son veau, attendu aussi que le mary d'elle disoit qu'il veoit tant de choses, voire a pou prez tout le monde ; si pensoit en soy mesme

que le veau ne pouvoit gueres estre eslongné, & que  
 avec d'autres choses leans pourroit estre embusché.

---

XIII. NOUVELLE.

*LE CLERC CHATRE'.*

**A** Londres en Angleterre, auoit n'agueres vng  
 Procureur de Parlement qui entre les aultres  
 de ses seruiteurs auoit vng Clerc habile & diligent  
 & bien escriuant, que tres beau fils estoit, & que on  
 en doibt pas oblir pour vng homme de son aage il  
 n'estoit point de plus subtil. Ce gentil Clerc & vi-  
 goureux fut tantost prouoqué de sa maistresse, que  
 tres belle, gente & g acieuse estoit, & si tres bien  
 luy vint que aincoys qui luy osast oncques dire son  
 cas, le Dieu d'Amours l'auoit a ce menné, qu'il es-  
 toit le seul homme au monde qui plus luy plaisoit.  
 Aduint qu'il se trouua en place commode, & de fait  
 toute crainte mise arriere, a sadite maistresse son  
 tres gracieulx & doux mal racompta, laquelle pour  
 la grant courtoisie que Dieu en elle n'auoit pas  
 obliée, desja ainsi atteinte, comme dessus est dit,  
 ne le fit gueres languir; car aprez plusieurs excusa-  
 tions & remonstrances qu'en brieſ elle luy toucha,  
 que elle eust a autre plus aigrement & plus longue-  
 ment demennées, elle fut contente qu'il sceust qu'il

luy plaisoit bien. L'autre qui entendoit son latin, plus joyeux que jamais il n'auoit été, se aduifa de battre le fer tandis qu'il estoit chaud, & si tres fort sa besongne poursuiuit, qu'en peu de temps jouit de ses amours. L'amour de la maistresse au Clerc & du Clerc a elle, estoit & fut long tems si tres ardent, que jamais gens ne furent plus emprins; car en effet le plus souuent en perdoient le boire & le manger, & ne estoit pas en la puissance de malle bouche, de dangier ne d'autres telles maudictes gens de leurs bailler ne donner destourbier. A ce tres joyeux estat & plaisant passetemps se passerent plusieurs jours qui gueres aux amants ne durerent, que tant donnez l'vng a l'autre s'estoient, qu'a peu ils eussent quitté a Dieu leur part de Paradis pour viure au monde leur terme en cette façon. Et comme vng jour aduint que ensemble estoient, & des tres haults biens qu'amour leur souffrit prendre se deuisoient entre eux, en eulx pourmenant par vne salle, comment cette leur joye nonpareille continuer seurement pourroient, sans que l'embusche de leur dangereuse entreprinse fust decouuerte au mary d'elle, qui du renc des jaloux se tiroit tres prez & du hault bout; pensez que plus d'vng aduis leur vint au deuant que je passe sans plus au long le descrire. La finale conclusion & derniere resolution que le bon Clerc print, fut de tres bien conduire & a leur fin mener son entreprinse; a quoi point ne faillit: vey comment. Vous deuez scauoir que l'accointance & alliance que

le Clerc eut a sa maistresse , laquelle diligemment seruoit & luy complaisoit , que aussi n'estoit pas moins diligent de seruir & complaire a son maistre , & tout pour tousjours mieulx son fait courir , & aueugler les jaloux yeulx qui pas tant ne se doubtoient que on luy en forgeoit bien la matiere. Vng certain jour aprez nostre bon Clerc voyant son maistre assez content de luy , entreprint de parler & tout seul tres humblement , doucement & en grant reuerence a luy , & luy dit qu'il auoit en son cueur vng secret que volentiers luy declairat s'il osat ; & ne vous faut celer que tout ainsi comme plusieurs femmes ont larmes a commandement que elles espendent au moins aussi souuent qu'elles veulent , si eut a ce coup nostre bon Clerc qu'a grosses larmes , en parlant , des yeulx luy descendoient en tres grande habondance , & n'estoit homme qui ne cuydast qu'elles ne fussent de contricion , de pitié ou de tres bonne intencion. Le poure maistre abuzé oyant son Clerc , ne fut pas vng peu esbahi ne esmerueillé ; mais cuydoit bien qu'il y eust aultre chose que ce que aprez il sceut. Si dit : Et que vous fault il , mon filz , & que auez vous a plorer maintenant ? Helas , sire , & j'ay bien cause plus que nul aultre de me doulour ; mais helas mon cas est tant estrange , & non pas moins piteulx ne moins seur tout temps d'estre celé , que nonobstant que j'aye eu vouloir de le vous dire , si m'en reboure crainte quand j'ay au long a mon malheur pensé.

Ne plorez plus , mon filz , respond le Maistre , & si me dictes qu'il vous fault , & je vous assure , s'en moy est possible de vous aider , je m'y emploirai volontiers comme je dois. Mon maistre , dit le regnard , je vous mercie ; mais quand j'ay bien tout regardé , je ne pense pas que ma langue eust la puissance de decourir la tres grant infortune que j'ay si longuement portée. Ostez moy tous ces propos & toutes ces doleances , respond le maistre ; je suis celui a que riens ne devez celer : je veul scavoir ce que vous auez , auancez vous & me le dictes. Le Clerc scaichant le tour de son baston , s'en fit beaucoup prier & a tres grant crainte par semblant , & a tres grant habondance de larmes , & a volenté se laisse ferrer , & dit qu'il luy dira ; mais qu'il luy veuille promettre que par luy jamais personne n'en scaura nouvelle , car il aimeroit autant ou plus chier mourir que son malheureux cas fust cogneu. Cette promesse par le maistre accordée , le Clerc mort & descouluré comme vng homme jugié a pendre , si va dire son cas. Mon tres bon maistre , il est vray que jacoit ce que plusieurs gens & vous aussi pourroient penser que je sceusse homme naturel comme vng aultre ayant puissance d'auoir compaignie avec femme , & de faire lignée , vous oseray je bien dire & montrer que point je ne sui's tel , dont helas trop je me deul ; & a ces parolles trop assurement tira son inembre , & luy fit monstre de la peau ou les C. . . . se logent , lesquels il auoit par industrie fait

monter en hault vers son petit ventre , & si bien les auoit cachiez qu'il sembloit qu'il n'en eut nulz. Or luy va dire : Mon maistre , vous voyez bien mon infortune dont je vous prie derechief qu'elle soit cee , & outre plus tres humblement vous requiere pour tous les seruices que jamais vous feis , que ne sont pas telz que j'en eusse eu la voulenté si Dieu m'eust donné le pouuoir , que me faciez auoir mon pain en quelque Monastere deuot , ou je puisse le surplus de mon temps au seruice de Dieu passer ; car au monde ne puis de riens seruir. Le abuzé & deceu maistre remonstra a son Clerc l'aspreté de Religion , le peu de merite que luy en viendroit quand il se veut rendre comme par desplaisir de son infortune , & foyson d'autres raisons luy amena , trop longues a compter , tendans a fin de l'oster de son propos. Scauoir vous fault il aussi que pour riens ne l'eut voulu habandonner , tant pour son bien escripre & diligence , que pour la fiance que dorefnauant a luy adjoutera. Que vous dirai je plus ? tant luy remonstra , que ce Clerc au fort pour vne espace en son estat & en son seruice demourer , luy promet ; & comme bien ouuert luy auoit son secret le Clerc , aussi le maistre le sien luy voulut deceler , & dit : Mon filz , de vostre infortune ne suis je point joyeux ; mais au fort , Dieu que fait tout pour le mieulx , & scait ce qui nous duit & vault mieulx , vous me pourrez dorefnauant tres bien seruir a mon pouuoir ; vous le meriteray. J'ai jeune femme assez legiere & volaige,

&



& suis, ainsi que vous veez, desja ancien & sur  
age, qui aucunement peut être occasion a plusieurs  
de la requerre de deshonneur, & a elle aussi, s'elle  
estoit aultre que bonne, me bailler matiere de la ja-  
lousie & plusieurs aultres choses. Je la vous baille &  
donne en garde, & si vous en priez que a ce tenez la  
main que je n'aye cause dans elle trouuer nulle ma-  
tiere de jalousie. Par grante deliberation fit le Clerc  
sa reponse, & quand il parla, Dieu scait s'il loua  
bien sa tres bonne & belle maistresse, disant que sur  
tous aultres il l'auoit belle & bonne, & qu'il s'en  
deuoit tenir seur. Neantmoins qu'en ce seruice &  
d'autres, il est celuy qui se veut du tout son cuer  
employer, & ne la laisser pour riens qu'il y puisse  
aduenir qu'il ne le aduertisse de tout ce que loyal  
seruiteur doit faire a son maistre. Le maistre lye &  
joyeux de la nouuelle garde de sa femme, laisse  
l'hostel, & en la ville a ses affaires va entendre, &  
bon Clerc incontinent fault a sa garde, & le plus  
longuement que luy & sa Dame bien oserent, n'es-  
pargnerent pas les membres qui en terre pouriront.  
Et ne firent jamais plus grant feste, depuis que l'ad-  
uenture fut aduenue de la façon subtile que son ma-  
ry abuseroient. Assez & longue espace dura le joli  
passetemps de ceulx que tant bien s'entreaumoient;  
& se aucunes fois le bon mary alloit dehors, il n'auoit  
garde d'emmener son Clerc, plustost eust emprunté  
vng seruiteur a ses voisins que l'autre n'eust gardé  
l'hostel; & se la Dame auoit congie d'aller en ay-

## 74 *LE CLERC CHATRE.*

cun pelerinaige , plutoſt allaſt ſans chambriere que ſans le tres gracieux Clerc ; & faiſtes votre compte , jamais Clerc ne ſe peult vanter d'auoir eu meilleure aduerture qui point ne vint a connoiſſance , voire au mains que je ſcaiche , a celui qui bien ſ'en fût deſeſperé , s'il en eut ſceu le demaine.

---

### XIV. NOUVELLE.

#### LE

## *FAISEUR DES PAPES*

#### O U

## *L'HOMME DE DIEU.*

**E**N la grante & large Marche de Bourgoigne ſi depourueü de pluſieurs aduertes dignes de memore & deſcripre , qu'a fournir les hiſtoires que a preſent courent , n'en puiſſe & doiue faire ſa part en renc des autres. Je ne oſe auant mettre ne en bruit ce que n'agueres y aduint aſſez prez d'vng gros & bon villaige , ſeant ſur la riuere d'Ouſche. La auoit , & encore a vne montaigne , ou vng Hermite , tel que Dieu ſcait , faiſoit ſa reſidence , lequel ſoubz vmbre du doux manteau d'hypocriſie , faiſoit des choſes merueilleuſes qui pas ne vindrent a connoiſſance ne en la voix publique du Peuple , juſques a

ce que Dieu plus ne voulut son tres damnable abus  
permettre ne souffrir. Ce saint Hermite qui de son  
coup a la mort se tiroit , n'étoit pas mains luxurieux  
que seroit vng viel cinge , mais la maniere du con-  
duire étoit si subtile qu'il fault dire quelle passoit les  
autres cautelles communes , vecy qu'il fit. Il regarda  
entre les autres femmes & belles filles la plus digne  
de estre aymée & désirée , si ce pensa que ce étoit la  
fille a une simple femme vesue tres deuote & bien  
aulmosniere , & va conclure en soy-mesme que se  
son sens ne lui fault qu'il en cheuira bien. Vng soir  
enuiron la mynuit qu'il faisoit fort & rude temps il  
descendist de sa montaigne , & vint a ce villaige , &  
tant passa de voyes & sentiers que a l'enuiron de la  
mere & la fille sans être oiseux se trouua, l'hostel n'é-  
toit pas si grant , ne si pou de lui hanté toute deuo-  
cion , qu'il ne sceut bien les engins. Si va faire vng  
pertuis en vne paroy non gueres espesse , a l'endroit  
de laquelle étoit le liêt de cette simple femme vesue,  
& prend vng long baston percé & creux dont il étoit  
hourdé , & sans la vesue esueiller auprez de son  
oreille le mit , & dit en assez basse voix par trois  
fois : Escoute moy femme de Dieu , je suis vng ange  
du Createur qui deuers toy m'enuoye , toy annoncer  
& commander que pour les haults biens qu'il a voulu  
en toy entrer qu'il veult par vng hoir de ta chair ,  
c'est a sçauoir ta fille , l'Eglise son espouse reünir ,  
reformer & en son état deu remettre , & vecy la fa-  
çon. Tu t'en iras en la montaigne deuers le saint

Hermite , & ta fille lui menneras & bien au long lui compteras ce qu'a present Dieu par moy te mande , il connoistra ta fille , & de eulx viendra vng filz esleu de Dieu & destiné au Saint Siege de Rome qui tant de bien feras que a saint Pierre & a saint Pol , l'on le pourra bien comparer , a tant men vois , obey a Dieu. La simple femme vefue tres esbahie , surprinse aussi & a demy raue cuida vraiment & de fait que Dieu lui enuoya ce messaiger , sy dit bien en elle même qu'elle ne desobeira pas , & puis la bonne femme se rendort. Vne grande piece aprez non pas trop fermement attendant & beaucoup desirant le jour , & entretant le bon Hermite prend le chemin deuers son hermitaige en la montaigne , ce tres desiré jour tost se monstra & fust par les raiz du soleil maulgré les verrieres des fenestres a coup descendu emmy la chambre de ladite vefue , & la mere & la fille se leuerent a tres grant hâte. Quant elles furent prêtes & sur piez mises , & leur peu de mesnaige mis a point. La bonne mere si demanda a sa fille s'elle auoit riens ouy en cette nuyt , & la fille lui respond certes mere nenny. Ce n'est pas a toy dit-elle , aussi que de prinssault ce doux messaige s'adresse combien qu'il te touche beaucoup. Lors lui va dire & racompter tout au long l'angelique nouuelle que en cette nuyt Dieu lui manda. Demande aussi quelle en veult dire la bonne fille comme sa mere simple & deuote respond Dieu soit loué. Tout ce qu'il vous plaira ma mere soit fait. C'est tres bien dit , respond

la mere: Or nous en allons en la montaigne a la ser-  
monce du bon ange deuers le saint Preudomme. Le  
bon Hermite faisant le guet, quant la deceuë femme  
sa simple fille ameneroit, la voit venir si laisse son  
huys entreouuert, & en priere se va mettre emmy  
la chambre: affin qu'en deuotion fut trouue, &  
comme il desiroit il aduint, car la bonne femme &  
sa fille aussi voyans l'huys entreouuert, sans deman-  
der quoy ne comment, dedans entrerent, & comme  
elles apperceurent l'Hermite en contemplacion,  
comme s'il fut Dieu, l'honnourerent. L'Hermite a  
voix humble en cachant les yeulx & vers la terre en-  
cliné, dit, Dieu salue la compaignie & la pource  
vieillotte desirant qu'il sceut la chose qui l'amenoit,  
le tira a part, & lui va dire de chief en chief, & de  
bout en bout tout le fait, qu'il scauoit & trop  
mieulx qu'elle, & comme en grant reuerance faisoit  
raport, le bon Hermite gettoit ses yeulx en hault,  
ioygnoit les mains au ciel, & la bonne vieille plou-  
roit tant auoit de joye & de pitié & la pource fille  
aussi plouroit quant elle veioit ce bon & saint Her-  
mite en si grande deuotion prier & ne scauoit pour-  
quoy. Quant ce raport fut tout au long acheué dont  
la vieillotte attendoit la responce, celui qui la doit  
faire ne se haste pas. Au fort certaine piece apres  
quand il parla, ce fut en disant: Dieu soit loué.  
Mais ma mie, dit-il, vous semble il a la vérité a  
votre entendement, que ce que ey vous me dictes  
ne soit point fantasie ou illusion, que vous en juge.

le cueur , faichez que la chose est grande. Certainement beau pere , j'entendis la voix que cette joyeuse nouvelle me apporta aussi plainement que je fais vous , & creez que je ne dormoye pas. Or bien , dit-il , non pas que je vueille contredire au vouloir de mon Createur , ce me semble il bon que vous & moy dormirons encores sur ce fait , & s'il vous appert de rechief , vous reviendrez ici vers moy , & Dieu nous donnera bon conseil & aduis ; on ne doit pas trop legierement croire ma bonne mere , le Diable est aucunesfois enuieulx d'aultrui , bien treuve tant de cautelles , & se transforme en ange de lumieres. Creez creez ma mere que ce n'est pas peu de chose de ce fait cy , & se ie y mets vng peu de reffus , & que ne vueille pas l'accomplir ce n'est pas merueilles , ne ay-je pas a Dieu voué chasteté , & vous m'apportez la rompeure de par lui , retournez en votre maison , & priez Dieu , & au surplus demain nous verrons que ce fera , & a Dieu soyez. Aprez vng grant tas de agios se part la compaignie de l'Hermite , & vindrent a l'hostel tout deuissant. Pour abregger , nostre Hermite a l'heure accoutumée & deuë fourny du baston creux , en lieu de potence , reuint a l'oreille de la simple femme vefue disant les propres mots ou en substance de la nuyt precedente , & ce fait incontinent sans autre chose faire retourne a son hermitage , la bonne femme emprinse de joye cuydant Dieu tenir par les piez se lieuë de hault heure , & a sa fille racomppte toutes ces nouvelles.

sans doute ; & confermant la vision de l'autre nuyt  
 passée il n'est que d'abregier. Or allons deuers le saint  
 homme. Elles s'en vont & il les regarde approcher ,  
 si va prendre son breuiare faisant de l'ypocrite , &  
 pensez que il le faisoit en grande deuotion , Dieu le  
 sçait , & puis aprez son seruice print a recommencer ,  
 & en cet état deuant l'huyz sa maisonnette se fait des  
 bonnes femmes saluer. Et pensez que se la vieille  
 lui fit hier un grant prologue de sa vision , celui de  
 maintenant n'est de rien maindre , dont le preud-  
 homme se signe du signe de la croix , faisans grans  
 admiracions a merueilles , disant mon Dieu mon  
 Createur qu'est cecy , fais de moy tout ce qu'il te  
 plaist , combien que ce n'étoit ta large grace , ie ne  
 suis pas digne de escouter vng si grant œuvre. Or re-  
 gardez beau pere , dit lors la bonne femme abusée  
 & follement deceuë. Vous voyez bien que c'est a  
 certes quant de rechief s'est apparu l'ange vers moy.  
 En verité ma mie , cette matiere est si haulte & si  
 très difficile & non accoutume que ie n'en sçauroye  
 bailler que douteuse responce. Non mye afin que  
 vous entendez seurement que en attendant la tierce  
 apparicion ie vueille que vous temptez Dieu. Mais  
 on dict de coutume a la tierce fois vault la luitte , si  
 vous prie & requiers que encore elle se puisse passer  
 cete nuit sans autre chose faire , attendant sur ce fait  
 la grace de Dieu , & se par sa grande misericorde , il  
 lui plaise nous demonstrier en nuit comme les autres  
 nuits précédentes , nous ferons tant qu'il en sera

loué. Ce ne fut pas du bon gré de la simple vieille qu'on tardast tant d'obeir a Dieu, mais au fort l'Hermite est creu comme le plus faige. Comme elle fut couchée ou parfond des nouuelles qui en teste lui viennent, l'hypocrite peruers de sa montaigne descendu, lui inet son baston creux à l'oreille ainsi comme il auoit de coutume, en lui commandant de par Dieu comme son ange vne fois pour toutes qu'elle maine sa fille a l'Hermite pour la cause que dit est; elle n'oublia tantoit qu'il fut jour cette charge, car après les graces a Dieu de par elle & sa fille rendues se mettent au chennin par deuers l'hermitaige, ou l'Hermite leurs vint au deuant qui de Dieu les saluë & begnie, & la bonne mere trop plus que nulle autre joyeuse ne lui celast guères sa nouuelle apparicion, dont l'Hermite qui par la main la tient en sa chapelle la conuoie, & la fille va après & leans font leurs très deuotes oraisons a Dieu le tout puissant, qui ce très hault mystere leur a daigné demonstrier. Après vng peu de sermon que fist l'Hermite touchant songes, visions, apparicions qui souuent aux gens aduiennent, & il cheut en propos de toucher leur matiere pour laquelle étoient assemblez & pensez que l'Hermite les presche bien & en bonne deuotion, Dieu le sçait, puis que Dieu veult & commande que je fasse lignée papale, & le daigne reueller non pas vne fois ou deux seulement, mais la tierce d'abondance. Il faut dire, croire & conclure que c'est vng hault bien que de ce fait s'en ensuyua.



By m'est aduis que mieux on ne peut faire que d'abreger l'exécution en ce lieu, de ce que trop j'ay différé de bailler foy a la sainte apparicion. Vous dictes bien beau pere. Comment vous plaist il faire respond la vieille. Vous laisserez ceans dit l'Hermite vostre belle fille, & elle & moy en oraisous, nous mettrons & au surplus ferons ce que Dieu nous apprendra, la bonne femme vefue en fut contante, & aussi fut sa fille pour obeir, quand notre Hermite se treuve a part avecques la belle fille, comme se il la voulsist rebaptizer, toute nuë il la fait depouïller, & pensez que l'Hermite ne demoura pas vestu. Que en vouldroit le long compte il la tint tant & si longuement avecques lui, en lieu d'autre Clerc, tant allast aussi & vint a l'hostel d'elle pour la doubte des gens, & aussi pour honte qu'elle n'osoit partir de la maison. Car bientost apres le ventre si lui commença a bourser dont elle fut si joyeuse qu'on ne le vous sçauroit dire. Mais se la fille s'esjouissoit de sa portée, la mere d'elle en auoit a cent doubles joyes, & le maudit bigot faignoit aussi s'en esjouir. Mais il enraigeoit tout vif, cette pource abusée cuidant de vray que sa fille d'eust faire vng très beau fils pour le temps aduenir de Dieu esleu Pape de Rome, ne se peult tenir qu'a sa plus priuée voisine ne le contaft, que aussi esbahie en fut comme se cornes lui venoient, non pas toutesfois qu'elle ne se doubtaft de tromperie, elle ne celaft pas longuement aux aultres voisins & voisines, comme la fille d'une telle étoit

## 82 *LE FAISEUR DES PAP. &c.*

grosse par les œuvres du saint Hermite, d'vng fils qui doit être Pape de Rome, & ce que j'en sçay, dit-elle, la mere d'elle me l'a dit, a qui Dieu la voulu reueler. Cette nouuelle fut tantost espandue par les villes voisines, & en ce temps pendant la fille s'accoucha, qui a la bonne heure d'une belle fille se deliura, dont elle fut esmerueillée, & courroucée, & les voisines aussi que attendoient vraiment le Saint Pere aduenir, recevoir. La nouuelle de ce cas ne fut pas mains tost sçeuë que celle precedente, & entre aultres, l'Hermite en fut des premiers aduertis, qui tantost s'en fouyt en vng autre pays ne sçay quel, vne autre femme ou fille deuenir, ou és deserts d'Egypte de cuer contrit la penitence de son peché satisfaire. Quoy que soit ou fut la pource fille en fut deshonorée, dont ce fut grand dommaige, car belle, bonne & gente estoit.

---

### XV. NOUVELLE.

#### *NONNAIN SCAVANTE.*

**A**U gentil pays de Brebant prez d'vng Monastere de blancs Moines est scitué vng autre Monastere de Nonnains que très devotes & charitables sont, dont l'histoire taist le nom & la marche particuliere, ces deux maisons comme on dit de coutume étoient voisines: la grange & les bateurs: car Dieu mercy

## NONNAIN SCAVANTE. 83

La charité de la maison aux Nonnains étoit si très grande que peu de gens étoient escondis de l'amoureuse distribucion , voire si dignes étoient d'y celle recevoir. Pour venir au fait de cette histoire ou Cloistre des blancs Moines avoit vng jeune & beau Religieux que fut amoureux d'yne des Nonnains , & de fait eut bien le couraige aprez les premisses de lui demander a faire pour l'amour de Dieu , & la Nonnain que bien congnoissoit ses outilz , iacoi qu'elle fut bien courtoise lui baillast dure & aspre responce. Il ne fut pas pourtant enchassé , mais tant continua sa très humble requeste , que force fut a la très belle Nonnain ou de perdre le bruit de sa très large courtoisie , ou d'accorder au moins ce qu'elle avoit a plusieurs sans gueres prier accordé. Si lui va dire , en verité vous poursuivez & faictes grant diligence d'obtenir ce que a droit ne sçauriez fournir , & pensez vous que je ne faiche bien par ouï dire quelz outilz vous portez , créez que si fais , il n'y a pas pour dire grant mercy. Je ne sçay moy qu'on vous a dit respond le Moyne , mais je ne doute pas que vous ne soyez bien contente de moy & que ne vous monstre que je suis homme comme vng aultre , homme , dit-elle , cela croy ie assez bien , mais , vostre chose est tant petit comme l'on dit que se vous l'apportez en quelque lieu , a peu s'on s'apperçoit qu'il y est : il va bien autrement dit le Moyne , & se j'estoye en place je feroie , & par votre jugement , menteurs tous ceux ou celles que ceste renommée

me donnent : au fort aprez ce gracieux debat , la courtoise Nonnain afin d'être quitte de l'ennuyante poursuite que le Moyne faisoit , afin que elle saiche qu'il vault & qu'il sçait faire , & aussi qu'elle n'oublie le métier que tant lui plaît , elle lui baille jour a douze heures de nuyt deuers elle venir & heurter a sa trille dont elle fut haultement merciée : toutes-fois vous n'y entrerez pas que ie ne saiche dit-elle , a la verité quelz outilz vous portez , & se je m'en sçauroye ayder ou non , comme il vous plaira respond le Moyne , a tant s'en va & laisse sa maistresse , & vint tout droit deuers frere Contrard l'vng de ses compaignons que étoit outillé Dieu sçait comment , & pour cette cause auoit vng grant gouuernement ou Cloistre des Nonnains. Il lui contaist son cas tout du long , comment il a prié vne telle , la responce & le refus qu'elle fit doubtant qu'il ne soit pas bien fouiller a son pied , en la parfin comme elle est contente qu'il entre vers elle , mais qu'elle sente & saiche premier de quelle lance il voudroit iouster contre son escu , or est ainsi , dit-il , que je suis malourny d'une grosse lance , telle que j'espere & voy qu'elle desire d'être rencontrée. Si vous en prie tant comme je puis que en nuit vous venez avec moy a l'heure que je me dois vers elle rendre & vous me ferez le plus grant plaisir que jamais homme fist a autre. Je sçay très bien qu'elle voudra la moy venu sentir & taster la lance dont je attens a fournir mes armes , & en la fin ce faultra ce faire , vous serez

derriere moy sans dire mot & vous mettez en place & votre gros bourdon en son poing lui mettez : elle ouvrera l'huis ie n'en doubte point , & puis cela fait vous vous en yrez & dedens j'entreray , & puis du surplus laissez moy faire. Frere Conrard est en grant souci comment il pourra faire & complaire a son Compaignon mais toutesfois se met a l'avanture & tout ainsi que lui auoit dit s'en va & lui accorde ce marché , & a l'heure assignée se met avecques lui en chemin par deuers la Nonnain. Quant ils sont a l'endroit de la fenestre , maistre Moyne plus eschauffé que vng estalon de son baston vng coup heurte , & la Nonnain n'attendit pas l'autre heurt , mais ouvrit la fenestre & dit en basse voix que est cela ? c'est moy , dit-il , ouurez tost l'huis qu'on ne vous oye , ma foy , dit-elle , vous ne serez ia en mon diure enregistré ne escript , que premierement ne passez a monstre : & que ie ne saiche quel harnois vous portez. Approchez vous prés & me montrez que c'est. Très voulentiers , dit-il , alors tire frere Conrard lequel s'avançoit pour faire son personnaige que en la main de Madamé la Nonnain , mit son bel & très puissant bourdon que gros long & rond étoit , & tantost qu'elle le sentir comme se nature lui en baillast la connoissance , elle dit nenny nenny , dit-elle , je congnois bien cestuy cy. C'est le bourdon de frere Conrard. Il ne y a Nonnain ceans qui bien ne le congnoisse , vous n'avez garde que j'en soye deceuë je le congnois trop , allez querir votre aduen-

## 86 *NONNAIN SCAVANTE.*

ture ailleurs , & a tant sa fenestre referma bien cou-  
goucée & mal contente non pas frere Conrard , mais  
sur l'autre Moyne , lesquelz apres cette aduventure  
s'en retournerent vers leur hostel tout deuifant de  
cette aduventure.

---

### XVI. NOUVELLE.

## *LE BORGNE AVEUGLE.*

**E**N la Comté d'Artois n'agueres viuoit un gentil  
Cheualier riche & puissant , lyé par mariage avec  
vne très belle Dame de hault lieu ; ces deux ensem-  
ble par longue espace passerent plusieurs jours paissi-  
blement & doucement , & pource que alors le très  
puissant Duc de Bourgoigne Comte d'Artois , &  
leur Seigneur étoit en paix avec tous les grands  
Princes Chrétiens. Le Cheualier qui très deuot étoit  
délibéra faire a Dieu sacrifice du corps qu'il lui auoit  
prêté , bel & puissant assouui de taille d'être autant  
& plus que personne de sa contrée , excepté que  
perdu auoit vng œil en vng assault & pour faire son  
obligation en lieu esleu & de lui désiré. Apres les  
congiez a Madame sa femme prins & de plusieurs  
ses parents s'en va deuers les bons Seigneurs de  
Prusse vrais deffenseurs de la très saincte foy chré-  
tienne , tant fit & diligenta qu'en Prusse apres plu-  
sieurs aduentures que je passe sain & sauve se trouua.

## LE BORGNE AVEUGLE. 87

Il fit largement de grandes prouesses en armes, dont le grand bruit de sa vaillance fut tantost espandu en plusieurs marches, tant à la relation de ceulx qui veu l'auoient en leur pays retournez, que par lettres que les demeurez escriuoient à plusieurs que très grand gré leur en sçauoient. Or ne faut pas celer que Madame qui étoit demeurée, ne fut pas si rigoureuse qu'à la priere d'vng gentil Escuyer, qui d'amours la requit elle ne fut tantost contente qu'il fut Lieutenant de Monseigneur; qui aux Sarrazins se combattoit. Tandis que Monseigneur ieusne & fait penitence. Madame fait bonne chiere avecques l'Escuyer, le plus des fois Monseigneur se disne & soupe de biscuit & de la belle fontaine, & Madame a de tous les biens de Dieu si très largement que trop, Monseigneur au mieulx venir se couche en la paillade, & Madame en vng très beau liest avec son Escuyer se repose; pour abregier tandis que Monseigneur aux Sarrazins fait grand guerre, l'Escuyer & Madame se combat, & si très bien si porte, que se Monseigneur jamais ne retournoit elle s'en passeroit très bien, & a peu de regret, voire qu'il ne fasse autrement qu'il a commencé. Monseigneur voyant la, Dieu mercy, que l'effort des Sarrazins n'étoit point si aspre que par cy devant a été, sentant aussi que assez longue espace a laissé son hostel & sa très bonne femme que moult la desire & regrette comme par plusieurs de ses lettres, elle lui a fait sçauoir, dispose son partement & avec le peu de gens qu'il

auoit se meſt en chemin, & ſi bien exploicta a l'aide du grand deſir qu'il a de ſoy trouuer en ſa maiſon, & es bras de Madame, qu'en peu de jours ſ'y trouua. Celuy a qui cete haſte plus touche que a nul de ſes gens eſt tousiours des premiers deſcouchiez & premier prêt & le deuant au chemin, & de fait ſa trop grande diligence le fait bien ſouuent cheuaucher ſeul deuant ſes gens, aucunesfois vng quart de lieuë ou plus. Aduint vng jour que Monſeigneur étant au giſte enuiron a ſix lieuës de ſa maiſon ou il doit trouuer Madame, ſe leua bien matin & monta a cheual que bien lui ſemble que ſon cheual le rendra ſa maiſon auant que Madame ſoit deſcouchée, que riens de ſa venuë ne ſçait; ainſi comme il le propoſa il aduint, & comme il étoit en ce plaiſant chemin dit a ſes gens venez tout a votre aiſe, & ne vous chaille ja de moi ſuir, je m'en irai tout mon beau train pour trouuer ma femme au liſt ſes gens tous hodez & trauaillez & leurs cheuaux auſſi, ne contredirent pas a Monſeigneur, mais ſ'en viennent tout a leur aiſe aprez lui ſans eulx trauailler aucunement: mais pourtant ſi doubtoient ilz de monſieur ſeigneur, lequel ſ'en alloit ainſi de nuit tout ſeul & auoit ſi grand haſte; & il ſ'en va & fait tant qu'il eſt en brieſ en la baſſe court de ſon hoſtel deſcendu ou il trouua vng varlet qui le démonſtra de ſon cheual. Tout ainſi houzé & eſpronné quand il fut deſcendu, ſ'en va tout droit ſans rencontrer perſonne, car encores matin étoit, deuers ſa chambre ou  
Madame



Madame encores dormoit ou espoir faisoit, ce qui tant a fait Monseigneur trauailler. Crééz que l'huy n'étoit pas ouuert accause du Lieutenant que tout esbahi fut & Madanie aussi quand Monseigneur heurta de son baston vng très sourd coup, qui est cela dit Madame, c'est moy ce dit Monseigneur, ouurez ouurez, Madame que tantost a congneu Monseigneur a son parler ne fut pas des plus asseurées, néantmoins fait habiller incontinent son Escuyer que met peine de s'aduancer le plus qu'il peut, pensant comment il pourra eschapper sans danger.

Madame qui faine d'être encores toute endormie & non recongnoître Monseigneur, aprez le second heurt qu'il fait a l'huy demanda encores qui est cela. C'est votre mary Dame, ouurez bien tost ouurez. Mon mary dit elle, hélas il est bien loing d'icy, Dieu le remaine a joye & brief. Par ma foy Dame je suis vôtre mary : & ne me congnoissez vous au parler. Si tost que je vous ai ouy respondre je congneuz bien que s'estiés vous. Quant il viendra je le sçaurai beaucoup deuant pour le recepuoir ainfi comme je dois, & aussi pour mander Messeigneurs ses parens & amis pour le festoier & conuoier a sa bien venue. Allez allez & me laissez dormir. Saint Jehan je vous en garderay bien dit Monseigneur, il faut que vous ouurez l'huy, & ne voulez, & ne voulez vous congnoître votre mary. Alors l'appelle par son nom, & elle qui voit que son ami est ja tout prêt le fait mettre derriere l'huy. Et puis va dire a

Monseigneur estes vous ce pour Dieu pardonnez moy & estes vous en bon point. Ouy Dieu merci ce dit Monseigneur. Or loué en soit Dieu ce dit Madame. Je viens incontinent vers vous & vous mettrés dedens : mais que je soye un peu habillée & que j'aye de la chandelle. Tout a votre aise ce dit Monseigneur. En verité ce dit Madame tout a ce coup que vous auez heurté Monseigneur j'estoye bien empeschie d'vng songe qui est de vous & quel est il ma mie. Par ma foi Monseigneur il me sembloit a bon escient que vous étiez reuenu que vous parliez a moi & si voyez tout aussi cler d'un œil comme de l'autre. Pleust ores a Dieu ce dit Monseigneur. Nostre Dame ce dit Madame je croy que aussi faictes vous , par ma foi ce dit Monseigneur vous estes bien bête & comment ce pourroit il faire. Je tiens moy dit elle qu'il est ainsi , il n'en est riens, non dit Monseigneur, êtes vous bien si folle de le penser. Dea Monseigneur, dit elle , ne me creez jamais s'il n'est ainsi , & pour la paix de mon cueur je vous requier que nous l'esprouuons , & a ce coup elle ouura l'huy tenant la chandelle ardante en sa main , & Monseigneur qui est content de cette esprouue & si accorde par les parolles de sa femme , & ainsi le pource homme endura bien que Madame lui boucha son bon œil d'une main , & de l'autre elle tenoit la chandelle deuant l'œil de Monseigneur qui creué étoit , & puis lui demanda Monseigneur ne veez vous pas bien par votre foy. Par mon serment non ce dit Monseigneur ,

& entretant que ces deuises se faisoient le Lieutenant  
 de mondit Seigneur fault de la chambre sans qu'il  
 fut apperceu de lui. Or attendez Monseigneur ce dit  
 elle, & maintenant vous me voyez bien, ne faictes  
 pas. par Dieu ma mie nenny respond Monseigneur  
 comment vous veroy ie vous avez bouchiez mon des-  
 tre œil & l'autre est creué passé a plus de dix ans. Alors  
 dit elle et voy ie bien que s'estoit songe voyrement  
 qui ce raport me fit, mais quoy que soit Dieu soit  
 loué & gracie que vous êtes cy. Ainsi soit il ce dit  
 Monseigneur & a tant s'entracolerent & baisèrent  
 par plusieurs fois, & firent grant feste, & n'oublia  
 pas Monseigneur conter comment il avoit laissé ses  
 gens derriere, & que pour la trouver au lit il auoit  
 fait telle diligence, vrayement dit Madame encores  
 êtes vous bon mary, & a tant vindrent femmes &  
 seruiteurs qui bien veignerent Monseigneur & le des-  
 houserent & de tous points deshabillerent, & ce fait  
 ee bouta ou lit avec Madame qui le repeut du de-  
 mourant de l'Escuier qui s'en va son chemin lye &  
 joyeux destre ainsi eschappé. Comme vous avez ouy  
 fut le Cheualier trompé & n'ay point sceu, combien  
 que plusieurs gens depuis le sceurent, qu'il en fut ja-  
 mais aduerti.



XVII. NOUVELLE.

LE CONSEILLER  
AU BLUTEAU.

**E**N la ville de Paris presidoit en la Chambre des Comptes vn grant Clerc Chevalier assez sur aage , mais très joyeux & très plaisant étoit , tant en sa manière d'être , comme en deuise , ou qui les adressast fut aux hommes fut aux femmes. Ce bon seigneur avoit femme espousée desja ancienne & maladiue dont il auoit belle lignée & entre les autres Damoiselles chambrières & seruantes de son hostel , celle ou nature auoit mis son atteinte de la faire très belle , étoit meschine faisant le mesnaige commun comme les lits , le pain , & autres telz affaires.

Monseigneur que ne jeuſnoit jour de l'amoureux mestier tant qu'il trouuaſt rencontre , ne cela guères a la belle meschine le grant bien qu'il lui veult , & lui va faire vng grant prologue des amoureux assaults que incessamment amours pour elle lui enuoye , continuë aussi ce propos , lui promettant tous les biens du monde , monstrant comment il est bien en lui de lui faire tant en telle maniere & tant en telle , & qui oyoit le Cheualier jamais tant d'eür n'aduint

La meschine que de lui accorder son amour. La belle meschine bonne & saige ne fust pas si beste que aux gracieux mots de son Maître baillast response en riens a son aduantage, mais se excusa si gracieusement que Monseigneur en son couraige très bien l'en prisa & aima, combien qu'il aimast mieulx quelle fust autre chemin, motz rigoureux vindrent en jeu par la bouche de Monseigneur quant il apperceut que pour douceur ne feroit rien, mais la très-bonne fille aymant plus chier mourir que perdre son honneur, ne s'en effroia guères, ainsi asseurement respondit, dit & fasse ce qu'il lui plaist mais jour qu'elle viue de plus prez ne lui sera, Monseigneur que la voit aheurtée en cette opinion, aprez vng gracieux adieu, laissa ne sçay quans jours ce gracieux pourchat de bouche seulement, mais regards, & autres petits signes ne lui coustoient guères, qui trop étoient a la fille enuieux, & s'elle ne doubtaست mettre malle paix entre Monseigneur & Madame, elle ne lui celeroit guères la desloyaulté de son seigneur. Mais au fort elle conclud le deceler tout le plus tard quelle pourra.

La deuocion que Monseigneur auoit aux sains de la meschine de jour en jour croissoit, & ne lui souffisoit pas de laymer & seruir en cuer seulement, mais d'oraison comme il a fait cy devant la veult arriere reseruir. Si vient a elle & de plus belle recommença sa harangue en la façon que dessus, laquelle il confermoit par cent mille serments & autant de pro-

## 94 LE CONSEILLER

messes. Pour abregier, riens ne lui vault, & ne peut obtenir vng seul mot & encores moins de semblans qu'elle lui baille quelque peu despoir de jamais paruenir a ses atteintes, & en ce point se partit, mais il noublia pas de dire que s'il la rencontre en quelque lieu marchand qu'elle l'obeira ou elle fera pis. La meschine gueres ne s'en effroia, & sans plus y penser va besoigner en la cuisine ou autre part ne sçai, quand jours aprez vng lundy matin la belle meschine pour faire des pastez blustoit de la farine. Or debuez vous sçauoir que la chambre ou ce faisoit ce métier ne étoit pas loing de la chambre de Monseigneur, & qu'il oyoit très bien le bruit & la noise qui se faisoit, & encores sçauoit aussi très bien que c'étoit la meschine qui des tamis jouoit. Si s'aduifa qu'elle n'aura pas seule cette peine mais lui viendra aider voire & lui fera au surplus ce qu'il lui a bien promis, car jamais mieulx ne la pouroit trouuer; dit aussi en soy même quelques reffus que de la bouche elle m'ait fait, si en eueiray ie bien si je la puis a gré tenir, il regardast que bien Inatin étoit & que Madame n'étoit pas esueillée; dont il fut bien joyeux, & afin qu'il ne l'esueille il sault tout doucement hors de son list a tout son couurechief & prend sa robe longue & ses bottines & descend de sa chambre si celément, qu'il fut dedens la chambre ou la meschine dormoit sans qu'elle oncques en sçeut riens jusques a tant qu'elle le vit tout dedens, qui fut bien esbahie, ce fut la poure cham-

brière que a pou trembloir, tant étoit effrée, doub-  
 tant que Monseigneur ne lui ostant ce que jamais  
 rendre ne lui sçauoir, Monseigneur qui la voit ef-  
 frée sans plus parler lui baille vng fier assault, &  
 tant fist en peu d'heures qu'il auoit la place empor-  
 tée s'il n'eut été content de parlementer. Si lui va  
 dire la fille, hélas Monseigneur je vous crie mercy  
 je me rends a vous, ma vie & mon honneur sont en  
 votre main ayez pitie de moi. Je ne sçai quelle hon-  
 neur dit Monseigneur que très eschauffé & espris  
 étoit, vous passerez par là. Et a ce mot recommence  
 l'assault plus fier que deuant. La fille voyant. que  
 eschapper ne pouuoit s'aduifa d'vng bon tour & dit  
 Monseigneur j'aime mieulx vous rendre ma place  
 par amour que par force, donnez fin s'il vous plaît  
 aux durs assauls que me liurez, & je feray tout ce  
 qu'il vous plaira. J'en suis content dit Monseigneur,  
 mais creez que autrement vous neschapperez. D'vne  
 chose je vous requiers dit lors la fille, Monseigneur  
 je doute beaucoup que Madame ne vous oye & se  
 elle venoit dauanture, & droit cy vous trouuast, je  
 seroye femme perduë & deshonorée, car elle me  
 feroit du mains battre ou tuer, elle n'a garde de  
 venir, non dit Monseigneur, elle dort au plus fort.  
 Hélas Monseigneur je doute tant que je n'en sçay-  
 être assurée, si vous prie & requiert pour la paix  
 de mon cuer & plus grande seureté de notre be-  
 soigne, que vous me laissez aller voir s'elle dort ou  
 quelle fait. Nostre Dame tu ne retourneroyz pas dit

## 96 LE CONSEILLER

Monseigneur, si feray dit elle par mon serment tres-  
 tout tantost. Or je le vueille, dit il, auance toy. Ha  
 Monseigneur dit elle, se vous voulez bien faire vous  
 prendriez ce tamis & besoigneriez comme je fai-  
 soie, afin d'auenture se Madame étoit esueillée  
 qu'elle oye la noise que j'ay deuant le jour encom-  
 mencée. Or monstre ça je feray bon deudir, & ne  
 demeurez gueres: nenny Monseigneur tenez aussi ce  
 bluteau sur votre teste, vous semblerez tout a bon  
 escient être vne femme. Or ça de pardieu, dit il. Il  
 fut affublé de ce bluteau, & puis commence a tami-  
 ser, tant que c'étoit belle chose que tant bien lui  
 seoit, & entretant la bonne chambriere monta en la  
 chambre & esueilla Madame, & lui compta com-  
 ment Monseigneur parcy deuant damours l'auoit  
 priée, qu'il l'auoit assaillie a cette heure ou elle ta-  
 misoit, & s'il vous plaist venir voir comment j'en  
 suis eschappée & en quel point il est. Venez en bas  
 vous le verrez, Madame tout a coup se lieue, &  
 prend sa robe de nuit & fut tantot deuant l'huis de  
 la chambre ou Monseigneur diligemment tamisoit,  
 & quant elle le voit en cet état, & affublé du blu-  
 teau, elle lui va dire. Sa Maître, & qu'est ce cy,  
 ou sont vos Lettres, vos grands honneurs, vos scien-  
 ces & discretions, & Monseigneur que l'ouit & de-  
 ceu se veoit respondit tout subitement. Au bout de  
 mon v. . Dame, la ay ie tout amassé aujourd'hui,  
 lors très mary & couruocé sus la meschine se desar-  
 ma de l'estamine & du bluteau & en sa chambre re-  
 monte



monte & Madame le suit qui son preschement recommence, dont Monseigneur ne tient gueres de compte ; quant il fut prest il manda sa mule, & au palais s'en va ou il compta son aduenture a plusieurs gens de bien qu'il sen rirent bien fort, & me dit on depuis quelque couroux que le seigneur eust de prin-fault a sa meschine ; si laïda il depuis de sa parolle & de cheuance a marier.

XVIII. NOUVELLE.

LA PORTEUSE

DU VENTRE ET DU DOS.

**V**N Gentilhomme de Bourgoigne n'a guères pour aucuns de ses affaires s'en alla a Paris, & se logea en vng très bon hostel : Car telle étoit sa coutume de tousjours querir les meilleurs logis. Il neut guères esté en son logis lui que bien congnoissoit mouche en lait qu'il n'apperceut tantost que la chamberiere de leans étoit femme que deuoit volentiers faire pour les gens ; si ne lui celast guères ce qu'il auoit sur le cueur, & sans aller de deux en trois il demanda l'aumosne amoureuse. Il fut de prin-fault bien rechassé des meures, voire dit elle est-ce a moy que vous deuez adresser telles parolles. Je veuil

*Tsme I.*

I

bien que vous sachez que je ne suis pas celle que fera tel blâme a l'hostel ou je demeure & pour abregier qui loioit, elle ne le feroit pour aussi gros d'or ; Le gentil homme tantost congneut que toutes ses excusations étoient érres pour besongner , si lui va dire ma mye se jeusse temps & lieu , je vous diroye telle chose que vous seriez bien contente , & ne doubtez point que ce ne fut grandement vostre bien , ma mye pource que deuant les gens ne vous vueille guéres arraisonner afin que ne soyez de moy suspeconnée. Croiez mon homme de ce que par moy vous dira , & se ainsi le faictes vous en vauldrez mieulx , je n'ay dit elle n'a vous na lui que deuifer & sur ce point s'en va , & nostre gentil homme appella son varlet qui étoit vn gallant tout esueillé , puis lui compta son cas & le charge de poursuivre sa besongne sans espagner bourdes. Le varlet duit a cela , dit qu'il fera bien son personnaige : il ne l'oublia pas : car au plutôt qu'il la trouua : pensez qu'il jouïa bien du bec. Et se elle neust été de Paris , & plus subtile que foison d'autres , son gracieux langaige , & les promesses qu'il faisoit pour son maistre l'eussent tout en haste abbatuë , mais autrement alla car aprez plusieurs parolles & deuises d'entre elle & lui , elle lui dit vng mot trencé , je sçay bien que vostre maistre veult , mais il ne touchera ja se je n'ay dix escus. Le varlet fist son rapport a son maistre qui n'étoit pas si large voire au moins en tel cas que donner dix escus pour jouïr d'une telle Damoiselle. Quoy que soit elle

n'en fera autre chose dit le varlet , encores y a t'il bien maniere de venir en sa chambre , car il faut passer parmi celle a l'hoste. Regardez que vous voudriez faire. Par la mort bieu dit il mes dix escus me font bien mal den ce point les laisser aller : mais j'ay si grante deuocion au saint & si en ay fait tant de poursuite que il faut que ie besongne au Dyable soit chichette, elle les aura , pourtant vous dis-je dit le varlet, voulez vous que je lui die quelle les aura. Ouy de par le Dyable, ouy dit il , le varlet trouua la bonne fille & lui dit quelle aura ces dix escus, voire & encores mieulx cy après , trop bien dit elle , pour abregier leure fut prinse que l'escuyer doit venir coucher avec elle mais auant que onques le voulist guyder par la chambre de son maistre en la sienne , il bailla tous les dix escus content ; qui fut bien mal content ce fut notre homme qui se pensa en passant par la chambre & cheminant aux nopces que trop chier a son gré lui coustoient, qu'il jouera d'vng tour. Ils sont venus si doucement en la chambrette que Maistre & Dame rien n'en scauent. Si se vont despoüiller , & dit nostre escuyer qu'il emploiera son argent s'il peut. Il se met a l'ouuraige & fait merueilles d'armes & espoir plus que bon ne lui fut ; tant en deuise que aultrement se passerent tant d'heures que le jour étoit voisin & prochain a celui qui plus volentiers eut dormy que nulle autre chose fait , mais la très bonne chamberiere lui va dire. Or ça sire pour le très grant bien , honneur &

courtoisie que j'ay ouy & veu de vous, j'ay été contente mettre en vostre obeissance & jouïssance la chose en ce monde que plus doit chier tenir, ie vous prie & requier que incontinent vous vueillez apprêter, habiller & de cy partir, car il est deja haulte heure, & se d'avanture mon maître ou maitresse venoient cy comme assez est leur coutume au matin, & vous trouuasse je seroye perduë & gastée, & voup promets que ne ferez pas le miculx party du jeu. Je ne sçay moy dit l'escuier, quel bien ou quel mal : mais ie me reposeray & si dormiray tout a mon aise & a mon beau loisir auant que je parte, & aussi je vueille employer mon argent, pensez vous auoir si tost gagné mes dix escus. Ils ne vous coustent guères a prendre, mais par la mort bieu afin que je ne aye paour, & que point je ne me espan-  
te, vous me ferez compaignie s'il vous plaît, ah Monseigneur dit elle il ne se peult ainsi faire par mon serment, il vous conuient partir, il sera jour tout en haste & se on vous trouuoit icy que seroit ce de moy, j'aymeroie mieulx être morte que ainsi en aduenist, & si vous ne vous aduancez, ce que trop je doubte en aduiendra, il ne me chaud moy qu'il adueigne dit l'escuier ; mais je vous dis bien que se ne me rendez mes dix escus ia ne m'en partirai. Aduiengne ce que aduenir peult, voz dix escus dit elle ? & êtes vous tel, se vous mauez donné aucune courtoisie ou gracieuseté que vous me voulez aprez retollir par cette façon sur ma foy vous

montrez mal que vous soyez gentil homme. Tel que je suis dit il je suis celluy qui de cy ne partiray ne vous aussi , tant que me ayez rendu mes dix escus, vous les auriez gaignez trop aise. Ha , dit elle, si mayt Dieu quoy que vous disiez ie ne pense pas que vous soyez si mal gracieux attendu le bien qui est en vous, & le plaisir que je vous ay fait que fussiez si peu courtois que vous ne aydissiez a garder mon honneur, & pour ce de rechief vous supplie que ma requête passez & accordez & que de cy vous partez , l'escuyer dit qu'il n'en fera rien, & pour abregier force fut a la bonne gentille femme a tel regret que Dieu sçait, de desbourser les dix escus afin que l'escuyer s'en allast : quant les dix escus refurent en la main dont ils étoient partis , celle que les rendit cuida bien enrager tant étoit mal conten-  
te , & celluy qui les a leur fait grant chiere. Or avant dit la couroucée & desplaisante que se voit ainsi gouverner , quant vous vous êtes bien joué & farsé de moy , au moins aduancez vous & vous suffise que vous seul congnoissiez ma folie & que par votre tarder elle ne soit congneue de ceulx qui me deshonoront s'ils en voient l'apparence ; a votre honneur dit l'escuyer point je ne touche , gardez le autant que vous l'aimez , vous m'avez fait venir ici , & si vous somme que vous me rendez & remettez au lieu dont je partis , car ce n'est pas mon intencion d'auoir les deux peines de venir & retourner. La chamberiere voyant que riens n'auoit eu si non le

courroucer, voyant aussi que le jour commençoit à apparoir, avecques tout le déplaisir & crainte que son enuie cueur portoit dudit escuyer, se hourde de cet escuyer & a son col le charge, comme a tout ce fardeau, le plus souïef quelle oncques peut, le courtois gentil homme portoit tenant lieu de bahu sur le dos de celle qui sur son ventre l'auoit soutenu, laissa couler vng gros pet, dont le ton & le bruit firent l'hoste esueiller & demanda assez effréement que est la. C'est votre chamberiere sire dit l'escuyer qui me porte rendre ou elle m'auoit emprunté. A ces motz la pource gentile femme n'eut plus cueur puissance ne vouloir de soutenir son déplaisant fardeau : si va d'vng côté & l'escuyer de l'autre. Et l'hoste que bien congnoist que c'est, & aussi avecques ce s'en doubtoit bien parla très bien a l'épousée que toute demoura deceuë & scandalisée, & tost après se partir de leans, & l'escuyer en Bourgoigne s'en retourna, qui aux galans & compaignons de sorte joyeusement & souvent racompta cette aventure dessus dicte.



## XIX. NOUVELLE.

*L'ENFANT DE NEIGE.*

**A**RDANT desir de voir pays , congnoistre & sçauoir plusieurs experiences qui par le monde vniuersel de jour en jour aduiennent , nagueres si fort eschauffa lattrempé cueur & vertueux couraige d'un bon & riche marchand de Londres en Angleterre , que abandonna sa très belle & bonne femme , sa belle maignie d'enfant , parens , amis , heritages , & la plus part de sa cheuance & se partit de ce Royaulme assez bien fourny d'argent content & de très grande habondance de marchandises dont ledit pays de Angleterre peut d'autres pays seruir , comme d'estain de ris & foison d'autres choses que pour cause de briefueté ie passe : En ce premier uoyage vacqua le bon marchand l'espace de cinq ans , pendant lequel temps sa tres bonne femme garda tres bien son corps , fit son prouffit de plusieurs marchandises , & tant si tres bien le fit que son mary au bout desditz cinq ans tetourne , beaucoup la loüa & plusque parauant ayma : le cueur audit marchand , non encores content tant d'auoir veu & congneu plusieurs choses étranges & merueilleuses comme d'auoir gaigné l'argent fit arriere sur la mer

I liij

boutter , cinq ou six mois puis son retour , & s'en reua a l'aventure en étrange terre tant de Crétiens comme de Sarrazins & ne demoura pas si peu que les dix ans ne fussent passez , ainsi que sa femme le reuist ; trop bien lui escripuoit & assez souuent , & a celle fin quelle sceut qu'il étoit encores en vie. Elle qui jeune étoit & en bon point & que faulte n'auoit de nulz biens de Dieu , fors seulement de la presence de son mary fut contraincte par son trop demourer de prendre vng Lieutenant , qui en peu d'heure lui fit vng très beau filz. Ce filz fut noury & conduit avec les aultres ses freres d'vng cousté , & au retour du marchant mary de sa mere auoit le-dit enfant enuiron sept ans. La feste fut grande a ce retour d'entre le mary & la femme & comme ils furent en leurs joyeuses deuises & plaisans propos , la bonne femme a la semonce de son mary fait venir deuant eulx tous leurs enfans sans oublier celui qui fut gaigné en l'absence de celui en qui auoit le nom. Le bon marchant voyant la belle Compaignie de ses enfans recordant très bien du nombre d'eulx a son partement , le voit creu d'vng dont il est esbahy & moult esmerueillé. Si va demander a sa femme qui estoit ce beau fils le dernier ou renc de leurs enfans , que il est dit elle par ma foy sire il est nostre fils & que seroit il. Je ne sçay dit il , mais pource que plus ne l'auoie veu , auez vous merueilles si ie le demande. Sainct Jehan nenny dit elle , mais il est notre fils , & comment se peut il



faire dit le mary, vous n'étiez pas grosse a mon par-  
 tement, non vrayement dit elle que ie sceusse, mais  
 ie vous ose bien dire a la verité que l'enfant est vo-  
 tre, & que aultre que vous a moy na touchié. Je ne  
 le dis pas aussi dit il : mais touteffois il y a dix ans  
 que je partis, & cet enfant se monstre de sept,  
 comment doncques pourroit il être mien, l'auriez  
 vous peu porté plus que vng aultre, par mon serment  
 dit elle je ne sçay, mais tout ce que je dis est vray  
 se ie l'ay plus porté que vng aultre, il n'est chose  
 que ien saiche, & se vous ne me le feistes au partir  
 je ne sçay moy penser dont il peult être venu, sinon  
 que assez tost après votre departement vng iour i'es-  
 toye par vng matin en notre grant Jardin, ou tout  
 a coup me vint vng soudain desir & appetit de men-  
 ger vng feüille doüille qui pour icelle heure étoit  
 couuerte, & sous la neige tapie. J'en choisis vne  
 entre les aultres belle & large que je cuiday aualler,  
 mais ce n'étoit que vng peu de neige blanche &  
 dure, & ne leuz pas si tôt auallée que ne me sen-  
 tisse en tel état que ie me suis trouuée quant mes  
 autres enfans ai portez. Ce fait a certaine piece de-  
 puis ie vous ai fait ce très beau fils. Le marchant  
 congneust tantost qu'il en étoit nozamis & n'en vou-  
 lut faire aucun semblant, aincois s'en vint adjoin-  
 dre par parolles a confermer la belle bourde que sa  
 femme lui bailloit & dit. Ma mye vous ne dictes cho-  
 se qui ne soit possible, & qu'a aultre que vous ne  
 soit aduenü, loue soit Dieu de ce qu'il nous a eue.

uoyé. S'il nous a donné vng enfant par miracle , ou par aucune secrette façon dont nous ignorons la maniere , il ne nous a pas oublié d'enuoyer cheuance pour l'entretenir. Quant la bonne femme vit que son mary vouloit condescendre a croire ce quelle lui dit , elle n'est pas moyennement joyeuse. Le marchant saige & prudent en dix ans qu'il fut depuis a l'hostel sans faire ses loingtains voyages ne tint oncques manieres enuers sa femme en parolles ne aultrement , pourquoy elle peust penser qu'il entendit riens de son fait tant étoit vertueux & patient. Il n'étoit pas encores saoul de voyager , si voulut recommencer & le dit a sa femme qui fist semblant d'en être très marrie & mal contente. Apaisez vous dit il , s'il plaist a Dieu Monseigneur saint George je reuiendray brief. Et pource que nostre fils que feistes en mon aultre voyage est desja grant habille & en bon point de veoir & d'apprendre se bon vous semble je l'emmeneray avecques moy , & par ma foy dit elle vous ferez bien & je vous en prie , il sera fait dit il. A tant se part , & avec lui emmaine le fils , dont il n'étoit pas pere a que il a pieca garde bonne pensée. Ils eurent si bon vent qu'ils sont venus au port d'Alexandrie , ou le bon marchand très bien se deffit de la plus part de ses marchandises , & ne fut pas si beste afin qu'il n'eust plus de charge de l'enfant de sa femme & d'vng aultre , & que après sa mort ne succedast en tous ses biens comme vng de ses aultres enfans qu'il ne

le vendist a très bons deniers contens pour en faire  
 vng esclave & pource qu'il étoit jeune & puissant.  
 Il en eust près de cent ducats. Quant ce fut fait il  
 sen reuint a Londres sain & sauf Dieu mercy , &  
 n'est pas a dire la chiere que sa femme lui fist quant  
 elle le vit en bon point , mais elle ne voit point son  
 fils dont ne sçait que penser. Elle ne se peut gué-  
 res tenir qu'elle ne demandast à son mary qu'il auoit  
 fait de leur fils. Ha , Madame , dit il , il ne vous le  
 fault ja celer. Il lui est très mal prins. Helas com-  
 ment dit elle est il noyé , nenny certes , mais il est  
 vray que fortune de mer nous mena par force en vng  
 pays ou il faisoit si chaud què nous cuidions tous  
 mourir par la grande ardeur du soleil que sur nous  
 ses rais espendoit , & comme vng jour nous étions  
 faillis de notre naue pour faire vn chascun vne fosse  
 a soy tapper pour le soleil , notre bon fils que de  
 neige comme vous sçavez étoit , en notre présence  
 sur le grauier par la grant force du soleil il fut  
 tout a coup fondu & en eauë resolu , & neussiez pas  
 dit vng sept-pseume que nous ne trouuassmes rien  
 de lui , tout ainsi soudain en est party & pensez  
 que j'en fus & suis bien desplaisant , & ne veis ja-  
 mais chose entre les merueilles que j'ay veuës dont  
 je fusse plus esbahi. Or auant dit elle puis qu'il  
 plaist a Dieu le nous oster comme il le nous auoit  
 donné louë en soit il. S'elle se doubtaist que la  
 chose allast aultrement , l'histoire sen taist & n'en  
 ait mencion , lorsque son mary lui rendist telle

comme elle lui bailla combien qu'il en demoura  
tousjours le Cousin.

---

## XX. NOUVELLE.

## LE MARI MEDECIN.

C E n'est pas chose nouuele qu'en la Conté de Champagne on a toujours recouuert de gens lourds en la taille, combien qu'il sembloit assez estrange a plusieurs, pourtant que ils sont si prez a ceulx du pays du mal engin, assez & largement d'histoires a ce propos pourroit on mettre confermant la bestise des Champenois, mais quant a présent celle que sensuit pourroit souffire. En la dicte Conté avoit vng jeune homme orphelin qui bien riche & puissant demoura puis le trepas de ses pere & mere, & iacoit que il feust lourd, très peu saichant, & encores aussi mal plaisant, si auoit vne industrie de bien garder le sien & conduire sa marchandise. Et a cette cause assez de gens; voire de gens de bien lui eussent bien voulu donner en mariage leur fille; vne entre les aultres pleut aux parens & amis de nostre Champenois, tant pour la beauté, bonté, & cheuance, &c. & lui dirent qu'il étoit tems qu'il se mariast, & que bonnement il ne pouuoit conduire son fait. Vous avez

aussi dirent ils desja vingt & quatre ans si ne pourriez en meilleur aage prendre cet état, & se vous y voulez entendre nous auons regardé & choisi pour vous vne belle fille & bonne qui nous semble très bien votre fait. C'est vne telle vous la congnoissez bien, lors la lui nommèrent. Et notre homme a qui nen challoit que il fit, fut marié ou non, mais qu'il ne tirast point d'argent, respondit, qu'il feroit ce quils vouldroient, puis qu'il vous semble que c'est mon bien conduisez la chose au mieulx que vous sçaurez. Car je vueil faire par votre conseil & ordonnance : vous dictes bien, dirent ces bonnes gens, nous le regarderons & y penserons comme pour nous mêmes ou pour l'vng de nos propres enfans. Pour abregier, certaine piece aprez, nostre Champenois fut marié, de par dieu ce fut, mais tantost qu'il fut auprès de sa femme couché la premiere nuit, lui, qui oncques sur bête chrestienne n'auoit monté : tantost lui tourna le dos. Qui étoit mal contente, c'étoit notre espousée, nonobstant qu'elle n'en fit nul semblant. Ceste maudicte maniere dura plus de dix jours & encores duraft, se la bonne mere a l'espousée ny eust pourueu du remede. Il ne vous faut pas celer que nostre homme neuf en façon & en mariage, du temps de ses feu pere & mere, auoit été bien couru tenu, & sur toutes choses lui étoit & fut deffendu le mestier de la beste aux deux dos, doubtant que s'il sy esbatoit qu'il y despendroit toute sa che-

uance , & bien leur sembloit & a bonne cause qu'il n'étoit pas homme que on deust aimer pour ses beaulx yeulx , lui qui pour riens ne courtoisast pere & mere , & qui n'étoit pas trop chaut sur potage , auoit toujours gardé son pucelage , que sa femme eust volentiers derobé selle eut sceu par quelque honneste façon. Vng jour se trouua la mere de notre espousée deuers sa fille , & lui demanda de son mary , de son état , de ses condicions , de son mariage & cent mille choses que femmes sçaiuent dire , a toutes choses bailla & rendit notre espousée a sa mere responce & dit que son mary étoit très bon homme & qu'elle ne doubtoit point quelle ne se conduisit bien avec lui , & pource qu'elle sçauoit bien par elle même qu'il faut autre chose en mariage que boire & mangier , elle dit a sa fille. Or viens ça & me dis par ta foy , & de ces choses de nuit comment ten est il. Quant la pource fille oüit parler de ces choses de nuit a peu que le cueur ne lui faillit tant fut marrie & desplaisante , & ce que sa langue n'osoit respondre , montrent ses yeulx dont saillirent larmes en tres grande habondance : si entendit tantost sa mere que ces larmes vouloient dire. Si dit ma fille ne plourez plus , dictes moi hardiment , je suis votre mere a que ne deuez riens celer , & de qui ne deuez être honteuse vous a til encores riens fait. La pource fille reuenuë de pamoison , & vng peu rassurée , & de sa mere reconfortée cessa la grande flote de ses larmes , mais n'auoit

encores force ne sens de respondre. Si l'interrogea arriere sa mere & lui dit. Dis moy hardiment & oste tes larmes. Ta t'il riens faict , à voix basse & pleurs entremeslées respondit la fille & dit , par ma foy ma mere il ne me toucha oncques , mais du surplus , que il ne soit bon homme & doux par ma foy si est. Or dis moy dit la mere , & scéz tu point s'il estourny de tous ses membres. Dis hardiment se tu le scais : si est très bien dit elle. J'ay plusieurs fois sentu ses denrées dauanture ainsi que je me tourne & retourne en notre lit , quand je ne puis dormir. Il souffrit ce dit la mere , laisse moy faire du surplus. Veci que tu feras. Au matin il te conuient faindre d'être malade très fort , & monstre semblant d'être oppressée , qu'il semble que l'ame s'en pare. Ton mary me viendra ou mandera querir ie n'en doute point , & je feray si bien mon personnaige que tu sçauras tantôt comment tu fus gaignée , car ie porterai ton vrine a vng tel medecin que donnera tel conseil que je voudray ; comme il fut fait. Car lendemain si tôt qu'on vit le jour notre gouge se commença a plaindre & a faire la malade , que il sembloit que vne fiebure continuë lui rongeast corps & ame. Son mary étoit bien esbahy & desplaisant si ne sçauoit que faire ne que dire. Si manda tantôt querir sa belle mere qui ne fit gueres attendre. Tantôt qu'il la vit. Helas mere dit il votre fille se meurt , ma fille dit elle & que lui fault il : lors tout en parlant marcherent jusques en la chambre de la pa-

tiente. Si tôt que la mere voit sa fille elle lui demande qu'elle faisoit , & elle comme bien aprinse ne respondit pas la premiere fois , mais a petit de piece aprez dit mere ie me meurs , non faictes fille se Dieu plait , prenez couraige. Mais dont vous vient ce mal si en haste. Je ne scay , ie ne scay dit la fille , vous me parofflez a me faire parler. Sa mere la prent par la main , lui tastre son poulx & son chief , & puis dit a son beau filz. Par ma foy croyez qu'elle est bien malade , elle est pleine de feu , si y fault pourueoir de remede , y a t'il point ici de son vrine ; celle de la minuyt y est , dit vne des meschines. Baillez la moy dit elle. Quand elle eut ceste vrine fit tant quelle eut vng vrinal & dedans la boutta , & dit a son beau filz qu'il la portast monstrier a vn tel medecin , pour sçauoir qu'on pourra faire a sa fille , & son lui peult aider , pour Dieu ny espargnons riens dit elle. J'ay encores de l'argent que ie n'aymes pas tant que je fais ma fille. Espargner dit le mary , croyez son lui peut aider pour argent que je ne lui fauldray pas. Or vous auancez dit elle & tandis que elle se reposera vng peu je m'en iray jusqu'au menaige , tousjours reuiendray ie bien , s'on a mestier de moy ; or deuez vous sçauoir que notre bonne mere auoit le jour de deuant au partir de sa fille , forgié le medecin que étoit très bien aduertty de la responce qu'il deuoit faire. Vecy nostre gueux qui arriue devers le medecin a tout l'vrine de sa femme , & quant il y eut fait la reuerence , il  
lui



lui va compter comment sa femme étoit deshaitée & merueilleusement malade , & vecy son vrine que vous apporte affin que mieulx vous informez de son cas , & que plus seurement me puisse conseiller. Le medecin prend l'vrinal & contremont le lieue , & tourne & retourne l'vrine , & puis va dire votre femme est fort aggravée de chaulde maladie & dangier de mort , se elle n'est prestement secouruë , vecy son vrine que le monstre. Ha maître pour Dieu mercy veuillez moy dire , & je vous payerai bien que on y pourra faire pour recouurer santé , & s'il vous semble qu'elle n'ait garde de mort. Elle n'a garde , se vous lui faictes ce que ie vous diray dit le medecin , mais si vous tardez gueres , tout l'or du monde ne la garderoit de la mort. Dictes pour Dieu dit l'autre & on le fera. Il faut dit le medecin quelle ait compaignie a homme ou elle est morte. Compaignie d'homme dit l'autre & quest ce a dire cela. Cest a dire dit le medecin qu'il faut que vous montez sur elle , & que vous la ronchiez très bien trois ou quatre fois tout en haste , & le plus a ce premier que vous en pourcez faire sera le meilleur , autrement ne sera point estainte la grande ardeur qui la seiche & tire a fin , voir dit il , & seroit ce bon , elle est morte & ny a point de repit dit le medecin se ainsi ne le faictes , voire & bien tost encores. Sainct Jehan dit l'autre jefayeray comment je pouray faire. Il se part de la , & vient a l'hostel & treuve sa femme que se plaignois

& doulousoit très fort, comment va il, dit il, ma mye. Je me meurs mon amy dit elle. Vous n'avez garde, se Dieu plaist, dit il. J'ay parlé au medecin que ma enseigné vne medecine dont vous ferez garie. Et durant ces deuises il se despoüille, & au plus prez de sa femme se boute. Et comme il approchoit pour executer le conseil du medecin tout en lourdois, que faites vous dit elle me voulez vous tuer. Mais ie vous gariray dit il. Le medecin la dit, & si dit ainsi que nature lui monstra & a laide de la patiente, il besongna très bien deux ou trois fois, & comme il se reposoit tout esbahy de ce que aduenü lui étoit, il demande a sa femme comment elle se porte : Je suis vng peu mieux, dit elle, que parcy deuant nay été, loué soit Dieu, dit il. Jespoire que vous n'avez garde, & que le medecin aura dit vray. Alors recommence de plus belle, & pour abreger tant & si bien le-fit que sa femme reuint en santé dedens peu de jours, dont il fut très joyeux, si fut la mere quant elle le sceut. Notre Champenois apréz ces armes dessus dictes, deuient vng peu plus gentil compaignon qu'il n'étoit auparauant, & lui vint en couraige, puis que sa femme restoit en santé qu'il semondroit vng jour au disner ses parens & amis, & les pere & mere d'elle, ce qu'il fit & les seruoit grandement en son patoys : a ce disner faisoit très bonne & joyeuse chiere. On beuuoit a lui, il beuuoit aux autres, c'estoit merueilles qu'il étoit gentil com-

paignon : or escoutez qu'il lui aduint au fort de la meilleure chiere de ce disner. Il commenca très fort a plorer , & sembloit que tous amis , voire tout le monde fussent morts , dont ny eut celui de la table qui ne s'en donnaît grant merueilles dont ces soudaines larmes procedoient ; les vngs & les autres lui demandent qu'il auoit , mais a peu s'il pouuoit ou sçauoit respondre , tant le contrain-  
gnoient ses folles larmes. Il parla au fort en la fin & dit. Jay bien cause de plorer. Et par ma foy non auez , ce dit sa belle mere que fault il , vous êtes riche & puissant & bien logié , & si auez de bons amis , & que ne fait pas a oublier, vous auez belle & bonne femme que Dieu vous a ramenée en santé que n'agueres fut sur le bord de sa fosse , si m'est aduis que vous deuez être lye & joyeux. Helas non fait , dit il. Cest pour moy que mon pere & ma mere que tant n'aimoient , & m'ont assemblez , & laissez tant de biens , qu'ils ne sont encores en vie , car ils ne sont morts tous deux que de chaulde maladie se je les eusse aussi bien ronchinés quant ils furent malades , que j'ai fait ma femme ils fussent maintenant sur piedz. Il ny eut celui de la table qui aprez ces mots a bien peu se peut tenir de rire. Mais non pourtant il sen garda qui peut. Les tables furent ostées chacun s'en alla , & le bon Champenois demoura avec sa femme , laquelle afin quelle demoura en santé , fut souuent de lui racollée.

## X X I. N O U V E L L E.

## L' A B E S S E G U E R I E.

**S**UR les métés de Normandie y a vne bonne Abbaye de Dames, dont l'Abbesse qui belle & jeune & en bon point lors étoit, nagueres facoucha malade. Ses bonnes sueurs deuotes & charitables tantost la vindrent visitter, en la confortant & administrant a leur leal pouuoir de tout ce quelles sentoient que bon lui fut, & quant elles apperceurent quelle se disposoit a garison, elles ordonnerent que l'vne delles iroit a Rouën porter son vrine, & compteroit son cas a vng medecin de grant renommée, Pour faire cette ambassade, a lendemain l'vne delles se mist en chemin, & fit tant quelle se trouua deuers ledit medecin auquel aprez qu'il eust visitté l'vrine de Madame l'Abbesse, elle conta tout au long la façon & maniere de sa maladie, comme de son dormir, d'aller en chambre, de boire & de manger; Le saige medecin vrayment du cas de Madame informé tant par son vrine comme par la relation de la Religieuse, voulut ordonner le regime & jacoit ce qu'il eust de coustume de bailler plusieurs vng recipé par écrit, toutefois il se fia bien de tant en la Religieuse, que de bouche lui diroit

ce qu'auoit a faire , & lui dit ; belle sueur , pour recouurer la santé de Madame l'Abbesse , il lui est métier & de necessité qu'elle ait compagnie d'homme , & brief aultrement elle se trouuera en peu despace si de mal entechée & surprinse , que la mort lui sera derrain remede ; qui fut bien esbahie d'oïr ces très dures nouuelles , ce fut notre Religieuse , qui va dire ; hélas maître Jehan , ne voyez vous autre façon pour la recourance de la santé de Madame. Certes nenny , dit il , il n'en y a point d'autre , & si vuëil bien que vous saichiez , qu'il se fault aduencer de faire ce que j'ay dit , car se la maladie par faulte d'ayde , peut prendre son cours comme elle s'efforce , jamais homme a tems ny viendra. La bonne Religieuse a peu selle n'osa disner a son aise , tant auoit grant haste d'annoncer a Madame ces nouuelles. Et a l'aide de sa bonne haguénée , & du grant desir qu'elle a d'être a l'hostel s'auança si très bien que Madame l'Abbesse fut très esbahye de si tost la reuoir. Que dit le medecin la belle , ce dit la bonne Abbesse , ay ie garde de mort , vous serez tantost en bon point se Dieu plaît , Madame , dit la Religieuse messagiere , faites bonne chiere & prenez cueur. Comment ? ne ma le medecin point ordonné de regime dit Madame : si a dit elle , lors lui va dire tout au long comment le medecin auoit veu son vrine , & les demandes qu'il fit de son aage , de son manger , de son dormir , &c. Et puis pour conclusion il a dit & ordon-

né qu'il faut que vous ayez compaignie charnelle a quelque homme , ou brief aultrement vous êtes morte , car a votre maladie na point d'autre remede. Compaignie d'homme , dit Madame, j'aimeroye mieulx plus chier mourir mille fois s'il m'étoit possible , & alors va dire puis que ainfi est que mon mal est incurable & mortel se je ny pouruois de tel remede. Loué soit Dieu je prens bien la mort en gré appelez bien tost tout mon Couuent : le timbre fut sonné , si vindrent a Madame toutes ses Religieuses , & quant elles furent en la chambre , Madame qui auoit encores toute la langue a commandement quelque mal qu'elle eust , commença vne grande & longue harangue deuant ses sueurs , remonstrant le fait & état de son Eglise , en quel point elle la trouua & en quel état elle est aujourd'hui & vint descendre ces parolles , a parler de sa maladie que étoit mortelle & incurable comme elle bien sentoit & congnoissoit , & au jugement aussi d'vng tel medecin elle s'arrétoit , que morte l'auoit jugée. Et pourtant mes bonnes sueurs je vous recommande notre Eglise , & en vos plus deuottes prieres , ma pource ame ; & a ces parolles larmes en grant habondance faillirent de ses yeux que furent compaignies d'autres sans nombre sourdans de la fontaine du cueur de son bon Couuent. Cette plorerie dura assez longuement , & fut la le mesnaige long temps sans parler. Assez long temps apréz , Madame la Prieure que saige & bonne étoit , print la parole pour tout .

le Couuent & dit Madame , de votre mal , quel il est , Dieu le sçait , a que nul ne peut riens celer , il nous desplaist beaucoup , ny a celle de nous qui ne se voudroit emploier autant que possible est , & seroit a personne viuant pour la recouurance de votre santé. Si vous prions toutes ensemble , que vous ne nous espargnez en rien , ne chose qui soit des biens de votre Eglise , car mieulx nous vauldroit , & plus chiér de perdre la part de nos biens temporels que le prouffit spirituel que votre presence nous donne. Ma bonne sueur , dit Madame , je n'ay pas tant desserui que vous me offrez , mais je vous en mercie tant que je puis , en vous aduifant & priant de rechief que vous penſes comme je vous ay dit aux affaires de notre Eglise que me touchent prez du cuer , Dieu le sçait , en compaignant aux prieres que ferés , ma poure ame que grant mestier en a. Helas Madame , dit la Prieure , & n'est il possible pour bon gouuernement ou par soigneuse diligence de medecine que vous puissiez reposer , nenny certes ma bonne sueur , dit elle. Il me faut mettre ou renc des trespassez , car je ne vaulx gueres mieulx , quelque langaige que encores je prononce. Adonc faillit auant la Religieuse qui porta son vrine a Roüen , & dit Madame il y a bon remede s'il vous plaisoit : Créez qu'il ne me plaist pas , dit elle , vey sueur Jehanne que reuiet de Roüen , & a monſtré mon vrine & compté mon cas a vng tel medecin que ma jugée morte , veoir se ne me vou-

loie abandonner a aucun homme & être en sa compaignie, & par ce point esperoit il comme il trouuoit par ses liures que ie n'auroye garde de mort, mais se ainsi ne le faisoie, il n'y a point de ressource en moy, & quant a moy i'en louë Dieu que me daigne appeller, aincoys que jaye fait plus de péchez a lui me rens, & a la mort ie presente mon corps vienne quant elle veult. Comment Madame, dit l'Enfermiere, vous êtes de vous mesme homicide : Il est en vous de vous sauuer & ne faut que tendre la main, & requerre ayde & vous la trouuerez prête, ce n'est pas bien fait & vous ose bien dire que votre ame ne partiroit point seurement, s'en cest état vous mouriez. Ha ma belle sueur, dit Madame, quantefois auez vous ouï prechier que mieux vaudroit a vne personne s'abandonner a la mort que commettre vng seul pechie mortel, & vous sçauiez que ie ne puis ma mort fuir ne esloigner sans faire & commettre pechie mortel, & qui bien autant au cueur me touche s'en se faisant ma vie eslongnerois n'en ferois ie pas deshonnourée & a tousjours mais reprouchée, & diroit on vela la Dame, &c. . . mesmes vous toutes, quelque conseil que me donnez, m'en auriez en irreuerence & en mains d'amour, & vous sembleroit & a bonne cause que indigne feroie d'entre vous presider & gouverner. Ne dictes & ne pensez jamais cela, dit Madame la Tresoriere, il n'est chose qu'on ne doieue entreprendre pour escheuer la mort ; Et ne dit pas notre bon

Pere



pere saint Augustin qu'il ne loist a personne de soy  
oster la vie ne tollir vng sien membre , & ne fe-  
riez vous pas directement encontre sa sentence se  
vous laissez a escient ce qu'il vous peut de mal gar-  
der. Elle dit bien , respondit le Conuent en general.  
Madame pour Dieu obeissez au medecin , & ne  
soyez en vostre opinion si abeurtee que par faulte  
de soustenance vous perdez corps & ame , & laissez  
votre pource Couuent qui tant vous aime desolé &  
despourueu de Pastoure. Mes bonnes sueurs , dit  
Madame , j'aime mieulx volontairement a la mort  
rendre les mains , submettre mon col , & honora-  
blement l'embrasser que par la fuir je viue deshono-  
urée. Et ne diroit on pas , vela la Dame , qui fit  
ainsi & ainsi. Ne vous chaille qu'on die Madame ,  
vous ne ferez ja reprochée de gens de bien. Si  
feroie , se dit Madame. Le Conuent se alla esmou-  
voir , & firent les bonnes Religieuses entre elles vng  
Consistoire dont la conclusion s'enfuit , & porta les  
parolles d'icelle la Prieure. Madame vecy votre de-  
solé Conuent si très desplaisant que jamais maison ne  
fut plus troublée qu'elle est , dont vous êtes cause ,  
& créez se vous êtes si mal conseillée de vous aban-  
donner a la mort que bien fuir vous pouuez , j'en  
suis bien seure. Et affin que vous entendez que  
nous vous aimons d'entiere & leal & parfaicte  
amour , nous sommes cōtentes & auons conclud  
& deliberé meurement toutes ensemble & genera-  
lement en sauuant vous & nous , auoir compaignie

*Tome I.*

L

bien secrettement d'aucun homme de bien , & nous pareillement le ferons , afin que vous n'ayez pensée ne imaginacion que ou tems advenir vous en soudist reproche de nulle de nous. N'est ce pas ainsi mes sueurs. Oüi , dirent elles de très bon cueur. Madame l'Abbesse oyant ce que dit est , & portant au cueur vng grant fardeau d'ennui pour l'amour de ses sueurs se laissa ferir & s'accorda , combien qua grant regret que le conseil du medecin seroit mis en oeuvre. Adonc furent mandez moines , prêtres & clerics , qui trouuerent bien a besongner & la ouurerent si très bien que Madame l'Abbesse fut en peu d'heure rappaisée , dont son Conuent fut très joyeux qui par honneur faignit ce que par honte oncques ne laissa.

## XXII. NOUVELLE.

## L' E N F A N T

## A D E U X P E R E S.

**N** A G U E R E S que vng gentil homme demourant a Bruges , tant & si longuement se trouua en la compaignie d'une belle fille qu'il lui fit le ventre leuer , & droit au coup qu'il s'en aperçeut & donna garde , Monseigneur fit vne assemblée de gens d'armes , si fust force a notre gentil

homme de l'abandonner & avec les autres aller ou service de mondit seigneur, ce que de bon cueur & bien il fit, mais avant son partement il fit garnison & pourueance de parins & marines, & de nourrice pour son enfant advenir, logea la mere avecques de bonnes gens, lui laissa de l'argent & leurs recommanda quant au mieulx qu'il sceut & le plus brief qu'il peut, ces choses furent très biens disposées. Il ordonna son partement & prit congie de sa Daine, & au plaisir de Dieu promist de tantost retourner. Pensez que selle n'eust jamais ploré, ne sen tenist elle pas a ceste heure, puis quelle veoit d'elle eslongner celui en ce monde dont la presence plus lui plaist. Pour abreger, tant lui depleut ce dolent departir, que oncques mot ne sceut dire tant empêchoient sa douce langue les larmes sourdantes du parfond de son cueur : au fort elle sappaisast quant elle vit que autre chose être n'en pouuoit ; & quant vient environ vng mois aprez le partement de son amy, desir lui eschauffa le cueur & si lui vint ramenteuoir les plaisans passetemps quelle saouloit auoir dont la très dure & très maudicte absence de son amy helas l'auoit priuée ; le Dieu d'amours qui n'est jamais oyseux lui mist en bouche & en termes les haults biens, les nobles vertus, & la très grande beaulté d'vng marchant son voisin, qui plusieurs fois auant & depuis le departement de son amy, lui auoit présenté la bataille, & conclure lui fist que sil retourne plus a sa requête qu'il ne sen

yra pas escondit même si la voyoit és ruës , elle tiendra telles & si bonnes manieres qu'il entendra bien qu'elle en veult a lui : or vint il si bien qu'a lendemain de ceste conclusion a la premiere oeuvre , amour enuoya nostre marchant deuers la patiente , & lui presenta comme par plusieurs fois auoit , chiens & oyseaux , son corps , ses biens & plus de cent mille choses que ces abbatteurs de femmes sçaiuent tout courant & par cueur. Il ne fut pas escondit , car s'il auoit bonne volenté de combattre & faire armes , elle n'auoit pas mains de desir de lui fournir de tout ce que il voudra & durant que notre gentil homme est en guerre , notre gentil femme fournit & accomplit au bon marchant tout ce dont la request , & se plus eust osé demander elle étoit preste de l'accomplir , & trouua en lui tant de bonne cheualerie , de proësse & de vertu qu'elle oubliä de tous les points son amy par amours , qui a cette heure gueres ne s'en doubtoit. Beaucoup pleust aussi au bon marchant la courtoisie de sa nouuelle Dame & tant furent conjoinctes les volentez , desirs & pensers de lui & d'elle , qu'ils n'auoient pour eulx deux que vng seul cueur. Si se penserent que pour le bien loger a leur aise , il souffiroit bien d'vng hostel pour leur deux : si trouua vng soir notre gouge , & ses bagues avec elle , en l'hostel du marchant sen allast en abandonnant le premier son amy : son hôte , son hostesse , & foison d'autres gens de bien , ausquels il l'auoit recomman-

dée & elle ne fut pas si folle quant elle se vit bien logée quelle ne dit incontinent a son marchand , qu'elle se sentoît grosse que en fut très joyeux ; & cuida bien que c'estoit de ses oeuvres. Au chief de sept mois ou enuiron , notre gouge fit vng beau fils dont le pere adoptif saccointa grandement & de la mere aussi. Aduint certaine espace apréz que le bon gentil homme retourna de la guerre & vint a Bruges , & au plustost qu'il peut honnêtement prist le chemin vers le logis où il laissa sa Dame , & lui venu leans la demanda a ceux que emprindrent la charge de la penser , garder & ayder en sa gesine. Comment dirent ils ! est ce que vous en sçavez , & n'avez vous pas eu les lettres que vous furent escriptes. Nenny par foy dit il , & quelle chose y a il ? quelle chose sainte Marie , dirent ils ? uotre Dame c'est bien raison que on le vous die. Vous ne fustes pas party d'vng mois aprez , qu'elle ne trouf-  
fast pignes & miroirs , & se allast boutter cy deuant en l'hostel d'vng tel marchand qui la tient a fer & a clou , & de fait elle a porté vng beau filz & a geü leans , & la fait le marchand chrestiemmer , & si le tient a sien. Saint Jehan cecy aultre chose de nouveau , dit le bon gentil homme , mais au fort puis qu'elle est telle , au diable soit elle. Je suis content que le marchand l'ait & la tienne , mais quant est de l'enfant , je suis seur qu'il est mien si le vuëil rauoir , & sur ce mot part & s'en va heurter bien rudement a l'huys du marchand , de bonne ad-

uenture sa Dame, que ce fut, vint a ce heurt qui ouure l'huis, comme toute de leans quelle étoit, quant elle vit son ami oublié & qu'il la congneust aussi, chascun fut esbahy. Non pourtant lui demanda donc elle venoit en ce lieu, elle respondit que fortune lui auoit amenée, fortune, dit il, & fortune vous y tienne, mais je vueille auoir mon enfant, votre maître aura la vache, mais j'aurai le veau. Or me le rendez bientoist, car je le veulx rauoir quoi qu'il en aduiegne. Helas ce dit la gouge que diroit mon homme, je serois defaictes, car il cuide certainement qu'il soit sien. Il ne m'en chauld dit l'autre die ce qu'il voudra, mais il n'aura pas ce qui est mien. Ha mon amy je vous requiers que vous laissez, & baillez cet enfant ici a mon marchand, & vous me ferez granr plaisir & a lui aussi. & pardieu se vous l'auiez veu vous ne seriez ja pressé de l'auoir, c'est vng lait & ord garson tout rongeux & contrefait. Dea dit l'autre tel qu'il est, il est mien, & se le vueil rauoir; & parlez bas pour Dieu se dit la gouge, & vous appeaisez je vous en supplie, & vous plaise ceans laisser cest enfant, & je vous prometz se ainsi le faictes de vous donner le premier enfant que jamais jaurai; le gentil homme a ces motz jasoit qu'il fut couroucé, ne se peult tenir de soubzrire & sans plus dire, de sa bonne Dame se partit re jamais ne redemanda ledict enfant. Et encores le nourist cellui qui la mere engrainga en l'absence de nostre dict gentil homme.

XXIII. NOUVELLE.

LA PROCUREUSE  
PASSE LA RAYE.

**N**AGUERES qu'en la ville de Mons en Haynault vn procureur de la cour dudit Mons assez sur aage & ja ancien , entre ses autres Clercs auoit vng très beau fils & gentil compaignon duquel sa femme a certaine espace de temps s'en amoura fort bien, & lui sembloit qu'il étoit mieulx taillé de faire la besongne que n'étoit son mary , & affin quelle esprouuast se son cuider étoit vray , elle conclud en soi même quelle tiendra d'autres tels termes que fil n'est plus bête que vng asne , il se donna tantost garde qu'elle en veult a lui pour executer ce desir ceste vaillante femme jeune , fresche & en bon point , venoit souuent & menu , coudre & filer auprez de ce Clerc , & deui-soit avec lui de cent mille besongnes dont la plus part tousjours enfin sur amours retournoient , & deuant ces deuises elle noublia pas de le seruir d'au-bades assez largement , vne fois le butoit du coude en escripuant , vne autre fois lui gettoit des pierres tant qu'il broüilloit ce qu'il faisoit , & lui falloir

L iijj

recommencer. Vng autre jour recommençoit ceste feste & lui ostoit papier & parchemin tant qu'il falloit qu'il laissast l'oeuvre dont il étoit très mal content, doubtant le courroux de son maître, quelque semblant que la maitresse long tems lui eust monstre qui tiroit fort au train de derriere, si lui auoient jeunesse & crainte les yeulx si bandez qu'en rien il ne s'apperceuoit du bien que on lui vouloit. Neantmoins en la fin il apperçeut qu'il étoit bien en grace, & ne demoura gueres aprez ceste deliberation que le procureur étant hors de l'hostel sa femme vint au Clerc bailler l'affault qu'elle auoit de coustume, voire trop plus aigre & plus fort que nulle fois de deuant, tant de ruer, tant ne bouter, de parler, même pour le plus despeschier & bailler destourbier, elle respandit sur buffet, sur papier, sur robe, sur cornet a l'encre, & notre Clerc plus congnoissant & mieulx voyant que cy dessus saillir sur piez & assault sa maitresse & la reboute arriere de lui priant quelle le laissat escrire, & elle que demandoit être assaillie & combattre, ne laissa pas pourtant l'entreprinse commencée. Sçavez vous, lui a dit le Clerc, Mademoiselle c'est force que ie achene l'escript que j'ai commencée. Si vous requier que vous me laissez paisible, ou par la mort bieu ie vous liureray castille; & que me ferez vous beau sire dit elle, la moë? nenny par Dieu, & quoi donc, quoi: voire quoi: pource dit il que vous avez respandu mon



cornet a l'encre, & auez broüillé mon escripture, je vous pourai bien broüiller votre parchemin, & afin que faulte d'encre ne m'empesche descrire, j'en pourai bien pescher dans votre cornet. Bar moi dit elle en vous êtes bien l'homme, & croyez que j'en ay grant paour. Je ne sçai quel homme dit le Clerc, mais je suis tel que se vous y esbatez plus vous passerez par la, & de fait vecy vne roye que je vous fais & par Dieu se vous la passez tant peu que ce soit se je v'ous faulx, ie vuëil qu'on me tue & par ma foi dit elle ie ne vous en crains, & si passerai la roye, & puis verrez que vous ferez, & disant ces paroles marcha la druë, faisant le petit fault outre la roye bien auant, & le bon Clerc la prent aux grilz sans plus enquerre & sur son banc la ruë & creez qu'il la pugnît bien, car elle l'auoit broüillé & il ne lui en fit pas mains, mais ce fut en autre façon, car elle le broüilla par dehors & a decouuert & il la broüilla a couuert & par dedens. Or il est vrai que la present y étoit vng jeune enfant de enuiron quatre ou cinq ans fils de leans : Il ne faut pas demander s'aprez ces premieres armes de la mairesse & du Clerc il y eut plusieurs secrets remonstrez a mains de parolles que les premiers. Il ne vous fault pas celer aussi que peu de jours apréz ceste aduerture, ledit petit enfant ou comptoit étant ou notre Clerc escripuoit. Le Procureur & Maître de leans suruint, & marche auant pour tirer vers son Clerc pour regarder qu'il escripuoit ou pour espoir d'au-

tre chose : Et comme il aprocha de la roye que son Clerc auoit faicte pour sa femme , qui encores n'étoit pas effacée son filz qui crie & dit. Mon pere gardez bien que vous ne passez ceste roye , car nostre Clerc vous abatteroit & houspilleroit ainsi que fit nagueres ma mere. Le procureur oyant son filz & regardant la roye , si ne sçeut que penser , car il se souuint que folz , yvres & enfant ont de coustume de verité dire , non pourtant il ne fit pour ceste heure nul semblant , & n'est encores point venu en ma congnoissance se il diffiera la chose ou par ygnorance , ou par doubte desclandre , &c.

## XXIV. NOUVELLE.

*LA BOTTE A DEMI.*

**S**OIT ainsi que ès Nouuelles dessus dictes les noms de ceulx & celles a qui elles ont touchié ou touchent ne soient mis & escripts si me donne appetit grant vouloir de nommer en ma petite ratelee , le Conte Vaaleran , en son temps Conte de saint Pol , & appellé le beau Conte : Entre autres seigneuries il étoit seigneur d'vng villaige en la Chastellenie de lisse nommée Vrelechen prez dudit isle enuiron d'vne lieüe. Ce gentil Conte de bonne & doulce nature étoit & sur tout son temps amou-

reux , oultre l'Enseigne il sceut au rapport d'aucuns  
ses seruiteurs que en ce cas le seruoient , que audit  
Vrelenchen auoit vne très belle fille gente de corps  
& en bon point. Il ne fut pas si paresseux que assez  
tost aprez cette nouvelle il ne se trouuaft en ce vil-  
laige & firent tant lesdits seruiteurs , que les yeulx  
de leur maistre confermerent de tous points leur  
raport touchant ladiète fille. Or ca qu'est il de faire  
dit lors le gentil Conte. C'est que je parle a elle  
entre nous deux seulement & ne me chault qu'il  
me couste. L'vng de ses seruiteurs docteur en son  
métier lui dit Monseigneur pour votre honneur &  
celui de la fille aussi , il me semble que mieulx vault  
que je lui decouure toute l'embusche de votre vou-  
lenté , & selon la responce j'auray aduis de parler  
& poursuyvre , comme l'autre dit , il fut fait ; car  
il vint deuers la belle fille & très courtoisement la  
salua , & elle que n'étoit pas mains saige & bonne  
que belle courtoisement lui rendit son salut. Pour  
abregier après plusieurs paroles d'acointance , le  
bon maquereau va faire un grant premice touchant  
les biens & les honneurs que son maistre lui vou-  
loit , & de fait se a elle ne tenoit elle seroit cause  
enrichir & honnorer tout son lignaige , la bonne fil-  
le entendist tantost quelle heure il étoit. Il fist la  
responce telle quelle étoit , c'est à sçavoir belle &  
bonne : car au regard de Monseigneur le Conte  
elle étoit celle , son honneur sauue, que lui vouldroit  
obeir craindre & seruir en toutes choses , mais qui

la voudroit requérir contre son honneur quelle tenoit aussi chier que sa vie , elle étoit celle qui ne le congnoissoit & pour qui elle feroit non plus que le cinge pour le mauvais. Qui fut esbahy & couroucé cette responce ouye , ce fut notre macquereau qui sen reuient deuers son maistre a tout ce qu'il auoit de poisson car a chair auoit il failly. Il ne faut pas demander se le Conte fut mal content quant il sceut la très fiere & dure responce de celle dont il desiroit l'acointance & jouissance , & autant ou plus que nulle du monde. Tantost après si va dire. Or auant laissons la là pour cette foys , il m'en souuiendra quand elle cuidera qu'il soit oublié. Il se partit de là tantost après , & ny retourna que les six septmaines ne fussent passées , & quant il reuint ce fut si très secrettement que nulle nouuelle ne fut tant simplement , & en tapinaiage si trouua. Il fit tant par ces espies qu'il sceut que notre belle fille soyoit de l'herbe au coing d'ung boys asséulée de toutes gens , il fut bien joyeux , & tout houzé encores qu'il étoit , se met au chemin deuers elle en la compagnie de ses espies , & quant il fut près de qu'il queroit , il leur donna congié , & fit tant qu'il se trouua auprès de la Dame sans ce qu'elle en sceut nouuelle , sinon quant elle le veit. Selle fut bien esprinse & esbahie de se veoir faisie & tenuë de Monseigneur le Conte ce ne fut pas merueilles , mesme elle en changea couleur müa semblant , & a bien peu en perdit la

parole , car elle sçauoit par renommée qu'il étoit perilleux & noyseux entre femmes. Ha Dea Mademoiselle , dit alors le gentil Conte , qui se trouua scay si , vous êtes a merueilles fiere. On ne vous peult auoir sans siege. Or pensez bien de vous deffendre , car vous êtes venuë à la bataille , & auant que de moy partez vous en ferez à mon vouloir & tout a ma deuise , des peines & trauaux que j'ay soufferts & endurés tout pour l'amour de vous. Helas Monseigneur , ce dit la jeune fille toute esbahye & surprise quelle étoit je vous crie mercy se j'ay dit ou fait chose qui vous desplaïse , vueillez le moy pardonner , combien que je ne pense auoir dit ne fait chose dont me doyez sçauoir malgré. Je ne sçay moy qu'on vous a rapporté , on ma requise en votre nom de deshonneur je n'y ay point adjousté de foy , car je vous tiens si vertueux que pour riens ne voudriez deshonnorer vne votre simple subgecte comme je suis , mais la vouldriez vous bien garder. Ostés ces Pensées , ce dist Monseigneur , & foyez seure que vous ne meschapperez. Je vous ay fait monstrier le bien que je vous vueil , & ce pourquoy ie enuoïay deuers vous , & sans plus dire la trouffe & prent entre ses bras , & dessus vn peu d'herbe mise en vng tas qu'elle auoit assemblée soudainement la coucha & fort roide l'accola , & viftement faisoit toutes ses préparatoires d'accomplir le desir qu'il auoit de pieca. La jeune fille que se veoit en ce danger & sur le point de perdre ce que en ce monde

plus chier tenoit, s'advisa d'vng bon tour & dit, ha Monseigneur ie me rends a vous, ie feray ce qu'il vous plaira sans nul reffus ne contredit, soyez plus content de prendre de moy ce qu'en voudriez pour mon accord & voulenté, que par force & malgré moy, vos parolles & votre vouloir desordonné soient accomplis. Ha dea dit Monseigneur que vous meschappez, non ferez, que voulez vous dire. Je vous requier, dit elle, puis qu'il fault que vous obeisse, que vous me faites ceste honneur que je ne soie saoullie de vos huseaux que sont gras & ors, & vous souffise du surplus & comment en pourroie faire ce dist Monseigneur. Je vous les osteray, ce dit elle très bien s'il vous plaist, car par ma foy je n'auroye cueur ne couraige de vous faire bonne chiere avec ces paillards huseaux: C'est peu de chose des huseaux, ce dit Monseigneur. Mais non pourtant puis qu'il vous plaist ilz seront ostez: & alors il abandonna sa prinse & fassit dessus l'herbe & tend sa jambe, & la belle fille lui osta l'esperon & puis lui tire l'vng de ses huseaux que bien estroys étoient, & quant il fut enuiron a moitié a quoy faire elle eu moult de peine, pource que tout a propos le tira de mauuais biays: elle part & sen va tant que piedz la peuuent porter, aider & soutenir de bon vouloir & là laissa le gentil Conte, & ne fina de courre tant quelle fut a l'hostel de son pere. Le bon seigneur qui se trouua ainsi deceu si enrageoit & plus nen pouuoit, & qui a

cette heure l'eust veu rire jamais n'eust eu les fiebures. A quelque meschief que ce fut se mit sur piedz cuidant par marchier sur son housseau l'oster de sa jambe , mais c'est pour neant il étoit trop étroit si n'y trouua autre remede que de retourner vers ses gens. Il ne fut pas loing allé que tost ne trouua ses bons disciples , sur le bord d'vng fossé que l'attendoient qu'ilz ne sceurent que penser quant ils le virent ainsi atourné. Il leur conta tout son cas & se fit rehouser. Et que loyoit , celle qui la trompé ne seroit pas seurement en ce monde tant lui cuide & veut bien faire de desplaisir. Mais quelque vouloir qu'il eut pour lors & tant mal content qu'il fut pour vng temps , toutefois quant il fut vng peu refroidye tout son courroux fut converty en cordial amour. Et qu'il soit vray depuis a son pourchas & a ses chiers coustz & dépens il la fit marier très richement & bien alla contemplacion seulement de la franchise & loyauté qu'en elle auoit trouué dont il eut la vraye congnissance par le reffus cy dessus compté.



## XXV. NOUVELLE.

*FORCE'E DE GRE'.*

**L**A chose est si fresche & si nouvellement advenue dont je vueil fournir ma nouvelle que je ne puis ne tailler ne oster. Il est vray que au Quesnoi vint une très belle fille nagueres au Preuost soi complaindre de force & violence en elle perpetrée & commise par le vouloir desordonné d'un Compaignon. Ceste complainte au Preuost faicte, le Compaignon encusé de ce crime fut en l'heure prins & saisi & au dire du commun peuple ne valoit gueres mieulx que pendu au Gibet ou sans tête sur vne Rouë mis emmy les champs. La fille voyant ce, sentant celui dont elle se douloit emprisonné, poursuiuoit rudement le Preuost qu'il lui en fit Justice, disant que outre son gré & vouloir violement & par force l'auoit deshonnourée. Et le Preuost homme discret & saige, & en justice très expert, fit assembler les hommes & puis manda le prisonnier, & aincoys qu'il le fit venir deuant les hommes desja tout prests pour le juger s'il confessoit par gehaine ou autrement l'horrible cas dont il étoit chargié, parla a lui a part & si l'adjura de dire verité. Vecy telle femme, dit il,



il , qui de vous se complaint très fort de force est  
il ainsi , l'auez vous efforcée , gardez que vous dic-  
tes verité , car se vous faillez vous êtes mort , mais  
se vous dictes verité on vous fera grace. Par ma foy  
Monseigneur le Preuost , dit le prisonnier , ie ne  
vueil pas nier ne celer que je ne laye pieca requise  
de son amour & de fait deuant hier aprez plusieurs  
parolles , ie la ruay sur vng liét pour faire ce que  
vous sçauiez , & lui leuai robe , pourpoint & che-  
mise , & mon furon qui n'auoit jamais hanté leurier  
ne sçauoit trouuer la duyère de son conuil , & ne  
faisoit que aller ca & la , mais elle par sa courtoi-  
sie lui dressa le chemin , & a ses propres mains le  
bouta tout dedens. Je croy trop bien qu'il ne par-  
tit pas sans proye , mais qu'il y eut autre force ,  
par mon serment , non eust. Est il ainsi , dist le Pre-  
uost ; ouï par mon serment , dit le bon Compaignon.  
Or bien , dit il , nous en ferons très bien. Aprez ces  
parolles le Preuost se vient mettre en siege ponti-  
fical a dextre enuironné de ses hommes , & le bon  
Compaignon fut mis & assis sur le petit banc ou  
parquet. Ce voyant tout le peuple & celle qui l'ac-  
cusoit aussi. Or sa ma mye dit le Preuost que de-  
mandez vous a ce prisonnier. Monseigneur le Pre-  
uost , dit elle , je me plains a vous de la force que  
il m'a fait , car il ma viollée outre mon gré & vou-  
lente & malgré moy dont je vous demande Justice.  
Que respondes vous mon amy , dit le Preuost au  
prisonnier. Monseigneur , dit il , vous ay ia dit com-

ment il en va & je ne pense pas qu'elle die au contraire. Ma mye, dit le Preuost, regardez bien que vous dictes & que vous faictes de vous plaindre de force, c'est grant chose uecy qu'il dit qu'il ne vous fit oncques force, mêmes auez été consentante, & a peu prez requerante de ce qu'il a fait. Et qu'il soit vray, vous mêmes adressastes & mistes son furon qui s'esbattoit a lentour de votre terrier. Et a vos deux mains ou a toute l'une tout dedens votre dit terrier le mistes. Laquelle chosse il n'eust peu faire sans votre aide. Et se vous y eussiez tant soit peu résisté, jamais n'en fut venu a chief. Se son furon a fouragé l'hostel il n'en peult mais, car dez lors qu'il est au terrier ou duyers il est hors de son chastoy. Ha Monseigneur le Preuost, dit la fille plaintiue, comment l'entendez vous. Il est vray je ne vueille pas nyer que voirement j'adressay son furon & le boutai en mon terrier, mais pourquoi fut-ce. Par mon serment Monseigneur, il auoit la tête tant roide & le museau tant dur, que je scai tout vray qu'il m'eust fait vng grant perthuis ou deux ou trois ou ventre, si je ne l'eusse bien en haste boutté en celui qui y étoit dauantage & vela pourquoi ie le feis. Pensez qu'il y eut grande risée aprez la conclusion de ce procez, de ceux de la Justice & de tous les assistans, & fut le Compaignon deliuré promettant de retourner a ces journées quant sommé en seroit & la fille s'en alla bien couroucée que on ne pendoit très bien hault en

haste cellui qui auoit pendu a ses basles fourches : mais le courroux ne fa rude poursuite ne dura guerres, car a ce qu'on me dit, tantost aprez par bons moyens la paix entre eulx si fut trouuée, & fut abandonnée au bou Compaignon, garenne, conniere & terrier toute fois que chasser y voudroit.

---

XXVI. NOUVELLE.

LA DEMOISELLE  
CAVALIERE.

**E**N la Duché de Braban n'a pas long temps que la memoire n'en soit fresche & presente a cete heure aduint vng cas digne de reciter. Et pour fournir vne nouvelle ne doibt pas être reboutté, & affin qu'il soit enregistré & en appert congneu & declairé, il fut tel. A l'hostel du grant Baron dudit Pays demouroit & residoit vng jeune gent & gracieulx gentil homme nommé Girard qui s'enamoura très fort d'une Damoiselle de leans nommée Catherine, & quant il vit son coup, il lui osa bien dire son gracieux & piteulx cas. La responce qu'il eut de prins faultz plusieurs la peuuent sçauoir & penser laquelle pour abregier ie trespasse. Et viens a ce que Girard & Catherine par succession de temps

M ij

s'entreayemerent tant fort & si leallement qu'ils n'auoient que vng seul cueur & vng même vouloir. Ceste entiere leale & parfaite amour ne dura pas si peu que les deux ans ne furent accomplis & passez, puis aprez certaine piece amours que bende les yeux de ses seruiteurs, les boucha si très bien que la ou ils cuidoient le plus secrettement de leur amoureux affaires conelure & diuiser, chascun s'en apperceuoit & ny auoit homme ne femme a l'hostel qui très bien ne s'en donna garde, même fut la chose tant escriée que on ne parloit par leans que des amours Girard & Catherine. Mais helas, les pources aueugles euidoient bien seuls être empeschiez de leurs besongnes, & ne se doubtoient gueres qu'on tenist conseil ailleurs qu'en leur presence, où le troisième de leur gré n'eust pas esté receu, sans leur propos changer ne transmuier. Tant au pourchas d'aucuns mauidicts & detestables enuieux, que pour la continuelle noise de ce qui rien ou peu leurs touche vint être ceste maniere a la congnoissance du maître & de la maitresse de ceux amants, & d'iceulx s'espandit & faillit en audience du Pere & de la Mere de Catherine. Si lui en cheut si très bien que par vne Damoiselle de leans sa très bonne Compaigne & amye, elle fut aduertie & informée du long & du large de la descouuerture des amours Girard & d'elle, tant a Monseigneur son Pere & Madame sa Mere que a Monseigneur & a Madame de leans. Helas qu'est-il de faire ma bonne fueur & ma mye dit Catherine a vne de ses Com-

paignes. Je suis femme destruite puis que mon cas est si manifeste que tant de gens le sçaiuent & en devisent. Conseillez moy ou je suis femme perdue & plus que vne autre desolée, & mal fortunée. Et à ces mots larmes a grant tas saillirent de ses yeulx, & descendirent au long de sa belle & chaire face jusques bien bas sur sa robe. La bonne Compaignie ce voyant, fut très-mariée & desplaisante de son ennuy, & pour la conforter lui dit: Ma sueur c'est folie de mener ce dueil & si grant, car on ne vous peut Dieu mercy reprocher de chose qui touche votre honneur, ne celle de vos amis, se vous auez entretenu vng gentil homme en cas d'amours ce n'est pas chose deffendue en la court d'honneur, mêmes est la sante & vraye adresse de y paruenir, & pour ce vous n'aez cause de douloir, & n'est asne viuant qui a la verité vous en puisse, ou doiue chargier: mais toutesfois il me sembleroit bon pour estaindre la noise de plusieurs parolles que courent aujourd'hui a l'occasion de vosdictes amours, que Girad votre seruiteur sans faire semblant de riens, print vng moult gracieulx congié de Monseigneur & de Madame coulourant son cas. Ou aussi d'aller en vng loingtain voyage ou en quelque guerre apparente & soubz cette ombre s'en allast quelque par soi rendre en vng bon hostel attendant que Dieu & amours aurent disposé sur vos besoignes; & lui arrêté vous face sçauoir de son état & par son même messaige lui ferez sçauoir de vos nouvelles, & par ce point s'appaisera le bruit qui court a pres-

sent , & vous entreaimerez & entretiendrez l'un & l'autre par liaison attendant que mieulx vous vienne & ne pensez point que votre amour pourtant doive cesser même de bien en mieulx se maintiendra , car par longue espace vous n'avez eu rapport ne nouvelle chascun de sa partie que par la relation de vos yeulx que ne sont pas les plus heureux de faire les plus surs jugemens , mêmes a ceulx que sont tenus en l'amoureux seruaige. Le gracieux & bon conseil de ceste gentil femme fut mis en oeuvre & a effet. Car au plus tost que Catherine sceust trouver la façon de parler a Girard son seruiteur , elle en bref lui comptat comment l'embusche de leurs amours étoit descouverte , & venue desja a la congnoissance de Monseigneur son Pere , de Madame sa Mere , & de Monseigneur & de Madame de leans. Et créez , dit elle , auant que il soit venu si auant ce na pas été sans poser grants langaiges au pourchas des rapporteurs deuant tous ceux de leans & de plusieurs voisins , & pource que fortune ne nous est pas si amye de nous auoir permis longuement viure si glorieusement en notre état commencé , & si nous menace aduise forge & prepare encores plus grants destourbiers se ne pouruions a l'encontre , il nous est mestier vtile & necessité d'auoir aduis bon & hastif & pource que le cas beaucoup me touche & plus que a vous quant au dangier que soudre en pouroit , sans vous dedire je vous diray mon opinion. Lors lui vas compter de chief en bout

l'auertissement & conseil de sa bonne Compagnie ; Girard desja vng peu aduerty de cette maudicte aduventure plus desplaisant que se tout le monde fut mort , mis hors de sa Dame , respondit en telle maniere. Ma leale & bonne Maitresse , vecy votre humble & obeissant seruiteur , qui aprez Dieu n'ayme rien en ce monde si loyaulment que vous & suis celuy a qui vous pouuez ordonner & commander tout ce que bon vous semble , & qui vous vient a plaisir , pour être lyement & de bon cueur sans contredit obeye : mais pensez qu'en ce monde ne me pourra pis aduenir quant il fault que je esloigne votre très desirée presence. Helas s'il fault que je vous laisse il m'est aduis que les premieres nouuelles que vous aurez de moy ce sera ma dolente & piteuse mort adjudée & executée accause de votre eslongier mais quoy que ce soit , vous êtes celle & seule viuante que ie vueil & ayme trop plus chier la mort en vous obeissant , que en ce monde viure , voire & être perpetuel , non accomplissant votre noble commandement. Vecy le corps de celui qui est tout vostre. Taillez , rongnez , prenez , ostez & faictes tout ce qu'il vous plaist. Se Catherine étoit marrie , desplaisante , oyant son seruiteur quelle aymeroit plus loyaulment que nul autre , le voyant ainsi plus troublé que dire on ne le vous pouroit , il ne le fault que penser & non enquerre & se ne fut pour la grant vertu que Dieu en elle n'auoit pas oubliée de mettre largement & a comble , elle se

feust offerte de lui faire compaignie en son voyage ; mais esperant de quelque jour recouvrera a ce que très malheureusement faillit , le retira de ce propos : Et certaine piece aprez si lui dit mon amy c'est force que vous en allez : si vous prie que vous n'oubliez pas celle qui vous a fait le don de son cuer , & afin que vous ayez le couraige de mieux soutenir la très horrible bataille que raison vous liure & amaine a votre douloureux partement encontre votre vouloir & desir , ie vous prometz & assure sur ma foy que tant que je viue aultre homme n'auray a espoux de ma volenté & bon gré que vous , voire tant que vous me foyez leal & entier comme j'espore que vous ferez & en approbacion de ce je vous donne cette verge qui est d'or esmaillé de larmes noires , & se aduerture on me vouloit ailleurs marier , ie me defendray tellement & tiendray telz termes que vous deuerez être de moy content , & vous monstreray que je vous vueille tenir sans faulser ma promesse. Or je vous prie que tantost que vous serez arresté ou que ce soit que vous mescripuez de vos nouuelles , & je vous en rescripray des miennes. Ha ma bonne Maitresse , dit Girard : Or voys ie bien qu'il faut que je vous abandonne pour vne espace. Je prie a Dieu qu'il vous doint plus de bien , & plus de ioye qu'il ne m'appert en auoir. Vous m'aurez fait de votre grace, non pas que j'en sois digne, vne si haulte & honorable promesse que n'est pas en moy de vous en sçauoir seulement & suffisamment mercier. Et

encores



encores ay ie le pouuoir de le desseruir , mais pour-  
 tant ne demene pas que ie n'en aye la congnoissan-  
 ce & si vous ose bien faire la pareille promesse , vous  
 suppliant très humblement & de tout mon cueur  
 que mon bon & leal vouloir me soit reputé de tel  
 & aussi grant merite que s'il partoit de plus homme  
 de bien que moy. Et adieu Madame mes yeulx de-  
 mandent a leur tour audience qui coupent a ma  
 langue son parler , & a ces motz la baïsa & elle lui  
 très serrement & puis sen allerent chascun en sa  
 chambre plaindre ses douleurs , Dieu sçait s'ilz plo-  
 roient des yeulx , du cueur & de la tête. Au fort  
 l'heure qu'il se conuint monstrier chascun s'efforça a  
 faire aultre chière de semblant & de bouche que le  
 desolé cueur ne faisoit. Et pour abregier Girard fit  
 tant en peu de jours qu'il obtint congie de son maî-  
 tre qui ne lui fut pas par trop difficile a impetrer ,  
 non pas pour faulte qu'il eust faicte , mais a l'oc-  
 casion des amours de lui & de Catherine dont les  
 amis d'elle étoient mal contens pourtant que Gi-  
 rard n'étoit pas de si grant lieu ne de si grant richet-  
 ses comme elle étoit , & pource doubtoient qu'il ne  
 la fiançast , ainsi n'en aduint pas & si se partit Gi-  
 rard , & fist tant par ses journées qu'il vint ou pays  
 du Barrois & trouua retenance a l'hostel d'vng grant  
 Baron du pays & lui arresté tantost manda & fist  
 sçauoir a la Dame de ses nouuels qui en fut très  
 joyeuse , & par son messagier mêmes lui rescripuit  
 de son état & du bon vouloir qu'elle auoit & au-

roit vers lui tant qu'il voudroit être loyal. Or vous fault il sçauoir que tantost que Girard fut party du pays du Breban plusieurs gentils hommes , Escuyers & Cheualiers se vindrent accointer de Catherine desirans sur toutes autres sa bienueillance & sa grace que durant le temps que Girard seruoit & étoit présent ne se monstroient ne apparoient sçachans de vray qu'il alloit deuant eulx a l'offrande. Et de fait plusieurs la requirent a Monseigneur son Pere de l'auoir en mariage & entre autres lui aduint vng qui lui fut agreable. Si manda plusieurs de ses amis & sa belle fille aussi & leur remonstra comment il étoit desja ancien , & que vng des grants plaisirs qu'il pourroit en ce monde auoir ce feroit de veoir sa fille en son viuant bien alliée. Leurs dit au surplus , vng tel gentil homme m'a fait demander ma fille se me semble très bien son fait & se vous me le conseillez & ma fille me vueil obeir il ne sera pas escondit en sa très honnorable requête. Tous ses amis & parens louèrent & accorderent beaucoup ceste alliance , tant pour les vertus & les richesses que aultres biens dudit gentil homme.

Et quant vint a sçauoir la vouldenté de la bonne Catherine elle se cuida excuser de non foi marier remonstrant & alleguant plusieurs choses dont elle le cuidoit desarmer & eslongier ce mariage , mais en la parfin elle fut a ce menée que selle ne vouloit être en la male grace de Pere de Mere de parents , d'amis , de maître , de maitresse, quelle ne

tiendroit point la promesse qu'elle a faite a Girard son seruiteur. Si s'aduifa d'vng très bon tour pour contenter tous ses parens sans enfreindre la loyauté qu'elle veut a son seruiteur & dit. Mon très redouté seigneur & pere je ne suis pas celle que vous voudroye en nulle maniere du monde desobeir voire sans la promesse que je auroye fait a Dieu mon Createur de qui ie tiens plus que de vous. Or est il ainsi que ie métoie resoluë en Dieu & proposai & promis en mon cueur auoye, non pas de jamais moy marier, mais de ce non faire encores ne encores, attendant que par sa grace me voulsist enseigner cet état ou aultre plus seur pour sauuer ma pource ame. Neantmoins pource que je suis celle que pas ne vous veuille troubler ou je puisse bonnement a l'encontre, je suis très bien contente d'emprendre l'état du mariage ou aultre tel qu'il vous plaira. Moyennement qu'il vous plaise moy donner congé de aincoys faire vn pelegrinaige a saint Nicolas de Varengueille, lequel j'ai voué & promis auant que jamais je change l'état ou je suis, & ce, dit elle, affin qu'elle peut veoir son seruiteur en chemin & lui dire comment elle étoit forcée & menée contre son vœu. Le pere ne fut pas moyennement joyeux de ouïr le bon vouloir & la saige responce de sa fille. Si lui accorda sa requête & prêtement voulut disposer de son partement. Et disoit desja a Madame sa femme, sa fille presente nous lui baillerons vng tel gentil homme

vng tel & vng tel : Isabeau , Marguerite & Jehanne-  
ton , c'est assez pour son état. Ah Monseigneur dit  
Catherine nous ferons autrement s'il vous plaist.  
Vous sçavez que le chemin de saint Nicolas n'est  
pas bien seur , mêmeement pour gens qui mènent  
état & conduisent femmes & a quoi on doit bien  
prendre garde : je n'y pourroie aussi aller sans grosse  
depençe & aussi c'est vne grande voie & s'il nous  
aduenoit meschief de être prins ou destrouffez de  
biens ou de notre honneur que ia Dieu ne vueil ce  
seroit vng merueilleux desplaisir. Si me sembleroit  
bon , sauue toutefois votre bon plaisir , que me fis-  
siez faire vng habillement d'homme & me baillias-  
siez en la conduite de mon oncle le battard chacun  
monté sur vn petit cheual. Nous yriens plus seu-  
rement , & a mains de despens , & se ainsi ie vous  
plaist je l'entreprendrai plus hardiment que d'y al-  
ler en état. Ce bon seigneur pensa vng peu sur l'ad-  
uis de la fille en parla a Madame si leur sembla  
que l'ouuerture qu'elle faisoit lui partoist d'vng  
grant sens , & d'vng très bon vouloir ; si furent ses  
choses prestes & ordonnées tantost pour partir , &  
ainsi le mirent au chemin la belle Catherine , &  
son oncle le battard sans aultre compaignie habil-  
lez a la façon d'Allemagne , bien & gentement  
étoient & firent tant par leurs journées que leurs  
pelerinaiges voire de Saint Nicolas fut accompli.  
Et comme ils se mettoient au retour , louans Dieu  
qu'ils n'auoient encores eu que tout bien , & de-

uisans d'autres plusieurs choses Catherine a son oncle va dire. Mon oncle mon amy vous sçavez qu'il est en moy, la mercy Dieu, qui suis seule heritiere de Monseigneur mon Pere, de vous faire beaucoup de biens, laquelle chose ie ferai volentiers quant a moy sera, se vous me voulez seruir en vne menüe queste que j'ay entreprise. C'est d'aller a l'hostel d'vng seigneur de Barrois qu'elle lui nomma, veoir Girard que vous sçavez & afin que quant nous reuiendrons puisse compter quelque chose de nouveau nous demanderons leans retenance, & se nous la pouuons obtenir nous y serons pour aulcuns jours & verrons le pays, & ne faictes nulle doubte que je n'y garde mon honneur comme vne bonne fille doit faire. L'Oncle esperant que mieulx lui en fera cy aprez, & qu'elle est si bonne qu'il ny fault ja guet sur elle, fut content de la seruir, & de l'accompagner en tout ce quelle voudra s'il fut beaucoup mercie n'en doubtez, & deslors conclurent qu'il appelleroit sa niepce Conrard. Ilz vindrent assez tost comme on leurs euseigna ou lieu desire, & s'adresserent au maître d'hostel du seigneur que étoit vng ancien escuyer qui les receust comme étrangers très lyement & honorablement. Conrard lui demanda se Monseigneur son maître ne voudroit pas seruice d'vng jeune gentil homme qui queroit aduenture & demandoit a veoir pays. Le maître d'hostel demanda dont il étoit, & il dit que il étoit de Breban. Or bien, dit il, vous viendrez

dilner ceans & apres disner i'en parlerai a Monseigneur. Il les fit tantost conduire en vne belle chambre & enuoya couvrir sa table , & faire vng très beau feu & apporter la soupe & la piece de mouton & le vin blanc attendant le disner. Et s'en alla deuers son maître & lui compta la venue d'vng jeune gentil homme de Breban qu'il le voudroit bien seruir , se le seigneur étoit content & si lui semble que ce soit son fait. Pour abregier tantost qu'il eust serui son maître il s'en vint deuers Conrard pour lui tenir compaignie au disner & avec lui amena pour ce qu'il étoit de Breban le bon Girard dessus nommé & dit a Conrard veti vng gentil homme de votre pays , il soit le très bien trouué ce dit Conrard , & vous le très bien venu ce dit Girard : mais créez qu'il ne reconnut pas la Dame , mais elle lui très bien , durant que ces accointances se faisoient , la viande fut apportée , & assis en prez le maître d'hostel chascun en sa place ce disner dura beaucoup a Conrard esperant apres d'auoir de bonnes deui- ses avec son seruiteur pensant aussi qu'il la recon- noistra tantost , tant a sa parolle comme aux res- ponses qu'il lui fera de son pays de Breban , mais il alla tout autrement. Car oncques durant le disner le bon Girard ne demandoit après homme ne fem- me de Breban dont Conrard ne scauoit que pen- ser ; ce disner fut passé & apres disner Monseigneur retint Conrard en son seruice , & le maître d'hostel trespascent homme ordonna que Girard & Conrard

pource qu'ilz sont tous d'vng pays auroient chambre ensemble. Et après ceste retenue, Girard & Conrard se prinrent a bras, & s'en vont veoir leurs cheuaux, mais quant au regard de Girard s'il parla oncques ne demanda rien de Breban. Si se print fort a doubter le pource Conrard, c'est a sçauoir la belle Catherine qu'elle étoit mise avec les pechiez oubliez, & que s'il en étoit rien a Girard il ne se pourroit tenir, qu'il n'en demandast, ou au moins du Seigneur ou de la Dame ou elle demouroit : la poutete étoit sans gueres le monstrier en grant destresse de cuer, & ne sçauoit lequel faire, ou de soi encores celer, & de l'esprouuer par subtiles parolles, ou de soi prestement faire congnoistre. Au fort elle s'arresta que encores demourera Conrard & ne demandera Catherine se Girard ne tient aultre maniere. Ce soir se passe comme le disner & vindrent en leur chambre Girard & Conrard parlans de beaucoup de choses, mais il ne venoit nulz propos en termes que gueres pleussent audit Conrard. Quant il vit qu'il ne disoit rien se on ne luy met en bouche elle lui demanda de quelz gens il étoit de Breban ne comment il étoit là venu & comment on se portoit audit pays de Breban depuis qu'elle ny auoit été, & il en respondit tout ce que bon lui sembla, & congnoissez vous pas dit elle vng tel seigneur & vng tel. Saint Jehan, ouï dit il, au dernier elle lui nomma le seigneur, & il dit qu'il le congnoissoit bien sans dire qu'il y eust demouré, ne aussi que jamais en sa vie y eut été. On dit, se dit

elle , qu'il y a de belles filles leans en congnoissez vous nulles , bien peu , dit il , & aussi il ne m'en chault , laissez moy dormir je meurs de sommeil. Comment, dit elle , pouuez vous dormir puis que on parle de belles filles ce n'est pas signe que vous soyez amoureux. Il ne respondit mot , mais s'endormit comme vng pourceau , & la pource Catherine se doubta tantoit de ce qui étoit , mais elle conclud qu'elle l'esprouvera plus auant. Quant vint a lendemain chascun faillit parlant & deuissant de ce que plus lui étoit. Girard de chiens & d'oyseaux , & Conrard de belles filles de leans & de Breban. Quant vint après dîner Conrard fit tant qu'il destourna Girard des aultres , & lui va dire que le pays de Barrois desja lui desplaisoit très fort , & que vrayment Breban est toute autre marche , & en son langage lui donna assez a congnoistre que le cuer lui tiroit fort deuers Breban. Auquel propos , ce dit Girard , que voyez vous en Breban qui n'est icy , & n'avez vous pas icy tant & si largement de belles forets pour la chasse , les belles riuieres & les plaines tant plaisantes qu'a souhaiter pour le desduit des oyseaulx & tant de gibier & aultres. Encores n'est ce riens ce dit Conrard , les femmes de Breban son bien aultres qui me plaisent bien autant & plus que vos chasses & volieres. Saint Jehan cest aultre chose ce dit Girard vous y seriez hardiment amoureux en votte Breban , je l'oz bien. Et par ma foy ce respondit Conrard , il n'est ja mestier que vous soit celé



car je suis amoureux voirement. Et a ceste cause me y tire le cuer tant rudement. Et si fort, que je fais doubte que force me sera d'abandonner vng jour votre Barroys, car il me sera pas possible a la longue de longuement viure sans veoir ma Dame. C'est folie donc ce dit Girard de l'auoir laissée se vous vous sentiez si inconstant. Inconstant mon amy. Et ou est celui qui peult mestrier loyaulx amoureux. Il n'est si saige ne si aduisé qui saiche seurement conduire. Amour bannit souuent de ses seruans & sens & raison. Ce propos sans plus auant le desduire se passa & fut heure de souper & ne se ratelerent point au deuiser. Tant qu'ils furent au liect couchez. Et creéz que de par Girard jamais n'étoit nouuelles que de dormir se Conrard ne l'eust assailli de procéz qui commença vne piteuse, longue & douloureuse plainte après sa Dame que ie passe pour abregier. Et si, dit il, en la fin. Helas Girard comment pouuez vous auoir enuie ne fain de dormir auprez de moy qui suis tant esueillé qui nay esperit que ne soit plain de regretz, d'ennuy & de soucy c'est merueilles que vous n'en êtes vng peu touchié, & croyez ce c'estoit maladie contagieuse, vous ne seriez pas seurement si prez sans auoir des esclabotures. Helas si ie ne vois bien brief ma Dame par amours; je ne vis jamais si fol amoureux dit Girard, & pensez vous que je n'aye point été amoureux. Certes ie sçai bien que c'est, car j'ay passé par la comme vous, certes si ay, mais je ne fus onques si enraigé que

d'en perdre le dormir ne la contenance comme vous faictes maintenant : vous estes beste , & ne prise point votre amour vng blanc. Et pensés vous qu'il en soit autant a votre Dame : nenny nenny. Je suis tout seur que si , ce dit Conrard , elle est trop loyalle pour m'oublier , ha dea vous dirz ce que vouldrez , ce dit Girard , mais ie ne croiray ja que femmes soient si lealles que pour tenir telz termes & ceulx qui le cudent sont parfaits coquarts. J'ay aimé comme vous & encores en aimes bien vne , & pour vous dire mon fait je partis de Breban a l'occasion d'amours & a l'heure que ie partis i'estoye bien en la grace d'une très belle , bonne & noble fille que je laissai a très grant regret & me despleust beaucoup par aucuns peu de jours d'auoir perdu sa présence , non pas que i'en laissasse le dormir ne boire ne manger comme vous. Quant ie me veis ainsi d'elle eslongie ie volus vser pour remede du conseil de Ouide , cat ie n'eus pas sifost l'accointance & entrée seans , que ie ne prinse vne des belles que y soit & ay tant fait la Dieu mercy qu'elle me veult beaucoup de bien , & ie l'aime beaucoup aussi & par ce point me suis deschargié de celle que par auant aimoye , & ne m'en est apresent non plus que de celle que oncques ne vis tant m'en a rebouté ma Dame de present.

Et comment , ce dit Conrard , est il possible se vous aymiez bien l'autre que vous la puissiez sifost publier ne abandonner , ie ne le scay entendre moy

ne concepuoir comment il se peut faire. Il s'est fait toutefois entendés le se vous sçavez, ce n'est pas bien gardé loyauté, ce dit Conrard. Quant a moy j'aymeroye plus cher mourir mille fois se possible m'étoit que d'auoir fait a ma Dame si grande fausseté, & ia Dieu ne me laisse tant viure que j'aye non pas le vouloir seulement, mais vne pensée de jamais aimer ne prier autre quelle. Tant estes vous plus beste, ce dit Girard, & se vous maintenez cette folie jamais vous n'aurez bien & ne ferez que songier & muſer & secherez sur terre comme la belle herbe dedens le four, & ferez homicide de vous mêmes, & si n'en aurez ia gré, mêmes votre Dame n'en fera que rire se uous êtes si heureux qu'il vienne a la congnoissance; comment, ce dit Conrard vous sçavez, d'amours bien auant je vous requiers dont que vueillez estre mon moyen seans ou autre part, que je face ma Dame par amours assauiſſer mon, se je pouroie guerir comme vous. Je vous diray, ce dit Girard, je vous feray demain deuiser a ma Dame, & aussi je lui diray que nous sommes Compaignons & qu'elle face votre besongne a sa Compaigne, & ie ne doute point se vous voulez que encores n'ayons du bon tems, & que bien brief se passera la resuerie qui vous affole voire se a vous ne tient: se ce n'étoit pour faulſer mon serment a ma Dame je le desiroye beaucoup, ce dit Conrard. Mais au fort i'essayeray comment il m'en prendra, & a ces motz se retourna Girard & s'endormit, & Catherine étoit de

mal tant oppressée voyant & oyant la desloyauté de celluy quelle aymoît plus que tout le monde , quelle se souhaittoit morte. Non pourtant elle se appaisa & adossa la tendreur feminine , & s'adouba de virile vertu. Car elle eut bien la constance de lendemain longuement & largement deuïser avec celle qui par amours aymoît cellui au monde que plus chier tenoit , même força son cueur & ses yeulx fit être notaires de plusieurs & maintes entreteneances a son très grant & mortel préjudice : Et ainsi comme elle étoit en parolles avec sa Compaigne elle apperceut la verge que au partir donna a son desloyal seruiteur qui lui percent ses douleurs , mais elle ne fut pas si folle non pas par conuoitise de la verge quelle ne trouua vne gracieuse façon de la regarder & boutter en son doigt , & sur ce point comme non y pensant se part & sen va , & tantost que le soupper fut passé , elle vint a son oncle , & lui dit nous auons assez été en Barroys , il est temps de partir soyez demain prest au point du jour , & aussi feray ie. Gardez que tout notre bagaige soit bien attinté. Venez si matin qu'il vous plaist il ne vous fauldra que monter respondit l'oncle. Or deuez vous sçauoir que tandis puis soupper que Girard deuïsoit avec sa Dame , celle qui fut s'en vint en sa chambre & se met a escrire vne lettre qu'ilz narroient tout du long & du large les amours d'elle & Girard comme les promesses qui s'entrefirient au partir , comment on l'auoit vouluë marier , le

refus qu'elle en fit , & le pelerinaige qu'elle entre-  
 print pour sauuer son serment , & se rendre a lui. La  
 desloyaulté dont elle la trouuée garny tant de bou-  
 che comme en œuvre & de fait & pour les causes  
 dessus dictes , elle se tient pour acquittée & deso-  
 bligée de la promesse qu'elle jadis lui fit & s'en va  
 vers son pays & ne le quier point jamais ne voir ne  
 rencontrer comme le plus desleal qu'il est qui jamais  
 priaist femme , & si emporte la verge qu'elle lui  
 donna qu'il auoit desja mise en main sequestre. Et  
 si se peult vanter , qu'il a couchié par trois nuyts  
 au plus prez d'elle , s'il y a que bien , si le die , car  
 elle ne le craint ; escript de la main de celle dont  
 peut bien congnoistre la lettre & au dessous Ca-  
 therine , &c. surnommée Conrard , & sur le dos au  
 desleal Girard , &c. Elle ne dormir gueres la nuyt ,  
 & aussitost que on vit du jour elle se leua tout dou-  
 cement , & s'abilla sans que oncques Girard s'es-  
 ueilla & prent sa lettre quelle auoit bien close &  
 fermée & la boutte en la manche du pourpoint de  
 Girard , & a Dieu le commanda tout en basset en  
 plourant tendrement pour le grant duëil quelle auoit  
 du très faulx & mauuais tour qu'il lui auoit joué.  
 Girard dormoit qui riens ne respondit, elle s'en vient  
 deuers son oncle qui lui bailla son cheual , & elle  
 monte & puis tirent pays tant qu'ilz vindrent en  
 Breban ou ilz furent receus joyeusement , Dieu le  
 sçait. Et pensez que leurs fut bien demandé des  
 nouuelles & aduentures de leurs voyages , com-

ment ils sy étoient gouvernez , mais quoy qu'ils respondissent ils ne se vanterent par de la principale. Pour parler comment il aduint a Girard quant vint le jour du partement de la bonne Catherine environ dix heures il s'esueilla & la regarda que son Compaignon Conrard étoit ia leué si se pensa qu'il étoit tard , & fault tout en haste & cherche son pourpoint , & comme il boutoit son bras dedens l'une des manches il s'en faillit vne lettre dont il fut assez esbahy , car il ne lui souuenoit pas que nulles y en eut bouttées. Il les releva toutefois , & voit quelles sont fermées , & auoit au dos escript au desloyal Girard , &c. Se parauant auoit été esbahy encores le fut il beaucoup plus. A certaine piece il les ouurit & veoit la subscription qui disoit Catherine surnommée Conrard , &c. Si ne sçait que penser ; il les lit neantmoins , & en lisant , le sang lui monte , & le cueur lui fremit & deuint tout altéré , de maniere & de couleur a quelque meschief que ce fut , il acheua de lire sa lettre par laquelle il congneut que sa desloyauté étoit venue a la congnoissance de celle qui lui vouloit tant de bien , non quelle le sceust être tel au rapport d'autrui. Mais elle même en propre personne en a faicte la vraye information & qui plus prez du cueur lui touche , il a couché trois nuyts avec elle sans l'auoir guerdonnée de la peine quelle a prinse que de si très loing le est venu esprouuer , il ronge son frain & a petit qu'il ne enrage tout vif quant il se veoit en celle peleterie , &

aprez beaucoup d'aduis il ne sçait aultre remede que de la fuir, & bien lui semble qui la rataindra si prent congié de son maître, & se met a la voie suyuant le froye des cheuaux de ceux que oncques ne rataignit tant qu'ils fussent en Breban. Il uint si a point que c'étoit le jour des nopces de celle qui la esprouuë, laquelle il cuida bien aller baïser & saluer, & faire vne ordre excufance de ses faultes, mais il ne lui fut pas souffert, car elle lui tourna l'espaule, & ne sceut tout ce jour ne oncques puis aprez trouuer maniere ne façon de deuïser avec elle mesme, il s'auança vne fois pour la mener dancier, mais elle le refusa plainement deuant le monde dont plusieurs a ce prinrent garde. Ne demoura guères aprez que vug aultre gentil homme entra dedens qui fit courner les menestriers, & sauança pardeuant elle & elle descendit, ce voyant Girard, & sen alla dancier. Ainsi donc comme auez oüy perdit le desloyal, sa Dame s'il en est encores d'autres tels, ils se doiuent mirer en cet exemple que est notoire & vray aduenü & depuis naguères.



XXVII. NOUVELLE.

*LE SEIGNEUR*

A U B A H U.

**C**E n'est pas chose peu accoustumée especiallement en ce Royaulme , que les belles Dames & Damoiselles , se trouuent volentiers & souuent en la compagnie des gentilz Compaignons. Et a l'occasion des bons & joyeux passetemps quelles ont avec eulx , les gracieuses & doulces requestes qu'ilz leurs font ne sont pas si difficiles a impettrer. A ce propos n'a pas long temps que vng très gentil Seigneur que on peut bien mettre ou renc & du costé des Princes dont ie laisse le nom en la plume , se trouua tant en grace d'une très belle Damoiselle qui mariée étoit, dont le bruit d'elle n'étoit pas si peu congneu que le plus grant maître de ce Royaulme ne se tenist pour très heureux de en être retenu seruiteur : laquelle lui vouloit montrer le bien qu'elle lui vouloit. Mais ce ne fut pas a sa premiere volenté tant l'empêchoient les anciens aduersaires & ennemis d'amours , & par special plus lui nuisoit son bon mary tenant le lieu en ce cas du très maudit dangier car se ce ne fut il, son gentil seruiteur ne eust pas



pas encores a lui tollir ce que bonnement & par honneur donner ne lui pouuoit, & pensez que le seruiteur n'étoit pas fort content de cette longue attente. Car l'acheuement de sa gente chasse lui étoit plus grant heur, & trop plus désiré que nul autre bien quelconque que aduenir iamais lui pouoit, & a cette cause tant continua son pourchas que sa Dame lui dit, je ne suis pas mains desplaisante que vous par ma foy que je ne vous puis faire autre chiere: mais vous sçauiez, tant que mon mary soit estans forcé est qu'il soit entretenu. Helas, dit-il, & n'est-il moien qui se puisse trouuer d'abregier mon dure & cruel martyre. Elle que comme dessus est dit, n'étoit pas en maindre desir de soy trouuer a part avec son seruiteur si lui dit venez ennuit a telle heure heurter a ma chambre ie vous feray mettre dedens, & trouuerai façon d'estre deliurée de mon mary se fortune ne détourne mon entreprinse.

Le seruiteur ne ouït jamais chose que mieulx lui pleust, & apres les remerciments gracieux & doux en ce cas dont il étoit bon maître & ouurier se part d'elle attendant & desirant son heure assignée. Or deuez vous sçauoir que enuiron vne bonne heure ou plus ou mains deuant l'heure assignée dessus dicte, notre gentile Damoiselle avec ses femmes & son mary qui va derriere, pour ceste heure étoit en sa chambre retraicte puis le soupper, & n'étoit pas croyez son engin oyseux, mais labouiroit a toute force pour fournir la promesse a son seruiteur, main-

tenant pensoit d'vng, puis maintenant d'vng aultre, mais rien ne lui venoit a son entendement, que peult eslongier ce mauldit mary, & toutefois approchoit fort l'heure très desirée. Comme elle étoit en ce profond penser fortune lui fut si très amye que même son mary donna le très doulx aduertissement de sa dure chance & mal aduventure conuertie en la personne de son aduersaire, c'est a sçauoir du seruiteur dessus dit en joye non pareille de deduit, soulas & liesse, regardant par la chambre, Tant regarda qu'il apperçeut d'auanture aux pieds de la couchette vng bahu qui étoit a sa femme, & afin de la faire parler & l'oster de son penser demanda de quoi sert ce bahu en la chambre, & a quel propos on ne le portoit a la garderobe ou en quelque aultre lieu sans en faire leans parement, Il n'y a point de peril Monseigneur, ce dit Mademoiselle, amene vient ici que nous, aussi ie lui ay fait laisser tout a propos pource que encores sont aucunes de mes robes dedens, mais n'en soyez ia mal content mon amy, ces femmes l'osteront tantost. Mal content, dit-il, nenny par ma foy je l'ayme autant ici qu'ailleurs, puis qu'il vous plaist, mais il me semble bien petit pour y mettre vos robes bien a laise sans les froisser attendu les grandes & longues trainées qu'on fait aujourd'hui. Par ma foy Monseigneur, dit-elle, il est assez grant, il ne le me peult sembler, dit-il, vrayment, & le regardez bien. Or ça Monseigneur, dit-elle, voulez vous faire vng gage a moy, où

vrayment , dit-il , qu'il fera il. Je gaigerai s'il vous plaist pour demi douzaine de bien fines chemises encontre le satin d'une cote simple nous vous bouterons bien dedens tout ainsi que vous êtes. Par ma foy , dit-il , ie gaige que non , & ie gaige que si. Or auant ce dirent les femmes nous verrons que le gaignera , a l'esprouuer le sçaura on dit Monseigneur , & lors s'auance & fit tirer du bahu les robes qui étoient dedens , & quant il fut vuide , Mademoiselle & ses femmes a quelque meschief que ce fut , firent tant que Monseigneur fut dedens tout a son aise : & a ce coup fut grande la noise , & autant joyeuse , & Mademoiselle alla dire , or Monseigneur vous auez perdu la gaigeure , vous le congnoissez bien faictes ? ouï , dit-il , c'est raison & en disant ces paroles le bahu fut fermé , & tout jouant , riant & esbatant prindrent toutes ensemble & homme & bahu & l'emporterent en vne petite garde robe assez loing de la chambre , & il erie & se demene faisant grant bruit & grant noise , mais c'est pour neant , car il fut la laissé toute la belle nuit pense , dorme face du mieulx qu'il peult , car il est ordonné par Mademoiselle & son estroit conseil qu'il n'en partiroit meshuy pource qu'il a tant empêché le lieu. Pour retourner a la matiere de notre propos encommencé nous laisserons notre homme & notre bahu , & dirons de Mademoiselle que attendoit son seruiteur avec ses femmes qui étoient telles & si bonnes & si secrettes que rien du monde ne leur étoit cels

de ses affaires. Lesquelles sçauoient bien que le bien aimé seruiteur se a lui ne tenoit tiendrait la nuit le lieu de celui qui au bahu fait sa penitence. Ne demoura gueres que le bon seruiteur sans faire effroi ne bruit vint heurter a la porte & au heurter qu'il fist on le congneut tantost, & la étoit celle qui le bouta dedens, il fut receu ioyeusement & liement, & entretenu doucement de Mademoiselle & de sa compaignie & ne se donna garde qu'il se trouua tout seul avec sa Dame qui lui compta bien au long bonne fortune que Dieu leur a donnée. C'est a sçavoir comment elle fist la gageure a son mary d'entrer au bahu, comment il y entra, & comment elle & ses femmes l'ont porté en vne garde robe. Comment ce dit le seruiteur, ie ne cuidoye point qu'il fut ceans, par ma foy ie pensoie moy, que vous eussiez trouué aucune façon de l'enuoyer ou faire aller dehors, & que j'eusse ici tenu meshuy son lieu. Vous n'en yrez par pourtant, dit-elle, il n'a garde de yssir dont il est, & si a beau crier il n'est ame de nulz ceans qui le puist ouïr, & croyez qu'il demoura mesbuy par moy. Se vous le voulez desprisonner ie m'en rapporte a vous nostre Dame, dit-il, s'il en foilloit tant que ie l'en fisse oster il auroit bel attendre. Or faisons donc bonne chiere, dit-elle, & ny pensons plus. Pour abregier chascun se despoüilla & se coucherent les deux amants dedens le beau lit ensemble bras a bras & firent ce pour-  
 quei ils étoient assemblez qui mieulx vault estre pen-

se des lifans qu'estre noté de l'escripquant. Quant vint au point du jour, le gentil seruiteur se partit de la Dame le plus secrettement qu'il peust, & vint a son logis dornir comme j'espoire ou desjeuner, car de tous deux auoit befoing. Madamoiselle qui n'étoit pas mains subtile que saige & bonne quant il fust heure se leua & dit a ses femmes: Il seroit desormais heure de hoster notre prisonnier, je vois voire qu'il dira & s'il se voudra mettre a finance. Mettez tout sur nous, dirent elles, nous l'appaiserons bien, croyez que si ferai ie dit-elle, & a ces motz se seigne & s'en va, & comme non pensant a ce quelle faisoit, tout daguet & a propos entra dedans en la garderobe ou son mary encore étoit dedans le bahu clos. Et quant il ouït, il commença faire grant noise & crier a la volée qu'est cecy me laissera on cy dedans, & sa bonne femme qui l'ouït ainsi demener respondit effreément, & comme craintiuement faisant l'ignorante, eh Dieu qui est cela que j'ay ouï erier? c'est moy de par Dieu dit le mary, c'est moy; e'est vous, dit-elle, & dont venez vous a ceste heure, dont je viens, dit-il, & vous le sçavez bien, Madamoiselle, il ne faut ia qu'on le vous die, mais si vous faites de moy au fort ie ferai quelque jour de vous, & s'il eut endure, ou osé il se fut volentiers couroucé & eut dit villenie a sa bonne femme, & elle qui le congnoissoit lui coupa la parole, & dit: Monseigneur pour Dieu ie vous crie mercy par mon serment, je vous assure que ie ne vous cuidoye pas

ici a ceste heure : & croyez que ie ne vous y eusse pas quis , & ne me sçai assez esmerueiller dont vous venez a y être encores , car ie chargé hier au soir a ces femmes qu'elles vous missent dehors, tandis que ie disoie mes heures , & elles me dirent que si feroient elles , & de fait l'une me vient dire que vous étiez dehors & desja allé en la ville , & que ne reuiendriez meshuy. Et a ceste cause ie me couchay assez tost après sans vous attendre. Saint Jehan , dit-il , vous voyez que c'est , or vous aduancez de moy tirer d'ici , car ie suis tant las que ie n'en puis plus. Cela feroye bien Monseigneur , dit-elle , mais ce ne sera pas deuant que vous n'ayez promis de moy payer de la gaigeure que auez perduë , & pardonnez moy toutefois , car autrement ne le puis faire ; & aduancez vous de pardieu , ie le payeray vrayment & ainsi vous le prometz , ouï par ma foy , & ce procès finé , Mademoiselle defferma le bahu , & Monseigneur yffit hors lassé , froissé & trauaillé , & elle le prent a bras & baise & acolle tant doucement , que on ne pourroit plus , en lui priant pour Dieu qu'il ne soit point mal content. Adonc le pource coquart dit que non étoit-il , puis qu'elle n'en sçauoit rien , mais il pugnira trop bien ses femmes s'il y sçait aduenir. Par ma foy Monseigneur , dit-elle , elles s'en son ores bien vengées de vous , je ne doute point que vous ne leurs ayez fait quelque chose. Non ay certes que je saiche , mais croyez que le tour que elles m'ont joué leur sera chier vendu. Il

n'eut pas finé ce propos que toutes ses femmes entrèrent dedans qui si très fort rioient, & de si grant cueur qu'elles ne sceurent mot dire grant piece après, & Monseigneur qui devoit faire merueilles, quant il les vit rire en ce point ne se peult tenir de les contrefaire. Et Madamoiselle pour lui faire compaignie, ne si faignit point la veilliez vous vne merueilleuse risée, & d'vng cousté & d'aultre, mais celui qui en auoit le mains cause ne s'en pouuoit rauoir, après certaine piece, ce passetemps cessa & dit a Monseigneur : Madamoiselle ie vous mercie beaucoup de la courtoisie que m'auez ennuit fait a votre commandement, Monseigneur, respondit l'vne, & encore n'êtes vous pas quitte, vous nous auez fait & faites tousjours tant de peine & de meschief que nous vous auons gardé ceste pensée, & n'auons aultre regret que vous n'y auez été, & se n'eussions sceu de vray qu'il n'eust pas bien plu a Madamoiselle encores y feussiez vous & prenez en gré, & est ce cela, dit-il. Or bien bien, vous verrez comme il vous en prendra, & par ma foy ie suis bien gouverné quant avec tout ce mal que j'ai eu, on ne me fait que farcer, & encores qui pis est il me faut payer la cote simple de satin. Et vrayment je ne puis a mains que d'auoir les chemises de la gaigeure en recompensation de la peine qu'on ma faicte. Il n'y a par bieu que raison dirent les Damoiselles, nous voulons a ceste heure être pour vous, Monseigneur & vous les aurez n'aura pas Madamoiselle, & a quel propos, dit-elle, il

a perdu la gaigeure, dea nous sçauons trop bien cela il ne les peut auoir de droit aussi ne les demande il pas a ceste intencion, mais il les a bien desseruiés en aultre maniere. A cela ne tiendra il pas, dit-elle, je seray volentiers finance de la toille pour l'amour de vous, mes Damoiselles, qui tant bien procurés pour lui & vous prendrez bien la peine de les coudre, oüi vrayement Madamoiselle. Comme celui qui ne fait que escourre la tête au matin quant il se lieue qu'il ne soit prest ainsi étoit Monseigneur, car il ne lui faillit que vne secousse de verge a nettoyer sa robe & ses chausses qu'il ne fust prest & ainsi a la messe s'en va & Madamoiselle & ses femmes le suivent, qu'ils faisoient de lui ie vous assure grans risées. Et croyez que la messe ne se passa pas sans ris soudains quant il leur souuient du giste que Monseigneur a fait au bahu, lequel ne le scait encores que fut celle nuit enregistré ou liure que n'a point de nom, & se n'est que d'aduenture que ceste histoire viengne entre ses mains jamais n'en aura si Dieu plaist congnoissance ce que pour riens ie ne voudroie. Si prie aux lisans qui le congnoissent que se gardent de lui monstres.





## XXVIII. NOUVELLE.

LE GALANT  
MORFONDU.

**S**E au temps du très renommé & eloquent Bocace, l'aduanture dont je vueil fournir ma nouvelle fut aduenüe a son audience, & congnoissance paruenüe, je ne doubte point qu'il ne l'eust ajoutée & mise ou renc des nobles hommes mal fortunez. Car je ne pense pas que noble homme jamais pour vng coup eut guères fortunes plus dure a porter que le bon seigneur que Dieu pardoint dont je vous compteray l'aduenture; & se mal fortune n'est digne d'être ou dit liure de Bocace, ce j'en fais juge tous ceux qui l'orront racompter. Le bon seigneur dont ie vous parle en son temps étoit vng des beaulx Princes de ce Royaulme, garny & adreslié de tout ce qu'on sçauroit louer & priser vng noble homme, & entre aultres de ses propriétés, il étoit tel destiné qu'entre les Dames jamais homme ne le passa de gracieuseté. Or lui aduint que au temps, que cette renommée & destinée florissoit, & qu'il n'étoit bruit que de lui, amours qui seme ses vertus ou mieulx lui plaist & bon lui sem-

*Tome I.*

P

ble fit alliance a vne belle fille , jeune gente & gracieuse & en bon point , en sa façon ayant bruit autant & plus que nulle de son temps , tant par sa grant & non pareille beaulté , comme par ses très belles meurs & vertus que pas ne nuysoit au jeu tant étoit en la grace de la Royne du Pays qu'elle étoit en son demy lit les nuyts que ladicte Royne point ne couchoit avec le Roy. Ces amours que je vous dis furent si aduant conduites qu'il ne restoit que temps & lieu pour dire & faire chascun a sa partie la chose au monde que plus lui pouroit plaire , ils ne furent pas peu de jours pour aduifer lieu & place conuenable a ce faire , mais en la fin celle qui ne desiroit pas mains le bien de son seruiteur que la saluacion de son ame , s'aduifa d'vng bon tour , dont tantost l'aduertit disant ce qui s'ensuit. Mon très loyal amy , vous sçaez comment ie couche avec la Royne , & que nullement n'est possible se ie ne vouloye tout gaster d'abandonner cet honneur & auancement , dont la plus femme de bien de ce Royaulme se tiendrait pour bien heureuse & honorée combien que par ma foy je voudroye complaire , & faire votre plaisir d'aussi bon cueur comme a elle , & qu'il soit vray ie le vous monstreray de fait , sans abandonner toutefois celle que me fait & peult faire tout le bien & l'honneur du monde , je ne pense pas aussi que vous voulissiez que aultrement ie fisse. Non par ma foy ma mye , respondit le bon seigneur , mais toutefois je vous prie que seruant votre mai-

treſſe votre leal ſeruiteur ne ſoit point arriere du bien que faire lui pouez qui ne lui eſt pas moindre choſe de a votre grace & amour paruenir que de gagner le ſurplus du monde. Vecy que je vous feray , Monſeigneur , dit-elle , la Royne a vne leuriere comme vous ſçauex dont elle eſt beaucoup aſſotée , & la fait coucher en ſa chambre , je trouueray façon en nuit de l'enclorre hors de la chambre ſans qu'elle en ſaiſche rien , & quant chacun ſera retrait je feray vng fault juſques en la chambre de parement , & deffermeray l'huyſ , & le laiſſeray entreouuert. Et quant vous penſerez que la Royne pourra être ou lit vous viendrez tout ſecrettement , & entrerez en ladite chambre & fermerez l'huiſ , vous y trouuerez la leuriere que vous congnoiſt aſſez , ſi ſe laiſſera bien approchier de vous , vous la prendrez par les oreilles & la ſerez bien hault crier , & quant la Royne l'orra , elle la congnoiſtra tantost , ie ne doubte point qu'elle ne me face leuer incontinent pour le mettre dedens , & en ce point vendray ie vers vous , & ne faillez point ſe jamais vous voulez parler a moy. Ha ma très chiere & loyale amye , dit Monſeigneur , ie vous mercie tant que je puis , penſez que je n'y fauldray pas , & a tant ſe part & s'en va , & ſa Dame auſſi , chaſcun penſant & deſirant d'acheuer ce que eſt propoſé qu'en vaudroit le long compte , la leuriere ſe cuida rendre quant il fut heure en la chambre de ſa maitreſſe comme elle auoit accoutumé , mais celle qui l'auoit candamnée dehors la

fit retraire en la chambre au plus prez & la Royne se coucha sans ce qu'elle s'en donna garde , & assez tost aprez lui vint faire compaignie , la bonne Damoiselle qui n'attendoit que l'heure d'oüir crier la leuriere & la semonce de bataille ne demoura gueres que le gentil seigneur se mit sur les rens , & tant fit qu'il se trouua en la chambre ou la leuriere se dormoit , il la quest tant au pié qu'a la main qu'il la trouua , & puis la print par les oreilles , & la fit hault crier deux ou trois fois , & la Royne qui l'oyoit congneut tantost que c'étoit sa leuriere , & pensoit quelle vouloit être dedens. Si appella sa Damoiselle & lui dit ma mye vela ma leuriere qui se plaint la dehors , leuez vous si la mettez dedens , voulentiers Madame , dit la Damoiselle , & jasoit quelle attendit la bataille dont elle mêmes auoit l'heure & le jour assigné , si ne s'arma telle que de sa chemise , & en ce point sen vint a l'huis & l'ouurit , tantost lui vint a l'encontre celui qui l'attendoit , il fut tant joyeux & tant surprins quant il vit sa Dame si belle & si en bon point qu'il perdit force , sens & aduis & ne fut en sa puissance , adonques tirer sa dague pour la esprouuer se elle pouroit prendre sur les cuirasses trop bien de baiser , d'acoler , de maniere le tetin du surplus il faisoit assez diligence , mais du parfait nichil. Si fut force a la gente Damoiselle quelle retourna sans lui laisser ce qu'auoir ne pouuoit se par force d'armes ne le conqueroit , & ainsi quelle se voulut partir il la

enidoit retenir par force & par doulces parolles , mais elle n'osoit demourer : sy lui ferma l'huis au visaige & s'en reuint par deuers la Royne qui lui demanda s'elle auoit mis la leuriere dedens. Et elle dit que non , car oncques puis ne l'auoit sceu trouuer , & si auoit beaucoup regardé. Or bien , dit la Royne , couchez vous tousjours l'aura on bien. Le pource amoureux étoit a celle heure bien mal content qui se voit ainsi deshonoré , & aneantir : & si cuidoit au parauant & bien tant en sa force si fioit , qu'en mains d'heure qu'il n'auoit été avec sa Dame , il en eut bien combattu telles trois , & venu au dessus d'elles a son honneur : au fort il reprint couraige & dit bien en soi-même , s'il est jamais si heureux que de treuuer sa Dame en si belle : elle ne partira pas comme elle a fait l'autre fois , ainsi animé & éguillonné de honte & de desirs , il reprit la leuriere par les oreilles , & la tira si rudement tout couroucé qu'il étoit , qu'il la fit crier beaucoup plus hault quelle n'auoit deuant , si hucha arriere a ce cry la Royne sa Damoiselle qui reuint ouurir l'huis comme deuant , mais elle s'en retourna deuers sa maitresse sans conquerter , ne plus ne mains qu'elle fit l'autre fois , or reuint la tierce fois que ce pource gentil homme faisoit tout son pouoir de besongner comme il auoit lé desir , mais au dyable de l'homme s'il peut oncques trouuer maniere de fournir vne pource lance a celle qui ne demandoit aultre chose , & qui attendoit tout de pié quoy. Et quant

elle veit quelle n'auroit pas son panier percé , & qu'il n'étoit pas en l'autre mettre seulement la lance en son arrêt , quelque avantage quelle lui fist. Tantost congneut qu'elle auoit a la jouste failly , dont elle tint beaucoup de compte , mais du joueur elle ne voulut plus demourer pour conqueste quelle y fist. Si voulut rentrer en la chambre , & son amy la retiroit a force & disoit. Helas ma mye demourez encores vng peu & ie vous en prie. Je ne puis , dit-elle , laissez moy aller , dit elle , & ie n'ay que trop demouré pour chose que j'aye proufité. Et a tant se tourne vers la chambre , & l'autre la suiuoit qui la cuidoit retenir. Et quant elle vit ce pour le bien payer , & la Royne contenter , alla dire tout en hault passez passez , orde caigne que vous êtes , pardieu vous ny entrez meshuy meschante beste que vous êtes , & en ce disant ferma son huis & la Royne qui l'oüit , demanda a qui parlez vous ma mye. C'est à ce paillard chien , Madame , que m'a fait tant de peine de la querir , il s'étoit bouté sous vng banc la dedens & caché tout de plat le museau sur la terre , & si ne le sçauoye trouuer , & quant je lui ay trouué il ne s'est oncques daigné leuer pour quelque chose que je lui aye faite. Je l'eusse très volentiers bouté dedens , mais il n'a oncques daigné leuer la tête , si l'ay laissé la dehors & a son visage tout par despit ay fermé l'huis , c'est très bien fait ma mye , dit la Royne couchez vous , si dormirons. Ainsi que vous auez oüi fut

ma fortuné ce gentil Seigneur, & pource qu'il ne peust quant sa Dame voulut, ie tient moy quant il eut bien depuis la puissance a commandement, le vouloir de sa Dame fut hors de la ville.

---

## XXIX. NOUVELLE.

## LA VACHE

## ET LE VEAU.

**N**A pas cent ans du jourd'huy que vng gentil homme de ce Royaulme voulut sçauoir & esprouuer l'aïse qu'on a en mariage, & pour abregier fit tant que le très desiré jour de ses nopces fut venu, aprez les très bonnes chieres, & aultres passetemps accoustumez l'espousée fut couchée a vne certaine piece, aprez la lui vint & se coucha auprez d'elle, & sans delay incontinent bailla l'assault a sa forteresse a quelque meschief que ce fut, il entra dedens & la gaigna, mais vous deuez entendre qu'il ne fit pas ceste conquête sans faire saison d'armes qui longues seroient a racompter, car aincoys qu'il venist au donjon du chasteau, force lui fut de gaigner & emporter la beleure, bambeliers, & plusieurs aultres forts dont la place étoit bien garnie, comme celle qui jamais n'a été prinse. Au moins doncques fust encores grant nouuelle & que nature auois mis

P iiij

a deffence , quant il fust maître de la place il rompit sa lance , & lors cessa l'assault & ploya l'œuvre. Or ne faut pas oublier que la bonne Damoiselle qui se vit en la mercy de ce gentil homme son mary , qui desja auoit fouragé la pluspart de son manoir voulut lui monstrier vng prisonnier qu'elle tenoit en un secret lieu enclos & enfermé , & pour parler plein elle se deliura cy prins cy mis , aprez ceste premiere course d'vng très beau filz , donc son mary se trouua si très honteux & tant esbahy qu'il ne sçauoit sa maniere sinon de soy taire , & pour honnesteté & pitié qu'il eust de ce cas, il seruit la mere & l'enfant de ce qu'il sçauoit faire. Mais créez que la pource gentil femme a cest coup getta vng bien hault & dur cry que de plusieurs fut clairement ouï & entendu qu'ils cuidoient a la verité que elle getta ce cry a la despucler comme ce la coustume en cest Royaulme , pendant ce temps les gentis hommes de l'hostel ou ce nouveau marié demouroit , vindrent heurter a l'huis de ceste chambre & apporterent le chaudreau , ils heurterent beaucoup sans ce que ame respondit , l'esposée en étoit bien excusée , & l'épousé n'auoit , pas cause de trop caqueter , & qu'est ce , dirent-ilz , n'ouurirez vous pas l'huis. Se vous ne vous hâtez nous le romperons , le chaudreau que nous vous aportons sera tantost tout froid & lors recommencerent a heurter de plus belle , mais le nouveau marié ne eust pas dit ung mot pour cent francs , dont ceulx de dehors ne sçauoient que penser : car



il n'étoit pas muet de coustume : au fort il se le-  
ua, & print vne longue robe qu'il auoit & laissa  
entrer ses compaignons dedens , que tantost de-  
manderent se le chaudeau étoit gaigné & qu'ilz  
l'apportoient a l'aduenture , & lors vng d'entre eulx  
courrit la table & mist le banquet dessus , car ils  
étoient en lieu pour le faire , & ou rien n'étoit es-  
pargné , en telz cas & aultres semblables. Ils s'assi-  
rent tous au mengier & bon mary print sa place  
en vne chaire a dos assis prez de son lit , tant sim-  
ple & tant piteux qu'on ne le vous sçauroit dire , &  
quelque chose que les autres dissent il ne sonnoit  
pas vng mot , mais se tenoit comme vne droite sta-  
tuë ou vne idole entaillée , & qu'est cecy , dit l'vng  
ne prenez vous point garde a la bonne chiere que  
nous fait notre homme , encores a il a dire vng  
seul mot , ha dea , dit l'autre ses bourdes sont ra-  
passez , par ma foy , dit le tiers mariage est chose  
de grant vertu , regardez quant a vne heure qu'il a  
été marié il a ja perdu la force de sa langue. S'il est  
jamais longuement je ne donnerois pas maille de  
tout le surplus , & a la verité dire , il étoit aupara-  
uant vng très gracieulx farseur & tant bien lui seoit  
que merueilles , & ne disoit jamais vne parolle puis  
qu'il étoit en gogues qu'elle n'aportast avec elle son  
ris. Mais il en étoit pour l'heure bien rebouté , ces  
gentils hommes & ces gentils Compaignons beu-  
uoient d'autant & d'aurel & a l'espousé. Mais au  
diable des deux s'ils auoient fain de boire : l'vng

enraigoit tout vif & l'autre n'étoit pas mains mal-  
aisé. Je ne me congnois en ceste maniere, dit vng  
gentil homme, il nous fault sestoier de nous mê-  
mes. Je ne veis jamais homme de si hault esternu  
si tost rassis pour vne femme : j'ay veu qu'on n'eust  
pas Dieu oüi tonner en vne compaignie où il fust &  
il se tient plus quoy que vng feu couuert, ha dea ces  
haultes parolles sont bien entonnées maintenant :  
je bois a vous espousé, disoit l'autre. Mais il n'é-  
toit pas pleige : car il jeunoit de boire, de mangier  
de bonne chiere faire, & de parler, non pourtant  
assez bonne piece apres quant il eut bien été re-  
prouué & rigolé de ses Compaignons & comme vng  
sanglier mis aux abais de tous costés. Il dit Messei-  
gneurs quant ie vous ay bien entendu qui me se-  
monnez si très fort de parler ie vuille bien que  
vous saichiez que j'ay bien cause de beaucoup pen-  
ser, & de moy taire tout quoy, & si suis seur qu'il  
n'y a nul qui n'en fit autant s'il en auoit le pour-  
quoy comme j'ay. Et par la mort bieu si i'estoie aussi  
riche que le Roy, que Monseigneur & que tous les  
Princes chrestiens, si ne sçauois ie fournir ce qui m'est  
apparent d'auoir a entretenir, vecy pour vng poure  
coup que j'ay accollé ma femme, elle m'a fait vng  
enfant. Or regardez se a chascune fois que je recom-  
menceray elle en fait autant de quoy ie pouray nourir  
le mesnaige. Comment vng enfant, dirent ses compai-  
gnons, vecy de quoy regardez, & lors se tourne vers  
son liét & lieue la couuerture & leurs monstre, te-

nez , dit-il , vela la vache & le veau , suis ie pas bien party , plusieurs de la compagnie furent bien esbahis & pardonnerent a leur hoste sa simple chiere , & s'en allerent chascun a sa chascune , & le pource nouveau marié abandonna cette premiere nuyt la nouuelle accouchée & doubtant que elle n'en fit vne autre fois autant oncques puis ne sy trouua.

## XXX. NOUVELLE.

LES TROIS  
CORDELIERS.

**I**L est vray , comme l'Evangile , que trois bons marchands de Sauoye se misdrent au chemin avec leurs trois femmes pour aller en pelerinaige a saint Antoine de Viennois , & pour y aller plus deuotement rendre a Dieu & a Monseigneur saint Antoine leur voyage plus agreable , ils conclurent avec leurs femmes dez le partir de leurs maisons que tout le voyage ils ne coucheroient pas avecques elles , mais en continence yront & viendront. Ils arriuerent vng iour en la ville de Chambery , & se logerent en vng très bon logis , & firent au souper très bonne chiere , comme ceulx qui auoient très bien de quoy & que très bien le sceurent faire , & croy & tiens

fermement se ne fut la promesse du voiage que chascun fut couché avec sa chacune. Tontefois ainsi n'en aduint pas , car quant il fut heure de soy retirer , les femmes donnerent la bonne nuit a leurs maris & les laisserent , & se bouterent en vne chambre au plus prez où elles auoient fait couvrir chascune son lit. Or debuez vous sçauoir que ce soir propre , arriuerent leans trois Cordeliers qui sen alloient a Geneue , qui furent ordonnez a coucher en vne chambre non pas trop longtaine de la chambre aux marchandes. Lesquelles puis quelles furent entre elles commencerent a deuïser de cent mille propos & sembloit pour trois qu'il en y auoit qu'on en oyoit la noise qu'il souffroit bien d'oïr d'vng quarteron.

Ces bons Cordeliers oyant ce bruit de femmes , faillirent de leurs chambres sans faire effroy ne bruit , & tant approcherent de l'huis sans être oüïs , qu'ils apperceurent trois belles Damoiselles que étoient chascune a par elles en vng beau lit assez grant & large pour le deusiesme recepuoir d'autre costé puis se reuïrent , & quant il entendirent les maris qui se coucherent en l'autre chambre , & puis dirent que fortune & honneur a ceste heure leurs court sus , & qu'ils ne sont pas dignes d'auoir jamais nulle bonne aduenture se ceste qu'ils n'ont pas a pourchasser par lascheté leur eschappoit. Si dit l'vng , il ne fault aultre deliberacion en notre fait , nous sommes trois & elles trois. Chascun

preigne sa place quant elles seront endormies. Si fut dit ainsi fut il fait , & si bien vint a ces bons freres Cordeliers qu'ils trouuerent la clef de la chambre aux femmes dedens l'huis si l'ouurirent si très souëment qu'ils ne furent dames ouës. Ils ne furent pas si folz quant ils eurent gaigné ce premier fort pour plus seurement assaillir l'aulture qu'ils ne tiraissent la clef par deuers eulx & resserrent très bien l'huis , & puis après sans plus enquerre chascun print son quartier & commencerent a besongner chascun au mieulx qu'il peult. Mais le bon fut , car l'vne cuidant auoir son mary parla , & dit que voulez vous faire , ne vous souuient-il de votre veu. Et le bon Cordelier ne disoit mot , mais faisoit ce pourquoi il étoit venu de si grant cuer qu'elle ne se peult tenir de lui aider a parfourrir. Les aultres deux d'aulture part n'étoient pas oyseux , & ne sçauoient ces bonnes femmes que menoit leurs maris de si tost rompre & casser leur promesse. Neantmoins toutefois elles que doiuent obeir le prinrent bien en patience sans dire mot chascune doubtant d'être ouye de sa compaignie , car ny auoit celle qui a la verité ne cuydast auoir seulé & empotter ce bien. Quant ces bons Cordeliers eurent tant fait que plus ne pouuoient , ils se partirent sans dirent mot , & retournerent en leur chambre chascun comptant son aduenture. L'vng auoit rompu 111. lances , l'aulture 4. l'aulture 6. Ils se leuerent matin pour toute seureté & tire-

rent pays. Et ces bonnes femmes qui n'auoient pas toute la nuit dormy ne se leuerent pas trop matin car sur le jour sommeil les print qui les fit leuer tard. D'autre costé leurs maris qui auoient assez bieu beu le soir, & qui se attendoient a la peau de leurs femmes dormoient au plus fort a l'heure, car les aultres jours auoient ja cheminé deux lieuës. Au fort elles se leuerent après le repos du matin, & s'habillerent le plus roide qu'elles peurent, non pas sans parler, & entre elles celle qui auoit la langue plus prête allat dire entre vous mes Damoiselles comment auez vous passé la nuit, vos maris vous ont ils refueillez comme a fait le mien, il ne cessast ennuyt de faire la besongne. Saint Jehan, dirent-elles, se votre mary a bien besongné ceste nuit les nostres n'ont pas été oyseux, ils ont tantost oublié ce qu'ils promirent au partir, & croyés que on ne leurs oubliera pas a dire. J'en aduertis trop bien le mien, dit l'vne quant il commença, mais il n'en cessa pourtant oncques l'œuure, & comme homme affamé pour deux nuits qu'il a couchié sans moy il a fait raige de diligence; quant elles furent prêtes elles vinrent trouuer leurs maris qui desja étoient comme tous prests & en pourpoint. Bon jour a ces dormeurs, dirent-elles. Votre mercy, dirent ils, qui nous auez si bien huchiez. Ma foi, dit l'vne, nous auions plus de regret de vous appeller matin que vous n'auiez fait ennuit de conscience de rompre & casser votre veu.

Quel veu , dit l'vng , le veu , dit-elle , que vous  
 fistes au partir c'est de non couchier avec votre fem-  
 me ; & qui y a couchié , dit-il , vous le sçavez bien ,  
 dit-elle , & aussi fais ie : & moy aussi , dit sa Com-  
 paigne , vela mon mary qui ne fut pieca si roide  
 qu'il fut la nuit passée , & s'il n'eut si bien fait son  
 deuoir ie ne seroie pas si contente de la rompeure de  
 son veu , mais au fort ie le passe , car il a fait com-  
 me les jeunes enfans qui veulent employer leur bas-  
 ture quant ils ont desserui le pugnir. Saint Jehan  
 si a fait le mien , dit la tierce , mais au fort ie n'en  
 ferai ja procez se mal y a il en est cause. Et ie tiens  
 par ma foy , dit l'vng que vous refuez & que vous  
 êtes yures de dormir. Quant est de moy i'ay cou-  
 chié tout seul & n'en partis ennuyt , non ay ie moy ,  
 dit l'autre , ne moy par ma foy , dit le tiers , ie ne  
 voudroie pour rien auoir enfreint mon veu. Et si  
 cuide être seur de mon Compere qui est cy & de  
 mon voisin qu'ilz ne l'eussent pas promis pour si  
 tost l'oublier. Ces femmes commencerent a chan-  
 ger couleur & se doubterent de tromperie dont  
 l'vng des maris d'elle tantost sen donna garde. Et  
 lui iuga le cueur de la verité du fait si ne leur bailla  
 pas induce de respondre aincoyz faisant signe a ses  
 Compaignons , dit en riant par ma foy Madamoi-  
 selle le bon vin de ceans & la bonne chiere du  
 soir passé nous ont fait oublier notre promesse si  
 n'en soyez ja mal contentes a l'aduenture se Dieu  
 plaist nous auons fait ennuyt a votre aide chascun

vng bel enfant qui est chose de si hault merite qu'elle sera suffisante d'effacer la faulte du cassement de notre veu , or Dieu le vueille , dirent-elles. Mais ce que si affermement disiez que n'avez pas été vers nous , nous a fait vng petit doubter , nous l'auons fait tout a propos , dit l'autre , afin d'oüir que vous diriez , & vous auiez fait double peché comme de faulcer votre veu & de mentir a escient , & nous meme aussi auiez beaucoup troublées : ne vous chaille , non , dit-il , c'est peu de chose , mais allez a la messe & nous vous suiurons , & elles se misrent a chemin de vers l'Eglise. Et leurs maris demeurerent vng peu sans les suiure trop roide , puis dirent. tous ensemble sans en mentir de mot nous sommes trompez , ces diables de Cordeliers nous ont deceuz , ils se sont mis en notre place & nous ont montré notre folie , car se nous ne voulions pas couchier avec nos femmes , il n'estoit ja mestier de les faire couchier hors de notre chambre , & s'il y auoit dangier de lit la belle paillade est en saison , dea dit l'vng d'eux nous en sommes chastiez pour vne autre fois , & au fort il vult mieulx que la tromperie soit seulement sceue de nous que de nous & d'elles , car le dangier est bien grant s'il venoit a leur congnoissance. Vous oyez par leur confession que ces ribaulx moines ont fait merueilles d'armes & espoire plus & mieulx que nous ne sçaurions faire. Et selles le sçauoient elles ne le passeroient pas pour ceste fois seulement s'en est



est mon conseil que nous l'auavons sans mascher. Ainsi me ait Dieu se dit le tiers : mon Compere dit très bien quant a moy ie rapelle mon veu , car ce n'est pas mon intencion de plus moy mettre en ce dangier. Puis que vous le voulez se dirent les deux aultres , & nous vous ensuiurons. Ainsi coucherent tout le voiage & femmes & maris tous ensemble , dont ils se garderent trop bien de dire la cause qui a ce les mouuoit , & quant les femmes virent ce si , ce ne fut pas sans demander la cause de ceste reuerse. Et ils respondirent , par couuerture , puis qu'ils auoient commencé de leur veu entrerompre il ne restoit que du parfaire. Ainsi furent les trois bons marchands des trois bons Cordeliers trompez sans qu'il venist jamais a la connoissance de celles qui bien en fussent mortes de dueil selles en eussent sceu la verité comme on voit tous les jours mourir femme de maindre cas & a mains d'occasion.



## XXXI. NOUVELLE.

## LA DAME A DEUX.

**V**N gentil escuyer de ce Royaulme bien renommé & de grant bruit, deuint amoureux a Rochan, d'une très belle Damoiselle & fit toutes ses diligences de parvenir a sa grace. Mais fortune lui fut si contraire, & sa Dame si peu gracieuse qu'enfin il abandonna sa queste comme par desespoir. Il n'eut pas trop grant tort de ce faire, car elle étoit ailleurs pourueüe non pas qu'il en sceut rien combien qu'il sen doubta, toutefois celui qui en jouissoit qui Cheualier & homme de grant auctorité étoit, n'étoit pas si peu priué de lui qu'il n'étoit gueres choses au monde dont il ne se fut bien a lui descouvert, sinon de ce cas: trop bien lui disoit-il souuent. Par ma foy mon amy ie vueil bien que tu saiches que j'ay vng retour en cette ville dont je suis beaucoup assoté. Car quant ie ny suis, ie suis tant parforcé de trauail & si rebouté qu'on ne tireroit point de moy vne lieüete de chemin, & se ie me treuve vers elle ie suis homme pour en faire trois ou quatre voire les deux tout d'une alaine, & n'est-il requeste ne priere, disoit l'escuyer que je vous sceusse faire dire tant seulement le nom

de celle. Nenny par ma foi , dit l'autre , tu n'en sçauras plus auant. Or bien , dit l'escuyer , quant je seray si heureux que d'auoir rien de beau ie vous seray aussi pou priué que vous m'êtes étrange. Aduint ce temps pendant que son bon Cheualier le pria de souper au chasteau de Rochan , où il étoit logié , & il vint , & firent très bonne chiere , & quant le souper fut passé & aulcun peu de deuïser , aprez , le gentil Cheualier qui auoit heure assignée d'aller vers sa Daine donna congié a l'escuyer , & dit , vous sçauiez que nous auons demain beaucoup a besongner & qu'il nous faut leuer matin pour telle maniere & pour telle qu'il faut expedier , c'est bon de nous couchier de bonne heure , & pource ie vous donne la bonne nuit. L'escuyer qui étoit subtil , en ce voyant , doubta tantost que ce bon Cheualier vouloit aller couchier & qu'il se couuroit pour lui donner congié des besongnes de lendemain , mais il n'en fit quelque sémblant aincoys dit en prenant congié & donnant la bonne nuit. Monseigneur vous dictes bien , leuez vous matin & aussi feray ie. Quant ce bon escuyer fut en bas descendu , il trouua vne petite mullette au pié du chasteau & ne vit ame qui la gardast , si pensa tantost que le paige qu'il auoit rencontré en descendant alloit querir la housse de son maître , & aussi faisoit-il , ha , dit-il , en soy-même mon hoste ne m'a pas donné congié de si haulte heure sans cause , vecy sa mulette qui n'attens autre chose que ie soye

Q ij

en voye , pour aller ou on ne veult pas que je foye. Ha mullette , dit-il , si tu sçauois parler tu dirois de bonnes choses ie te prie que tu me mennes ou ton maître veult être , & a ce coup il se fist tenir l'escrrier par son paige & monta dessus & lui mist la resne sur le col , & la laissa aller ou bon lui sembla tout le beau pas , & la bonne mullette le mena par ruës & par ruettes deca dela tant quelle vint arrester au deuant d'vng petit guichet qui étoit en vne ruë fort oblique ou son bon maître auoit accoustumé de venir , & étoit l'huis du jardin de la Damoiselle qu'il avoit tant aimée & par desespoire abandonnée , il mist pied a terre & puis heurta vng petit coup au guichet , & vne Damoiselle que faisoit le guet par vne faulce treille cuidant que ce fut le Cheualier s'en vint en bas & ouurit l'huis & dit Monseigneur vous soyez le très bien venu , vela Mademoiselle en sa chambre que vous attend , elle ne le congneut point pource qu'il étoit tard & avoir vne Cornette de veloux deuant son visaige. Adonc l'escuyer respondist ie vois vers elle & puis dit a son paige tout bas en l'oreille , va t'en bien en haste , & remaine la mullette ou ja l'ai prinse & puis t'en va couchier. Si feray ie , dit-il. La Damoiselle referra le guichet , & s'en retourna en sa chambre & notre bon escuyer tresfort pensant a sa besongne marcha très fermement vers la chambre ou sa Dame étoit , laquelle il trouua desja mise en sa cotte simple , la grosse chaine d'or au col , & comme il étoit

gracieux courtois & bien en parler la salua bien honnorablement, & elle qui fut tant esbahye que se cornes lui fussent venuës de prinfault ne sceut que respondre, sinon a vne piece aprez quelle lui demanda qu'il queroit leans, & dont il venoit a ceste heure, & qui l'auoit bouté dedens. Madamoiselle, dit-il, vous pouuez assez penser que se ie n'eusse eu autre ayde que moi même que ie ne fusse pas ici, mais la Dieu mercy vng qui a plus grant pitié de moy que vous n'avez encores eu ma fait cest aduentaige, & que vous a admeiné sire, dit-elle. Par ma foy Madamoiselle ie ne vous le requiers ja celler. Vng tel seigneur, c'est a sçavoir son hoste du souper m'y a enuoyé, ha, dit-elle, le traistre & desloyal Cheualier qu'il est se trompe il en ce point de moy. Or bien bien i'en seray vengée quelque jour. Ha Madamoiselle, dit l'escuyer, ce n'est pas bien dit a vous, car ce n'est pas trahison de faire plaisir a son amy & lui faire secours & seruice quant on le peult faire. Vous sçauiez bien la grande amitié que est de pieca entre lui & moy, & qu'il n'y a celluy qui ne die a son Compaignon tout ce qu'il a sur le cueur. Or est ainsi qu'il n'y a pas long-temps que ie lui comptay & confessay tout le long de la grant amour que ie vous porte & que a ceste cause ie n'auoye nul bien en ce monde & se par aulcune façon ie ne paruenoye en votre bonne grace, il ne m'estoit pas possible de viure en ce douloureux martire. Quant le bon seigneur a congneu la verité que mes

parolles n'estoient pas fainctes , doubtant le grant inconuenient qui en pouroit soudre a fait bien de me dire ce qui est entre vous deux. Et aime mieulx vous habandonner en moy. sauuant la vie qu'en moy perdant malheureusement vous entretenir : & se vous eussiez été telle que vous deueriez vous n'eussiez pas tant attendu de bailler confort ou garison a moy votre obeissant seruiteur qui sçauiez certainement que vous ay loyaulment seruie & obeie. Je vous requiers , dit-elle , que vous ne me parlez plus de cela & vous en allez hors d'icy. Mauldit soit cellui que vous y fist venir : sçauiez vous qu'il y a Mademoiselle ce n'est , dit-il , pas mon intencion de partir d'icy qu'il ne soit demain. Par ma foy , dit-elle , si ferez tout maintenant. Par la morbieu non feray , car ie coucherai avecques vous. Quant elle vit que c'estoit a bon escient & qu'il n'estoit pas homme pour enchacier par de rudes parolles elle lui cuida donner congié par douceur & dit. Je vous prie tant que je puis allez vous en pour meshui , & par ma foy ie ferai vne aultre fois ce que vous voudrez. Dea , dit-il , n'en parlez plus , car ie coucherai ennuit avecques vous & lors commence a foy despoüiller & prent la Damoiselle & la méne banqueter , & fist tant pour abregier quelle se coucha & lui emprés d'elle , ils n'eurent guères été couchez , ne plus courut d'une lance que vecy bon Cheualier qui va venir sur sa mullette & vint heurter au guichet , & le bon escuyer que l'ouït le congneut tantôt si commença a glappir

contrefaisant le chien très fierement. Le Cheualier quant il ouït il fut bien esbahy & autant couroucé. Si reheurte de plus belle très rudement au guichet, & l'autre de recommencer a glappir plus fierement que deuant. Qui est ce la qui grongne, dit celui de dehors. Par la mort bieu ie le scauray. Ouurez l'huis ou ie le porteray en la place. Et la bonne gentil femme qui enraigeoit toute viue faillit en la fenestre en sa cotte simple & dit êtes vous faulx & desloyal Cheualier. Vous auez beau heurter vous n'y entrez pas, pourquoi ny entreray ie pas, dit-il. Pource, dit-elle que vous êtes le plus desloyal que jamais femme accointast, & n'êtes pas digne de vous trouuer auecques gens de bien. Mademoiselle, dit-il, vous blasonnez très bien mes armes, ie ne sçai qui vous ment, car ie ne vous ay pas fait desloyaulté que ie sache. Si auez, dit-elle, & la plus grande que jamais homme fist a femme. Non ay par ma foy, mais dites moy qui est la dedens. Vous le sçauiez bien, dit-elle, traître mauuais que vous êtes, & a cette fois bon escuyer qui étoit ou lit commença a glappir contrefaisant le chien comme parauant. Ha dea, dit celui de dehors ie n'entens point cecy, & ne sçauray ie point qui est ce grongneur. Saint Jehan si ferez dit l'escuyer, & il sault sus & vint a la fenestre d'emprés la Dame & dit que vous plaist il Monseigneur, vous auez tort de nous ainsi reueiller. Le bon Cheualier quant il congneut que il parloit a lui fut tant esbahi que merucilles. Et quant il parla,

il dit. Et dont viens tu cy , je viens de soupper de votre maison pour coucher ceans. A mal faulte , dit il , & puis adressa la parolle a Madamoiselle & lui dit Madamoiselle hebergez vous telz hoïtes ceans. Nenny Monseigneur , dit-elle , la votre mercy que vous me l'avez enuoyé. Moy , dit-il , saint Jehan non ay ie suis mêmeement venu pour y trouuer ma place , mais c'est trop tard : & au mains ie vous prie puis que ie n'en puis auoir aulcune chose ouurez moy l'huis si boirai vne fois , vous n'entrerez pardieu ia , dit-elle , saint Jehan si fera dit l'escuyer. Lors descendit & ouurit l'huis , & s'en vint recoucher , & elle aussi Dieu sçait bien honteuse & bien mal contente. Quant le bon seigneur fut dedens , & il eut allumé de la chandelle il regarde la belle compaignie dedens le lit & dit bon preu vous face Madamoiselle & a vous aussi mon escuyer , bien grant mercy Monseigneur , dit-il , mais la Damoiselle qui plus ne pouoit se le cuer ne lui failloit deshors du ventre ne peult oncques dire vng seul mot & cuidoit tout certainement que l'escuyer fut leans arriué par l'aduertissement & conduicte du Cheualier , & si lui en vouloit tant de mal que on ne vous le sçauroit dire. Et qui vous a enseigné la voie de ceans mon escuyer , dit le Cheualier , votre mullette , Monseigneur , dit - il , que je trouuai en bas ou chasteau quant jeuz souppé avec vous elle étoit la seule esgarée si lui demandai qu'elle attendoit , & elle me respont quelle n'attendoit que sa housse & vous , & pour



pour où aller disje , où auons de coustume , me dit-elle , ie sçai bien disje que ton maître ne yra meshuy dehors , car il se va coucher , mais maine moy la où tu sçais qu'il va de coustume & ie t'en prie , elle fut contente , si montai sur elle & elle m'adreça ceans la sienne bonne mercy. Dieu mette en mal au lorde beste dit le bon seigneur que ma encusé. Ha que vous le vallez loyaument , Monseigneur , dit la Damoiselle , quant elle peult prendre la peine de parler. Je uoy bien que vous trompez de moi , mais je vueil bien que vous saichez que vous n'y aurez guéres d'honneur , il n'étoit ja mestier se vous ny vouliez plus venir de y enuoyer aultruy sous vmbre de vous , mal vous congnoist quiconques ne vous vit , par la mort bieu ie ne lui ay pas enuoyé , dit-il ; mais puis qu'il y est ie ne l'en chasseray pas , & aussi il y en a assez pour nous deux , n'a pas mon Compaignon ? ouï , Monseigneur , dit-il , tout au butin , & ie le vueil , si nous fault boire du marché , & lors se tourna vers le dresseoir , & versa du vin en vne grant tasse qui y étoit , & dit ie boi a vous mon Compaignon & puis fit verser de l'autre vin , & le bailla a la Damoiselle qui ne vouloit nullement boire , mais en la fin voulüst ou non elle bailla sa tasse. Or ça , dit le gentil Chevalier , mon Compaignon ie vous laisserai ici besongnez bien votre tour aujourd'huy , le mien sera demain se Dieu plaist , si vous prie que vous me soyez aussi gracieulx quant vous m'y trouuerez que ie vous suis maintenant.

Notre dame mon Conpaignon aussi seray ie ne vous doubtez. Ainsi s'en alla le bon Cheualier & laissa l'escuier que fit au mieulx qu'il peust cette premiere nuit, & aduerti la Damoiselle de tous points de la verité de son aduventure dont elle fut vng peu plus contente que se l'autre lui eust enuoyé. Ainsi fut la belle Damoiselle deceüe par la mullette & contrainte d'obeir & au Cheualier & a l'escuier chascun a son tour, dont en la fin elle s'accoustuma & très bien le prist en patience. Mais tant de bien y eut que se le Cheualier & l'escuier s'entraimoient bien par auant ceste aduventure, l'amour d'entre eulx a ceste occasion fut redoublée, qui entre aucuns mal conseillez eut engendré discort & mortelle haine.

## XXXII. NOUVELLE.

*LES DAMES*

## DIXMEES.

**A**FIN que ie ne foye escluz du très heureux & hault merite dû a ceulx qui trauaillent, & labourent a l'augmentation des hystoires de ce present liure, ie vous racomptetai en brief vne aduventure nouvelle par laquelle on me tiendra excusé

d'auoir founy la nouuelle dont j'ay, n'aguères été  
 sommé. Il est notoire verité que en la ville de Cas-  
 tellongne arriuerent en l'hostellerie plusieurs fre-  
 res mineurs qu'on dit de l'obseruance enchassez &  
 deboutez par leurs mauuais gouuernement, & sainc-  
 te deuocion du Royaulme d'Espaigne, & trouue-  
 rent facon d'auoir entrée deuers le seigneur de la  
 ville qui desja étoit ancien, & tant firent pour abre-  
 gier qu'il leurs fonda vne belle Eglise & beau Cou-  
 uent & les maintint & entreuint toute sa vie le  
 mieulx qui sceut, & après regna son fils aîné que  
 ne leurs fit pas mains de bien que son bon pere, &  
 de fait ils prospererent en peu de ans, si bien qu'ils  
 auoient suffisamment tout ce qu'on scauroit deman-  
 der en vng Couuent de mandians, & afin que vous  
 saichez qu'ilz ne furent point oyseux durant le temps  
 qu'ilz acquirent ses biens ils se mirent a prescher  
 tant en la ville que par les villaiges voisins & gain-  
 gnerent tout le peuple, & tant firent qu'il n'étoit pas  
 bon Chrestien que ne s'étoit a eulx confessé, tant  
 auoient grant bruit & bon los de bien remonstrer  
 aux pecheurs leurs deffaults, mais qui les louast  
 & eut bien en graces les femmes étoient du tout  
 données, tant les auoient trouuez saintes gens de  
 grande charité & de parfonde deuocion. Or enten-  
 dez la mauuaise deception & horrible trahison que  
 ces faulx hypocrites pourchasserent a ceulx & celles  
 qui tant de biens de jour en jour leurs faisoient Ils  
 baillerent entendre generallement a toutes les fem-

mes de la ville qu'elles étoient tenuës de rendre a Dieu la disme de tous leurs biens comme au seigneur de telle chose , & de telle a votre paroisse & curé de telle chose & telle. Et a nous vous devez rendre & liurer la dixme du nombre des fois que vous couchez charnellement avec votre mary , nous ne prenons sur vous autre dixme car comme vous sçavez nous ne portons point d'argent. Car il ne nous est rien des biens temporels & transitoires de ce monde. Nous querons & demandons seulement les biens spirituelz. Les dismes que nous demandons & que vous nous devez n'est pas des biens temporelz , c'est a cause du saint sacrement que vous avez receu que est vne chose diuine & spirituelle & celui n'appartient a nul recepuoir la dixme que nous seulement que sommes Religieux de l'obseruance. Les pources simples femmes qui mieulx cuidoiẽt ces bons freres être des anges que des hommes terriens , ne refuserent pas ce dixme a payer il n'y eut celle qui le payast a son tour , de la plus haulte , jusqu'a la maindre , même la femme du seigneur n'en fut pas excusée. Ainsi furent toutes les femmes de la ville apparties a ces villains moynes , & n'y auoit celui d'eulx qui n'eust a sa partie quinze a seize femmes la dixme a recepuoir , & a ceste occasion Dieu sçait les presens qu'ils auoient d'elles tout soubz vmbre de deuocion. Ceste maniere de faire dura longuement sans ce quelle vint a la congnissance de ceulx qui se fussent bien passé de se

nouveau dixme. Il fut toutefois descouvert en la façon qui s'ensuit. Vng jeune homme nouvellement marié fut prié de souper a l'hostel d'vng de ses parents lui & sa femme, & comme ils retournoient en passant pardeuant l'Eglise des Cordeliers dessusdits la cloche de l'aue maria sonna, tout a ce coup & le bon homme s'enclina sur la terre pour faire ces deuotions, sa femme lui dit je entreroye volontiers dedens ceste Eglise, & que ferez vous la dedens a ceste heure, dit le mary, vous y reuiendrez bien quant il sera jour demain a vne aultre fois. Je vous requiers, dit-elle, que j'y aille & reuiendrez tantost. Nostre Dame, dit-il, vous n'y entrerez ja maintenant. Par ma foy, dit-elle, c'est force il m'y conuient aller ie ne demoureray riens, si vous auez haste de être a l'hostel, allez toujours deuant, ie vous suiurai toute a cette heure, piquez piquez deuant, dit-il, vous n'y auez pas tant a faire si vous voulez dire votre pater noster, ou votre aue maria, il y a assez place a l'hostel, & vous vaudra autant la le dire que en ce monastere, ou l'on ne veoit maintenant goutte. Ha dea, dit-elle, vous direz ce qu'il vous plaira, mais par ma foy il fault necessairement que j'entre vng peu dedens, & pourquoy, dit-il, voulez vous aller coucher avec les freres de leans, elle qui cuidoit a la verité que son mary sceut bien quelle payast la dixme, lui respondit nenny ie n'y vueil pas coucher, ie voulois aller payer, quoi payer, dit-il, vous le sçavez bien, dit-elle, & si vous le

demandez. Que sçai ie bien, dit-il, ie ne me melle pas de vos debtes, au mains, dit-elle, sçauvez vous bien qu'il me fault payer la dixme, quelle dixme, ha dea, dit-elle, c'est vng jamais, & la dixme de nuit & de vous & de moi. Vous auez bon temps il fault que ie paye pour nous deux, & a que la payez vous, dit-il, a frere Eustache, dit-elle, allez toujours a l'hôtel si m'y laissez aller que i'en soye quitte, c'est si grant pechié de ne la point payer que ie ne suis jamais aise quant ie lui dois riens. Il est meshuy trop tard, dit-il, il est couchié passé a vne heure, ma foi, dit-elle, ie y ay été cette année beaucoup plus tard puis que on veult payer on y entre a toute heure, allons, allons, dit-il, vne nuit n'y fait rien.

Ainsi s'en retournerent le mary & la femme mais contens tous deux, la femme pource qu'on ne la pas laissé payer son dixme, & son mary pource qu'il se veoit ainsi deceu, tous esprins d'yre & de mal talent que encores redoubloit la peine que ne l'osoit montrer. A certaine piece aprez toutefois, ils se coucherent & le mary que étoit assez subtil interrogea sa femme de longue main se les aultres femmes de la ville ne payent pas aussi ceste disme quelle fait. Quoy donc, dit-elle, par ma foi si fort, quel priuilege auroient elles plus que moi, nous sommes encores seize ou vingt qui les payons a frere Eustache. Ha il est tant deuot. Et croiez que ce lui est vne grande patience.

Frere Barthelemy en a autant ou plus & entre

les autres Madame est de son nombre. Frere Jacques aussi en a beaucoup , frere Antoine aussi , il n'y a celui deulx qui n'ait son nombre. Saint Jehan dit le mary ils n'ont pas ouure laissée , or congnois ie bien qu'ils sont beaucoup plus deuots qu'il ne semble & vrayement ie les vueil auoir ceans tous l'vng aprez l'autre pour les fettoyer & ouïr leurs bonnes deuises , & pource que frere Eustache reçoit la dixme de ceans , ce sera le premier , faites que nous ayons demain bien a disner , car ie le amenerai très volentiers , dit-elle , au mains ne me fauldra il pas aller en sa chambre pour le payer , il la recepura bien ceans , vous dictes bien , dit-il. Or dormons , mais créez qui n'en auoit garde & en lieu de dormir il pensa tout a son aise ce qu'il vouloit a lendemain exécuter. Ce disner vint , & frere Eustache qui ne sçauoit pas l'intencion de son hôte , fit assez bonne chiere sous son chaperon & quant il veoit son point , il prestoit ses yeulx a l'hostesse sans espargner par dessous la table le gracieulx ieu des piedz , de quoi s'apperceuoit bien l'hoste sans en faire semblant , combien que ce fut a son prejudice. Aprez les graces , il appella frere Eustache , & lui dit qu'il lui vouloit monstrier vne image de notre dame , & vne très belle oraison qu'il auoit en sa chambre & il respondit qu'il le verroit volentiers. Adonc ils entrerent dedens la chambre & puis l'hoste ferma l'huis dessus eulx qu'il ne peust sortir , & puis empoigna vne grande hache , & dit a nostre

R. iiii

Cordelier, par la mort bieu beau pere, vous ne partirai jamais d'ici, sinon les pieds deuant se vous ne confessez verité. Helas mon hôte je vous crie mercy que me demandez vous. Je vous demande, dit-il, le dixme du dixme que vous auez prins sur ma femme. Quand le Cordelier ouït parler de ce dixme, il pensoit bien que ces besongnes n'étoient pas bonnes, se ne sceut que respondre sinon que crier mercy & de soy excuser le plus beau qu'il pouoit. Or me dictes dict l'hôte quelle dixme est ce que vous prenez sur ma femme & sur les autres. Le pource Cordelier étoit tant effroyé qu'il ne pouoit parler, & ne respondit mot. Dictes moi, dit l'hôte, la chose comment elle va, & par ma foi ie vous lerray aller, & ne vous feray ja mal, ou sinon ie vous tuëray tout roide. Quant l'autre se ouït asseuer il aima mieulx confesser son pechié, & celui de ses compaignons & eschapper que le celer & tenir clos & être en dangier de perdre sa vie, si dit. Mon hôte je vous crie mercy je vous diray verité. Il est vrai que mes Compaignons & moi auons fait accroire a toutes les femmes de cette ville quelles doiuent la dixme des fois que vous couchez avec elles, elles nous ont creu si les payent les jeunes & vieilles, puis qu'elles sont mariées, il n'en y a pas vne qui en soit excusée, Madame mesme la paye comme les aultres, les deux niepces aussi, & generally nulle n'en est exempte. Ha dea, dit l'autre, puis que Monseigneur & tant de gens de bien



là payent je n'en dois pas être quitte , combien que je m'en passasse bien. Or vous en allez beau pere par telle fin que vous me quitterez la dixme que ma femme vous doit. L'autre ne fut oncques si joyeux quant il se fut sauué dehors , si dit que jamais n'en demanderoit rien , aussi ne fit il comme vous orrez. Quant l'hoste du Cordelier fut bien informé de sa femme & de cette nouvelle dixme , il s'en vint a son seigneur & lui compta tout du long ce cas du dixme comme il est touchié ci dessus , pensez qu'il fut bien esbahy & dit ; oncques ne me pleurent ces papelars & me iugeoit bien le cueur qu'ils n'étoient pas tels par dedens comme ils se monstroient par dehors. Ha maudictes gens qu'ils sont , maudicte soit l'heure que oncques Monseigneur mon pere a qui Dieu pardoint les accointa. Or sommes nous par eulx gastez & deshonnourez & encore feront ils pis s'ils durent longuement : qu'est il de faire par ma foi Monseigneur , dit l'autre , s'il vous plaist & semble bon vous assemblerez tous vos sugets de cette ville , la chose leur touche comme a vous ; si leur desclairez cette aduventure , & puis aurez aduis avec eulx d'y pourueoir & remedier auant qu'il soit plus tard. Monseigneur le voulut , si demanda tous ses sugets mariez tant seulement , & ils vinrent vers lui en la grant salle de son hostel , il leur declaira tout au long la cause pourquoi il les auoit assemblez. Se Monseigneur fut bien esbahy de prinfault quant il sceut premier ces nouvelles , aussi furent toutes bon-

nes gens qui la étoient. Adoncques les vngs disoient-ils les fault tuer, les aultres il les fault pendre, les aultres noyer, les aultres 'disoient qu'ils ne pourroient croire que ce fut verité, & qu'ils sont trop deuots & trop de sainte vie. Ainli dirent les vngs & les aultres d'aultre. Je vous dirai, dit le seigneur, nous manderons ici nos femmes, & vng tel maître Jehan, &c. fera vne petite collation, laquelle enfin cherra de parler des dixmes, & leur demandera au nom de nous tous selles s'en acquittent, car nous voulons quelles soient payées. Nous orrons leur response, & après aduis sur cela, ils s'accorderent tous au conseil & a l'opinion de Monseigneur. Si furent toutes les femmes mariées de la ville mandées, & vindrent en la salle où tous leurs maris étoient. Monseigneur même fit venir Madame, qui fut toute esbahye de veoir l'assemblée de ce peuple & puis après vng sergent commanda de par Monseigneur faire silence. Et ledit maître Jehan se mit vng peu au dessus des aultres & commença la petite collation comme il ensuit. Mes Dames & mes Damoiselles, j'ay la charge de par Monseigneur, qui cy est, & ceulx de son Conseil, vous dire en brief la cause pourquoy estes icy mandées. Il est vrai que Monseigneur & son Conseil & son peuple qui cy est, ont tenus a ceste heure vng chapitre du fait de leurs consciences, la cause s'y est qu'ils ont voulenté, Dieu deuant, dedens brief temps faire vne belle procession & deuote a la louenge de Notre Seigneur

Jesus-Christ, & de sa glorieuse mere, a icelluy jour se mettre tous en bon état, afin que ils soient mieulx exaulcez en leurs plus deuotes prieres, & que les œuvres qu'ils feront soient a icellui nostre Dieu plus agreables, vous sçavez que la mercy Dieu, nous n'a-  
 uons eu nulles guerres de notre temps, & nos voi-  
 sins en ont été terriblement persecutez, & de pesti-  
 lences & de famines. Quant les autres en ont été  
 ainsi examinez nous auons peu dire & encores fai-  
 sons que Dieu nous a preservez. C'est bien raison  
 que nous congnoissons que ce vient non pas de nos  
 propres vertus, mais de la seule large & liberale  
 grace de notre benoist Createur & Redempteur qui  
 huche & appelle & inuite au son des deuotes prie-  
 res qui se font en notre Eglise & où nous ajous-  
 tons très grant foi & tenons en fermes deuotions.  
 Aussi le très deuot Couuent des Cordeliers de cette  
 ville nous a beaucoup valu & vault a la conserua-  
 tion des biens dessusdits. Au surplus nous voulons  
 sçauoir se vous acquittez a faire ce a quoy vous êtes  
 tenuës, & combien que nous tenons assez être en  
 votre memoire l'obligacion qu'avez a l'Eglise, il ne  
 vous desplaira pas se je vous en touche aucuns des  
 plus grants points quatre fois l'an, c'est a sçauoir  
 aux quatre nataux, vous vous devez bien confesser  
 a votre Curé, ou a quelque Religieux ayant sa puis-  
 sance, & se receurez votre Createur a chaque fois  
 vous feriez bien, a tout le mains le devez vous faire  
 vne fois l'an, allez a l'offrande tous les dimanches ;

& payez leaument les dixmes a Dieu, comme de fruits , de poullailles , agneaux , & aultres tels vsaiges accoustumez. Vous deuez aussi vne aultre dixme aux deuots Religieux du Couuent de saint François que nous voulons expressement qu'elle soit payée , c'est celle que plus nous touche au cuer , & dont nous desirons plus l'entretienance , & pourtant s'il y a nulle de vous que n'en ait fait son deuoir aulcunement que ce soit par sa negligence ou par faulte de le demander ou aultrement , si s'auance de le dire , vous sçauiez que ces bons Religieux ne peuuent venir a l'hostel querir leurs dixmes , ce leurs seroit grant peine & trop grant destourbier , il doibt bien suffire s'ils prennent la peine de le receuoir en leur Couuent. De la partie de ce que ie vous ay a dire , reste a sçauoir celles que ont payez & celles que doiuent. Maître Jehan n'eust pas finé son dire , que plus de vingt femmes commencerent a crier toutes d'une voix. J'ay payé moi & moi je ne doibz rien ne moi ne moi. D'aultre costé se dirent vng cent d'autres, & generallement quelles ne deuoient rien, même faillirent auant quatre ou six très belles jeunes femmes qui disoient quelles auoient si bien payé qu'on leurs debuoit sur le temps aduenir sur l'une quatre fois , a l'autre six fois , a l'autre dix fois. Il y auoit aussi d'aultre costé ie ne sçai quantes vielles qui ne disoient mot , & maître Jehan leur demanda s'elles auoient bien payé leurs dixmes , & elles respondirent qu'elles

auoient fait traité avec les Cordeliers , comment , dit-il , ne payez vous pas , vous deuez semondre & contraindre les aultres de ce faire , & vous mêmes faictes la faulte. Dea , dit l'vne , ce n'est pas moi. Je me suis présentée plusieurs fois de faire mon deuoir , mais mon Confesseur n'y veult jamais entendre , il dit tousjours qu'il n'a loisir , saint Jehan , dirent les aultres vielles , nous composons par traictié fait avecques eulx la dixme que deuons en toille , en draps , en coussins , en banquiers , en oreilliers & aultres telles bagues , & ce par leur conseil & aduertissement , car nous aimerions mieulx la payer comme les aultres. Nostre dame , dit maître Jehan , il n'y a point de mal , c'est très bien fait. Elles s'en peuuent doncques bien aller , dit Monseigneur a maître Jehan , ouï , dit-il , mais quoi que ce soit que ces dixmes soient pas oubliées. Quant elles furent toutes hors de la salle l'huis fut serré , si ny eut cellui des demourez qui ne regardast son Compaignon. Or ça , dit Monseigneur , qu'est il de faire , nous sommes acertez de la trayson que ces ribaulx moines nous ont fait par la desposition de l'vng d'eulx & par nos femmes , il ne nous fault plus de tesmoins. Aprez plusieurs & diuerses opinions , la finale & derniere resolution si fut , qu'ilz yront bouter le feu au Couuent , & bruleront & moines & monstier , si descendirent en bas en la ville , & vindrent au monastere , & osterent hors le *Corpus Domini* , & aucun aultre reliquaire qui là

étoit , & l'envoierent en la paroisse , & puis sans plus enquerir bouterent le feu en diuers lieulx leans , & ne s'en partirent tant que tout fut consommé , & moines & Couuent & Eglise & dertoir & le surplus des edifices dont il y auoit foisons leans. Ainsi acheterent bien cherement les pources Cordeliers , la dixme non accoustumée qu'ils mindrent sur Dieu , qui n'en pouuoit , mais en eut bien sa maison brulée.

---

## XXXIII. NOUVELLE.

## M A D A M E T O N D U E.

**V**N G gentil Cheualier des marches de Bourgogne, faige , vaillant , & très bien adrecé digne d'auoir bruit & los comme il eut tout son temps entre les plus renommez , se trouua tant & si bien en la grace d'une si belle Damoiselle qu'il en fut retenu seruiteur , & d'elle obtint a petit de piece tout ce que par honneur elle donner lui pouuoit , & au surplus par force d'armes , & a cela mena que refuser ne lui peult nullement ce que par deuant & aprez ne peult obtenir , & de ce se print , & très bien donna garde vng très grant & gentil seigneur , très clervoyant dont ie passe le nom & les vertus , lesquelles ce en moi étoit de les auoir racompter , il n'y a celui de vous qui tantost ne congneut de quoi ce Con-

te ce feroit, ce que pas ne voudroie. Ce gentil sei-  
 gneur que ie vous dis qui se apperceut des amours  
 du vaillant homme deffusdit, quant il vit son point  
 si lui demanda s'il n'étoit point en grace d'une Da-  
 moiselle, c'est a sçauoir de celle deffusdicte, & il  
 lui respondit que non, & l'autre qui bien sçauoit  
 le contraire, lui dit qu'il congnoissoit très bien que  
 si. Neantmoins quelque chose qu'il lui dit ou re-  
 monstraist, il ne lui debuoit pas celer vng tel cas, &  
 que se il lui en étoit aduenue vng semblable ou beau-  
 coup plus grant il ne lui celeroit ja, si ne lui voulut il  
 oncques dire ce qu'il sçauoit certainement. Adonc  
 se pensa en lieu d'autre chose faire & pour passer  
 temps s'il sçait trouuer voie ne façon en lieu que ce-  
 lui qui lui est tant estrange, & prent si peu de fiance  
 en lui, il s'accointera de sa Dame & se fera priué  
 d'elle, a quoi il ne faillit pas, car en peu d'heure  
 il fut uers elle si très bien venu, comme celui qui le  
 valoit qu'il se pouoit vanter d'en auoir autant obte-  
 nu, sans faire gueres grant queste ne poursuite que  
 celui qui mainte peine & foison de trauaulx en auoit  
 soutenu, & si auoit vng bon point qu'il n'en étoit  
 en rien feru, & l'autre que ne pensoit point auoir  
 Compaignon en auoit tout au long du bras & autant  
 que on en pouroit entasser a toute force au cuer  
 d'vng amoureux Et ne vous fault pas penser qu'il  
 ne fut entretenu de la bonne gouge, aultant &  
 mieulx que parauant qu'il lui faisoit plus auant bou-  
 ter & entretenir en sa folle amour, & afin que vous

ſaichez que ceſte vaillante gouge n'étoit pas oyſeuſe qui en auoit a entretenir deux du mains leſquels elle eut grant regret perdus & eſpecialement le dernier venu, car il étoit de plus hault eſtoffe & pour mieulx garni au pongnet que le premier venu, & elle leurs bailloit & aſſignoit tousjours heure de venir l'vng après l'autre comme l'vng aujourd'huy & l'autre demain, & de cette maniere de faire ſçauoit bien le dernier venu, mais il n'en faiſoit nul ſemblant, & auſſi a la verité, il ne en enchailloit gueres, ſinon que lui deſplaiſoit la folie du premier venu que trop fort a ſon gré ſe boutoit en choſe de petite valuë, & de fait ſe penſa qu'il l'en aduertiroit tout du long ce qu'il fiſt. Or ſçauoit-il bien que les jours que la gouge lui deſſendoit de venir vers elle dont il faiſoit trop bien le mal content étoient gardez pour ſon Compaignon le premier venu. Si fiſt le guet par pluſieurs nuits & le veoit entrer vers elle par le même lieu, & a celle heure que és autres ſes jours faiſoit. Si lui dit vng jour entre les autres, vous m'auiez trop celé les amours d'une telle & de vous, & n'eſt ſerment que vous ne m'ayez fait au contraire dont ie m'eſbahis bien que vous prenez ſi peu de fiance en moi, voire quant ie ſçai dauantaige, & veritablement ce qui eſt entre vous & elle, & afin que vous ſaichez que je ſçai qu'il en eſt, ie vous ay veu entrer vers elle a telle heure & a telle, & de fait hier n'a pas plus loing, ie tins ſur vous & d'vng lieu la où j'eſtoye ie vous y veis arriver, vous ſçaviez bien

ſe



se ie dis vray. Quant le premier venu ouït si viues enseignes il ne sceut que dire si lui fut force de confesser ce qu'il eut volentiers celé, & qu'il cuidoit que ame ne le sceut que lui. Et dit a son Compaignon le dernier venu que vrayment il ne lui peult plus ne veult celer qu'il en soit bien amoureux, mais il lui prie n'en soit nouvelle. Et que diriez vous, dit l'autre, se vous auiez Compaignon, Compaignon, dit-il, quel Compaignon en amours ie ne le pense pas, dit-il, saint Jehan, dit le dernier venu, & ie le sçay bien. Il ne fault ja aller de deux en trois. C'est moy, & pource que ie vous veois plus feru que la chose ne vault, vous ay pieça voulu aduertir, mais ne y auez voulu entendre, & se ie n'avoie plus grant pitié de vous que vous mêmes n'avez ie vous l'airoie en cette folie, mais ie ne pouroie souffrir que vne telle gouge se trompast & de vous & de moi si longuement; qui fut bien esbahy de ces nouvelles ce fut le premier venu, car il cuidoit tant être en grace que merueilles, voire & si croyoit fermement que ladicte gouge n'aimoit aultre que lui, si ne sçauoit que dire ne penser, & fut longue espace sans mot dire. Au forr quant il parla il dit, par notre dame on m'a bien baillé de loignon, & si ne m'en doubtoye gueres si en ay été plus aisié a decevoir, le diable emporte la gouge quant elle est telle. Je vous diray, dit le dernier venu, elle se cuide tromper de nous & de fait elle a desja très bien commencé, mais il la nous fault mêmes tromper.

Et ie vous en prie , dit le premier venu , le feu de saint Antoine larde quant oncques ie l'accointay ; vous sçavez , dit le dernier venu , que nous allons vers elle tour a tour , il fault que la premiere fois que vous irez ou moy que vous dites que vous auois bien congneu & apperceu que ie suis tant amoureux d'elle , & que vous m'auez veu entrer vers elle , a telle heure , & ainsi habillé , & que par la mort bieu se vous m'y trouuez plus que vous me tuerez tout royde quelque chose qui vous en doieue aduenir , & dirai ainsi de vous & nous verrons sur ce que fera & dira & aurons aduis du surplus, C'est très bien dit , & ie le vueil , dit le premier venu. Comme il fut dit en fut fait , car ie ne sçai quans jours après le dernier venu eut son tour d'aller besongner , il se mit au chemin & vint au lieu assigné. Quant il se trouua seul a seul avecques la gouge qui le receut très doucement & de grant cueur comme il sembloit , il faindit comme bien le sçauoit faire vne mathe chiere & monstra semblant de couroux. Et celle qui l'auoit accoustumé de veoir tout aultrement ne sceut que penser , si lui demanda qu'il auoit & que sa maniere monstrois que son cueur n'étoit pas a son aise , vrayment Madamoiselle , dit-il , vous distes vrai que ay bien cause de être mal content & desplaissant la votre mercy toutesfois , que le m'auez pourchassé , moi , se dit-elle , hélas , dit-elle , non ay que ie faiche. Car vous êtes seul homme en ce monde a qui ie voudroie faire le plus de plaisir ,

& qui de plus près me toucheroit l'ennui & le des-  
plaisir , il n'est pas damné qui ne le croi , dit-il , &  
pensez vous que ie ne me soye bien apperceu que  
vous auez tenu vng tel c'est a sçavoir le premier ve-  
nu , si fait par ma foi ie l'ay trop bien veu parler a  
vous a part , & qui plus est ie l'ay espié & veu en-  
trer ceans , mais par la mort bieu se ie lui treuve ja-  
mais son dernier jour sera venu quelque chose qu'il  
en doye aduenir , que ie seuffre ne puisse veoir qu'il  
me fit ce desplaisir , j'aimeroye mieulx a mourir mil-  
le fois s'il m'étoit possible : & vous êtes aussi bien  
desleale que sçauiez certainement , & de vray que  
après Dieu ie n'aime riens que vous , qui a mon  
trés grant préjudice le voulez entretenir. Ha Mon-  
seigneur , dit-elle , & qui vous a fait ce rapport. Par  
ma foi je vueil bien que Dieu & vous faichez que  
la chose va tout aultrement , & de ce ie ne prens a  
tesmoing que oncques iour de ma vie ie ne tins ter-  
me a cellui dont vous parlez , ne a aultre quel  
qu'il soit , parquoy vous ayez tant soit peu de cause  
d'en être mal content , de moi ie ne vueil pas nier  
que ie n'aye & parlé a lui tous les jours & a plu-  
sieurs aultres , mais qu'il y ait entretenance riens ;  
ainsi tiens que soit le maindre de ses pensées , &  
aussi pardieu il s'abuseroit , ja Dieu ne me laisse tant  
viure que aultruy que vous ait part ne demie en ce  
qui est entierement a vous. Mademoiselle , dit-il ,  
vous le sçavez très bien dire , mais ie ne suis pas si  
bête que de le croire , quelque mal content qu'il y

S ij

fut , elle ſçeut ce pourquoi il étoit venu , & au partir lui dit ie vous ay dit , & derechief vous fais ſçauoir que ſe ie me appereois jamais que l'autre vienne ceans , le mettrai ou ferai mettre en tel point qu'il ne couroucera jamais ne moi ne aultre. Ha Monſieur , dit-elle , pardieu vous auez tort de prendre votre imaginacion ſur lui & croyez que ie ſuis ſeure qu'il n'y penſe pas. Ainſi ſe partit noſtre dernier venu. Et a lendemain ſon Compaignon le premier venu ne faillit pas a ſon leuer pour ſçauoir des nouuelles , & il lui en compta largement , & bien au long tout le demené comment il fit le courroucé & comme il le menaca de tuer , & les reſponces de la gouge. Par mon ſerment c'eſt bien joüé , dit il. Or laiſſez moi auoir mon tour ſe ie ne fais bien mon perſonnaige , ie ne ſus oncques ſi eſbahi. Vne certaine piece apres ſon tour vint & ſe trouua vers la gouge qui ne lui fit pas mains de chiere qu'elle auoit de couſtume , & que le dernier venu en auoir emporté nagueres. Se l'autre ſon Compaignon le dernier venu auoit bien fait du mauuais cheual & en maintien & en parolles , encores en fit il plus , & dit en telle maniere. Je dois bien maudire l'heure & le jour qu'onque j'eus votre acointance ; car il n'eſt pas poſſible au monde d'amaſſer plus de douleurs & regrets & d'amers plaiſirs au cueur du poure amoureux que j'en treue aujourd'hui dont le mien eſt enuironné & aſſiégré. Helas ie vous auoie entre aultres choiſie comme la nonpareille de beaulté , genteté & gracieuſeté , & que je y trouueroye.

largement & a comble de loyauté : & a ceste cause m'estoie de mon cuer deffait , & du tout mis l'auoie en votre mercy , cuidant a la verité que plus noblement ne en meilleur lieu asseoir ne le pouroye, mêmes m'auiez a ce mené que j'estoye prest & délibéré d'attendre la mort ou plus , se possible eust été , pour votre honneur sauuer , & quant j'ay cuidé être plus seur de vous , que je n'ay pas sçeu seulement par estrange raport mais a mes yeulx apperceuz vng aultre être venu de costé , qui me toulte & rompt tout l'esperoir que j'auoye en votre seruice d'être de vous tout le plus chier tenu. Mon amy, dir la gouge, ie ne sçay qui vous a troublé , mais votre maniere & vos paroles portent & jugent qu'il vous fault quelque chose , que je ne sçauroye penser que ce peult être , se vous n'en dites plus auant , sinon vng peu de jalousie qui vous tourmente se me semble , de laquelle se vous étiez bien saige n'auriez cause de vous accointer , & la où je le sçauroye je ne vous en voudroye pas bailler l'occasion , toutefois n'êtes pas si peu accointé de moi que ie ne vous aye monstré la chose qui plus en peult bailler la cause d'assurance , a quoi vous me feriez tantost auoir regret , par me seruir de telles paroles. Je ne suis pas homme dit le premier venu , que vous doyez contenter de paroles , car excusance n'y vault rien , vous ne pouez nier que vng tel , c'est a sçauoir le dernier venu , ne soit de vous entretenu , je le sçay bien , car je m'en suis donné garde , & si ay fait le guet , car je le veis.

hier vers vous a telle heure , & ainsi habillé , mais je voüe a Dieu qu'il en a pris ses caresmeaux car je viendrai sur lui , & fut-il plus grant maître cent fois , se ie le y puis rencontrer ie lui osterai la vie du corps , ou lui a moi , ce sera l'vng des deux , car je ne pouroye viure voyant vng autre jouïr de vous , & vous êtes bien faulse & desloyale , que m'avez en ce point deceu , & non sans cause maudis-je l'heure que oncques vous accointay , car ie sçay tout certainement que c'est ma mort , se l'autre sçait ma voulenté , comme i'espere que ouï , & pour vous ie sçai de vrai que ie suis mort , & si me laisse viure il aguise le cousteau , que sans merci a ses derniers jours le menera , & s'ainsi est le monde n'est pas assez grant pour me sauuer que mourir ne me face.

La gouge n'auoit pas moyennement a penser pour trouuer soudaine & suffisante excusance pour contenter celui qui est si mal content. Toutefois ne demoura pas qu'elle ne se mist en ses deuoirs pour l'oster hors de cette melencolie , & pour assiette en lieu de cresson , elle lui dit : Mon amy j'ay bien au long entendu votre grant ratelée , qui a la verité dire me baille a congnoistre que ie n'ay pas été si saige comme je d'eusse , & que j'ay trop tost adjouisté foy a vos semblans & deceuantes paroles , car elle m'ont conclut & renduë en votre obeïssance , vous en tenez a cette heure trop mains de biens de moi , autre raison aussi vous meut , car vous sçauiez assez que ie suis prinse & que amours m'ont a ce menée , que sans

vosre presence ie ne puis viure ne durer , & a cette cause & plusieurs aultres qu'il ne fault ia dire , vous me voulez tenir vosre sugette en esclauue sans auoir loy de parler , ne deuiser a nul autre qu'a vous. Puis qu'il vous plaist , au fort j'en suis contente , mais vous n'avez nulle cause de moi suspecconner en rien de personne qui viue , & si ne fault aussi ia que ie m'en excuse verité que tout vaint en fin m'en deffendra s'il lui plaist , pardieu ma mye , dit le premier venu , la verité est telle que ie vous l'ay dicté si vous en fera quelque jour prouuée & chier vendue pour altruy & pour moy , se aultre prouision de par vous n'y est mise ; après ces paroles & aultres trop longues a racompter , se partit le premier venu qui pas n'oublia landemain tout au long racompter a son Compaignon le dernier venu , & Dieu sçait ses risées & joyeuses deuises qu'ils eurent entre culx deux , & la gouge en ce lieu auoit des estouppes en sa quenaille que veoit & sçauoit très bien que ceux qu'elle entretenoit se doubtoient & apperceuoient aucunement chascun de son Compaignon , mais non pourtant ne laissa pas de leurs bailler tousjours audience chascun a sa fois , puis qu'ils la requeroient sans en donner a nul congé , trop bien les aduertissoit que ils venissent bien secrettement vers elle , afin qu'ils ne fussent de nuls apperceuz. Mais vous deuez sçauoir quant le premier venu auoit son tour qu'il n'oublloit pas a faire sa plainte comme dessus , & n'étoit rien de la vie de son Compaignon s'il le pouoit re-

contrer. Pareillement le dernier , jour de son audience , s'efforçoit de monst<sup>r</sup>er semblant plus desplaisant que le cuer ne lui donnoit , & ne valoit son Compaignon , qui oyoit son dire , gueres mieulx que mort s'il le treuve , en belles patoies , & la subtile & double Damoiselle les cuidoit abuser de paroles qu'elle auoit tant a main & si prestes , que ses bourdes sembloient autant veritables que l'Euangile si cuidoit bien que quelque doubte ne suspection qu'ils eussent eu , jamais la chose ne seroit plus auant enforcée , & qu'elle étoit femme pour les fornir tous deux trop mieulx que l'vng d'eux a part , n'étoit pour la seule seruir a son gré. La fin fut aultre , car le dernier venu qu'elle craignoit beaucoup a perdre quelque chose qu'il sceut de l'aultre , lui dit vng jour trop bien la leçon , & de fait lui dis qu'il n'y retourneroit plus , & aussi ne fit-il de grant piece après , dont elle fut très desplaisante & malcontente. Or ne fault pas oublier , afin qu'elle eut encores mieulx le feu , il enuoya vers elle vng gentilhomme de son estroit conseil , afin de lui remontrer bien au long le desplaisir qu'auroit d'auoir Compaignon a son seruice , & brief & court selle ne lui donne congé que n'y reuiendra jour qu'il viue. Comme vous auez oüy dessus , elle n'eut pas volentiers perdu son accointance : si n'étoit sainte ne sainte qu'elle ne parjurast en soy excusant de l'entretienance du premier : & enfin comme toute forcenée dit a l'Escuyer , & ie monst<sup>r</sup>eray a votre maistre que ie l'aime & me baillez



tez votre cousteau. Adonc quand elle eut le cousteau elle se destourna , & si coupa tous les cheueulx de ce cousteau , non pas bien vniment , toutefois l'autre print ce present qui bien sçauoit la verité du cas , & se offrit du present faire deuoir , ainsi qu'il fit tantost après , le dernier venu receut ce beau present qu'il detroussa & leua les cheueulx de sa Dame que beaux étoient & beaucoup longs , si ne fut puis gueres aise tant qu'il trouua son Compaignon a qui il ne cella pas l'ambassade que on lui a mise sus , & a lui enuoyée , & les gros presens qu'on lui enueloppe que n'est peu de chose , & lors monstra les beaulx cheueulx. Je croy , dit-il , que je suis bien en grace : vous n'avez garde qu'on vous en face aiant. Saint Jehan , dit l'autre , vecy autre nouuelle. Or voy ie bien que ie suis frit. C'est fait vous auez bruit tout seul sur ma foy , ie croy fermement qu'il n'en est pas encore vne pareille , je vous requiers , dit il , pensons qu'il est de faire , il lui fault monstrier a bon escient que nous la congnoissons telle quelle est , & ie le vueil , dit l'autre ; tant penserent & contrepenserent qu'ils s'arresterent de faire ce qui sensuit. Le jour ensuiuant ou tost aprez les deux Compaignons se trouuerent en vne chambre ensemble où leur loyalle Dame avec plusieurs aultres étoit , chascun saisit la place au mieulx qu'il peult. Le premier venu auprés de la très bonne Damoiselle , a laquelle tantost après plusieurs deuises , il monstra les cheueulx qu'elle auoit enuoyez a son Compai-

gnon , quelque chose quelle en pensast , elle n'en monstra nul semblant ne deffrai , même disoit qu'elle ne les congnoissoit , & qu'ils ne venoient point d'elle. Comment, dit-il , sont ilz si tost changiez & descongneuz. Je ne scay qu'ilz sont, dit-elle, mais ie ne les congnois , & quant il vit ce , il se pensa qu'il étoit heure de jouer son jeu , & fit maniere de mettre son chaperon que sur son espaule étoit , & en faisant le tour tout a propos , lui fit heurter si rudement a son atour qu'il l'enuoya par terre , dont elle fut bien honteuse , & malcontente , & ceux qui là étoient apperceurent bien que ses cheueulx étoient cuppez , & assez lourdement , elle saillit sus en haste & reprit son atour & s'en entra en une aultre chambre pour se ratourner , & il la suivit , si la trouua toute couroucée , & marie , voire bien fort pleurante de deüil qu'elle auoit d'auoir été desatournée. Si lui demanda qu'elle auoit a plourer , & a quel jeu elle auoit perdu ses cheueulx , elle ne scauoit que respondre , tant étoit a celle heure surprise , & lui qui ne se peult plus tenir d'exorcuter la conclusion prinse entre son Compaignon & lui ; dit, faulx & desloyale que vous êtes , il n'a pas tenu a vous que vng tel & moi ne nous sommes entretenez & deshonneur & je tiens moi que vous l'eussiez bien voulu a ce que vous avez montré , pour en racointer deux aultres nouveaux , mais Dieux merci nous n'en auons garde , & afin que nous sachez son cas & le mien , vocy vos cheueulx

que lui auez enuoyez dont il m'a fait présent , & ne pensez pas que nous soyons si bêtes , que nous auez tenus jusques ici. Lors appella son Compaignon & il uint , puis dit j'ai rendu a cette bonne Damoiselle ses cheueulx & lui ay commencé a dire comment de sa grace elle nous a bien tous deux entretenus , & combien que a sa maniere elle a bien monsté qu'il ne lui chailloit , se nous deshonorions l'vng l'autre , Dieu nous en a gardez. Saint Jehan c'amon , dit-il , & lors mêmes adressa parole a la gouge , & Dieu sçait s'il parla bien a elle , en lui remonstrant sa très grande lascheté & desloyauté , de cueur , & ne pensé pas que gueres oncques femme fut mieulx capitulée qu'elle fut a l'heure , puis de l'vng , puis de l'autre , a quoy elle ne sçauoit en nulle maniere que dire ne respondre comme surprinse en mesfait euident , sinon de larmes qu'elle n'espargnoit pas. & ne pensez pas quelle eut gueres oncques plus de plaisir en les entretenant tous deux quelle auoit a cette heure de desplaisir. La conclusion fut telle toutesfoi qu'ilz ne l'abandonneront point , mais par acort dorefnauant chascun aura son tour , & s'ils y viennent tous deux ensemble , l'vng fera place a l'autre & seront bons amis , comme parauant sans plus jamais parler de tuer ne de battre. Ainsi en fut il fait & maintinrent assez longuement les deux Compaignons cette uie & plaisant passetemps , sans que la gouge les osast oncques desdire : & quant l'vng alloit sa journée il le disoit a l'autre , & quant

220 *SEIGNEUR DESSUS*,  
d'aventure l'vng eslongnoit le marchié, le lieu &  
l'autre demouroit. Très bon faisoit oïr les recom-  
mandacions qu'ils faisoient au despartir, mèmement  
ils firent de très bons rondeaux, & de plusieurs  
chansonnettes qu'ilz manderent & enuoyerent l'une  
à l'autre, dont il est aujourd'hui grant bruit seruans  
aux propos de leur matiere dessus dicté, dont ie  
cesserai de parler & si donnerai fin au compte.

---

XXXIV. NOUVELLE.

*SEIGNEUR DESSUS*,  
*SEIGNEUR DESSOUS*.

N'A pas long temps que j'ay congneu vne nota-  
ble femme & digne de memoire, car les ver-  
tus ne doiuent être celées ne estaintes, mais en com-  
mune audience publiquement blasonnée. Vous orrez  
s'il vous plaît en cette nouuelle la chose de quoy  
j'entens parler. C'est d'accroistre la très heureuse re-  
nommée. Cette vaillant preude femme mariée à vng  
tout oultre nos amis, auoit plusieurs seruiteurs en  
amours, pourchassans, & desirans sa grace qui n'é-  
toit pas trop difficile de conquerre, tant étoit douce  
& pityable. Celle qui la pouuoit & vouloit depar-  
tir largement par tout où bon & mieulx lui sembloit.  
Aduint vng jour que les deux vinrent vers elle com-

me ils auoient de coutume, non saichans l'vng de l'autre, demandans lieu de cuire & leur tour d'audience. Elle qui pour deux ne pour trois n'eust jamais reculé ne démarchié leur bailla jour & heure de se rendre vers elle. Comme a lendemain, l'vng a huit heures du matin l'autre a neuf ensuiuant, chargeant a chascun par exprés & bien a certes qu'il ne faille pas a son heure assignée, ils promirent sur leur foy & sur leur honneur, s'ils n'ont cause raisonnable qu'ils se rendront au lieu & terme limité. Quant vient a lendemain enuiron cinq heures du matin, le mary de cette vaillante femme se leue, se habille, & se met en point & puis la huche, & appelle pour se leuer, mais il ne lui fut pas accordé ains refusé tout pleinement. Ma foy, dit-elle, il m'est prins vng tel mal de teste que ie ne me sçauroie tenir en piedz, si ne me pourroie encor leuer pour mourir tant suis foible & trauaillée, & que vous le sachiez, ie ne dormis ennuit, si vous prie & requier que me laissez ici vng peu reposer, & i'espere quant ie seray seule ie prendray quelque peu de repos. L'autre combien qu'il se doubtaist n'osast contredire ne repliquer, mais s'en alla comme il auoit de coutume besongner en la ville. Tandis sa femme ne fut point oyseuse a l'hostel, car huit heures ne furent pas plustost sonnées que vecy bon Compaignon du jour de devant, ainsi assigné, qui vient heurter a l'hostel, & elle le boutta dedens, il eut tantost despoüillé sa robe longue, & le surplus de ses habillemens & puis vint

## 222 SEIGNEUR DESSUS

faire compaignie a Madamoiselle , afin qu'elle ne se espouuenta & furent eulx deux tant & si longuement bras a bras qu'ils ouïrent assez rudement heurter a l'huis, Ah , dit elle , par ma foy vecy mon mary , auancez vous , prenez votre robe. Votre mary , dit-il , & le congnoissez vous a heurter, ouï , dit-elle , je sçay bien que c'est il abregez vous, qu'il ne vous treuve ici. Il fault bien , se c'est il qu'il me voye , ie ne me sçauroye où sauuer. Qu'il vous voye , dit-elle , non fera se Dieu plaist , car vous seriez mort & moi aussi , il est trop merueilleux , montez en hault en ce petit grenier & vous tenez tout quoy sans mouuoir qu'il ne vous oye. L'autre monta comme elle lui dit en ce petit grenier qui étoit d'ancien edifice , tout desplanché , tout deslatté , & pertuisé & rompu en plusieurs lieux , & Madamoiselle le sentant la dessus fait vng fault jusqu'a l'huis , très bien saichant que ce n'étoit pas son mary , & mit dedens celui qui auoit a neuf heures promis deuers elle se rendre , ils vindrent en la chambre , ou pas ne furent longuement debout , mais tout plat s'entracolerent & embrassèrent en la même ou semblable façon que celui du grenier auoit fait , lequel par vng pertuis veoit a l'œil la compaignie dont il n'étoit pas trop content , & fit grant procez en son courage , assauoir se bon étoit qu'il parlast ou se mieulx lui valloit se taire , il conclud toutefois tenir silence & ne dire mot jusqu'a ce qu'il verra trop mieulx son heure & son point , & pensez qu'il auoit belle patience ;

tant attendit , tant regarda sa Dame avec le survenu  
que bon mary vint a l'hoſtel pour ſçavoir de l'état  
& ſanté de ſa très bonne femme , ce qu'il étoit très  
bien tenu de faire ; elle l'oüit tantost ſi n'eut autre  
loisir que de faire leuer ſa compaignie , elle ne ſça-  
voit ou ſauuer , pource que au grenier ne l'eut ja-  
mais enuoyé : & elle ſit bouter en la ruelle du lit ,  
& puis le couurit de ſes robes , & lui dit , ie ne vous  
ſçauroye où mieulx logier , prenez en patience. Et  
elle n'eut pas acheué ſon dire que ſon mary entra  
dedens , qui aucunement ſi lui ſembloit auoir noiſe  
entre oüye ſi trouua le lit tout deſfroiffié & deſpeil-  
lé , la couuerture mal honnie & d'eſtrange biais , &  
ſembloit mieulx le lit d'une eſpouſée que la couche  
d'une femme malade. La doubte qu'il auoit aupa-  
rauant , avec l'aparence de preſent , lui ſit ſa femme  
appeller par ſon nom , & lui dit paillard & meſ-  
chante que vous êtes , ie n'en penſoie pas mains huy  
matin , quant vous contrefiſtes la malade : où eſt vo-  
tre houlhier , ie vouë a Dieu ſi ie le trouue qu'il au-  
ra mal finé & vous auſſi : & lors mit la main a la  
couuerture , & dit vecy bel apareil , il ſemble que les  
pourceaux y ayent couchié. Et qu'avez vous , ce dit-  
elle , meſchant yvrogne , fault il que ie compare le  
trop de vin que votre gorge a entonné , eſt ce la belle  
ſalutacion que vous me faites de m'appeller paillar-  
de : ie vueil bien que vous ſaichez que ie ne ſuis pas  
telle : mais ſuis trop leale & trop bonne pour vng  
tel paillard que vous êtes , & n'ay autre regret , ſinon

## 224 SEIGNEUR DESSUS,

de quoy ie vous ay été si bonne & si loyale : car vous ne le vallez pas , & ne sçay qui me tient que je ne me lieue & vous esgratigne le vifage par telle façon , qu'a tousjours , mais ayez memoire de m'avoir ainsi villennée. Et qui me demanderoit comment elle osoit en ce point respondre , & a son mary parler , ie y treuve deux raisons. La premiere si est qu'elle auoit bon droit en sa querelle , & l'autre quelle se sentoit la plus forte en la place , & sçait assez a penser se la chose feust venue jusques aux horions , celui du grenier & l'autre , l'eussent servie & secouruë. Le pauvre mary ne sçauoit que dire qui oyoit le diable sa femme ainsi tonner , & pource qu'il veoit que hault parler & fort tencer n'auoit pas lors son lieu , il print le procès tout en Dieu qui est juste & droiturier. Et a chief de sa meditation , entre autres parolles , il dit , vous vous excusés beaucoup de ce dont ie sçai tout le vray , au fort il ne m'en chauld pas tant qu'on pouroit bien dire , ie n'en quieres jamais faire noise , celui de la hault payera tout , & pour celui d'enhault entendoit Dieu. Mais le galant qui étoit au grenier qui oyoit les parolles cuidoit a bon escient que l'autre l'eut dit pour lui , & qu'il fut menacé de porter la paste au four pour le meffait d'autrui. Si respondit tout en hault. Comment sire il suffit bien que i'en paye la moitié , celui qui est en la ruelle du lit peut bien payer l'autre moitié , car certainement ie croy qu'il y est autant tenu que moi. Qui fut bien esbahy , ce fut l'autre , car il cuydoit



que Dieu parlaſt a lui , & celui de la ruelle ne ſçauoit que penſer : car il ne ſçauoit rien de l'autre , il ſe leua toutefois , & l'autre ſe deſcendit qui le congneut , ſi ſe partirent enſemble & laiſſerent la compagnie bien troublée , & mal contente dont il ne leurs chailloit gueres & a bonne cauſe.

XXXV. NOUVELLE.

L' E C H A N G E.

**V**N gentil homme de ce Royaulme très vertueux & de grant renommée, grant voyager & aux armes très preux & vaillant, deuint amoureux d'une très belle & gente Damoiſelle , & en brief tems fut ſi bien en ſa grace que rien ne lui fut eſcondit de ce qu'il voulut & oſa demander. Aduint ne ſçai combien aprez cette alliance que ce bon Cheualier , pour mieulx valoir & honneur acquerir, ſe partit de ſes marches très bien en point & accompagné , portant entreprinſe d'armes du congé de ſon maître , & ſ'en alla és Eſpaignes & en diuers lieux où il ſe conduiſit tellement que a ſon retour il fut reçu a grant triumphe. Pendant ce temps ſa Dame fut mariée a vn ancien Cheualier qui gracieux & ſaichant homme étoit , qui tout ſon temps auoit hanté la court & étoit au vray dire le regiſtre

d'honneur & n'étoit pas vng petit dommaige qu'il ne fut mieulx allié , combien toutefois que encores n'étoit pas descouuerte l'embusche de son infortune si auant , ne si commune comme elle fut depuis ainsi comme vous orrez. Car ce bon Cheualier aduentureux dessusdit retourna d'accomplir ses armes , & comme il passoit par le pays , il arriva d'adventure vng soir au Chasteau où sa Dame demouroit , & Dieu sçait la bonne chiere que Monseigneur son mary & elle lui firent , car il y auoit de pieça grant accointance & amitié entre eulx deux. Mais vous devez sçauoir que tandis que le Seigneur de leans pensoit & s'efforçoit de trouuer maniere de plusieurs choses pour festoyer son hôte , l'hôte se deuisoit avec sa Dame qui fut , & s'efforçoit de trouuer maniere de la festoyer , comme il auoit fait auant que Monseigneur fut son mary , & elle qui ne demandoit autre chose ne se excusoit en rien , sinon du lieu , mais il n'est pas possible , dit elle , de le pouuoir trouuer. Ah , dit le bon Cheualier , ma chiere Dame par ma foy si vous le voulez bien , il n'est maniere qu'on ne treuve , & que sçaura votre mary quant il sera couchié & endormi , si vous me venez veoir jusques den ma chambre , ou se mieulx vous plaist & bon vous semble , ie viendrai bien vers vous. Il ne se peult ainsi faire , ce dit-elle , car le dangier y est trop grant , car Monseigneur est de legier somme , & jamais ne s'esueille qu'il ne taste aprez moi & s'il ne me trouuoit point pensez ce que se-

roit. Et quant il s'est en ce point tourné, que vous fait-il. Autre chose, dit-elle, il se vire d'vng & revire d'autre. Ma foy, dit-il, c'est vng très mauuais mesnagier, il vous est bien venu que je suis venu pour secourir, & lui ayder & parfaire ce que ne est pas bien en sa puissance d'acheuer. Si m'est Dieu, dit-elle, quant il besoigne vne fois le mois c'est au mieulx venir, il ne fault ia que i'en face la petite bouche. Croyez fermement que je prendroye bien miculx. Ce n'est pas merveille, dit-il, mais regardez comment nous ferons, car c'est force que je couche avecque vous cette nuit. Il n'est tour ne maniere que je voye, dit-elle, comment il se puisse faire; & comment, dit-il, & n'avez vous point ceans femme en quoi vous oussiez fier de lui declarer votre cas. J'en ay par dieu vne, dit-elle, en qui j'ai bien tant de fiance que de lui dire la chose en ce monde que plus voudroit être celée, sans avoir suspicion ne doubte que jamais par elle fut descouverte.

Que nous fault il donc plus, dit-il, regardez vous & elle du surplus. La bonne Dame qui vous auoit la chose a cueur appella cette Damoiselle & lui dit ma mye c'est force annuit que tu me serues, & que tu me aydes a acheuer vne des choses en ce monde qui plus au cueur me touche. Madame, dit la Damoiselle, ie suis preste & contente comme je dois de vous seruir & obeir en tout ce qu'il me sera possible, commandez, ie suis celle qui accompli-

ray votre commandement. Et ie te mercie ma mye , dit la Dame , & soyes seuré que tu ny perdras rien. Vecy le cas. Ce Cheualier qui ceans est , c'est l'homme au monde que j'aime le plus , & ne voudroie pour rien qu'il se partit de moy sans aucunement auoir parlé a lui ; or ne me peult il bonnement dire ce quil a sur le cueur , sinon entre nous deux & a part & je ne m'y puis treuver se tu ne vaie tenir ma place devers Monseigneur. Il a de coustume comme tu sçais de soi virer par nuit vers moy & me taffe vng peu & puis me laisse & se rendort. Je suis contente de faire votre plaisir , Madame , il n'est rien qu'a vostre commandement ie ne feisse. Or bien ma mye , dit-elle , tu te coucheras comme ie fais assez loing de Monseigneur , & garderas bien quelque chose qu'il fasse que tu ne die vng seul mot , & quelque chose qu'il vouldra faire souffre. Tout a votre plaisir , Madame , & ie le ferai. L'heure du souper vint , & n'est ia mestier de vous compter du seruice. Seulement vous souffise que on y fit très bonne chere , & il y auoit bien de quoi. Après souper la compaignie s'en allast a lesbat & le Cheualier estranger tenant Madame par le bras , & aucuns aultres gentils hommes tenans le surplus des Damoiselles de leans , & le Seigneur de l'hostel venoit derriere , & enqueroit des voyages de son hoste a vng ancien gentil homme qui auoit conduit le fait de sa despense en son voyage. Madame n'oublia pas de dire a son ami que vne telle de ses femmes tiendra annuit sa place & son

lieu , & qu'elle viendra vers lui. Il fut très joyeux & largement l'en remercia desirant que l'heure fut venue , ils se misdrent au retour & vinrent jusques en la chambre de parement , où Monseigneur donna la bonne nuit a son hoste & Madame aussi. Et le Cheualier estranger s'en vint en sa chambre qui étoit belle a bon escient , bien mise a point & étoit le beau buffet garni d'espices , de confitures & de bon vin de plusieurs façons. Il se fit tantost deshabiller , & la beut vne fois , puis fit boire ses gens & les enuoya coucher , & demoura tout seul attendant sa Dame , laquelle étoit avec son mary qui tous deux se despoüilloient & se mettoient en point pour entrer ou lit. La Damoiselle qui étoit en la ruelle du lit tantost que Monseigneur fut couchié , se vint mettre en la place de sa maitresse , & elle qui aultre part auoit le cueur ne fit que vng sault jusques dans la chambre de celui qui l'attendoit de pié quoi. Or est chascun logié Monseigneur avec sa chamberiere , & son hoste avec Madame , & sçait assez a penser qu'ils ne passerent pas toute la nuit a dormir. Monseigneur comme il auoit de coustume enuiron vne heure deuant le jour , se resueilla & vers sa chamberiere cuidant être sa femme se vira & au taster qu'il fit heurta sa main a son tetin , qu'il sentit si très dur & poignant & tantost congnyut que ce n'étoit point celui de sa femme , car il n'étoit point si bien troussé. Ha , dit-il en lui même , je vois bien que c'est , & i'en baillerai vng aultre. Il se vira vers celle belle fille &

a quelque meschief que ce fut il rompit vne lance, mais elle laissa faire sans oncques dire vng seul mot ne demi. Quant il eut fait, il appella tant qu'il put celui qui couchoit avec sa femme. Hau Monseigneur de tel lieu, où êtes vous, parlez a moi. L'autre qui se ouït appeller fut beaucoup esbahy & la Dame fut toute esperduë, & bon mary recommence a rehuchier, hau Monseigneur mon hôte parlez a moi, & l'autre s'anantura de respondre & dit que vous plaist il Monseigneur. Je vous ferai tousjours ce change quand vous vouldrez. Quel change, dit-il, d'une vieille ja toute passée & desloyalle a vne belle & bonne & fresche jeune fille, ainsi m'avez vous party, la votre mercy. La compaignie ne sceut que respondre, même la pource chamberiere étoit tant surprinse que s'elle fut a la mort condamnée tant pour le deshonneur & desplaisir de sa maitresse comme pour le sien, même quelle auoit meschamment perdu. Le Cheualier estrange se partit de sa Dame au pluzost qu'il sceust sans mercier son hôte, & sans dire adieu, & oncques puis ne sy trouua, car il ne sçait encores comme elle se conduit depuis avec son mary, ainsi plus auant ne vous en puis dire.



XXXVI. NOUVELLE.

A LA BESOIGNE.

**V**N G très gracieux gentil homme desirant employer son seruice & son temps en la très noble court d'amours, soy sentant de Dame impourneu, pour bien choisir & son temps employer, donna cuer, corps & biens a vne belle Damoiselle & bonne que mieulx vault, laquelle faite & duite de faconuer gens, l'entretint bel & bien & longuement, & trop bien lui sembloit qu'il étoit bien auant en sa grace, & a dire la verité, si étoit il, comme les autres dont elle auoit plusieurs. Aduint vng jour que ce bon gentil homme trouua sa Dame d'aventure a la fenestre d'une chambre, ou meillieu d'vng Cheualier & d'vng Escuyer; ausquels elle se deuisoit par deuises communes, aucunesfois parloit a l'vng a part, sans ce que l'autre en ouït riens, d'autre costé faisoit a l'autre la pafeille pour chascun contenter; mais que fut bien a son aise le pource amoureux enrageoit tout vif que n'osoit approcher de sa compaignie, & si n'étoit en lui deslongner, tant fort desiroit la presence de celle qu'il aimoit mieulx que le surplus des autres, trop bien lui iugeoit le cuer que ceste assemblée ne se despartiroit point sans con-

clure ou procurer aulcune chose a son prejudice , dont il n'auoit pas tort de se penser & dire , & s'il n'eust eu les yeux bandez & couuerts s'il pouuoit veoir apertement ce dont vng aultre a que riens ne touchoit , s'apperceut l'œil & de fait lui montra & vecy comment. Quant il congneut & apperceut a la lettre que sa Dame n'auoit loisir ne voulenté de l'entretenir , il se bouta sur vne couchette & se coucha , mais il n'auoit garde de dormir , tant étoient ses yeulx empêchez de veoir son contraire , & comme il étoit en ce point suruint vng gentil Cheualier qui salua la compaignie , lequel voyant que sa Damoiselle auoit sa charge se tira devers l'escuier , que sur la couche n'étoit pas pour d'ormir , & entre aultres deuises lui dit l'escuier. Par ma foi , Monseigneur , regardez a la fenestre , vela gens bien aise. Et ne voyez vous pas comment plaisamment ils se demainent ; saint Jehan , tu dis vray , dit le Cheualier. Encores font-ils bien aultre chose que ne deuisez , & quoy , dit l'aultre , quoy , dit-il , & ne vois tu point comment elle tient chascun d'eux par la resne. Par la resne , dit-il , voire vrayment pource beste par la resne , où sont tes yeulx , mais il y a bien choir des deux veoir quant a la façon , car celle quelle tient de gauche n'est pas si longue ne si grande que celle qui emple la destre main. Ha , dit l'escuier , par la mort bieu vous dite vray saint Antoine arde la loupe. Et pensez qu'il n'étoit pas bien aise. Ne te chaille , dit le Cheualier , portes ton mal le plus



plus bel que tu peulx , ce n'est pas ici que tu dois dire ton couraige , force est que tu fasses de nécessité vertu. Aussi fit-il , & vey bon Cheualier qui s'approuchoit de la fenestre où la gallée étoit , si apperceut d'aventure que le Cheualier a la resne gauche se lieue en piedz & regardoit que faisoient & disoient la Damoiselle gracieuse & l'escuier son Compaignon. Si vint a lui en lui donnant un petit coup sur le chapeau , entendez a votre besongne de par le diable , ne vous souciez des aultres. L'autre se retira & commença de rire , & la Damoiselle que ne étoit point effarée de legier , ne se mua oncques trop bien tout doucement laissa prinse , sans rugir ne changier couleur , regret eut elle en soy-même d'abandonner de la main ce que aultre part lui eust bien serui. Et fait assez accroire que par auant & depuis n'auoit cellui des deulx que ne lui fit très voulentiers seruice , aussi eut bien fait , qui eut voulu , le dolent amoureuX malade qui fut contraint d'être notaire du plus grant desplaisir qu'au monde aduenir lui pourroit , & dont la seule pensée en son pource cuer rongée étoit assez & trop puissant de mettre en desespoir ; se raison ne l'eut a ce besoing secouru qui lui fit tout abandonner , sa queste en amours , car de cettę cy il ne pourroit vng seul bon mot a son aduentaige compter.

XXXVII. NOUVELLE.

*LE BENETRIER*  
D'ORDURE.

**T**ANDIS que les aultres penseront & a leur memoire rameneront aucuns cas aduenus & perpetrez habilles & suffisans d'être ajoutez a l'histoire presente, ie vous compterai en bref termes en quelle façon fut deceu le plus jaloux de ce Royaulme pour son temps. Je croy assez qu'il n'a pas été seul entaché de ce mal , mais toutefois pource qu'elle fut outre l'enseigne , ie ne me sçauroie passer sans faire sçauoir le gracieulx tour qu'on lui fit. Ce bon jaloux que ie vous conte étoit très grant historien & auoit veu & beaucoup leu & releu de diuerses histoires , mais la fin principale a quoy tenoit son exercice & toute son estude , étoit de sçauoir & congnoistre les façons & manieres comment femmes peuuent decepuoir leurs maris. Car la Dieu mercy , les hystoires anciennes comme Ma-theolus , Juuenal , les quinze Joyes de mariage & aultres plusieurs dont ie ne sçay le conte , font mention de diuerses tromperies , cautelles , abusions , & deceptions en cet état aduenus. Notre jaloux les

auoit tousiours a ses mains , & n'en étoit pas mains  
 affoté que vng fol de sa marote , tousiours lisoit ,  
 tousiours estudioit , & d'yceulx liures fit vng petit  
 extrait pour lui auquel étoient descriptes , comprin-  
 ses , & nottées plusieurs manieres de tromperies au  
 pourchas & entreprinſes de femmes & és personnes  
 de leurs maris executées , & ce fit il tendant afin  
 d'être mieulx premuni sur sa garde de sa femme  
 s'elle lui en bailloit point de telles comme celles  
 qui en son liure étoient chroniquées & registrées.  
 Qu'il ne garda sa femme d'aussi près que vng jaloux  
 Italien , si faisoit , & si n'étoit pas bien assuré tant  
 étoit fort feru du maudit mal de jalousie , & en cet  
 état & aise delectable fut ce bon homme trois ou  
 quatre ans avec sa femme , laquelle pour passetemps  
 n'auoit autre loisir d'être hors de sa presence infer-  
 nale , sinon allant & retournant a la messe , en la  
 compaignie d'une vielle serpente qui d'elle auoit  
 charge. Vng gentil Compaignon oyant la renom-  
 mée de ce gouuernement , vint rencontrer vng jour  
 cette bonne Damoiselle qui belle , gracieuse &  
 amoureuse a bon escient étoit , & lui dit le plus  
 gracieusement que oncques sceust le bon vouloir  
 qu'il auoit de lui faire seruire , plaignant & soupi-  
 rant pour l'amour & volenté d'elle sa maudite  
 fortune , d'être alliée au plus jaloux que terre sou-  
 tienne & disant au surplus que elle étoit la seule en  
 vie pour qui plus vouldroit faire , & pource que ie  
 ne vous puis pas icy dire combien ie suis a vous , &

plusieurs aultres choses dont i'espère qui vous ne ferez que contente, s'il vous plaist ie les metteray par escript, & demain ie vous les bailleray vous suppliant que mon petit seruice partant de bon vouloir & entier, ne soit pas refusé. Elle escouta volentiers, mais pour la presence du dangier qui trop prés étoit gueres ne respondit, toutefois que elle fut contente de veoir ses lettres quant elles viendront. L'amoureux print congié assez joyeux & a bonne cause, & la Damoiselle comme elle étoit douce & gracieuse le congié lui donna, mais la vielle qui la suiuoit ne faillit point a demander quel parlement auoit été entre elle & celui qui s'en va, il ma dit elle apporté nouuelle de ma mere dont ie suis bien joyeuse : car elle est en bon point. La vielle n'en quist plus auant si vindrent a l'hostel. A lendemain, l'autre garni d'une lettre, Dieu sçait comment dictée, vint rencontrer sa Dame, & tant subitement & subtilement lui bailla ces lettres que onques le guet de la vieille serpente n'en eut connoissance. Ces lettres furent ouuertes par celle, qui volentiers les vit quand elle fut a part : le contenu en gros étoient comment il étoit esprins de l'amour d'elle, & que jamais vng seul jour de bien n'auroit se temps & loisir prestez ne lui sont, pour plus auant l'en aduertir, requerant en conclusion quelle lui vueille de sa grace jour & lieu conuenable assigner pour ce faire : elle fit vne lettre par laquelle très gracieusement s'excusoit de vouloir entretenir en

amours autre que celui auquel elle doit foi & loyauté, neantmoins pource qu'il est tant fort espris d'amours accause d'elle, qu'elle ne voudroit pour rien qu'il n'en fut guerdonné, elle seroit très contente d'oïr ce qu'il veut dire, se nullement pouoit ou scauoit, mais certes nenny, tant près la tient son mary qui ne la laisse d'vng pas, sinon a l'heure de la messe quelle vient a l'Eglise, gardée, & plus que gardée par la plus pute vieille qui jamais aultrui destourba. Ce gentil Compaignon tout autrement habillé & en point que le jour passé vint rencontrer sa Dame qui très bien le congneut, & au passer qu'il fit assez près d'elle, receut de sa main sa lettre dessusdicté. S'il auoit faim de veoir le contenu, ce n'étoit pas merveilles, il se trouua en vng destour où tout a son aise & beau loisir, vit & congneut l'état de sa besongne qui lui sembloit être en bon train, si regarda que ne lui fault que lieu pour venir au dessus & a chief de sa bonne entreprinse, pour laquelle acheuer il ne finoit nuit ne jour de aduiser & penser comment il la pouroit conduire. Si s'aduifa d'vng bon tour qui ne fait pas a oublier, car il s'en vint a vne sienne bonne amie, qui demouroit entre l'Eglise où sa Dame alloit a la messe & l'hostel d'elle, & lui compta sans rien celer ce fait de ses amours, en priant très affectueusement quelle a ce besoing le voulüst aider & secourir. Ce que ie pourai faire pour vous, ne pensés pas que ie ne m'y emploie de très bon cuer. Je vous mer-

cie , dit-il , & seriez vous contente quelle venist  
 ceans parler a moy , ma foy , dit-elle , il me plaist  
 bien. Or bien , dit-il , s'il est en moy de vous faire  
 autant de seruice , pensez que j'aurai congnoissance  
 de la courtoisie. Il ne fut oncques si aise ne jamais  
 ne cessa tant qu'il eut recript & baillé ses lettres a  
 sa Dame que contenoient qu'il avoit tant fait a vne  
 telle quelle étoit sa très grande amie femme de bien,  
 loyalle & secrette , & que vous aime & congnoit  
 bien ; qu'elle nous baillera sa maison pour deuiser ,  
 & vecy que j'ai aduisé , ie serai demain en la cham-  
 bre d'enhault que descouure sur la ruë , & si auray  
 auprès de moy vng grant seau deauë , & de cen-  
 dres entremeslé dont ie vous affublerai tout a coup  
 que vous passerez , & si seray en habit si descongneu  
 que votre vieille ne ame du monde n'aura de moy  
 congnoissance. Quant vous serez en ce point atour-  
 née , vous ferez bien l'esbahye & vous sauueres en  
 ceste maison & pour votre dangier manderez que-  
 rir en votre hostel vne aultre robe , & tandis quelle  
 sera en chemin nous parlerons ensemble. Pour abre-  
 gier , ces lettres furent escriptes & baillées & la res-  
 ponse fut renduë par elle qu'elle étoit contente.  
 Or fut venu ce jour , & la Damoiselle affublée par  
 son seruiteur d'vng seau d'eauë & de cendres , voire  
 par telle facon que son queueuechief , sa robe & le  
 surplus de ses habillemens furent tous gastez & per-  
 cez , & Dieu sçait quelle fit bien l'esbahye & de la  
 malcontente , & comme elle étoit ainsi atournée ,

elle se bouta en l'hostel ignorant d'en auoir con-  
 gnoissance. Tantost qu'elle vit la Dame elle se  
 plaignit de son meschief, n'est pas a vous dire le  
 deul quelle menoit de ceste aduenture, maintenant  
 plaint sa robe, maintenant son queueuchief, &  
 l'autre fois son tixu, brief que loyoit, il sembloit  
 que le monde fut finé. Et de rechief sa meschine  
 que enrageoit d'engagner, auoit en sa main vng  
 cousteau dont elle nettoyoit sa robe, & mieulx  
 qu'elle scauoit; nenny, nenny ma mye, dit-elle,  
 vous perdez votre peine ce n'est pas chose a net-  
 toyer si en haste, vous n'y scauriez faire chose main-  
 tenant qui vauisist rien, il fault que j'aye vne autre  
 robe & vng autre queueuchief il n'y a point d'aul-  
 tre remede, allez a l'hostel & les me apportez &  
 vous auancez de retourner que nous ne perdons la  
 messe avec tout notre mal. La vielle voyant la cho-  
 se être necessaire n'osa desdire sa maitresse, si print  
 & robe & queueuchief sous son manteau, & a l'hos-  
 tel s'en va, elle n'eut pas si tost tourné les tallons  
 que sa maitresse fut guidée en la chambre où son  
 seruiteur étoit, que volentiers la vit en cote sim-  
 ple, & en cheueulx, & tandis qu'ils se deuiferont  
 nous retournerons a parler de la vielle qui reuint a  
 l'hostel, où elle trouua son maître qui n'attendit  
 pas qu'elle parlaist, mais demanda incontinent, &  
 qu'avez vous fait de ma femme: & où est elle,  
 je l'ay laissée, dit-elle, chez vne telle, & en tel  
 lieu, & a quel propos, dit-il: lors elle lui monstra

robe & queuurechief, & lui compta l'aduenture de la tynée d'eauë & des cendres, disant qu'elle vient querir d'aultres habillemens : car en ce point sa mairesse n'osoit partir dont elle étoit, est-ce cela, dit-il, notre dame, ce tour n'étoit pas en mon liure, allez, allez ie voy bien que c'est. Il eut volentiers dit qu'il étoit cour, & croyez que si étoit il a ceste heure, & ne l'en sceut oncques garder liure ne brief ou plusieurs fins tours étoient registrez, & fait assez penser qu'il retint si bien ce dernier que oncques puis sa memoire ne partit, & ne lui fut nul besoing a cette cause de l'escrire tant en eut fresche souuenance le peu des bons jours qu'il vesquit.

---

## XXXVIII. NOUVELLE.

*UNE VERGE*  
POUR L'AULTRE.

**N**AGUERES que vng Marchand de Tours pour festoier son Curé & aultres gens de bien achepta vne grosse & belle lamproie, si l'enuoya a son hostel, & chargea tres bien a sa femme de la mettre a point ainsi qu'elle scauoit bien faire, & faites, dit-il, que le disner soit prest a douze heures, car ie ameneray notre Curé & aul-  
curs



tous aultres qui lui nomma , tout sera prest , dit-elle , amenez que vous voudrez ; elle mit a point vng grant tas de beau poisson , & quant vint a la lamproie , elle la souhaita aux Cordeliers a son amy , & dit en soi-mêmes. Ha frere Bernard que n'êtes vous ici , par ma foy vous n'en partiriez jamais tant que eussiez tasté de la lamproie ou se mieulx vous plaisoit vous l'emporteriez en votre chambre , & ie ne faudroie pas de vous faire compaignie. A très grant regret mettoit cette bonne femme la main a cette lamproie , voire pour son mary , & ne faisoit que penser comment son Cordelier la pouroit auoir , tant pensa & aduisa quelle conclud de lui enuoier par vne vieille que sçauoit de son secret , ce quelle fit & lui manda qu'elle viendra ennuit souper & couchier avec lui. Quant maître Cordelier vit cette belle lamproie & entendit la venuë de sa Dame , pensez qu'il fut joyeux & bien aise & dit a la vieille que s'il peult finer du bon vin que la lamproie ne sera pas fraudée du droit quelle a , puisque on la mengeuë. La vieille retourna de son messaige & dit sa charge , & enuiron douze heures vecy notre marchand venir , le Curé & plusieurs aultres bons Compaignons pour deuorer cette lamproie qui étoit bien hors de leur commandement. Quant ils furent en l'hostel du marchand , il les mena tretous en la cuisine pour veoir cette belle & grosse lamproie dont il les voloit festoier , & appella sa femme , & puis lui dit montrez nous notre lamproie , ie

vueuil ſçauoir a ces gens ſe i'en eu bon marché. Quelle lamproie, dit-elle, la lamproie que ie vous ſeis bailler pour notre diſner avec cette aultre poiſſon, ie n'ay point veu de lamproie, dit-elle, ie cuide moy que vous ſongiez, vecy vne carpe, deux brochets & ie ne ſcay quel aultre poiſſon, mais ie ne veis aujourd'hui lamproie. Comment, dit-il, & penſez vous que ie ſois yure. Ma foy oüy, dirent lors le Curé & les aultres, vous n'en penſiez pas aujourd'hui, mais vous êtes vng peu trop chiche pour acheter lamproie maintenant. Pardieu, dit la femme il ſe farce de vous ou il a ſongé d'une lamproie, car ſeurement ie ne veis de cet an lamproie, & bon mary de ſoy couroucer, qui dit vous avez menty paillarde, vous l'avez mengée ou cachée quelque part, ie vous promets que oncques ſi chiere lamproie ne fut pour vous, puis ſe vira vers le Curé & les aultres, & juroit la mort bieu & vng cent de ſermens, qu'il auoit baillé a ſa femme vne lamproie qui lui auoit couſté ung franc, & eulx pour encore plus le tournienter & faire enraiger, faiſoient ſemblant de le non croire, & tenoient termes comme s'ils fuſſent mal contens, & diſoient nous étions priez de diſner chez vng tel, & ſi auons tout laiſſiez pour venir icy cuidant manger de la lamproie, mais a ce que nous voyons elle ne nous fera mal. L'hoſte qui enraigeoit tout viſ, print vng baſton & marchoit vers ſa femme pour la trop bien froter ſe les aultres ne l'euffent retenu, qui l'em-

menèrent a force hors de son hostel, & misdrent peine de le rappaiser le mieulx qu'ils sceurent, quant ils le virent ainsi troublé, puis qu'ils eurent failly a la lamproie, le Curé mit la table & firent la meilleure chiere qu'ils sceurent. La bonne Damoiselle a la lamproie, manda vne de ses voisines, qui vefue étoit, mais belle femme & en bon point étoit elle, & la fit disner avecque elle. Et quant elle vit son point, elle dit ma bonne voisine, il seroit bien en vous de me faire vng singulier plaisir, & se tant vous vouliez faire pour moi, il vous seroit tellement desseruy que vous en deburiez être contente. Et que vous plaist il que ie face, dit l'autre. Je vous dirai, dit-elle, mon mary est si très ardent de ses besongnes, que c'est vne grant merueille, & de fait, la nuit passée il m'a tellement retournée que ie vous promets par ma foy ie ne l'oseroye bonnement ennuyt attendre, si vous prie que vous voulez tenir ma place, & se jamais puis rien faire pour vous, vous me trouuerez preste de corps & de biens. La bonne voisine pour lui faire plaisir & seruice fut bien contente de tenir son lieu dont elle fut largement & beaucoup mercié. Or deuez vous sçauoir que notre marchant a la lamproie, quant vint le disner, il fit très grosse & grande garnison de bonnes verges qu'il apportat secrettement en sa maison, & aux pieds de son lit il les cacha, pensant que sa femme ennuyt en sera trop bien seruie. Il ne sceut faire si secrettement que sa

femme ne s'en donna très bien garde que ne s'en pensa pas mains , congnoissant assez par expérience la cruauté de son mary , lequel ne soupa pas a l'hostel , mais tarda tant dehors qu'il pensoit bien qu'il la trouua nuë & couchée , mais il faillit a son entreprinse , car quant vint sur le soir & tart , elle fit despoüiller sa voisine , & coucher en sa place , en lui chargeant expressément quelle ne respondit mot a son mary quant il viendra , mais contreface la muette & la malade , & si fit encores plus , car elle estaignit le feu de leans , autant en la cuisine comme en la chambre , & ce fait a sa voisine chargea que tantost que son mary sera leué matin qu'elle s'en voise en sa maison , elle lui promist que si feroit-elle. La voisine en ce point logée & couchée , la vaillante femme s'en va aux Cordeliers pour manger la lamproie & gagner les pardons comme assez auoit de coustume. Tandis qu'elle se festoia leans , nous dirons du marchant qui après souper s'en vint en son hostel , esprins de yre & de maultalent a cause de la lamproie , & pour exécuter ce qu'en son par dedens auoit conclud , il vint saisir ses verges & en sa-main les tint , cherchant & querant par tout de la chandelle , dont il ne sceut oncques recouurer , même en la cheminée faillit a feu trouver. Quant il vit ce , il se coucha sans dire mot , & dormit jusques sur le jour qu'il se leua & s'abilla , & print ses verges & battit la lieutenance de sa femme en telle maniere que a peu qu'il

ne la caruenta en lui ramenteuant la lamproie , & la mist en tel point quelle seignoit de tous costez , mêmes les draps du lit étoient tant sanglans qu'il sembloit que vng bœuf y fut mort ; mais la pource martire n'osoit pas dire vng mot , ne monstrier le visaige. Les verges lui faillirent , & fut lassé , si s'en alla hors de son hostel , & la pource femme qui s'attendoit d'être festoyée de l'amoureux jeu & gracieux passetemps , s'en alla tantost après en sa maison plaindre son mal & son martire , non pas sans menasser & bien mauldire sa voisine. Tandis que le mary étoit allé dehors reuint des Cordeliers sa bonne femme qui trouua sa chambre de verges toute ionchée , son lit dérompeu & froissé , & les draps tout ensanglantez. Si congneut bien tantost que sa voisine auoit eu affaire de son corps comme elle pensoit bien , & sans tarder ne faire arrest refit son lit , & d'autres beaulx draps & frez le repara , & sa chambre nettoya. Après vers sa voisine s'en alla qu'elle treuua en piteux point , & ne fault pas dire qu'elle treuua bien a qui parler. Au plutost quelle fut en son hostel , retournée de tous points , elle se deshabilla , & au bean lit quelle auoit très bien mis a point se coucha & dormit très bien jusqu'a ce que son mary retourna de la ville , comme changié de son courroux pource qu'il s'en étoit vengié , & vint a sa femme qu'il trouua ou lit faisant la dormeueille. Et qu'est cecy , Mademoiselle , dit-il , n'est-il pas temps de leuer ,

amy , dit - elle , est il jour. Par mon serment ie ne vous ay pas ouï leuer , j'estoye entrée en vng songe qui m'a tenuë ainsi longuement. Je croy , dit-il , que vous songez de la lamproie ne faïsiez pas ? ce ne seroit pas trop grant merueille , car ie la vous ay bien ramentuë ce matin. Pardieu , dit-elle , il ne me souuenoit de vous ne de votre lamproie. Comment , dit-il , l'avez vous si tost oublié. Oublié , dit-elle , vng songe ne m'arrete rien. Et c'est ce songe , dit-il , de cette poingniée de verges que j'ay vsee sur vous n'a pas deux heures , sur moi , dit-elle. Voire vraiment , sur vous , dit-il. Je sçay bien qu'il y pert largement aux draps de nostre lit auecques , par ma foy amy , dit-elle , ie ne sçay que vous auez fait ou songié , mais quant a moy il me souuient très bien qu'aujourd'hui au matin vous me feistes de très bon appetit le jeu d'amours & autre chose ne sçay ie , aussi bien pouez vous avoir songié de m'auoir fait aultre chose , comme vous feistes hier de m'auoir baillé la lamproie. Ce seroit vne estrange chose , dit-il , monstres vng peu que je vous uoye , & elle osta & si renuersa la couverture & la toute nue sa monstra sans taiches ne blessure quelconques , vit aussi les draps beaulx & blancs sans aulcune souilleure ne taiche , si fut plus esbahy que on ne vous sçauroit dire , & se print a mussier & largement penser , en ce point longuement se tint , mais toutefois assez bonne piece après il dit. Par mon serment ma mye ie

vous cuydoie a ce matin auoir très fort battuë jusqu'au sang, mais maintenant je vois bien qu'il n'en est rien, si ne sçait qu'il m'est aduenu. Dea, dit-elle, ostez vous hors de cette imagination de batterie, car vous ne me touchastes oncques, vous le pouez bien presentement veoir & apperceuoir, faictes votre compte que vous l'auiez songé comme vous fistes hyer de la lamproie. Je congnois, dit-il, lors que vous dictes vrai, si vous requiers qu'ii me soit pardonné, car ie sçai bien que j'eus hyer tort de vous dire villennie deuant les estrangers que j'amenay ceans, il vous est legièrement pardonné, dit elle, mais toutefois aduisez bien que vous ne soyez plus si legier ne si hatif en vos affaires comme vous auez de coustume, non ferai ie, dit-il, ma mye. Ainsi qu'auiez oüi fut le marchand par sa femme trompé, cuidant auoir songié d'auoir achepté la lamproie & fait le surplus au compte dessus escript & racompté.



XXXIX. NOUVELLE.

*L'UN ET L'AULTRE*

PAYE.

**A**DVINT que vng gentil Cheualier des marches d'Amiens, riche, puissant, vaillant, & très beau Compaignon fut amoureux d'une très belle jeune Dame assez longuement, & aussi fut tant en sa grace, & si priué d'elle que toutefois que bon lui sembloit il se trouuoit en vng lieu de son hostel a part & destourné, où elle lui venoit faire compaignie, & la deuisoient tout a leur beau loisir, & n'étoit ame qui sceut rien de leur très plaisant passetemps, sinon vne Damoiselle que seruoit ceste Dame, laquelle bonne bouche très longuement porta & tant seruoit a gré en tous leurs affaires qu'elle étoit digne d'vng très grant guerdon en recepuoir, elle aussi auoit tant de vertu que non pas seulement sa maitresse auoit gagné par le seruice, comme dit est, & aultrement, mais encores le mary de sa Dame ne l'aymoit pas mains que sa femme, tant la trouuoit loyalle, bonne & diligente. Aduint vng jour que ceste Dame sentant son seruiteur, le Cheualier dessusdit en son chastel deuers lequel elle ne pouoit



aller si tost, qu'elle eut bien voulu, accause de son mary qui l'en destournoit dont elle étoit bien desplaisante, se aduisa de lui mander par la Damoiselle qu'il eut encores vng peu de patience, & que du plustost qu'elle sçauroit se desarmer de son mary quelle viendrait vers lui. Ceste Damoiselle vint deuers le Cheualier qui sa Dame attendoit, & dit sa charge, & lui que gracieulx étoit la mercie beaucoup de ce messaige, & la fit seoir auprez de lui & puis la baïsa deux ou trois fois très doucement, elle l'endura volentiers qui baillast courage au Cheualier de proceder au surplus dont il ne fut pas refusé. Cela fait elle reuint a sa maitresse, & lui dit que son amy n'attend quelle, hélas, dit-elle, ie sçai bien qu'il est vrai, mais Monseigneur ne se veut couchier, ils sont cy ie ne sçai quelz gens que ie ne puis laisser que Dieu les mauldie, j'aimasse mieulx être vers lui il lui ennuyt bien, ne fait pas d'être ainsi seul. Par ma foi croyez que ouï, dit-elle, mais l'esperoir de votre venue le conforte & attend tant plus aise. Je vous-en croi, mais toutefois il est la seul sans chandelle, & sont plus de deux heures qu'il y est, il ne peut être qu'il ne soit beaucoup ennuyé. Si vous prie ma mye que vous retournez vers lui encores une fois pour me excuser. Et lui faictes compaignie vne piece, & entretant se Dieu plaist le diable emportera ces gens qui nous tiennent ici. Je ferai ce qui vous plaira, Madame, dit-elle.

Mais il me semble qu'il est si content de vous qu'il ne vous fault ja excuser , & aussi si ie y allois vous demeureriez icy toute seule de femmes , & pourroit adoncques , Monseigneur , demander après moy , & ne me sçaroit où trouuer , ne vous chaille de cela , dit-elle , j'en feray bien s'il vous demande , il me desplaist que mon amy est seul , allez veoir qu'il fait ie vous en prie. J'y vois puis qu'il vous plaist , dit-elle. S'elle fut bien joyeuse de cette ambassade , il ne le fault ia demander , mais pour couvrir sa voulenté elle en fit la excusence & le reffus , a sa maitresse , & elle fut tantoit vers le Cheualier attendant , qui la receut joyeusement & elle lui dit , Monseigneur , Madame m'enuoie encores icy se excuser deuers vous pource que tant vous fait attendre , & croyez qu'elle en est la plus couroucée , vous lui direz , dit-il , qu'elle face tout a loisir , & qu'elle ne se haste de rien pour moy , car vous tiendrez son lieu. Lors de rechief la baïsa & accola , & ne la souffrit partir tant qu'il eut besongné deux fois qui gueres ne lui cousterent , car alors il étoit frés & jeune homme & fort a cela. Cette Damoiselle print bien en patience sa bonne aduventure , & eut bien voulu auoir souuent vne telle aduventure , sauf le préjudice de sa maitresse. Et quant vint au partir , elle pria au Cheualier que sa maitresse n'en sceut rien. Vous n'avez garde , dit-il. Je vous en requiers , dit elle , & puis s'en vint a sa maitresse qui demanda tantoit que fait

son amy. Il est là , dit-elle , & vous attend. Voire , dit-elle , & est il point mal content ? Nenny , dit-elle , puis qu'il a eu compagnie , il vous sçait très bon gré que vous m'y auez enuoyée & ce cette attente étoit souuent a faire il uouldroit bien m'auoir pour deuiser & a temps , & par ma foy ie y vois volentiers , car c'est le plus plaissant homme de jamais , & Dieu sçait qu'il fait bon ouïr mauldire ces gens qui vous retiennent , excepté Monseigneur , a lui ne voudroit il touchier. Saint Jehan ie voudroie , dit la Dame , que lui & la compagnie fussent en la riuere , & je fusse là dont vous venez. Tant passa le temps , que Monseigneur , Dieu mercy se deshabilla & se coucha , & Madame se mit en cotte simple , & print son atour de nuit , & ses heures en sa main & commença deuotement , Dieu le sçait , a dire ses sept seaulmes & patenostres , mais Monseigneur qui étoit plus esueillé que vng rat auoit grant fain de deuiser , s'il vouloit que Madame laissast ses oraisons jusques a demain , & qu'elle parlast a lui. Ah , Monseigneur , dit elle , pardonnez moy ie ne puis vous entretenir maintenant Dieu va deuant , vous le sçavez ie n'auroye meshuy bien , ne de sepmaine , se ie n'auoye dit le tant peu de service que ie lui sçay feire & encores de mal venir ie neuz pieça autant a dire que i'ay maintenant , ha hay , dit Monseigneur , vous m'affolez bien de cette bigotterie , & est ce a faire a vous de dire tant

d'œuvres que vous faites. Ostez , ostez , laissez les dire aux prestres. Ne dis-je pas bien hau Jehannette , dit-il , a la Dämoiselle dessusdicte. Monseigneur , dit-elle , ie n'en sçay que dire , sinon , puis que Madame a de coustume de seruir Dieu quelle parface. Ha dea , dit Madame , Monseigneur , je vois bien que vous êtes auoyé de plaidier , & j'ay voulenté de dire mes heures , & ainsi nous ne sommes pas bien tous deux d'accort si vous lairray Jehannette que vous entretiendra , & ie m'en iray en ma chambre la derriere pencet a Dieu. Monseigneur fut content. Si s'en alla , Madame , les grands gallots deuers le Cheualier son amy qui la receut Dieu sçait a grant lieffe & a grant reuerence , car l'honneur qu'il lui fit n'étoit pas maindre qu'a genoux ploiez , & enclinez jusqu'a terre : mais vous deuez sçauoir que tandis que Madame acheuoit ses heures avec son amy , Monseigneur son mary , ne sçay dequoy il lui souuint , pria Jehannette qui lui faisoit compaignie , damours a bon escient , & pour abregier tant fit par promesses & beau langage quelle fut contente d'obeir , mais le pis fut , que Madame au retour qu'elle fit de son amy , lequel l'auoit accolée deux fois a bon escient auant son partir trouua Monseigneur son mary , & Jehannette sa chamberiere en tout tel ouuraige quelle venoit de faire , dont elle fut bien esbahye & encores plus Monseigneur & Jehannette que se trouuerent ainsi surprins. Quant Madame vit ce , Dieu sçait comment elle salua la

compagnie , jasoit ce qu'elle eut bien cause de soy taire & si se reprint a la poure Jehannette par si très grant courroux qu'il sembloit bien, quelle eut vng diable ou ventre , tant lui disoit de vilaines parolles , & encores fit elle pis & plus , car elle print vng grant baston & l'en chargea trop bien le dos. Voyant ce , Monseigneur qui en fut mal content & desplaisant , se leua sur piez & batit tant Madame , qu'elle ne se pouoit soudre. Et quant elle vit qu'elle avoit puissance de sa langue , Dieu sçait s'elle la mist en œuvre , mais adreçoit la plus part de ses mots venimeux sur la poure Jehannette qui n'en peut plus souffrir. Si dit a Monseigneur , le gouvernement de Madame , & dont elle venoit a cette heure de dire ses oraisons & avecques qui. Si fut la compagnie bien troublée , Monseigneur tout le premier que se doubtoit assez de Madame qui se treuve affollée & battue , & de sa chamberiere encusée. Le surplus de ce mesnaige bien troublé , demeure en la bouche de ceulx que le sçaiuent si n'en fault ia plus auant enquerir.



## XL. NOUVELLE.

*LA BOUCHIERE,*  
LUTIN DANS LA CHEMINÉE.

**I**L aduint uagueres a l'Isle , que vng grant Clerc & prescheur de l'ordre de Saint Dominique , conuertit par sa sainteté & douce predication la femme d'vng bouchier , par telle & si bonne façon , que elle l'aimoit plus que tout le monde , & n'auoit jamais au cueur bien ne en soy parfaite liesse s'elle n'étoit enprés lui , mais maître moyne en la parfin s'ennuyat d'elle & tant que plus nullement n'en vouloit , & eut très bien voulu quelle se fust desportée de si souuent le visiter dont elle étoit tant mal contente que plus ne pouuoit , mêmes le reboutement qu'il lui faisoit trop plus auant en son amour l'entracinoit. Damp moyne ce voyant , lui deffendit sa chambre , & chargea bien expressement a son Clerc qui ne la souffrit plus. S'elle fut plus que parauant mal contente , ce ne fut pas de merueilles , car elle étoit ainsi que forcenée. Et ce vous me demandez a quel propos Damp moyne cé faisoit , je vous respons que ce n'étoit pas par deuocion ne pour voulente qu'il eut de deuenir chaste , mais la cause

étoit qu'il en auoit racointée vne plus belle & plus jeune beaucoup & plus riche , qui desja estoit tant priuée quelle auoit la clef de sa chambre. Tant fit toutefois que la bouchiere ne venoit pas deuers lui comme elle auoit de coustume si auoit trop meilleur & plus seur loisir sa Dame nouuelle , de venir gagner les pardons en sa chambre & payer la dixme comme les femmes d'hostellerie , dont cy dessus est touchié. Vng jour fut prins , de faire bonne chiere a vng disner en la chambre de maître moyne où sa Dame promet de comparoir , & faire apporter sa porcion tant de vin comme de viande , & pource qu'aucuns de ses freres de leans étoient assez de son mestier , il en inuita deux ou trois tout secrettement , & Dieu sçait la grant chiere qu'on fit a ce disner , qui ne se passa point sans boire d'autant. Or deuez vous sçauoir que notre bouchiere congnoissant assez les gens de ces prescheurs quelle veoit passer deuant sa maison , lequels portoient puis du vin , puis des pastez , & puis des tartes & tant de choses que merueilles , si ne se peult tenir de demander quelle feste on fait a leur hostel , & il lui fut respondu que ces biens sont pour vng tel a sçauoir son moyne qui a gens de bien a disner , & que sont ils , dit-elle , ma foy ie ne sçay , dit l'autre , ie porte mon vin jusqu'a l'huis tant seulement & la vient notre maître qui me descharge , ie ne sçay que y est. Voire , dit-elle , c'est la secrette compaignie. Or bien , allez vous en & les seruez bien. Tan-

## 256 LA BOUCHIERE, LUTIN

tost aprez passa vng aultre seruiteur qu'elle interro-  
 gea pareillement, qui lui dit comme son compai-  
 gnon, & encores plus auant, car il dit je pense  
 qu'il y a vne Damoiselle que ne veult pas être veuë  
 ne congneuë. Elle pensa tantost ce qui étoit, si cui-  
 dat bien enragier tant étoit mal contente, & disoit  
 en soy mêmes, quelle fera le guet sus celle qui lui  
 faisoit tort de son amy, & qui lui a baillé le bont,  
 & s'elle la peult rencontrer ce ne sera pas sans lui  
 dire & chanter sa leçon, & esgratigner le visaige.  
 Si se mist au chemin en intencion de exécuter ce  
 qu'elle auoit conclud. Quant elle fut venuë ou lieu  
 désiré, moult lui tardoit de rencontrer celle qu'elle  
 hayt plus que personne, si n'eust pas tant de con-  
 stance que d'attendre qu'elle saillist de la chambre  
 où elle auoit faite mainte bonne chose, mais s'ad-  
 uisa de prendre vne eschelle que vng couureur de  
 thuilles auoit laissée prez de son ouuraige, tandis  
 qu'il étoit allé dîner, & elle dressa cette eschelle a  
 l'endroit de la cheminée de la cuisine de l'hostel,  
 où elle vouldroit bien être pour saluer la compai-  
 gnie, car bien sçavoit que aultrement ne y pourroit  
 entrer. Cette eschielle mise a point comme elle la  
 voulut avoir, se monta jusques a la cheminée a l'en-  
 tour de laquelle elle lia très bien vne moyenne corde  
 qu'elle trouua d'auenture, & cela fait, très bien  
 comme il lui sembloit, elle se bouta dedens le bu-  
 hot de la cheminée, & se commença a descendre &  
 vng peu aualer; mais le pis fut qu'elle demoura en  
 chemin,



chemin , sans soy pouuoir auoir ne monter ne aual-  
ler , quelque peine qu'elle y mist , & ce a l'occasion  
de son derriere qui étoit beaucoup gros & pesant  
& aussi sa corde se rompiit , pourquoy elle ne se  
pouoit en nulle maniere ne monter ne resoudre a  
mont , si étoit Dieu le sçait en merueilleux desplai-  
sir , & ne sçauoit que faire ne que dire. Si s'aduifa  
qu'elle attendroit le coureur , & quelle se mettra  
en sa mercy , & l'appellera quant il viendra requerre  
son eschielle & sa corde. Elle fut bien trompée , car  
le coureur ne vint jusques a lendemain bien matin ,  
pource qu'il fit trop grande pluye dont elle eut bien  
sa part , car elle fut percée & baignée jusques a la  
peau , quant vint sur le soir bien tart , notre bou-  
chier étant en la cheminée ouït gens deuïser en la  
cuisine si commença a huchier dont ils furent bien  
esbahis & effroyés , & ne sçauoient qui les huchoit  
ne où c'étoit , toutefois quelque esbahissement ne  
paour qu'ils eussent ils escouterent encores vng peu ,  
si ouïrent la voix du parauant , arriere huchier très  
aigrement.

Si cuiderent que ce fut vng esperit , & le vinrent  
incontinent annoncer a leur maître qui étoit en dor-  
toir , lequel ne fut pas si vaillant de venir veoir que  
c'étoit , mais il mit tout a demain. Penſez la belle  
patience que ceste bonne femme auoit , qui fut tout  
au long de la nuit en ceste cheminée & de sa bonne  
aduenture , il ne pleut long temps a si fort ne si  
bien qu'il fit celle nuit , lendemain assez matin no-

## 258 *LA BOUCHIERE, &c.*

tte coureur de thuille reuint a l'heure pour recouurer la perte que la pluye lui auoit faite le jour de deuant. Il fut esbahy de veoir son eschielle ailleurs qu'il ne l'auoit laissée , & la cheminée liée de la corde : Si ne sçauoit qui ce auoit fait ne a quel propos , puis s'aduifa d'aller requerir sa corde , & monta a mont son eschielle , & vint jusques a la cheminée , & destacha sa corde , & comme Dieu voulut , bouta sa tête dedens le buhot de la cheminée , où il vit notre bouchiere plus simple que vng chat baigné dont il fut très esbahy , & que faites vous ici dame , dit-il , voulez vous desfrober les poures Religieux , hélas mon amy , dit-elle , par ma foy nenny , je vous requiers aidez moy a faillir d'icy , & ie vous donnerai ce que me voudrez demander. Dea ie me garderai bien , dit le coureur , si ie ne sçai pourquoi vous y venez ; Je le vous dirai puis qu'il vous plaist , dit-elle , mais ie vous prie qu'il n'en soit nouuelle , lors lui compta tout du long les amours d'elle & du moine , & la cause pourquoi elle venoit la , le coureur oyant ces parolles eut pitié d'elle , si fit tant a quelques peines & quelque meschief que ce fut , moyennant sa corde qu'il la tira dehors , & la mena en bas , & elle lui promist que s'il portoit bonne bouche quelle lui donneroit de sa chair , & de bœuf & de mouton , assez pour fournir son mesnaige pour toute l'année , ce quelle fit & l'autre tint si secret son cas , que chascun en fut aduertty.

XLI. NOUVELLE.

L'AMOUR ET L'HAUBERGON

EN ARMES.

**V**NG gentil Cheualier de Haynault , faige , subtil , & très grant voyagier aprez la mort de sa très bonne , & faige femme pour les biens qu'il auoit veuz & trouuez en mariage ne sçeut passer son temps sans soy lier comme il auoit été parauant. Si espousa vne très belle , jeune & gente Damoiselle , non pas des plus subtilles du monde , car a la verité dire , elle étoit vng peu lourde en la taille , & c'étoit ce en elle qui plaisoit plus a son mary , pource qu'il esperoit par ce point la mieulx duire & tourner en la facon qu'auoit la voudroit. Il mit sa cure & son estude a la faconner , & de fait elle lui obeissoit & complaisoit comme il le disoit, si bien qu'il n'eust sceu mieulx demander : & entre autres choses toutefois qu'il lui vouloit faire l'amoureux jeu , qui n'étoit pas si souuent qu'elle eut bien voulu , il lui faisoit vestir vng très beau haubergon , dont elle étoit bien esbahye , & de prinsault lui demanda bien a quel propos il la faisoit armer , & il lui respondit qu'on ne se doit point trouuer a l'assault amoureux sans armes , elle fust contente de vestir

Y ij

ce haubergon , & n'auoit aultre regret , sinon que Monseigneur n'auoit l'assault plus a cuer , combien que ce lui étoit assez grant peine se aucun plaisir n'en fut ensuiui. Et se vous demandez a quel propos son Seigneur la gouuernoit , ie vous respons que la cause qui a ce faire le mouuoit étoit afin que Madame ne desirat pas tant l'assault amoureux pour la peine & empeschement de ce haubergon ; mais combien qu'il fut saige il s'abusa de trop , car se le haubergon a chascun assault , lui eust cassé & dos & ventre si ne eust elle pas refusé le vestir tant étoit doux & plaissant ce que s'en suivoit ; Ceste maniere de faire dura beaucoup , tant que Monseigneur fut mandé pour seruir son Prince en la guerre , & en aultres assaults qui ne sont pas semblables a celui dessusdit. Si print congié de Madame , & s'en alla où il fut mandé , & elle demoura a l'hostel en la garde & conduite d'vng ancien gentil homme & d'aulcunes Damoiselles qui la seruoient. Or deuez vous sçauoir que en cest hostel auoit vng gentil Compaignon qui très bien chantoit & joüoit de la harpe , & auoit la charge de la despense , & aprez le disner s'esbattoit volentiers de la harpe , a quoi Madame prenoit très grant plaisir , & souuent se rendoit vers lui au son de la harpe , tant y alla , tant s'y trouua que le Clerc la pria d'amours. Elle desirant de vestir son haubergon ne l'escondit pas , aincois lui dit venez vers moy a telle heure & en telle chambre , & ie vous ferai responce telle que vous serez content.

Elle fut beaucoup merciée , & a l'heure assignée nostre Clerc si ne faillit pas de venir heurter a la chambre où Madame lui auoit dit , laquelle l'attendoit de pied coy , le beau haubergon en son dos. Elle ouurit la chambre & le Clerc la vit armée , si cuidat que ce fut aulcun qui fut embusché leans pour lui faire quelque desplaisir , & a cette occasion il fut si très subitement feru & espouuanté que de la grant paour que il en eut , il cheut a la renuerse par telle maniere qu'il descompta ne sçai quans degrez , si très roidement qu'a peu qu'il ne se rompit le col , mais toutefois il n'eut garde tant bien lui aida Dieu & sa bonne querelle. Madame que le vit en ce dangier fut très desplaisante si vint en bas , & lui aida a s'ourdte & lui demanda dont lui venoit ce paour ; & il lui compta & dit vrayment je cuidoye être deceu , vous n'avez garde , dit-elle , je ne suis pas armée pour vous faire mal , & en ce disant monterent arriere les degrés , & entrerent en la chambre. Madame , dit le Clerc , je vous requiers dictes moy s'il vous plaist que vous meut de venir en ce haubergon , & elle comme vng peu faisant la honteuse lui respondiſt , & vous le sçavez bien , par ma foy , sauue votre grace , Madadame , dit-il , se je le sceusse ie ne le demandisse pas , Monseigneur , dit-elle , quant il me veut baisser & parler d'amours , il me fait en ce point habiller , & ie sçai bien que vous venez ici a cette cause , & pour ce ie me suis mise en ce point , Madame , dit-il , vous avez raison.

& aussi vous me faites souuenir que c'est la maniere des Cheualiers d'en ce point faire habiller leurs Dames : mais les Clercs ont toute autre maniere de faire , qui a mon aduis est trop plus belle & plus aisée , & quelle est elle , dit la Dame , monstrez la moi , & ie vous la monstreray , dit-il , lors la fit despoüiller de son haubergon , & du surplus de ses habillemens jusques a la belle chemise , & lui pareillement se deshabilla & despoüilla , & se misdrent dedens le beau lit paré qui l'a étoit , & puis se desarmerent de leurs chemises & passerent temps deux ou trois heures bien plaissamment , & auant le departir le gentil Clerc monstra bien a Madame , la coustume des Clercs , laquelle beaucoup loua & pris trop plus que celle des Cheualiers , assez & souuent depuis se rencontrerent en la façon dessus dicté sans qu'il en fut nouvelle , quoique Madame feust peu subtile. A certain temps aprez Monseigneur retourna de la guerre , dont Madame n'en fut pas trop joyeuse en son pardehors , & vint a l'heure du disner & ce pour ce que on sçauoit sa venuë il fut serui Dieu sçait comment. Ce disner se passa , & quant vint a dire graces , Monseigneur se met a son renc , & Madame prent son quartier. Tantost que graces furent acheuées & dictes , Monseigneur pour faire du mesnagier & du gentil Compaignon , dit a Madame , allez tost en votre chambre & vestez votre haubergon , & elle se recordant du bon temps qu'elle auoit eu avec son

Clerc, respondit tout subit, la coustume des Clercs vault mieulx. La coustume des Clercs, dit il: Et sçavez vous leur coustume. Si commença a soy fumer, & couleur changier, & se doubta de ce que étoit vray, combien qu'il n'en sçeut oncques rien, car il fut tout a coup mis hors de son doubte. Madame ne fust pas si bête qu'elle n'apperceust bien que Monseigneur n'étoit pas content de ce quelle venoit de dire, si s'aduifa de changier le vers, & dit, Monseigneur ie vous ay dit la coustume des Clercs vault mieulx & encores le dis-je, & quelle est elle, dit-il. Ils boient aprez graces, dit-elle. Voire dea, dit-il, saint Jehan vous dictes vray, c'est leur coustume vrayment que n'est pas mauuaïse, & pource que vous la prisez tant nous la tiendrons dorefnauant. Si fist apporter du vin & beurent, & puis Madame allast vestir son haubergon, dont elle se fust bien passée, car le gentil Clerc lui auoit monsté aultre façon de faire, que trop mieulx lui plaisoit. Comme vous auez oïi, fut Monseigneur, par Madame, en sa responce abusé, ainsi fault dire que le sens subit que lui vint en memoire & a cette fois lui descendit de la vertu du Clerc, & depuis lui monstra la façon d'aultres-tours, dont Monseigneur en la parfin en demeura nos anys.

## XLII. NOUVELLE.

## L E M A R I , C U R É.

**L'**AN cinquante , dernier passé le Clerc du vil-  
laige du Diocèse de Noyon , pour impetrer &  
gagner les pardons que furent a Rome que sont  
tels que chascun sçait , se mit a chemin en la com-  
pagnie de plusieurs gens de bien de Noyon , de  
Compiègne , & des lieux voisins , mais auant son  
partement disposa bien & seurement de ses besoi-  
gnes. Premièrement de sa femme & de son mesnai-  
ge , & le fait de sa Cousturiere recommanda a vng  
jeune & gentil Clerc pour la desservir jusques a son  
retour , en assez briefue espace de temps lui & sa  
compagnie vindrent arriuer a Romme , & firent  
chascun leur deuotion & pelerinaige le mains mal  
qu'ils sceurent ; mais vous debuez sçauoir que notre  
Clerc trouua d'auanture a Romme vng de ses Com-  
paignons d'escolle du temps passé qui étoit au ser-  
uice d'vng gros Cardinal , & en grant auctorité , que  
fut tres joyeux de l'auoir trouué pour l'accointance  
qu'il auoit a lui , & lui demanda de son état , &  
l'autre lui compta tout du long , tout premier com-  
ment il étoit helas marié , son nombre d'enfans , &  
comment aussi il étoit Clerc d'vne Paroisse. Ha , dit  
son



son Compaignon , par mon serment il me desplaist bien que vous êtes marié. Pourquoi, dit l'aultre. Je vous diray , dit-il , vng tel Cardinal m'a chargé expressement que ie lui trouue vng seruiteur pour être son Notaire que soit de notre marche , & croyez que ce seroit trop bien votre fait , pour être tost & bien & largement pourueu , ce ne fut votre mariage que vous fera repatrier , & comme j'espere plus grants biens perdre , que vous n'y aurez. Par ma foy , dit le Clerc , mon mariage ny fait rien , mon Compaignon , car a vous dire la verité ie me suis party de notre pays soubz vmbre du pardon qui est a present , mais croyez que ce n'a pas été ma principale intencion , car j'ay conclud d'aller joüer deux ou trois ans par pays , & ce pendant se Dieu vouloit prendre ma femme jamais ie ne feus si heureux , & pourtant ie vous requiers & prie que vous songiez de moy & foyez mon moyen vers ce Cardinal que ie le serue , & par ma foy ie feray tant que vous n'aurez ia reprouche pour moy , & se ainsi le faictes vous me ferez le plus grant seruice que jamais Compaignon fit a aultre. Puis que vous auez cette voulenté , dit son Compaignon , ie vous seruiray a cette heure , & vous logeray pour auoir bon temps se a vous ne tient , & mon amy ie vous mercie , dit l'aultre. Pour abregier , notre Clerc fut logié avec ce Cardinal , laquelle chose il manda a sa femme , & son intencion , que n'est pas de retourner par dela si tost qu'il lui auoit dit au partir , elle se conforta , & lui rescriuit

quelle fera du mieulx qu'elle pourra : ou service de ce Cardinal se conduisit & maintint gentement notre bon Clerc , & fit tant que en peu de temps il gaigna de l'argent avec son maître , lequel n'auoit pas peu de regret qu'il n'étoit habille a tenir benefices : car largement l'en eust pourueu. Pendant le temps que notre dit Clerc étoit ainsi en graces comme dit est le Curé de son villaige alla de vie à trespas , & ainsi vacqua son benefice qui étoit ou mois du Pape , dont le coustre tenant le lieu de son Compaignon étant à Romme se pensa qu'au plustost qu'il pourroit qu'il courroit a Romme , & feroit tant a l'aide de son Compaignon qu'il auroit cette Cure. Il ne dormit pas , car en peu de jours , aprez maintes peines & trauaulx , tant fit qu'il se trouua a Romme , & n'eut oncques bien tant qu'il eut trouué son Compaignon , lequel seruoit vng Cardinal. Aprez grosses recongnoissances d'vng cousté & d'autre , le Clerc demande de sa femme , & l'autre lui cuydant faire vng singlier plaisir , & afin aussi que la besoigne dont il veut le requerir aulcunement en vaille mieulx , lui respondit qu'elle étoit morte , dont il mentoit , car ie tiens qu'a cette heure elle sçauoit bien rencer son mary. Dictes vous donc que ma femme est morte , dit le Clerc , & ie prie a Dieu qu'il lui pardonne ses pechez ; ouy vrayment , dit l'autre , la pestilence de l'année passée avec plusieurs aultres l'emporta. Or faignit il cette bourde qui depuis lui fut cher vendue , pource qu'il sçauoit

que le Clerc n'étoit party de son pays qu'a l'intention de sa femme que étoit trop peu paisible, & plus que plaisantes nouvelles d'elle ne lui pouroit on en apporter que sa mort, & a la verité ainsi en étoit il, mais le rapport fut faulx, & que vous amaine en ce pays, dit le Clerc, après plusieurs & diuerfes parolles. Je le vous diray mon Compaignon & mon amy. Il est vray que le Curé de notre ville est trespasé, si viens vers vous afin que par votre moyen ie puisse parvenir a son benefice, si vous prie tant que plus ne puis que me vueilliez aider a ce besoing. Je sçay bien qu'il est en vous de le me faire auoir a l'aide de Monseigneur votre maître; le Clerc pensant sa femme être morte & la Cure de sa ville vacquer, conclud en soy mêmes que il happera ce benefice pour lui & d'autres encores s'il y peut paruenir. Mais toutefois il ne le dit pas a son Compaignon, aincoys lui dit qu'il ne tiendra pas en lui, qu'il ne soit le Curé de leur ville dont il fut très grandement mercié. Tout autrement en alla, car a lendemain notre saint Pere a la requeste du Cardinal, maître de notre Clerc, lui donna cette Cure, si vint le Clerc a son Compaignon quant il sçeut ces nouvelles & lui dit. Ha mon Compaignon votre fait est rompu dont me desplaist bien, & comment, dit l'autre. La Cure de notre ville est donnée, dit-il, mais ie ne sçay a qui, Monseigneur mon maître vous a cuidé aider, mais il n'a pas été en sa puissance de faire votre fait: qui fut bien mal content, ce fut celui qui étoit

venu de si loing perdre sa peine & despendre son argent , dont ce ne fut pas dommaige. Si print congié piteusement de son Compaignon & s'en retourna en son pays , sans soy vanter de la bourde qu'il a semée. Or retournons a notre Clerc qui étoit plus gay que vne mitraine de la mort de sa femme , & de la Cure de leur ville que notre saint Pere le Pape a la requeste de son maître lui auoit donnée pour recompense , difons comment il deuint Prêtre a Romme , & y chanta sa bien deuote premiere messe , & print congié de son maître pour vne espace de temps , a venir par deça a leur ville prendre la possession de sa Cure. A cette entrée qu'il fit a leur ville , de son bon eut la premiere personne qu'il rencontra ce fut sa femme , dont il fut bien esbahy ie vous assure , & encotes beaucoup plus couroucé. Et qu'est-ce , dit-il , ma mye , on m'auoit dit que vous étiez trespassée , je m'en suis bien gardée , dit-elle , vous le dictes , ce croy ie pource que l'eussiez bien voulu ; & vous l'avez bien montré qui m'avez laissée l'espace de cinq ans , a tout vng grant tas de petits enfans. Ma mye , dit-il , ie suis bien joyeux de vous veoir en bon point , & en louë Dieu de tout mon cuer , mau!dit soit celui qui m'en rapporta autres nouvelles. Ainsi soit-il , dit-elle. Or ie vous diray ma mye ie ne puis arrêter pour maintenant , force est que ie m'en aille hastiuement deuers Monseigneur de Noyon pour vne besongue qui lui touche , mais au plus brief que je pouray ie retourneray. Il se par-

tit de sa femme & prent son chemin deuers Noyon , mais Dieu sçait s'il pensa en chemin a son pource fait. Helas , dit-il , or suis je homme defait & des-honneuré , Prestre , Clerc , & marié tout ensemble , ie croy que ie suis le premier malheureux de cet état. Il vint devers Monseigneur de Noyon , que fut bien esbahy d'oïr son cas & ne le sceut conseiller & l'enuoya a Romme. Quand il fut venu , il compta a son maître tout du long & du lé , la verité de son aduenture qui en fut très amèrement desplaisant. A lendemain il compta a notre saint Pere en la presence du Colliege des Cardinaux , & de tout le Conseil , l'aduenture de son homme qu'il auoit fait Curé , si fut ordonné qu'il demourera Prêtre & marié & Curé aussi , & demoura avec sa femme en la façon que vng homme marié honnourablement & sans reproche demeure , & seront ses enfans légitimes & non baltards iacoit ce que le pere soit Prestre , mais au surplus , s'il est sceu ne trouué qu'il aille aultre part que a sa femme il perdra son Benefice. Ainsi que auez oüy ce pource Clerc fut pugni par la façon que dit est , & par le faulx donner a entendre de son Compaignon & fut content de venir demourer a son benefice , & que plus est & pis demourer avec sa femme , dont il se fut bien passé se l'Eglise ne l'eut ordonné.

## XLIII. NOUVELLE.

LES CORNES  
MARCHANDES.

**N**AGUERES que vng bon homme laboureur & marchand & tenant sa residence en vng bon villaige de la Chastellenie de Lisle, trouua façon & maniere au pourchas de lui & de ses bons amis, d'auoir a femme vne très belle jeune fille, qui n'étoit pas des plus riches, & aussi n'étoit son mary, mais étoit homme de grant diligence, & qui fort tiroit d'acquerir & gagner, & elle d'autre part mettoit peine d'accroistre le mesnaige selon le desir de son mary, qui a cette cause l'auoit beaucoup en grace, lequel a mains de regrets alloit souuent ça & la és affaires de ses marchandises sans auoir doubte ne suspicion qu'elle fist aultre chose que bien : mais le pource homme sus cette fiance l'abandonna & tant la laissa seule que vng gentil Compaignon s'aproucha d'elle, qui pour abregier fist tant a peu de jours qu'il fut son lieutenant, dont gueres ne se doubtoit celuy qui cuidoit auoir du monde la meilleure femme, & qui plus pensoit a l'accroissement de son honneur & de sa cheuance. Ainsi n'étoit pas, car elle abandouna tost l'amour quelle lui debuoit,

& ne lui chailloit du proufit ne du dommaige , ce seulement lui fuffisoit qu'elle se trouua avec son amy , dont il aduint vng jour ce qui s'ensuit. Notre bon marchand dessusdit étant dehors comme il auoit de coustume , sa femme le fist tantost sçauoir a son amy , qui n'eut pas volentiers failli a son mandement , mais y vint tout incontinent , & afin qu'il ne perdit temps , au plustost qu'il sçeut s'aproucha de sa Dame , & lui mist en termes plusieurs & diuers propos , & pour conclusion le désiré plaisir ne lui fut pas escondit , non plus que és aultres dont le nombre n'étoit pas petit : De mal venir & pour vne partie & pour l'autre tout a cette belle heure que ces armes ce faisoient , vecy bon mary d'ariuer que treuua la compaignie en besongnée , dont il fut bien esbahy , car il n'eut pas pensé que sa femme fust telle. Quest cecy , dit-il , par la mort bieu je vous tueray tout roide , & l'autre qui se treuue surprins & en messait present achoppé ne sçauoit sa contenance , mais pource qu'il le sentoit diseteux & fort conuoiteux il lui dit tout subit. Ha Jehan mon amy je vous crie mercy , pardonnez moy se ie ay rien messait , & par ma foy ie vous donnerai six rasières de blé. Par dieu , dit il , ie n'en ferai rien , vous passerez par mes mains & auray la vie de votre corps se ie n'en ay douze rasières , & la bonne femme que ouyoit le debat pour y mettre le bien comme elle y étoit tenuë , s'aduança de parler & dit a son mary & Jehan , beau sire ie vous requiers , laissez le acheuer ce qu'il a commen-

cé & vous en aurez huit rasieres, n'aura pas, dit-elle, en ce virant deuers son amy : J'en suis content, dit-il, mais par ma foy a ce que le blé est chier, c'est trop, est ce trop, dit le vaillant homme, & par la mort bieu ie me repens bien que ie n'y dit plus hault, car vous avez forfait vne amende s'elle venoit a la congnoissance de la justice elle vous seroit bien plus hault taxée, pourtant faictes votre compte que j'en auray douze rasieres, ou vous passerez par là, & vrayment, dit la femme, Jehan vous avez tort de me desdire, il me semble que vous devez être content a ces huit rasieres, & pensez que c'est vng grant tas de blé. Ne m'en parlez plus, dit-il, j'en auray douze rasieres, ou ie le tueray & vous aussi. Ha dea, dit le Compaignon, vous êtes vng fort marchant, & au mains puis qu'il fault que vous ayez tout a votre dit j'auray terme pour payer, cela veux je bien, dit-il, mais j'auray mes douze rasieres. La noife s'appaisa si fut prins jour de payer a deux termes les huit rasieres a lendemain, & le surplus a la saint Remy prochainement venant, par telle conuenance qu'il leur lascia acheuer ce qu'ils auoient commencé. Ainsi se partit ce vaillant homme de sa maison joyeux en son couraige pour douze rasieres de blé qu'il doit auoir, & sa femme & son amy recommencerent de plus belle. Du payer c'est a l'adventure combien toutefois qu'il me fut dit depuis que le blé fut payé au jour & terme dessusdit.



XLIV. NOUVELLE.

*LE CURE' COURSIER.*

**C**OMME il soit certain que il est largement aujourd'huy de Prestres & Curéz, qui sont si gentilz Compaignons, que nulles des folies que font les gens laiz ne leurs sont pas impossiblement difficiles, auoit nagueres en vng bon villaige de Picardie, vng maître Curé qui faisoit raige de aimer par amours & entre les aultres femmes & belles filles, il choisit & chercha vne très belle, jeune & gente fille a marier, & ne fut pas si peu hardy qu'il ne lui compta tout du long son cas. De fait son bel & assuré langaige & cent mille promesses & autant de bourdes l'amenerent a ce qu'elle étoit comme contente d'obeir a ce Curé, qui n'eut pas été pour lui vng petit dommaige tant étoit belle, gente & de plaisante maniere & n'avoit en icelle que vne faulte, c'étoit qu'elle n'étoit pas des plus subtiles du monde. Toutefois ie ne sçay dont lui vient cet aduis ne maniere respondre, elle dit vng jour a son Curé que chauldement poursuiuoit la besongne qu'elle n'étoit pas conseillée de faire ce qu'il requeroit tant quelle fut mariée, car se d'adventure, comme il aduient chascun jour, elle faisoit vng enfant elle seroit a

toujours deshonnourée & reprouchée de son pere , de sa mere , de ses freres , & de tout son lynaige , laquelle chose elle ne pouroit pour rien souffrir & n'a pas cueur de soustenir le desplaisir que porter lui faudroit a cette occasion & pourtant de ce propos se je suis quelque jour mariée parlez a moi ie feray ce que ie pourai pour vous & non autrement , je le vous dis vne fois pour toutes. Monseigneur le Curé ne fut pas trop joyeux de cette response absoluë , & ne sçait que penser quel couraige , ne a quel propos elle dit ces parolles toutefois , lui qui étoit prins ou las d'amour & feru bien a bon escient , ne veut pourtant sa queste abandonner , si dit a sa Dame. Or ça ma mye êtes vous en ce fermée & concludë de riens faire pour moy si vous n'êtes mariée. Certes oüy , dit-elle. Et se vous étiez mariée , dit-il , & i'en étoie le moyen & la cause en auriez vous aprez congnoissance en maintenant loyaulment & sans faulser ce qu'avez promis. Par ma foy , dit-elle , oüy , & de rechief se vous prometz. Or bien grant mercy , dit-il , faictes bonne chiere , car ie vous prometz seurement qu'il ne demourera pas a mon pourchas ne a ma cheuance que vous ne le foyez & de brief , car ie suis seur que vous ne le desirez pas comme ie fais , & afin que vous voyez a l'œil que ie suis celui qui voudroye employer corps & biens a votre seruice , vous verrez comment ie me conduiray en cette besoigne , or bien , dit-elle , Monseigneur le Curé on verra comment vous ferez. Sur ce fit la de-

partie , & bon Curé qui auoit le feu d'amours ne fut depuis gueres aise tant qu'ils eut trouué le pere de sa Dame , & se mit en langaige avec lui de plusieurs & diuerſes matieres. Et en la fin il vint a parler de sa fille & lui va dire bon Curé, mon voisin ie me donne grant merueilles aussi font plusieurs de vos voisins & amis que vous ne mariez votre fille , & a quel propos la tenez vous tant denprés vous , & si sçauiez toutefois que la garde est perilleuse. Non pas Dieu m'en vueille garder que ie die ou vueille dire qu'elle ne soit toute bonne : mais vous en voyez tous les jours mesuenir , puis qu'on les tient outre le terme deu , pardonnez moy routefois que si seablement vous œuure & decouure mon couraige ; car l'amour que ie vous porte , la foy aussi que ie vous dois entant que suis votre pasteur indigne , me semonnent & obligent de ce faire. Pardieu Monſieur le Curé , dit le bon homme , vous ne me dictez chose que ie ne congnoiſſe être vraye , & tant que ie puis vous en mercie , & ne pensez pas , ce que ie la tiens si longuement avec moy c'est a regret , car quant son bien viendra ie me trauailleray pour elle aider comme ie dois , vous ne voulez pas aussi , ce n'est pas la couſtume que ie lui pourchasse vng mary , mais s'il en vint vng que soit homme de bien ie feray comme vng bon pere doit faire.

Vous dictez très bien , dit le Curé , & par ma foy vous ne pouuez mieulx que de vous despeschier , car c'est grant chose de veoir les enfans alliez en la

plaine vie , & que diriez vous d'vng tel , filz d'vng tel votre voisin , par ma foy il me semble bon homme bon mesnagier vng grant laboureur. Saint Jean , dit le bon homme , ie n'en dis que tout bien , quant a moy ie le congnois pour vng bon jeune homme , vng bon laboureur ; son pere & sa mere & tous ses parens sont gens de bien & quant ils feroient ceste honneur a ma fille de la requerir en mariaige pour lui , ie leurs respondroye tellement que ils deuroient être contens pour raison ; Ainsi maist Dieu , dist le Curé , on ne peut jamais mieulx , & plust a Dieu que la chose en fut ores bien faicte que ie le desire & pour ce que ie le sçay a la verité que ceste alliance seroit le bien des parties , ie m'y vueille employer & sur ce adieu vous dis. Se ce maître Curé auoit bien fait son personnage au pere de sa Dame il ne le fist pas mains mal au pere du jeune homme , & lui va faire vne grant premise , que son filz étoit en aage de marier , & qu'il le deut pieca être , & cent mille raisons lui amaine par lesquelles il dit & veult conclure que le monde est perdu se son filz n'est hastiuement marié. Monseigneur le Curé , dit le second bon homme ie sçay que vous dictes au plus prés de mon couraige , & en ma conscience se ie fusse aussi bien a l'aduent comme j'ay été puis , ne sçay quans ans il ne feust pas a marier , car c'est vne des choses en ce monde que plus ie desire , mais par faulte d'argent l'en a retardé , & c'est for-

ce qu'il ait patience jusques a ce que notre Seigneur nous enuoye plus de bien que encore n'avons. Ha dea , dit le Curé , ie vous entens bien , il ne vous fault que de l'argent ; par ma foy non , dit-il , se j'en eusse comme autrefois j'ay eu ie lui querroye tantost femme. J'ay regardé en moy , dit le Curé , pour ce que ie voudroye le bien & aduancement de votre filz que la fille d'vng tel seroit bien sa charge , elle est bonne fille , & a son pere très bien de quoy , & tant en sçay ie qu'il la veult très bien aider , & qui n'est pas peu de chose , c'est vng saige homme & de bon conseil & bon amy , & a qui vous & votre filz aurés grant recours & très bon secours. Certainement , dit le bon homme , pleust a Dieu que mon filz feust si heureux que de auoir aliance a si bon hostel , & croyez que se ie sentoye en aulcune façon qu'il y peust paruenir , & ie feusseourny d'argent aussi bien que ie ne suis mie pour l'heure ie y emploïroye tous mes amys , car ie sçay tout de vray qu'il ne pouroit en ceste marche miculx trouuer. Je n'ay pas donc , dit le Curé , mal choisi. Et que diriez vous se ie parloye au pere de ceste besongne , & ie la conduisoye tellement quelle sortit a effet ainsi que la chose le requert & vous faisoie encores avec ce , le plaisir de vous presenter vingt francs jusques a vng terme que nous aduiferons , par ma foy , Monseigneur le Curé , vous me offrez miculx que ie ne vaulx ne que

en moy n'ay deferui. Mais se ainsi le faictes , vous me obligerés a tousjours , mais en votre seruice. Et vrayment , dit le le Curé , ie ne vous ay dit chose que ie ne face & faictes bonne chere , car j'espere comme ie croy bien ceste besongne mener a fin. Pour abregier , maître Curé esperant de jouir de sa Dame quant elle seroit mariée , conduisoit les besongnes en tel état que par le moyen des vingt francs qu'il prestat , ce mariage fut fait & passé , & vint le jour des nopces. Or est il de coustume que l'espousé & l'espousée se confessent a tel jour. Si vint l'espousé premier , & se confessa a ce Curé , & quant il eust fait , il se tira vng peu arriere de lui disant ses oraisons & patenostres. Et vecy l'espousée que se met a genoux deuant le Curé & se confesse , quant elle eut tout dit , il parla voire si hault que l'espousé lequel n'étoit pas loing , l'entendit tout du long & dit. Ma mye ie vous prie qu'il vous souuienne maintenant de la promesse que me fistes nagueres , car il est heure , vous me promistes que quant vous seriez mariée que ie vous cheuaucheroye ; or l'êtes vous , Dieu mercy , par mon moyen & pourchas , & moyennant mon argent que j'ay presté. Monseigneur le Curé , dit - elle , ie vous tiendray ce que ie vous ay promis se Dieu plaist n'en faites nul doubte , ie vous en mercie , dit le Curé , puis lui bailla l'absolution apres cette deuote confession & la laissa aller ,

mais l'espousé que auoit ouï ces parolles n'étoit pas bien a son aise , touteſois il n'étoit pas heure de faire le couroucé. Aprez que toute les ſolem-nitez de l'Egliſe furent paſſées , & que tout fut retourné a l'hoſtel , & que l'heure du coucher approuchoit , l'espousé vint a vng ſien Compaignon qu'il auoit & lui pria très bien qu'il fiſt garniſon d'une groſſe poignée de verges , & qui la miſt ſe-crettement ſous le cheuet de ſon lit. Quant il fut heure , l'espouſée fut couchée comme il eſt de couſtume , & tint le coing du lit ſans mot dire , l'espousé vint aſſez toſt apreſ , & ſe met a l'aul-tre bout du lit ſans approucher ne mot dire , & le lendemain ſe lieue ſans aultre choſe faire , & cache ſes verges deſſous ſon lit. Quant il fut hors de la chambre , vecy bonnes matrones que vien-nent , & ne fut pas ſans demander comment c'eſt portée la nuit , & qu'il lui ſemble de ſon mary , ma foy , dit-elle , vela ſa place la loing , monſ-trant le bord du lit , & vecy la mienne il ne me approucha ennuit de plus prez. Furent eſbahyes , & y penſerent plus les vnes que les aultres , tou-teſois elles s'accorderent a ce qu'il la laiſſée par deuocion , & n'en fut plus parlé pour cette fois. La ſeconde nuitée vint & ſe coucha , l'espouſée en ſa place du jour deuant & le mary arriere fourny de ſes verges & ne lui fiſt aultre choſe , dont elle n'étoit pas contente , & ne faillit pas a lendemain a le dire a ces matrones , leſquelles ne

ſçauoient que penſer ; les aultres dient j'eſpoire qu'il n'eſt pas homme il le fault eſprouuer. Car ſi juſqu'a la quatrieſme nuit , il a continué ceſte maniere , ſi fault dire qu'il y a a dire en ſon fait, pourtant ſe la nuit que vient il ne vous fait aultre choſe , dirent-elles a l'eſpouſée , tirez vous vers lui. Si l'accolés & baiſez , & lui demandez ſe on ne fait aultre choſe en mariage , & ſi vous demande quelle choſe vous voulez qu'il vous face , dictes lui que vous voulez qu'il vous cheuauche , & vous orrez qu'il vous dira. Je le ferai , dit-elle , elle ne faillit pas , car quant elle fut couchée en ſa place de tousjours , le mary reprit ſon quartier & ne ſ'auançoit aultrement qu'il auoit fait les nuits paſſées ſi ſe tournait toſt deuers lui & le print a bons bras de corps & lui commença a dire , venez ça mon mary eſt ce là la bonne chiere que vous me faites , vecy la cinquieme nuit que je ſuis avecques vous , & ſi ne m'avez daigné approucher , & par ma foy ſi j'euffe cuidé qu'on ne fiſt aultre choſe en mariage ie ne m'y feuffe ja boutée , & quelle choſe , dit-il , lors vous a len dit qu'on fait en mariage , on m'a dit , dit-elle , qu'on y cheuauche l'vng l'aultre ; ſi vous prie que me cheuauchez ; Cheuaucher , dit-il , cela ne vouldroye pas faire encores , ie ne ſuis pas ſi mauſgracieux , hélas , dit-elle , ſi vous prie que le faiſiez , car on le fait en mariage. Le voulez vous , dit-il , ie vous en requiers , dit-elle ,

&



& en disant le baïsa très doucement. Par ma foy , dit-il , ie le fais a grant regret , mais puis que vous le voulez , vous ne vous en louerez ja. Lors prins sans plus dire les verges de garnison , & decouure Mademoiselle & l'en battit & dos & ventre , tant que le sang en saillit de tous costez , elle crie , elle pleure , elle se demaine , c'est grant pitié que de la voir , elle maudit que oncques lui fist requere d'être cheuauchée. Je le vous disoye bien , dit lors son mary. Apres , la prent entre ses bras , & la roncine très bien & lui fit oublier la douleur des verges. Et comment appelle on , dit-elle , a cela que vous m'auez maintenant fait , on l'appelle , dit-il , souffler en cul ; souffler en cul , dit-elle , le nom n'est pas si beau que cheuaucher mais la maniere de le faire vault trop mieulx que cheuaucher , c'est assez puis que ie le sçay ie sçauray bien dorefnauant duquel ie vous dois requerer , or devez vous sçavoir que Monseigneur le Curé tendoit tousjours l'oreille quant sa nouvelle mariée viendroit a l'Eglise pour lui ramenteuoir ses besongnes , & lui faire souuenir sa promesse. Le jour quelle y vint , Monseigneur le Curé se promenoit & se tenoit prest du benoystier , & quant elle fut prés , il lui bailla de l'eau benoyste , & lui dit assez bas , ma mye , vous m'auez promis que je vous cheuaucheroye quant vous seriez mariée , & vous l'êtes Dieu mercy voire & par mon moyen , si seroit heure de penser quant

se pouroit être , cheuaucher , dit - elle , pardieu j'aimeroye plus chier que vous fussiez noyé , voire pendu , ne me parlez plus de cheuauchier ie vous prie , mais ie suis contente que vous soufflez au cul si vous voulez. Et je feray , dit le Curé , votre siebvre quartaine paillarde que vous êtes qui tant êtes infame & malhonneste , ay ie tant fait pour vous pour être guerdonné de vous souffler au cul. Ainsi mal content , partit Monseigneur le Curé de la nouuelle mariée , laquelle se va mettre en son siege pour oüir la deuotte messe que le bon Curé vouloit dire en la façon qu'auetz dessus oüi. Perdit Monseigneur le Curé son aduenture de jouïr de sa Dame , dont il fut cause & nul aultre pour ce qu'il parloit trop hault a elle le jour qu'il la confessa : car son mary qui ce ouyoit le empescha en la facon qu'est dit dessus par faire accroire-a sa femme que ronciner s'appelle souffler en cul.



## XLV. NOUVELLE.

L'ESCOSSOIS,  
LAVANDIERE.

**C**OMBIEN que nulle des nouvelles histoires precedentes n'ayent touché ou raconté aucun cas aduenü és marches d'Italie , mais seulement font mention des aduenües en France , Allemaigne , Angleterre , Flandres , Breban , &c. si se entendront elle toutefois accause de la fresche aduenüe a vng cas a Romme aduenü qui fut tel. A Romme auoit vng Escossois , de l'aage d'enuiron de vingt a vingt-deux ans ; lequel par l'espace de quatorze ans se maintint & conduisit en état & habillement de femme sans ce que au dedens ledit tems il fut venu a la congnoissance des hommes , & se faisoit appeller Done Marguerite , & n'y auoit gueres bon hoïtel a la ville de Romme , où il n'eut son recours & congnoissance : especiallement il étoit bien venu des femmes comme entre les chamberieres , meschines & autres femmes de bas état , & aussi des aulcunes des plus grandes de Romme , & afin de vous descouurir l'industrie de ce bon Escossois , il trouua façon d'apprendre a

A a ij

blanchir les draps , linges , & s'appelloit la loundiere , & sous cette vmbre hantoit comme dessus est dit , és bonnes maisons de Romme , car il n'y auoit femme que sceut l'art de blanchir draps comme il faisoit , mais vous debuez sçauoir que encores sçauoit-il bien plus , car puis qu'il se trouuoit quelque part a descouuert avec quelque belle fille , il lui monstroit qu'il étoit homme , il demouroit bien souuent a coucher accause de faire la buyée vng jour , deux jours és maisons dessusdites , & le faisoit ou coucher avec la chamberiere , & aulcunes fois avec la fille & bien souuent & le plus la maitresse de son mary n'y étoit vouloit bien auoir sa compaignie , & Dieu sçait s'il auoit bien le temps , & moyennant le labour de son corps il étoit bien venu par tout , & n'y auoit bien souuent meschine ne chamberiere que ne se combattit pour lui bailler la moitié de son lit. Les bourgeois mêmes de Romme a la relation de leurs femmes le veoient très volontiers en leurs maisons & s'ils alloient quelque part dehors , très bien leur plaisoit que Done Marguerite aida a garder le mesnaige avec leurs femmes & que plus est la faisoient même coucher avecques elles , tant la sentoient bonne & honneste comme dessus est dit. Par l'espace de huit ans , continua Done Marguerite sa maniere de faire. Mais fortune bailla la congnoissance de l'ambusche de son état , par vne jeune fille que dit a son pere quelle avoit couchée avecques elle & l'auoit assaillie , & lui dit

veritablement qu'elle étoit homme. Ce pere fit prendre Done Marguerite a la relacion de sa fille elle fut regardée par ceulx de la justice , que trouverent qu'elle auoit tous telz membres & outilz que les hommes portent , & que vrayment elle étoit homme & non pas femme. Si ordonnerent qu'on le mettroit sur vng chariot & que on le meneroit par la ville de Romme , de carefour en carefour & la montreroit on voyant tout chascun ses genitoires , ainsi en fut fait , & Dieu sçait que la pource Done Marguerite étoit honteuse & surprinse , mais vous devez sçauoir que comme le chariot vint en vng carefour & qu'on faisoit ostencion des derrées de Done Marguerite , vng Romain que vint dit tout haut, regardez quel galioffe, il a couché plus de vingt nuyts avec ma femme , si le dirent aussi plusieurs aultres comme lui , plusieurs ne le dirent point que bien le sçauoient ; mais pour leur honneur ils s'en teurent en la façon que vous oyez , ainsi fut pugny notre pource Escossois qui la femme contrefit , aprez cette pugnition , fut banny de Romme dont les femmes furent bien desplaisantes : car oncques si bonne lauandiere ne fut & auoient bien grant duel que si meschamment perdu l'auoient.

*Fin du premier Tome.*

---

# T A B L E

## Des cent Nouvelles Nouvelles du premier Tome.

### *La Medaille a revers.*

I. **N**OUVELLE traite d'vng qui trouua façon de jouir de la femme de son voisin. Lequel il auoit enuoyé dehors pour plus aisement en jouir , & lui retourné de son voyage la trouua qui se baignoit avec sa femme , & non sçachant que ce fut elle le voulut veoir & permis lui fut seulement d'en veoir le derriere & alors jugea que a ce lui sembla sa femme , mais croire ne l'osa & sur ce partit & vint trouuer sa femme a son hostel que on auoit bourée dehors par une poterne de derriere & lui compta l'imagination qu'il auoit eue sur elle dont il se repentoit

Page 1

### *Le Cordelier Medecin.*

2. Nouvelle traite d'une jeune fille qui auoit le mal des broches , laquelle creua a vng Cordelier qui la vouloit mediciner vng seul bon œil qu'il auoit & aussi du procès qui s'ensuit puis après. 10

# T A B L E.

## *La pêche de l'Anneau.*

3. Nouvelle racontée par Monseigneur de la Roche, de la tromperie que fit vng Cheualier a la femme de son Meunier a laquelle il bailloit a entendre que son c. . . lui cherroit s'il n'étoit reconnu & ainsi plusieurs fois si lui recongna & le Meunier de ce auerti pêcha puis après dedens le corps de la femme dudit Cheualier, vng diamant qu'elle auoit perdu en foy baignant, & pêcha si bien & si auant, qui lui trouua comme bien sceut depuis ledit Cheualier, lequel appella le Meunier pêcheur de diamans, & le Meunier lui repondit en l'appellant recongneur de c. . .

17

## *Le Cocu armé.*

4. Nouvelle d'vng Archier Escossois qui fut amoureux d'une belle & gente Damoiselle, femme d'vng eschopier, laquelle par le commandement de son mary assigna jour audit Escossois & de fait garni de sa grande épée, il comparut & besongna tant que il voulut present eschopier que de grand paour se étoit caché en la ruelle de son lit, & tout pouuoit veoir & ouir plainement, & la complainte que fit après la femme a son mary.

27

## *Le Duel d'Aiguillette.*

5. Nouvelle racontée par Phelippe de Laon de

# T A B L E.

deux jugemens de Monseigneur Talebot, c'est a sçavoir d'vng François qui fut prins pour vng Anglois sous son saufconduit disant que esguillettes étoient habillement de guerre, & ainsi le fit armer de ses esguillettes sans aultre chose encontre le François, lequel d'une épée le frappoit present Thallebot, & l'autre qui l'Eglise auoit derobée auquel il fit jurer de ne jamais plus en l'Eglise entrer. 32

## *L'Yvrogne au Paradis.*

6. Nouvelle racontée par Monseigneur de Lamoignon d'vng Yvrogne qui par force au Prieur des Augustins de la Haye en Holande, se voulut confesser & après la confession, disant qu'il étoit en bon état vouloit mourir & cuidoit auoir la tête tranchée, & être mort & par ses compagnons fut emporté. Lesquels disoient qu'ils le portoient en terre. 38

## *Le Charreton à l'arrieregarde.*

7. Nouvelle d'vng Orpheure de Paris que fit coucher vng Charreton lequel lui auoit amené du charbon avec lui & sa femme & comment ledit Charreton par derriere s'esioüoit avec elle dont l'Orpheure s'apperceut, & trouua ce qu'il étoit, & des paroles que dit au Charreton. 43

## *Grace pour Grace.*

8. Nouvelle d'vng Compagnon Picard demourant



## T A B L E.

rant a Bruxelles lequel engrossa la fille de son maître & a cette cause print congé de haute heure & vint en Picardie soy marier & tost après son partement la mere de la fille s'apperçut de l'enceulleuse de ladite fille laquelle a quelque meschief que ce fut confessa a sa mere le cas & tel que étoit & la mere la renvoia deuers ledit Compaignon pour lui defaire ce qui lui avoit fait a sa fille. Et du refus que la nouvelle mariée fit audit Compaignon & du conte qu'elle lui conta, a l'occasion duquel de elle se departit incontinent & retourna a sa premiere amoureuse laquelle il épousa.

46

### *Le Mari maquereau de sa Femme.*

9. Nouvelle racontée par Monseigneur, parle d'vng Cheualier de Bourgogne lequel étoit tant amoureux d'une des chamberieres de sa femme que c'étoit merveille & cuidant coucher avec laditte chamberiere coucha avec sa femme laquelle étoit couchée au lit de laditte chambre & aussi comment il fit un autre Chevalier son voisin par ordonnance coucher avec laditte femme cuidant véritablement que ce fût la chamberiere, de laquelle chose il fut depuis bien mal content, iacoit que la Dame n'en sceut oncques rien & ne cuidoit avoir eu que son mary comme je croi. 51

### *Les Pastés d'Anguilles.*

10. Nouvelle parle d'vng Chevalier d'Angleterre, lequel depuis qu'il fut marié voulut que son mignon comme par auant son mariage faisoit, de belles fil-

*Tome I.*

B b

## T A B L E.

les lui fit finance. Laquelle chose il ne voulut faire ; car il se pensoit que lui suffisoit bien d'auoir une femme , mais ledit Cheualier a son premier train le ramena par le faire toujours seruir des pastés d'Anguilles au dîner & au souper. 56

### *L'Encens au Diable.*

11. Nouuelle par Monseigneur , d'un paillard jaloux qui après plusieurs offrandes faites a plusieurs saints pour le remede de la jalousie lequel offrit vne chandelle au diable que on peint ordinairement dessous Saint Michel & du songe qu'il songea , & de ce qu'il lui aduint au reueillé comme uous pourrez ouïr cy-après. 62

### *Le Veau.*

12. Nouuelle par Monseigneur de la Roche , parle d'vng Hollandois qui nuit & jour a toute heure ne cessoit de assaillir sa femme au jeu d'amours & comment d'auanture il la rua par terre en passant par un bois sous vng grand arbre sur lequel étoit vng laboureur qui avoit perdu son veau que il cherchoit auquel il disoit que il lui sembloit en veoir la queue. 64

### *Le Clerc Châtré.*

13. Nouuelle par Monseigneur Lamant de Bruxelles , comment le Clerc d'vng Procureur d'Angleterre deceut son maître pour lui faire accroire qu'il n'auoit nuls c. . . . . & a cette cause il eut le gouvernement de sa maitresse aux champs & a la

# T A B L E.

ville & se donnerent bon temps.

68

## *Le faiseur de Papes, ou l'homme de Dieu.*

14. Nouvelle par Monseigneur de Crequoy de l'hermite qui deceut la fille d'une pauvre femme & lui faisoit accroire que sa fille auroit vng fils de lui qui seroit Pape, & adonc quand vint a l'enfanter ce fut vne fille, & ainsi fut l'embuche du faux hermite descouverte qui a cette cause s'enfuit du pays.

74

## *Nonnain sçavante.*

15. Nouvelle par Monseigneur de la Roche d'une Nonnain qu'un Moine cuidoit tromper, lequel en sa compaignie amena son Compaignon qui devoit bailler a rasser a elle son instrument comme le mary le portoit, & comme le Moine mit son Compaignon en son lieu, & de la responce qu'elle fit.

82

## *Le Borgne Aveugle.*

16. Nouvelle par Monseigneur le Duc, d'un Chevalier de Picardie lequel en Prusse s'en alla tandis Madame sa femme d'un autre sacointa, & a l'heure que son mary retourna elle étoit couchée avec son amy, lequel par vne gracieuse subtilité, elle le bouta hors de sa chambre sans que son mary le Chevalier s'en donna garde

86

## *Le Conseiller au Bluteau.*

17. Nouvelle par Monseigneur le Duc, d'un

B b ij

## T A B L E.

**Président de Parlement qui douint amoureux de sa  
chamberiere laquelle a force en bluttant la farine  
euida violer. Mais par beau parler de lui se desarma  
& lui fit assubler le bluteau dequoy elle tamisoit ,  
puis alla querir sa-maitresse qui en cet état son mary  
trouua comme cy-après vous oyrez cy-dessous. 92**

### *La pensee du Ventre & du Dos.*

**18. Nouvelle racontée par Monseigneur de la  
Roche, d'vng gentilhomme de Bourgogne, lequel  
trouua façon moyennant dix escus qu'il fit bailler  
a la chamberiere de coucher avec elle, mais avant  
qu'il voulsist partir de sa chambre, il eut ses dix escus  
& se fit porter sur les espaules de ladicte chamberiere  
par la chambre de l'hoste, & en passant par ladicte  
chambre il fit un sonnet tout de fait aussi qui leur  
fut excusé comme vous pourrez oïr en la nouvelle  
cy-dessous. 97**

### *L'Enfant de Neige.*

**19. Nouvelle par Phelippe Vigner d'vng mar-  
chand d'Angletene duquel la femme en son absence  
fit vng enfant, & disoit qu'il étoit sien, & com-  
ment il s'en dépêcha gracieusement comme elle lui  
auoit baillé a connoître que il étoit venu de neige,  
aussi pareillement au soleil comme la neige s'étoit  
fondu. 103**

### *Le Mary Médecin.*

**20. Nouvelle racontée par Phelippe de Laon,**

# T A B L E.

d'vng lourdeau Champenois, lequel quand il se maria n'auoit encore jamais monté sur bête chrétienne dont sa femme se tenit bien de rire & de l'expedient que la mere d'elle y trouua, & soudain pleur dudit lourdeau a vne fête & assemblée qui se fit depuis après qu'on lui eut montré l'amoureux métier comme vous pourrez ouïr plus a plain cy-après. 108

## *L'Abbesse guérie.*

21. Nouuelle racontée par Phelippe de Laon, d'vne Abbesse qui fut malade par faute de faire cela que vous sçavez, ce que elle ne vouloit faire doutant de ses Nonnains être reprochée & toutes lui accorderent de faire comme elle & ainsi s'en firent donner toutes largement. 116

## *L'Enfant à deux Peres.*

22. Nouuelle racontée d'vng gentilhomme qui engrossa vne jeune fille & puis en vne armée s'en alla, & auant son retour elle d'vng autre saccointa auquel son enfant elle donna & le Gentilhomme de la guerre retourné son enfant demanda, & elle lui pria qu'a son nouuel amy le lascia promettant que le premier quelle feroit, sans faute lui donneroit comme cy-dessous vous sera recordé. 122

## *La Procurense passe la Raye.*

23. Nouuelle par Monseigneur de Commesuram, d'vng Clerc de qui sa maitresse fut amoureuse la.

B iij

## T A B L E.

quelle a bon écia si accorda pourtant qu'elle auoit passé la raye que ledit Clerc lui auoit faite, la voyant son petit fils dit a son pere quand il fut venu qu'il ne passast point la raye , car s'il la passoit le Clerc feroit comme il auoit fait a sa mere. 127

### *La Bote a demi.*

24. Nouuelle dite & racontée par Monseigneur de Fienne , d'vng conte qu'une très-belle jeune fille l'une de ses sujettes cuida recevoir par force & comment elle s'en échappa par le moyen de ses houxseaux, mais depuis l'en pris très-fort , & l'aida a marier comme vous sera cy-après déclaré. 130

### *Forcée de gré.*

25. Nouuelle racontée & dite par Monseigneur de saint Yon , de celle qui de force se plaignit d'vng Compaignon, lequel elle avoit même adressé a trouver ce que queroit & du jugement qu'il en fut fait. 136

### *La Damoiselle Cavaliere.*

26. Nouuelle racontée & mise en terme par Monseigneur de Loqueffoles , des amours d'vng gentilhomme & d'une Damoiselle laquelle éprouva la loyauté du gentilhomme par une merueilleuse & gente façon & coucha trois nuits avec lui sans aucunement sçavoir que ce fut elle , mais pour homme la tenoit ainsi comme plus a plain pourcez oïr cy-après. 139

# T A B L E.

## *Le Seigneur au Bahu.*

27. Nouuelle racontée par Monseigneur de Beauvoir des amours, d'vng grand seigneur de ce Royaume, & d'vne gente Damoiselle mariée, laquelle afin de bailler lieu a son seruiteur fit son mary bouter en vng Bahu par le moyen de ses chamberieres & leans le fit tenir toute la nuit tandis que avec son seruiteur passoit le temps, & des gageures qui furent faites entre elle & sondit mary, comme il vous sera recordé cy-après. 160

## *Le Gelant morfondu.*

28. Nouuelle dite & racontée par Messire Michault de Changy, de la journée assignée a vng grand Prince de ce Royaume par vne Damoiselle seruante de chambre de la Roynne & du petit exploit d'armes que fit ledit Prince, & des saintises que ladite Damoiselle disoit a la Roynne de sa leuriers, laquelle étoit tout a propos enfermée dehors de la chambre de la Roynne comme oyrez cy-après. 169

## *La Vache & le Veau.*

29. Nouuelle racontée par Monseigneur d'vng gentilhomme qui dès la premiere nuit qu'il se maria & après qu'il eut heurté vng coup a sa femme, elle lui rendit vng enfant & de la maniere qu'il en tint & des Paroles qu'il en dit a ses Compaignons qui lui rapportoient du chaudau, comme vous oyrez cy-après. 175

# T A B L E.

## *Les trois Cordeliers.*

30. Nouvelle racontée par Monseigneur de Beauvois françois, de trois marchands de Sauoye allans en pellerinage a saint Antoine en Viennois, qui furent trompés & deceus par trois Cordeliers, lesquels coucherent avec leurs femmes combien qu'elles cuidoient être avec leurs maris & comment par le rapport qu'elles firent les maris le sceurent, & de la maniere qu'ils en tinrent comme vous oyrez cy-après.

179

## *La Dame à deux.*

31. Nouvelle mise en auant par Monseigneur de la Barde, de l'Ecuyer qui trouua la mulette de son Compaignon & monta dessus, laquelle le mena a l'huis de la Dame de son maître & fit tant l'Ecuyer qu'il coucha leans ou son Compaignon le vint trouver, & pareillement des paroles qui furent entre eux comme plus a plain vous sera déclaré.

186

## *Les Dames Dismées.*

32. Nouvelle racontée par Monseigneur de Villiere, des Cordeliers d'hostellerie en Catalougne, qui prindrent la dixme des femmes de la ville & comment il fut sceu, & quelle punition par le seigneur & ses sujets en fut faite comme vous oyrez cy-après.

194

## *Madame tonduë.*

33. Nouvelle racontée par Monseigneur, d'vng



## T A B L E.

gentil. Seigneur qui fut amoureux d'une Damoiselle dont se donna garde vng autre grand Seigneur qui lui dit & l'autre toujours plus lui celloit & en étoit tout affollé & de l'entretènement depuis d'eux enuers elle comme vous pourrez ouir cy-après. 206

### *Seigneur dessus, Seigneur dessous.*

34. Nouvelle racontée par Monseigneur de la Roche, d'une femme mariée qui assigna journée a deux Compaignons, lesquels vindrent & besognerent, & le mary tantost süruint après, & des paroles qui après en furent & de la maniere qu'ils tindrent comme vous oyrez cy-après. 220

### *L'Echange.*

35. Nouvelle racontée par Monseigneur de Villiers, d'vng Cheualier duquel son amoureuse se maria tandis qu'il fut en voyage & a son retour d'avanture la trouua en menage, laquelle pour coucher avec son amant mit en son lieu coucher avec son mary vne jeune Damoiselle sa chamberiere & des paroles d'entre le mary & le Cheualier voyageur comme plus a plain vous sera recordé cy-après. 225

### *A la Besoigne.*

36. Nouvelle racontée par Monseigneur de la Roche, d'vng Escuyer qui vit sa maitresse dont il étoit moult fers entre deux gentilshommes & ne deuoit de garde qu'elle tenoit chacun deux en ses

# T A B L E.

lacs , & vng autre Cheualier qui ſçauoit ſon cas le lui bailla a entendre comme vous oyrez cy - après.

231

## *Le Benetrier d'ordure.*

37. Nouuelle par Monſeigneur de la Roche , d'vng jaloux qui enregiſtroit toutes les façons qu'il pouuoit ouir , ne ſçauoir dont les femmes ont deceu leurs maris le temps paſſé , mais a la fin il fut trompé par l'orde eaüe que l'amant de ladite femme getta par vne fenestre ſur elle en venant de la Meſſe comme vous oyrez cy-après.

234

## *Une Verge pour l'autre.*

38. Nouuelle racontée par Monſeigneur le Senechal de Guyenne , d'vng Bourgeois de Tours qui achete vne lamproye que a ſa femme enuoya pour apointer afin de feſtoyer ſon Curé & ladite femme l'enuoya a vng Cordelier ſon ami , & comment elle fit coucher ſa voiſine avec ſon mary qui fut battuë Dieu ſçait comment & de ce qu'elle fit accroire a ſon mary comme vous oyrez cy-après.

240

## *L'un & l'autre payé.*

39. Nouuelle racontée par Monſeigneur de ſaint Paul , d'vng Cheualier qui en attendant ſa Dame beſongna trois fois avec ſa chamberiere qu'elle auoit envoyée pour entretenir ledit Cheualier afin que trop ne lui ennuya , & depuis beſongna trois fois

## T A B L E.

avec la Dame, & comment le mary sceut tout par  
ladite chamberiere comme vous oyrez cy-après. 248

### *La Bouchiere, Lutin dans la cheminée.*

40. Nouvelle par Messire Michault de Changy,  
d'vng Jacopin qui abandonna sa Dame par amours,  
vne Bouchiere pour vne autre plus belle & plus jeune,  
& comment la dessus dite Bouchiere cuida entrer  
dedans sa maison par la cheminée. 254

### *L'Amour & l'Aubergon en armes.*

41. Nouvelle par Monseigneur de la Roche,  
d'vng Cheualier qui faisoit vestir a sa femme vng  
Aubergon quand il lui vouloit faire ce que vous  
sçavez, ou conter les dents, & du Clerc qui lui  
aprint autre maniere, dont elle fut a peu près par  
sa bouche même encusée a son mary, ce n'eut été  
la glose qu'elle controuua subtilement. 259

### *Le Mary Curé.*

42. Nouvelle par Meriadech, d'vng Clerc de  
village étant en la Cité de Rome cuidant que sa  
femme fut morte deuint Prêtre, & impetra la Cure  
de son village, & quant il vint a sa Cure la premiere  
personne qu'il rencontra ce fut sa femme. 264

### *Les Cornes Marchandes.*

43. Nouvelle par Monseigneur de Fiennes,  
d'vne Laboureur qui trouua vng homme dessus sa

## T A B L E.

femme & laissa a le tuer pour vne somme de bled  
& fut sa femme cause du traité, & afin que l'autre  
parfit ce qu'il auoit commencé. 270

### *Le Curé Courfier.*

44. Nouvelle racontée par Monseigneur de la  
Roche, d'vng Curé de village qui trouua façon de  
marier vne fille dont il étoit amoureux, laquelle lui  
auoit promis que quant elle seroit mariée de faire  
ce qu'il voudroit, laquelle chose le jour de ses nopces  
il lui ramenteut, ce que le mary d'elle ouit tout a  
plein, a quoi il mit prouision comme vous oyrez cy-  
après. 273

### *L'Ecoffois Lavandiere.*

45. Nouvelle par Monseigneur de la Roche,  
d'vng jeune Ecoffois qui se tint en habillement de  
femme l'espace de quatorze ans & par ce moyen  
couchoit avec filles & femmes mariées, dont il fut  
puny en la fin comme vous oyrez. 283

*Fin de la Table du premier Tome.*













